







দেবদাস ।

শ্রীকৈদারনাথ দত্ত প্রণীত ।

Calcutta :—

PRINTED BY S. N. ROY, VICTORIA PRESS :

2, GOABAGAN STREET,

১০১৬

মূল্য ৫ টাকা ।



**CALCUTTA,**  
**PUBLISHED BY—NARENDRA NATH GHOSE.**  
**110/4 Shambazar Street.**

# উপহার ।

প্রিয় বঙ্গবাসীগণের করকমলে

এই পুস্তক অঙ্কা ও ভক্তি সহকারে

সমর্পিত হইল ।

প্রার্থনা তাঁহার ইহার আদোপান্ত পাঠ করেন ।

১লা ফাল্গুন

১৩১৬ সাল

}

বিনীত

এচ্ছকার



## শুদ্ধি-পত্র

| পৃষ্ঠা | পংক্তি | অশুদ্ধ        | শুদ্ধ        |
|--------|--------|---------------|--------------|
| ৫১     | ২৫     | পুত্রাদির     | পুত্রাদির    |
| ৭৩     | ৫      | কারাগারাস্থিত | কারাগারস্থিত |
| ৭৪     | ১৫     | পুণ্যভূমি     | পুণ্যভূমি    |
| ৮৩     | ১৩     | হইয়াছে       | হইয়াছে      |
| ৮৫     | ৩      | নিকট          | —            |
| „      | ১৩     | সাধুগণও       | সাধুগণও      |
| ৮৬     | ২      | তিনি          | তিনি         |
| „      | ২৫     | আধ্যাত্মিক    | আধ্যাত্মিক   |
| ৯০     | ১৫     | বধুমাতা       | বধুমাতা      |
| ৯১     | ৮      | নিষেধ         | নিষেধ        |
| ৯৩     | ২১     | পরহিতংপরতা    | পরিহিততৎপরতা |
| ৯৬     | ২২     | কৃষ্ণা প্রসার | কৃষ্ণপ্রসার  |
| „      | ২৫     | প্রস্ফুটিত    | প্রস্ফুটিত   |
| ১০৩    | ১৭     | তঁহার         | তঁহার        |
| ১০৪    | ১      | সাস্ত্রনা     | সাস্ত্রনা    |
| ১০৬    | ৬      | কৃতবিদ্যা     | কৃতবিদ্যা    |
| ১০৭    | ৩      | মহকুমার       | মহকুমার      |
| „      | ২২     | নিযুক্ত       | নিযুক্ত      |
| ১০৮    | ৫      | মুখ্য         | মুখ্য        |
| ১১৩    | ৪      | মীমাংসার      | মীমাংসার     |

৭০

|     |    |            |            |
|-----|----|------------|------------|
| ১১২ | ১৩ | নিবারণার্থ | নিবারণার্থ |
| ১২৮ | ৩  | ভাগ্য      | ভাগ্য      |
| ১৩৯ | ৬  | উদ্ধৃত     | উদ্ধৃত     |
| ১৪৩ | ৮  | হৃদয়ে     | হৃদয়ে     |

---

## বিজ্ঞাপন ।

এই পুস্তক, ২৪ পরগণা জয়নগর পোস্টআফিস, মজিলপুর  
দত্তপাড়া নিবাসী উকীল শ্রীযুক্ত বাবু কেশরনাথ দত্তের নিকট,  
ও ১১০৮ শ্যামবাজার ষ্ট্রীট কলিকাতা শ্রীযুক্ত বাবু নরেন্দ্র নাথ  
ঘোষের নিকট ও ৮২১ হারিসন্ রোড্ কলিকাতা, এস্ এন্ বম্  
কোম্পানীর নিকট এবং ২০১ নং কর্ণওয়ালিস্ ষ্ট্রীট শ্রীযুক্ত বাবু  
গুরুদাস চট্টোপাধ্যায়ের নিকট প্রাপ্তব্য ।



## ভূমিকা

স্ব্থের লালসা মানুষের স্বভাবসিদ্ধ ধর্ম। স্ব্থ মানসিক আনন্দের অবস্থা। মনের সংস্কারানুসারে মানুষ ভিন্ন ভিন্ন প্রণালীতে স্ব্থ পাইবার চেষ্টা করিয়া থাকে। স্ব্থের আশায় মানুষ মানুষের হত্যা করিতেছে, আবার স্ব্থের আশায় মানুষ মানুষের উপকার করিতেছে। স্ব্থের আশায় মানব, রাজ্য বা ধনের জ্ঞাত্ব অপরের সহিত ঘোরতর সমরে লিপ্ত হইতেছে। আবার স্ব্থের আশায় রাজ্য ধন সনত্ত বিসর্জন দিয়া অকাতরে সন্ন্যাসাশ্রম আশ্রয় করিতেছে অথবা ভিক্ষালব্ধ অন্ন আপনাকে পরিপুষ্ট রাখিয়া আপন অভীষিত স্ব্থ লাভের চেষ্টা করিতেছে। স্ব্থ ঐহিক ও পারমাত্মিক এই দুই প্রকার। এই মোহ-মায়া-বহুল সংসারে অধিকাংশ নর নারী কেবল মাত্র ঐহিক স্ব্থের জ্ঞাত্ব সতত চেষ্টা করিতেছে। পারমাত্মিক স্ব্থের চেষ্টা অতি সামান্য লোকেই করিয়া থাকে। যাঁহারা পারমাত্মিক স্ব্থ লাভের চেষ্টায় ক্রেশবহুল সাধন কার্যের আশ্রয় লইয়াছেন, তাঁহারা চিরশান্তি পাইবার পথানুসরণ করিতেছেন। শেষোক্ত লোকের মধ্যেও চিরশান্তি লাভ অতি স্বল্প লোকের ভাগ্যেই ঘটয়া থাকে।

সাংসারিক স্ব্থে আসক্ত হওয়াই আমাদের বাবতীয় দুঃখের কারণ। এই আসক্তি যাহাতে না ঘটিতে পারে তাহার চেষ্টা জীবের কর্তব্য। এই চেষ্টায় যিনি স্বল্প বা বিস্তর সফল হইবেন, তিনি ইহ জগতে স্বল্প বা বিস্তররূপে শোক দুঃখের ভোগ হইতে আপনাকে উদ্ধার করিতে পারিবেন। এই সংসারে ভগবানের কার্যকলাপ মানব যতই আপন মন



মধ্যে অনুশীলন করিবেন, সাংসারিক সুখ দুঃখের অনিত্যত্ব ততই বিশদ-  
রূপে বুঝিতে পারিবেন। ভগবৎকার্যের এইরূপ অনুশীলন মনুষ্যহৃদয়ে  
ক্রমশঃ দৃঢ়রূপে এই অনিত্যত্বের উপলব্ধি করাইয়া দেয়, জীবও শোক  
দুঃখ হইতে শান্তিলাভের দিকে অগ্রসর হয়। ইহা ব্যতীত শান্তি লাভের  
দ্বিতীয় উপায় নাই। যাহারা এই তত্ত্ব মনুষ্যজীবনে বিশিষ্টরূপে  
পরিস্ফুট দেখিতে ইচ্ছা করেন, তাঁহারা একবার দেবদাসের জীবনী পাঠ  
করুন।



## দেবদাস ।

### প্রথম পরিচ্ছেদ

জেলা ২৪ পরগণার অন্তঃপাতী রামকৃষ্ণপুর নামে একটি সমৃদ্ধি-সম্পন্ন গ্রাম আছে। বহু পূর্বে এই স্থানে প্রসন্নসলিলা ভাগীরথী প্রবাহিতা ছিল। এক্ষণে সে প্রবাহ একবারে রুদ্ধ। ভাগীরথীখাতাব-চ্ছিন্ন স্থান এক্ষণে একটি বিস্তীর্ণ সমতল ক্ষেত্রে পরিণত। স্থানে স্থানে প্রকাণ্ড প্রকাণ্ড সরোবর বিদ্যমান। কেহ কেহ বলিয়া থাকেন যে এ স্থানে ভাগীরথী লুপ্তপ্রবাহ। হইলেও এই স্থানের নিম্ন স্তর দিয়া ইহার স্রোত অত্যাধি প্রবাহিত। এই স্থানের পুষ্করিণী সমুদয়ের জল ‘গঙ্গাজল’ বলিয়া সর্বত্র সমাদৃত এবং দেবকার্যাদিতে ব্যবহৃত হইয়া থাকে। গ্রামটীতে সম্পত্তিশালী বিস্তর কায়স্থ, ব্রাহ্মণ ও অত্যাশ্র জাতির বাস। বিবিধ ফল পুষ্প শোভিত উদ্যান সকল ইহার স্থানে স্থানে বিরাজিত। সুগঠিত সুদৃশ্য হর্ম্য সকল আপনাদের উন্নত দেহ প্রসারিত করিয়া গ্রামের শোভা সম্পাদন করিতেছে। বিস্তীর্ণ পথ সকল ইষ্টকচূর্ণে পরিবাপ্ত হইয়া রক্তাকার ধারণ করিয়াছে। গ্রামের মধ্যস্থলে একটি

বাজার ; উহারে প্রত্যহ নানাবিধ ফল, মূল ও অশ্রুত ভক্ষ্য দ্রব্য আনীত ও বিক্রয়ার্থ প্রস্তুত থাকে । একটা দাতব্য চিকিৎসালয়, একটা উচ্চ শ্রেণীর ইংরাজী বিদ্যালয়, একটা বঙ্গবিদ্যালয় ও একটা বালিকা-বিদ্যালয় এই পল্লীগ্রামে বিদ্যমান থাকায় গ্রামমবাসীদিগের বিস্তর সুবিধা ও স্বচ্ছন্দ । এই গ্রামে শ্রীকৃষ্ণ ও শিবকৃষ্ণ নামক দুই সহোদর বাস করিতেন । ইঁহারা কায়স্থ, উপাধি দত্ত । শিবকৃষ্ণ কলিকাতায় একটা ধনাঢ্য ব্যক্তির কন্যার পাণিগ্রহণ করেন । সেই কন্যা ব্যতীত তাঁহার খণ্ডরের আর কোন উত্তরাধিকারী ছিল না । তিনি মৃত্যুর পূর্বে জামাতা শিবকৃষ্ণকে আপন ভদ্রাসন ও অট্টালিকা এবং কন্যাকে তাঁহার সঞ্চিত অর্থ ও অশ্রুত অস্থাবর সম্পত্তি দান করিয়া যান । শিবকৃষ্ণ বাবু রামকৃষ্ণপুর-গ্রামস্থিত আপন পৈতৃক সম্পত্তি জ্যেষ্ঠ সহোদর শ্রীকৃষ্ণ বাবুকে দান করিয়া কলিকাতায় আপন খণ্ডরালয়ে আসিয়া বাস করিতে লাগিলেন । শ্রীকৃষ্ণ বাবু ধার্মিক বলিয়া গ্রামে প্রতিপন্ন ছিলেন । বিদ্যাশিক্ষায় তিনি বিশেষ উন্নতি সাধন করিতে পারেন নাই । সামান্য অপেক্ষা কিছু অধিক পরিমাণে তিনি ইংরাজী ও সংস্কৃত ভাষায় শিক্ষিত ছিলেন । বাঙ্গালা ভাষা-জ্ঞান তাঁহার অতি সুন্দর ছিল । রামকৃষ্ণপুর গ্রামে যে একটা উচ্চ শ্রেণীর ইংরাজী বিদ্যালয় ছিল, শ্রীকৃষ্ণ বাবু সেই বিদ্যালয়ে একজন শিক্ষক ছিলেন । তাঁহার বেতন সামান্য ছিল ।


দেবদাস এই শ্রীকৃষ্ণ বাবুর পুত্র । দেবদাসের অগ্র ভ্রাতা বা ভগিনী ছিল না । সংসারে শ্রীকৃষ্ণ বাবু, তাঁহার বনিতা এবং পুত্র দেবদাস এই তিন ব্যক্তি ছিলেন ; সুতরাং দেবদাসের পিতার সামান্য আয় হইলেও তদ্বারা সংসারের প্রয়োজনীয় অভাব সকল নিরাকৃত হইত । দেবদাসের পিতার ন্যায় দেবদাসের মাতারও ধর্ম্মে বিলক্ষণ আস্থা ও ভক্তি ছিল । সেই হেতু বর্তমান সময়ের গৃহীদিগের ন্যায় শ্রীকৃষ্ণ বাবুকে বনিতার অলঙ্কারাদির অভাব দূরীকরণ-চেষ্টায় বিভ্রত হইতে হয় নাই ।

বাল্যকালে দেবদাস পিতা মাতার অহরন্তর ছিলেন । তাঁহাদের অল্প সম্ভান সম্ভতি ছিল না, সুতরাং তিনি উভয়ের বড় আদরের বস্তু ছিলেন । শৈশবে তিনি অতিশয় ছরস্তু ছিলেন । প্রতিবেশী বালক বালিকাগণের সহিত সদ্ভাব করিতে তিনি যেমন তৎপর, তাহাদিগকে উত্ত্যক্ত করিতেও তেমনি পটু ছিলেন । পিতা মাতা শাসন করিলে তিনি ধীর ভাবে তাহা সহ্য করিতেন । ক্রমে ক্রমে দেবদাস পঞ্চম বর্ষে পদার্পণ করিলেন । শ্রীকৃষ্ণ বাবু দেবদাসকে প্রায় আপন সঙ্গে রাখিতেন । চুরি করিলে কি হস্ত, মিথ্যা কথা কহিলে কি দোষ, সকলের প্রতি দয়া করা উচিত ইত্যাদি বিষয় লইয়া পুত্রের বোধোপযোগী সহজ সহজ গল্প করিতেন । পুত্রও গল্প শুনিয়া যেরূপ যেরূপ প্রশ্ন করিতেন, তিনিও তদনুরূপ উত্তর দিয়া বুঝাইয়া দিতেন । ফলতঃ ঐরূপ গল্পে দেবদাস পিতার সঙ্গে থাকিতে আকৃষ্ট হইতে লাগিলেন এবং সময় সময় সেই সকল গল্পের কথা ভাবিতে লাগিলেন । পিতার ঐরূপ চেষ্টায় শিশু দেবদাসের মনে এক অপূর্ণ ভাবের সমাবেশ হইতে লাগিল । যখন পিতা বুঝিতে পারিলেন দেবদাস ঐ সকল ভাব হৃদয়ে আয়ত্ত করিয়াছেন এবং মধ্যে মধ্যে তদনুযায়ী তাঁহার কার্য্যও দেখিতে পাইলেন, তখন লেখা পড়া শিক্ষা করিয়া এই সংসারে যাহারা অতিপতিশালী হইয়াছিলেন, তাঁহাদের জীবনী অতি সহজ কথায় পুত্রের নিকট গল্প করিতেন । পুস্তকে এই সকল বিষয় লিখিত আছে, পুস্তক পড়িতে পারিলে এই সকল বিষয় অনায়াসে জানিতে পারা যায়, দেবদাস ক্রমে ক্রমে ইহা বুঝিতে পারিলেন ; সুতরাং পিতার নিকট পুস্তক পড়িবার আগ্রহ প্রকাশ করিলেন । পিতাও পুত্রের পঠনোপযোগী পুস্তকাদি ক্রমে পড়াইতে লাগিলেন ।

দেবদাসের পিতা, পুত্রের মনে যাহাতে লেখা পড়ার আগ্রহ জন্মে, তাহারই চেষ্টা করিতেন এবং সেই প্রকৃষ্ণ অস্তঃকরণে আগ্রহের উৎপাদন করাই তাঁহার বিশেষ লক্ষ্য ছিল । কোমলহৃদয় দেবদাসের মনে

লেখা পড়া শিক্ষার আগ্রহ যতই বন্ধমূল হইতে লাগিল, তাঁহার লেখা পড়া শিক্ষার চেষ্টা ততই বৃদ্ধি পাইতে লাগিল। শৈশব কালে পিতা মাতারও শিক্ষকের, কর্ণধার স্বরূপে বালকহৃদয় সুশিক্ষার পথে পরিচালন করা কর্তব্য।

বিদ্যালয়ে শ্রু ও কু উভয়বিধ স্বভাবসম্পন্ন ছাত্র থাকে। সুস্বভাব-সম্পন্ন বালকগণের অপেক্ষা কুস্বভাবসম্পন্ন বালকের প্রতি শিক্ষক মহাশয়ের অধিকতর যত্ন ও চেষ্টা করা উচিত। উপযুক্ত তত্ত্বাবধানে হুঃশীল বালক পরিণামে সুশীল হইয়া উঠিতে দেখা যায়। যে সকল ছাত্রের হৃদয়ে সুশিক্ষা ও লেখা পড়ার আগ্রহ বন্ধমূল হইয়াছে, তাহারা কুচরিত্র সম্পন্ন ছাত্রের সঙ্গ যত্ন পূর্বক পরিত্যাগ করে; কারণ, তাহাদের সঙ্গে তাহাদের অণুমাত্র আনন্দ হয় না। তথাপি পিতা মাতা ও শিক্ষক উহা-দিগকে কুসংসর্গ হইতে সর্বদা রক্ষা করিবেন। সুচরিত্র ও প্রতিভাশালী ছাত্রগণ একত্র অধ্যয়ন করিলে উহাদের মধ্যে জিগীষা ভাবের উদয় দেখা যায় এবং শিক্ষা সম্বন্ধে পরস্পর পরস্পরকে যথেষ্ট আনুকূল্য করিয়া থাকে। বিশেষরূপ বিবেচনা করিয়া দেখিলে বিদ্যালয়ে বালকগণকে অধ্যয়ন করান সর্বথা মঙ্গলপ্রদ। যাহা হউক, দেবদাসের পিতা কিছুকাল আপন গৃহে পুত্রকে লেখা পড়া শিক্ষা দিয়াছিলেন, পরে নিজের ও পুত্রের সুবিধার বিষয় বিবেচনা করিয়া স্বগ্রামস্থিত উচ্চশ্রেণীর ইংরাজী বিদ্যালয়ে তাহাকে ভর্তি করিয়া দিলেন। বলা বাহুল্য, শ্রীকৃষ্ণ বাবু এই বিদ্যালয়েই শিক্ষকতা করিতেন।



## দ্বিতীয় পরিচ্ছেদ ।

প্রথম দিবস দেবদাস বিতালয়ে গিয়া দেখিলেন যে, শিক্ষক মহাশয় কতিপয় ছাত্রকে, নিরূপিত পাঠ অভ্যস্ত করিতে না পারায়, গুরুতর-রূপে প্রহার করিলেন । প্রহারকালে ঐ সকল বালকের ক্রন্দন দেখিয়া শিশু দেবদাস স্থির থাকিতে পারিলেন না । তিনিও কাঁদিয়া উঠিলেন । ঐ সকল ছাত্রের কষ্ট তাঁহার মর্ম্মস্থান বিদ্ধ করিয়াছিল । দেবদাসকে কাঁদিতে দেখিয়া তাঁহার পিতা সত্বর তাঁহার নিকট আসিয়া তাঁহাকে সাহসনা করিতে লাগিলেন । দেবদাস পিতার সাহসনা পাইয়াও কিছুক্ষণ ক্রন্দনের বেগ সম্বরণ করিতে পারিলেন না । এইরূপ মিশ্রিত ক্রন্দনে একটা গোলমাল উপস্থিত হইলে প্রধান শিক্ষক মহাশয় ও অগ্রাগ্রহ হই একটা শিক্ষক এই গোলমালের তথ্য নিরূপণ করিতে তথ্য আসিয়া উপস্থিত হইলেন । প্রহারকারী শিক্ষক অপ্রস্তুত । প্রধান শিক্ষক মহাশয় একজন বহুদর্শী, বিজ্ঞ ও সহৃদয় শিক্ষক । তিনি ছাত্রগণকে গুরুতর প্রহার করা অগ্রাগ্রহ এবং ঐরূপ প্রহারে যে কোন উপকার নাই, বিশেষতঃ কোমলমতি বালকগণের শিক্ষা সম্বন্ধে উহা যে ঘোরতর অন্তরায়, ইহা বিলক্ষণ উপলব্ধি করিতেন । প্রধান শিক্ষক মহাশয় সক-

লের সম্মুখে প্রহারকারী শিক্ষককে প্রহার করিতে নিষেধ করিয়া এবং আর কিছু না বলিয়া আপন স্থানে চলিয়া গেলেন। অত্যাচারী শিক্ষকগণ স্ব স্ব স্থানে প্রত্যাগমন করিলেন।

বিদ্যালয়ের ছুটি হইলে শ্রীকৃষ্ণ বাবু দেবদাসকে সঙ্গে লইয়া বাটীতে আসিলেন। কিঞ্চিৎ বিশ্রাম ও জলযোগের পর তিনি দেবদাসকে লইয়া অত্যাচার দ্বিতীয় দিনের ত্রায় শিক্ষাপ্রদ গল্প বলিবার সূচনা করিলে দেবদাস পিতাকে জিজ্ঞাসা করিলেন।

দেবদাস। বাবা! ছেলেদের মারিলে কি খুব লেখা পড়া হয়?

পিতা। না বাবা, বরং লেখা পড়া হয় না।

দেব। তবে শিক্ষক মহাশয় ছেলেদের মারিয়াছিলেন কেন?

পিতা। ঐ শিক্ষক ছেলেদের দুই একবার পড়া বলিয়া দেন, তাহাতে ছেলেরা বলিতে না পারিলে তিনি রাগ সামলাইতে না পারিয়া ঐরূপে ছেলেদের মারেন।

দেব। উহারা কেন বাবা, পড়া বলিতে পারে না?

পিতা। উহারা যে শ্রেণীর ছাত্র, সেই শ্রেণীতে উহারা পড়িবার অযোগ্য। তোমাকে যেরূপ রুচিয়া আমি শিখাই, উহাদিগকে ঐরূপ করিয়া কেহ শিখায় না। লেখা পড়া শিখিতে উহাদের আগ্রহ নাই। বাৎসরিক পরীক্ষায় উহারা ভালরূপে উত্তীর্ণ হইতে পারে নাই। তথাপি উহাদিগকে উপরের শ্রেণীতে তুলিয়া দেওয়া হইয়াছে। উপর শ্রেণীর পাঠ্য উহাদের পক্ষে গুরুতর, স্মরণীয় উহাদের পক্ষে তাহা অসম্ভব করা কঠিন। এই সমস্ত কারণে উহারা পড়া বলিতে পারে না।

দেব। বাবা! উহাদের বাপ ও শিক্ষক মহাশয় ত উহাদিগকে উপরের শ্রেণীতে তুলিয়া না দিয়া নিম্নশ্রেণীতে রাখিতে পারিতেন।

পিতা। আমাদের গ্রামের যে দশা, তাহা আর কি বলিব? অধিকাংশ

ছেলেদের বাপ তাহাদের লেখা পড়ার কোন খবর লয়েন না। ছেলেকে স্কুলে দিতে হয় ত দেওয়া হইয়াছে। ছেলের মুখে বাহা শুনে, তাহাতেই বিশ্বাস। বৎসরের পরীক্ষায় ছেলে উপরের শ্রেণীতে উঠিয়াছে শুনিয়া সন্তুষ্ট, না উঠিতে পারিলে বাপ আসিয়া শিক্ষক মহাশয়কে বলেন—এবারে ভাল করিয়া পড়িবে, উহাকে উপরের শ্রেণীতে তুলিয়া দিন। এইরূপ নানা অহুন্নয় বিনয়ে শিক্ষক মহাশয়কে উত্তাক্ত করিয়া তুলেন। শিক্ষক মহাশয় অনিচ্ছা সত্ত্বেও উহাদিগকে উপরের শ্রেণীতে তুলিয়া দিয়া অব্যাহতি পাইয়াছেন।

দেব। বাবা! উহাদের উপায় কি?

পিতা। এক্ষণে নিম্নশ্রেণীতে আসিয়া পড়ুক, লেখা পড়ার জন্ত যত্ন করুক, তবে যদি উহাদের লেখা পড়া হয়।

দেবদাস পিতার এই সকল কথা শুনিয়া মন মধ্যে কিয়ৎক্ষণ চিন্তা করিতে লাগিলেন। তৎপর জিজ্ঞাসা করিলেন—

বাবা! উহাদিগকে নিম্নশ্রেণীতে কেন নামাইয়া দেওয়া হয় না?

পিতা। নামাইবার কথা প্রধান শিক্ষক মহাশয় উহাদের বাপকে লিখিয়াছেন। বাপের নিকট হইতে কোন উত্তর আসে নাই। ঐ সকল ছেলের লেখা পড়ায় কোন যত্ন নাই। শিক্ষকের দারুণ প্রহারেও উহাদের মনে লজ্জা হয় না।

দেব। তবে উহাদিগকে মারিয়া আর কি হইবে?

পিতা। তাই প্রধান শিক্ষক মহাশয় আজ ছুটির আগে ঐ শিক্ষককে ছেলেদের গায় হাত তুলিতে নিষেধ করিয়াছেন।

বাগল দেবদাস যতই ঐ সকল ছাত্রের কথা ভাবিতে লাগিল, ততই তাহারা যে লেখা পড়া শিখিতে পারিবে না এই চিন্তাই তাহাকে যার পর নাই ক্লেশ দিয়াছিল। ছেলের লেখা পড়া শিক্ষায় প্রথম হইতে পিতা বা অন্ত কৰ্ত্তৃপক্ষের বিশেষ যত্নের আবশ্যক। ছাত্র যখন বাটীতে



থাকিবে, পিতা তাহার লেখা পড়া শিক্ষার সঙ্গপায় ও যত্ন করিবেন । বিদ্যালয়ে শিক্ষক মহাশয় ছাত্রের শিক্ষা সম্বন্ধে অনুরূপ উপায় ও যত্ন করিবেন । শিক্ষক, পিতা বা কর্তৃপক্ষ, বাহাতে লেখা পড়া শিখিতে ছাত্রের মনে কোন আতঙ্কের উদয় না হয় এবং সহপদেশাদি দ্বারা বাহাতে ছাত্রের মনে শিক্ষার প্রতি আগ্রহ জন্মে, ইহাই সর্বদা লক্ষ্য রাখিবেন ; অত্যাধিক ছাত্রের সুশিক্ষা অসম্ভব । লেখা পড়া শিক্ষা যেমন আবশ্যিক, ছাত্রের সংস্কারবাসম্পন্ন হওয়া তেমনই প্রয়োজনীয় । বালক পিতা মাতার ও শিক্ষকের চরিত্র আদর্শ করিয়া থাকে । উহাদের সহপদেশ যেমন উপকারী, উহাদের সুগঠিত চরিত্র তেমনই মহোপকারক ।

প্রতিদিন দেবদাস পিতার সঙ্গে বিদ্যালয়ে যাইতেন তিনি পিতার একান্ত অনুরক্ত ছিলেন । পিতার সাধু চরিত্র তাঁহার হৃদয়ে প্রতিফলিত হইয়া উঠিল । তাঁহার বিনয়, সচ্চরিত্রতা ও প্রতিভার গুণে শিক্ষক মহাশয়-গণ ক্রমশঃ আকৃষ্ট হইয়া পড়িলেন । স্বশ্রেণীর ছাত্রবর্গের সহিত ক্রমশঃ তাঁহার সখ্যভাব জন্মিতে লাগিল । কালক্রমে তাঁহার সদগুণরাশি ও অসামান্য প্রতিভা সকলের নিকট প্রকাশিত হইতে লাগিল । সকলের মুখে তাঁহার প্রশংসা এবং প্রতিদিন সকলেরই প্রিয় হইয়া উঠিলেন ।





## তৃতীয় পরিচ্ছেদ ।

নিদ্রা কাল । সান্ধ্য সন্ধ্যার ধীরে ধীরে প্রবাহিত । শুভ্র জ্যোৎস্না দিগ্ভাঙ্গল উদ্ভাসিত করিয়া উত্তরোত্তর বিকাশ পাইতেছে । প্রস্ফুটিত বকুল গন্ধরাজ মল্লিকাদি পুষ্পের সমবেত সৌগন্ধে চতুর্দিক্ পুলকিত । বিহঙ্গম-কলরব নিস্তব্ধ । মেদিনী প্রচণ্ড মার্ভগুতাপে তাপিত ছিল, এক্ষণে প্রশান্ত ভাব ধারণ করিল । এমন সময়ে দেবদাসের বাটার সম্মুখস্থ বকুল তলার ধীরে ধীরে একটা পথিক আসিয়া উপবেশন করিল । পথিকের দেহ অতি শীর্ণ, দেখিলে বোধ হয় যেন ঐ ব্যক্তির কয়েক দিন আহার হয় নাই । উহার শরীর দীর্ঘ, মস্তক মুণ্ডিত, মলিন বস্ত্র পরিহিত । দেবদাসের পিতা তৎকালে বাটাতে ছিলেন না । দেবদাস উহাকে দেখিয়া উহার নিকট গমন করিলেন এবং কথায় কথায় জানিতে পারিলেন যে, ঐ ব্যক্তি কারাগারে ছিল । কারামুক্ত হইয়া বাটাতে যাইতেছে । কোন সম্বল নাই, সেই কারণে কয়েক দিন আহার করিতে না পাইয়া উহার শরীর শীর্ণ হইয়া গিয়াছে । কি দোষে কারাবাস ঘটিয়াছিল, তাহাকে জিজ্ঞাসা করিলে সে বড়ই ক্লান্ত হয় ; কোন কথা বলিতে চাহে না ; মস্তকে করাঘাত করে । অধিক জিজ্ঞাসায় পাছে পথিকের ক্রোধ হয়,

সেই আশঙ্কায় দেবদাস উহাকে আর অধিক কথা জিজ্ঞাসা করিলেন না। পথিক পশ্চাৎ আপনা হইতে কহিল—আমি বড় ক্ষুধার্ত। স্নাতরাং তাহার সহিত আর কোন কথা না কহিয়া তিনি আপন বাটী মধ্যে গমন করিলেন এবং মাতাকে উহার অনাহারের কথা জ্ঞাপন করিয়া উহার আহারের জন্ত অগ্নের প্রার্থনা করিলেন। মাতাও পুত্রের কথায়, কয়েক দিন এক-জনের আহার হয় নাই জানিতে পারিয়া, বিশেষরূপ ক্রেশ বোধ করিলেন। পুত্রকে কহিলেন—বাছা যাও, এই পাত ও জল লইয়া যাও, অন্ন ব্যঞ্জন প্রস্তুত হইয়াছে, অগ্রে গিয়া পথিককে স্নস্থ কর। এই বলিয়া পুত্রের হস্তে একখানি কলাপাত ও এক লোটা জল দিলেন। পুত্র উহা লইয়া বাটীর বহির্ভাগে একটা স্থান পরিষ্কার করিয়া পাতাটী পাতিয়া দিলেন ও লোটা পার্শ্বে রাখিলেন। দেবদাসের মাতা আসিয়া পাতের উপর উহার আহারোপযোগী প্রচুর অন্ন ব্যঞ্জন রাখিয়া গেলেন। পথিক আহারার্থ পাতার নিকট উপবেশন করিল। দেবদাস নিকটে উপস্থিত। মাতার আদেশ—পক্ষিকের অন্নাদির আবশ্যক হইলে তাঁহাকে বলিবে। যাহা হউক, পথিক আহার করিয়া স্নস্থ হইল এবং পরম পরিতোষ প্রাপ্ত হইয়া দেবদাসের সৌভাগ্য বারম্বার কামনা করিতে লাগিল। উচ্ছিষ্টাদি পরিষ্কার করিয়া পথিক হস্ত মুখাদি ধোত করণার্থ পুষ্কারীণী কোথায় জিজ্ঞাসা করায় তিনি উহাকে একটা বড় সরোবর দেখাইয়া দিলেন। ঐ সরোবর দেবদাসের বাটী হইতে কিছু দূরে অবস্থিত। সরোবরটী দেখাইয়া তিনি বাটীতে প্রত্যাবৃত্ত হইলেন। পথিক একদৃষ্টে অনেক ক্ষণ এই বালকের দিকে চাহিয়া রহিল। বালকের দম্ময় যৎপরোনাস্তি প্রীতি প্রাপ্ত হইল।

পথিক একজন চোর। সে কোন স্থানে আহার পায় নাই। চোর বলিয়া সে সকল স্থানে প্রত্যাখ্যাত হইয়াছিল। বালক দেবদাস অন্নাদি দানে তাহার পরিতোষ করিলেন। তিনি দয়া না করিলে তাহার আহা-

যের কোন সুবিধা ছিল না । অগ্নাভাবে তাহার প্রাণবায়ু বাহির হইবার সম্ভাবনা ছিল । কিন্তু দেবদাসের সেই উপকার পথিকের চৌক্যাসক্তি বিদূরিত করিতে পারিল না ; সে লোটাটি লইয়া একবারে প্রস্থান করিল ।

দেবদাসের মাতা অন্তঃপুরে দেবদাস, স্বামী ও আপনার জন্ত পুনরায় প্রয়োজনমত রন্ধনের আয়োজন করিলেন । দেবদাস মাতার কাছে বসিয়া পথিকের অতিশয় ক্ষুধা হইয়াছিল, কোন স্থানে সে কিছুমাত্র আহার পায় নাই, আহার পাইয়া সে বড় খুসী হইয়াছে ইত্যাদি নানা কথার জল্পনা করিতেছেন পথিক লোটা লইয়া প্রত্যাবর্তন করিল কি না, তাহার কোন অনুসন্ধান লন নাই । এইরূপে তিনি মাতার নিকট অনেকক্ষণ বসিয়া আছেন, এমন সময়ে একজন লোক আসিয়া তাঁহাকে বাহিরে ডাকিয়া আনিল । দেবদাস বহির্দেশে আসিয়া যাহা দেখিলেন, তাহাতেই তাহার বাঙনিষ্পত্তি রহিত হইল । দেবদাস দেখিলেন, গ্রামা চৌকীদার লোটা হস্ত পথিককে ধরিয়া বহির্দেশে উপস্থিত । চৌকীদার কহিল, 'এই ব্যক্তি লোটাটি লইয়া মাঠ দিয়া পলাইতেছে, দূর হইতে আমি দেখিতে পাইয়া ইহার অনুসরণ করি । অনেক চেষ্টায় আমি ইহাকে ধরিতে পারিয়াছি । ইহাকে লোটার কথা জিজ্ঞাসা করায় কহিল—লোটা আমার । প্রকৃত কথা জানিবার জন্ত আমি ইহাকে প্রহার করিতে থাকি । পুনঃ পুনঃ প্রহারে থিথমান হইয়া এ ব্যক্তি আত্মপূর্বিক সমস্ত ঘটনা প্রকাশ করিল । এক্ষণে এই অপহৃত লোটাটি তোমাদের কি না ? দেবদাস দেখিলেন, লোটাটি তাঁহাদের । জল খাইবার জন্ত এই লোটাটি পথিককে দেওয়া হইয়াছিল । সে পুষ্করিণী হইতে হস্তমুখাদি প্রক্ষালন করিয়া লোটাটি মাজিয়া তাঁহাদের বাটীতে প্রত্যর্পণ করিয়া যাইবে, ইহাই তাঁহার বিশ্বাস ছিল । এখন ভাবিলেন, এ ব্যক্তি নিঃসম্বল । লোটাটি বিক্রয় করিলে বিক্রয়লব্ধ অর্থ দ্বারা ইহার কয়েক দিনের আহার চলিতে পারে । ইহাকে ধাওয়াইয়া পরে ইহাকে

বিপদে ফেলা উচিত নহে। আবার ভাবিলেন, চোর ছাড়িয়া দেওয়া সমাজের অনিষ্ট করা। কি করিবেন, বালকবুদ্ধিতে তাহার কিছুই স্থির করিতে পারিলেন না। তখনও তাঁহার পিতা অনুপস্থিত। চৌকীদার পুনঃ পুনঃ জিজ্ঞাসা করিতে লাগিল, এই লোটাটী তোমাদের কি না? চোরের অবস্থা দেখিয়া বালকের কোমলহৃদয় গলিয়া গেল। তিনি চৌকীদারকে কহিলেন, এই লোটাটী আমাদের ছিল, এক্ষণে ইহা এই ব্যক্তির। এই লোটাটীতে আমাদের কোন দাবী নাই। চৌকীদার! এই ব্যক্তিকে ছাড়িয়া দেও। বালকের এই কথা শুনিয়া চোর ও চৌকীদার উভয়ে অবাক। পুনরায় চৌকীদার কহিল, তোমার বাপ কোথায়? তাঁহার কথা না শুনিয়া আমি তোমার কথার ইহাকে ছাড়িতে পারি না।

এইরূপ গোলমাল চলিতেছে, এমন সময় দেবদাসের পিতা আসিয়া বাটীতে উপস্থিত হইলেন। পুত্রের মুখে আনুপূর্ব্বিক সমস্ত ঘটনা শুনিয়া ও পুত্রের অভিপ্রায় অবগত হইয়া তিনিও পুত্রের কথা সমর্থন পূর্ব্বক কহিলেন, চৌকীদার! ইহাকে ছাড়িয়া দেও। লোটাটীতে আমরা কোন দাবী দাওয়া রাখি না। লোটাটী আমার পুত্র ইহাকে দিয়াছিল, আমার পুত্রও ইহার জন্ত কোন দাবী করে না। চৌকীদার দেখিল, ইহাকে চালান দেওয়া নিষ্ফল; অগত্যা ছাড়িয়া দিয়া চলিয়া গেল।

অতঃপর চোর বালককে সন্ধান করিয়া কহিতে লাগিল—বাবা! তুমি বালক হইলেও আজ আমি তোমার নিকট যে শিক্ষা করিলাম, তাহাতে আজ হইতে তুমি আমার গুরু। আমি চিরকাল চৌর্য্যবৃত্তি অবলম্বন করিয়াছি। চৌর্য্যাপরাধে আমার দুইবার কারাবাস হইয়াছে, এবার এই অপরাধ অনায়াসে প্রমাণিত হইত। আমার উপর নিশ্চয় গুরুতর দণ্ডের আদেশ হইত। বালক! আজ তোমার অমানুষিক দয়া আমার চৌর্য্যভাবকে পথ্যদন্ত করিয়াছে। ভগবন্! তোমার এই বিশ্ব-রাজ্যে আমি কত লোকের সহিত মিশিয়াছি; আজ যেক্রপ দয়ার সাগরে

আমি আশ্রুত হইয়া পড়িয়াছি, একরূপ দয়া আমার কখনও জ্ঞানগোচর হয় নাই। ষিৎ আমার স্বভাব! কাহার জন্তই বা আর চৌর্য্যবৃত্তি অবলম্বন করিব? এই ত এতদিন কারাগারে বাস করিলাম। কত ক্লেশ সহ করিলাম। এ ক্লেশের ভাগ ত আমার পোষাগণ লইল না। আমার বিনা সাহায্যে যখন এতদিন তাহাদের চলিয়াছে, তখন আর আমার সাহায্য না পাইলেও তাহাদের চলিবে। নিজের আহারের জন্ত মনুষ্যের ভাবনা নাই। শারীরিক কোনরূপ পরিশ্রমে নিজের উদরার্নের সঙ্কলন হইতে পারিবে। বাবা! তুমি আমার কোলে আইস। আজ তোমার পবিত্র অঙ্গস্পর্শে আমার এই মলিন দেহ পূত হউক। এই এই বলিয়া সে দেবদাসকে ক্রোড়ে লইল। তাহার দুই চক্ষু দিয়া অবি-  
রল আনন্দাশ্রু পড়িতে লাগিল। মধ্যে মধ্যে পবিত্র উচ্ছ্বাস তাহার হৃদয় হইতে প্রকাশিত হইতে লাগিল। সে উচ্ছ্বাস যিনি দেখিলেন, তাহারই হৃদয় গলিয়া গেল। পথিক দেবদাসকে ক্রোড় হইতে নামাইয়া দিয়া চক্ষু মুদ্রিত করিয়া করযোড়ে আর একবার ভগবানকে ডাকিল :—  
—দেব! আমি বয়োবৃদ্ধ, কখনই তোমার নাম মুখে আনি নাই। আজি এই সাধু বাগকের সংসর্গে আমার হৃদয় মন নিখল হইল। সাধু যে কি বস্তু, তাহা তুমি কৃপা করিয়া বুঝাইয়া দিলে। আমি আর গৃহে ফিরিব না। সংসার ছাড়িয়া কোন নির্জ্ঞান স্থানে গিয়া রাত্রি দিন তোমারই নামগানে অতিবাহিত করিব। দয়াময়! তুমি কখন কিরূপে জীবের প্রতি কৃপা কর, জীব তাহার কিছুই জানে না। পথিক আপন দুর্গতি পুনঃ পুনঃ শ্রবণ করিয়া হৃদয়ের আবেগে রোদন করিতে লাগিল। দেবদাসকে অপহৃত লোটাটী প্রত্যর্পণ করিল; কিন্তু দেবদাস তাহা গ্রহণ করিলেন না। দেবদাসের পিতা শ্রিয়পুত্রের এবং বিধ সংকার্য্য দর্শনে ব্যর্থপরনাই আনন্দিত হইলেন এবং বারাণসী ধ্রামে গমনপূর্ব্বক ভগবদারাধনায় অবশিষ্ট জীবন অতিবাহিত করিবার জন্ত পথিককে

পরামর্শ দিয়া পাথের স্বরূপ কয়েকটা মুদ্রা তাহার হাতে দিলেন । পথিক দেবদাসের প্রতি অনিমিষ লোচনে কতকক্ষণ চাহিয়া থাকিয়া সেই রাত্রে তথা হইতে নিষ্কান্ত হইল । পর দিন এই ঘটনা গ্রাম মধ্যে রাষ্ট্র হইয়া পড়িল । গ্রামের আবাল বৃদ্ধ বনিতা সকলেই একবাক্যে দেবদাসের ভূয়সী প্রশংসা করিতে লাগিলেন ।



## চতুর্থ পরিচ্ছেদ ।

গ্রামবাসী সকলে দেবদাসের সদৃশ্যে এরূপ আকৃষ্ট হইয়াছিল যে, সকলেই তাঁহাকে ‘আমাদের দেবদাস’ কহিত । দেবদাস সকলের প্রিয় বস্তু ; কেহই তাঁহার পর ছিল না । সকলেই একবাক্যে ভগবানের নিকট তাঁহার মঙ্গল কামনা করিতে লাগিল । গ্রামের বালকগণ ক্রমে ক্রমে তাঁহার প্রতি এরূপ অমুরক্ত হইয়া উঠিল যে, তিনি তাহাদিগকে যাহা করিতে বলিতেন বিনা বাক্যব্যয়ে তাহারা সেই কার্য্য করিতে প্রস্তুত হইত । গ্রামে অনেকগুলি দরিদ্র গৃহস্থ বাস করিত । তাহাদের কাহারও বা পতি পুত্র নাই, কাহারও বা ছই একটা শিশুসন্তান আছে । কেহ বা অন্ধ, কেহ বা বিকলাঙ্গ । এই সকল ব্যক্তির জীবিকা নির্বাহের কোন উপায় ছিল না । দেবদাস ও তাহার বয়স্কগণ প্রতিজ্ঞা করিলেন যে, তাঁহারা সপ্তাহে একদিন ভিন্ন ভিন্ন দল বাঁধিয়া এক ঘণ্টাকাল গ্রামবাসীদের দ্বারে দ্বারে ভিক্ষা করিবেন এবং ভিক্ষালব্ধ সামগ্রী বা অর্থ ঐ সকল দরিদ্রের মধ্যে বণ্টন করিয়া দিবেন । বালকগণের এই প্রতিজ্ঞা গ্রামবাসীগণ জানিতে পারিয়া অতিশয় আনন্দিত হইলেন এবং বালকগণের হস্তে যথাসাধ্য সাহায্য দান করিতে লাগিলেন । বালকগণও তাহাদের সেই ভিক্ষালব্ধ দ্রব্য ও অর্থ ঐ সমস্ত দরিদ্র গৃহস্থের মধ্যে যথাযোগ্য-



বিভাগ করিয়া দিত। এই সকল দরিদ্র গৃহস্থ বালকগণকে আশীর্বাদ করিত এবং যাহাতে তাহারা সুখ স্বচ্ছন্দে থাকে, তজ্জন্ত ভগবানের নিকট অর্হুক্ষণ প্রার্থনা করিতে লাগিল। যেমন দীপের আলোকে ইতস্ততঃ বিক্ষিপ্ত স্বপ্ন কাচখণ্ড সকল উজ্জ্বলাকার ধারণ করে, সুশীল সাধু দেবদাসের সঙ্গগুণে বালকগণের হৃদয় ও মন সেইরূপ অতি নিশ্চল হইয়া উঠিল। এই সকল বালক যেরূপ পরহিতব্রত ও কার্যাক্ষম ছিল তৎকালে অল্প কোন বালক এইরূপ কার্যে তাহাদের সমকক্ষ ছিল না। দেবদাসের যাবতীয় সদগুণ এই সমস্ত বালকহৃদয়ে প্রতিফলিত হইয়া উঠিল। রামকৃষ্ণপুর গ্রামের বালকগণের সুখ্যাতি ক্রমশঃ চতুর্দিকে ব্যাপ্ত হইয়া উঠিল।

দেবদাস যখন যে কার্য করিতেন, তখন তাহাতে পূর্ণ মনোভিনিবেশ করিতে পারিতেন। সুতরাং সকল কার্য তিনি অতি সুচারুরূপে সম্পাদন করিতেন। তাঁহার মনোমধ্যে এই স্থির ধারণা ছিল যে, যে কার্য কাহাকেও করিতে হইবে, সম্পূর্ণ মনোভিনিবেশ প্রয়োগ না করিলে, সে কার্য সুসম্পন্ন হইবে না। আর পূর্ণ মনোযোগ দিলে যে সময়ের মধ্যে কার্য সুসম্পন্ন হইতে পারে, সম্পূর্ণ মনোভিনিবেশের অভাবে তাহার দ্বৈগুণ্য অপেক্ষা অধিক সময় সেই কার্য সুসম্পন্ন করিতে লাগিবে। ইহাতে কোন লাভ নাই, কারণ অধিকাংশ স্থলে কার্য সুসম্পন্ন হয় না। যদি সুসম্পন্ন হয়, তবে দ্বিগুণ পরিশ্রম ও সময় অকারণ লাগিয়া থাকে। বালক দেবদাসের এই সিদ্ধান্ত মনুষ্যমাত্রের অনুকরণীয় ও হিতকর। ব্যোমকেশ সহকারে এইরূপে দেবদাসের বিদ্যা বুদ্ধি, ও চিন্তাশীলতা ক্রমশঃ মার্জিত ও পরিবর্দ্ধিত হইতে লাগিল। সহপাঠী বালকগণ দেবদাসের কার্য প্রণালী ও কার্যসফলতা অবলোকন করিয়া তাঁহার কার্যাদির অনুকরণ করিত। দেবদাস বালকগণের কর্ণধারস্বরূপ হইয়া উঠিলেন। সাধু চরিত্রের ক্ষমতা মহীয়সী।

ক্রমশঃ দেবদাস লেখা পড়ায় সমধিক উন্নতি লাভ করিতে লাগিলেন।

ষোড়শ বর্ষে পদার্পণ করিলে তিনি বিদ্যালয়ের প্রথম শ্রেণীতে উন্নীত হইলেন। এই বৎসর তাঁহাকে বিশ্ববিদ্যালয়ের প্রবেশিকা পরীক্ষা দিতে হইবে। পরীক্ষা দিতে হইবে বলিয়া তিনি রাত্রি দিন কেবল অধ্যয়নে ব্যস্ত থাকিতেন না। শারীরিক ও মানসিক উভয়বিধ পরিশ্রম তাঁহার লক্ষ্য ছিল। তিনি প্রত্যহ শারীরিক ব্যায়াম সম্বন্ধে যেরূপ শরীর পরিচালন করিতেন, মানসিক শিক্ষা সম্বন্ধে মনও সেইরূপ পরিচালন করিতেন। ফলতঃ তিনি শারীরিক যেরূপ বলিষ্ঠ ছিলেন, মানসিক কার্যকলাপ সম্বন্ধে সেইরূপ ক্ষমতাশালী ছিলেন। শরীর ও মন উভয়কে বলিষ্ঠ করা তাঁহার উদ্দেশ্য ছিল।

ষষ্ঠাসময়ে প্রবেশিকা পরীক্ষার সময় সমাগত হইল। দেবদাসের পিতা তাঁহাকে সঙ্গে লইয়া আপন সহোদর শিবকৃষ্ণ বাবুর আলয়ে গমন করিলেন। ইতিপূর্বে দেবদাস কখন কলিকাতা মহানগরীতে যান নাই। এই তাঁহার তথায় প্রথম গমন। দেখিলেন, সहरটা পরিষ্কার পরিচ্ছন্ন। চতুর্দিক অদৃশ্য সৌধমালায় পরিশোভিত। প্রকাণ্ড প্রকাণ্ড বস্ত্র সকল আপনাদের সুবিশাল দেহ পথিকগণের পদতলে বিস্তার করিয়া দিয়াছে। নানাবিধ পণ্যদ্রব্যো বিপণি সকল পরিপূর্ণ। মীনবের সুখ স্বচ্ছন্দতার উপযোগী কোন দ্রব্যের অভাব নাই। কত কল, কত কারখানা, কত গাড়ী, কত ঘোড়া, তাহার ইয়ত্তা হয় না। প্রত্যেক পথ লোকে পরিপূর্ণ, এবং এই সকল লোককে দেখিলে স্পষ্টই বুঝা যায় যে, তাহারা বিশেষ বিশেষ উদ্দেশ্য সাধনার্থ ব্যস্ত হইয়া পদচারণা করিতেছে। দেবদাস পিতার পশ্চাৎ পশ্চাৎ যাইতেছেন আর ভাবিতেছেন, এই মহানগরী মধ্যে কেবল কি সুখ বিরাজ করিতেছে? হুঃখ কি এখানে নাই? যে দিকে দৃষ্টিপাত করি, সুখের বস্তু বিদ্যমান। কিন্তু সুখ হুঃখ বিশ্বপতির বিশ্বরাজ্যে সমভাবে বিরাজমান। এই মহানগরীর ভাগ্যে নিরবচ্ছিন্ন সুখ ভোগ কদাপি সম্ভবপর নহে।

জ্যেষ্ঠ সহোদর দেবদাসকে লইয়া যে দিন কলিকাতায় আসিবেন, শিবকৃষ্ণ বাবু পূর্বে হইতে সে সমাচার পাইয়াছিলেন। তিনি তাঁহাদের স্বচ্ছন্দ অবস্থানের প্রয়োজনীয় সমস্ত দ্রব্যের যোগাড় করিয়া রাখিয়াছিলেন। শিবকৃষ্ণ বাবু জ্যেষ্ঠ সহোদরকে দর্শন মাত্র গাত্রোত্থান করিলেন এবং ভক্তিভাবে তাঁহাকে প্রণাম করিয়া তাঁহার পদধূলি লইলেন। দেবদাসও পিতৃব্যচরণে প্রণাম পূর্বক পদধূলি লইলেন। দুই সহোদরে কিম্বৎক্ষণ পরস্পরের কুশলাদি সমাচার লইবার পর শিবকৃষ্ণ বাবু দেবদাসকে লইয়া অন্তঃপুরে প্রবেশ করিলেন। পিতৃব্যপত্নীর পাদপদ্মে দেবদাস প্রণাম পূর্বক পদধূলি লইলেন। তিনিও তাঁহার এবং বাটীর কুশল জিজ্ঞাসা করিলেন এবং মস্তকে হস্তার্পণ পূর্বক আশীর্বাদ করিলেন। দেবদাস পরম সুখে পিতৃব্যভবনে বাস করিতে লাগিলেন। ক্রমে পরীক্ষার সময় সমাগত হইল। পরীক্ষায় তিনি প্রায় সকল প্রশ্নের সুন্দর উত্তর দিয়াছিলেন। পরীক্ষান্তে তাঁহার পিতৃব্য তাঁহার চিত্তবিনোদনার্থ কয়েক দিন তাঁহাকে লইয়া কলিকাতার সুন্দর সুন্দর দৃশ্য বস্তু দেখাইয়া ছিলেন। এইরূপে কিছুকাল পিতৃব্যভবনে অবস্থান করতঃ দেবদাস পিতার সঙ্গে স্বগ্রামে প্রতিনিবৃত্ত হইলেন।

যথাসময়ে প্রবেশিকা পরীক্ষার ফল প্রকাশিত হইল। প্রবেশিকা পরীক্ষায় দেবদাস সর্বপ্রথম হইয়াছেন, এই সমাচার তড়িৎবেগে রামকৃষ্ণপুরে আসিয়া পৌছিল। গ্রামবাসী সকলে এই সমাচার পাইয়া মহানন্দ প্রকাশ করিতে লাগিলেন। দেবদাসের পিতা মাতার অন্তঃকরণ আনন্দে উৎফুল্ল। তাঁহারা বিনয়নম্র বচনে সকলের নিকট পুত্রের আশীর্বাদ প্রার্থনা করিতে লাগিলেন। দেবদাস এই সুসমাচার পাইয়া মনে মনে আনন্দানুভব করিলেন এবং ভক্তিভাবে সেই বিশ্বনিয়ন্তা ভগবানকে একান্ত মনে ধন্যবাদ দিলেন এবং কহিলেন, প্রভো! সকলই তোমার কার্য্য, তোমারই করুণা।



## পঞ্চম পরিচ্ছেদ

কলিকাতা ভারতবর্ষের রাজধানী। এখানে অনেকগুলি ভাল ভাল কলেজ আছে। কলেজে ভর্তি হইবার সময় সমাগত হইলে দেবদাস পিতার সমভিব্যাহারে কলিকাতায় গমন করিলেন। তথায় সর্বাপেক্ষা উৎকৃষ্ট কলেজে তিনি অধ্যয়নার্থ প্রবেশ করিলেন। দেবদাসের পিতৃব্যের একটি মাত্র কন্যা ছিল। তাঁহার কোন পুত্র ছিল না। তিনি ব্রাহ্মপুত্রকে পুত্রের স্থায় স্নেহ করতেন। পিতৃব্যের অবস্থা ভাল ছিল ; তিনি দেবদাসকে যে কেবল আপন আলয়ে রাখিয়া তাহার ভরণপোষণের ভার লইলেন, তাহা নহে ; দেবদাসের যাবতীয় প্রয়োজনীয় পুস্তকাদি তিনি ক্রয় করিয়া দিলেন। কুসংসর্গ ও প্রলোভনবহুল মহানগরীতে তিনি দেবদাসের রক্ষক। কনিষ্ঠের হস্তে দেবদাসকে হস্ত করিয়া তাঁহার পিতা নিজ বাটীতে প্রত্যাবর্তন করিলেন। কি বিদ্যাশিক্ষা, কি সদব্যবহার, সকল বিষয়ে দেবদাস উৎকৃষ্ট ছিলেন। পিতৃব্য দেবদাসের সদৃশে বড়ই আনন্দ লাভ করিলেন।

মহানগরী কলিকাতায় অবস্থান করিলে মহুষ্যের যেমন নানাবিধ প্রলোভন-তন্তুতে বিজড়িত হইয়া পাপপঙ্কে পতিত হইবার সম্ভাবনা তেমন

যদি কেহ জ্ঞানোন্নতির জন্ত যত্নশীল হন, তাহা হইলে তিনি তৎসম্বন্ধে বিপুল সুবিধা উপভোগ করিতে পারেন। কোন স্থানে সাহিত্যাধ্যয়নের আলয়, কোন স্থানে বিজ্ঞানসভা, কোন স্থানে প্রাণীগণ রক্ষিত হওয়ার প্রাণিতত্ত্বানুসন্ধিৎসু ব্যক্তিগণ বিবিধ প্রাণিবিজ্ঞান শিক্ষা করিতে সমর্থ। ভূতত্ত্ব, উদ্ভিদতত্ত্ব, চিকিৎসাতত্ত্ব, চিত্র প্রভৃতি নানাবিধ শিল্প শিক্ষার উপযুক্ত বিদ্যালয় নানা স্থানে বিরাজিত। ফলতঃ জ্ঞানলাভ করিবার চেষ্টা থাকিলে মানব এই স্থানে উপযুক্ত ক্ষেত্র পাইয়া থাকেন। বিবিধ বিদ্যা সংক্রান্ত তত্ত্ব সম্বন্ধে কত কত সুপাণ্ডিত ব্যক্তি ভিন্ন ভিন্ন স্থানে বক্তৃতা করিতেছেন। তাঁহাদের বক্তৃতায় বিশিষ্ট জ্ঞানলাভ করিতে পারা যায়। বিদ্বান্ ও বুদ্ধিমান্ ব্যক্তি অনেকে আপন আপন কর্ম্মানুরোধে এখানে বাস করিতেছেন। তাহাদের সঙ্গ মনুষ্যের পরমোপকারক। দেবদাসের চিত্ত জ্ঞানোন্নতির দিকে ধাবনশীল, সুতরাং এই মহানগরীতে যখন যে সুবিধা পাইতেন, তাহা যত্নপূর্ব্বক গ্রহণ করিয়া তিনি আপন কর্তব্যপথে অগ্রসর হইতেন, দেবদাস যে কলেজে অধ্যয়ন করিতেন, সেই কলেজটীতে বিস্তর ধনাঢ্য সন্তান পাঠ করিতেন। লেখাপড়ায় তিনি যেরূপ অশ্রেনীতে সর্ব্বপ্রথম স্থান অধিকার করিয়াছিলেন, বিনয় ও শিষ্টাচার সম্বন্ধে তাঁহার সমকক্ষ কেহই ছিলেন না। অচিরে অশ্রেনীর যাবতীয় ছাত্র দেবদাসের শিক্ষা ও চরিত্রে আকৃষ্ট হইয়া পড়িলেন। রামকৃষ্ণপুর গ্রামে অনেক গুলি দরিদ্র ভদ্রলোক বাস করিতেন। তাহাদের অল্পের কোনরূপ সংস্থান ছিল না। সন্তানগণের লেখা পড়া শিক্ষা দিবারও কোন উপায় ছিল না। অনেক গ্রামে এইরূপ বহুতর লোকের বাস আছে। তাহাদের জীবিকা নির্বাহের ও সন্তানগণের সুশিক্ষা লাভের উপায় বিধান করা, দেবদাসের দয়াদ্রু হৃদয় আকর্ষণ করিল। তাঁহার যত্ন ও উপদেশ মতে কলেজের ছাত্রগণ একটি সাহায্য ভাণ্ডার স্থাপন করিলেন। উহাতে তাঁহারা বথাসাধ্য কিছু কিছু মাসিক সাহায্য করিতেন। সকলের সাহায্যে

ভাণ্ডারটীর মাসিক আয় একটু বৃহৎ হইল। দেবদাসের জাতসারে নিজ গ্রামে যতগুলি দরিদ্র ছিলেন, তিনি তাহাদের নাম ধাম ভাণ্ডারের অধ্যক্ষের নিকট প্রেরণ করিলেন। অগ্রাগ্র সভ্য তাঁহার ত্রায় তাঁহাদের পরিজ্ঞাত দরিদ্রগণের নাম ধাম অধ্যক্ষের নিকট প্রেরণ করিলেন। অধ্যক্ষ মহাশয় সাহায্য ভাণ্ডারের মাসিক আয় অবস্থা বিবেচনায় ঐ সকল দরিদ্রের মধ্যে বণ্টন করিয়া দিতেন। যে সভ্য যে যে দরিদ্রের নাম ধাম অধ্যক্ষ মহাশয়ের নিকট প্রেরণ করিয়াছিলেন, সেই সভ্যের দ্বারা সেই সেই দরিদ্রের অর্থ পাঠাইয়া দিতেন। এইরূপে দেবদাস যখন বিভাগয়ে অধ্যয়নে নিযুক্ত ছিলেন, সেই সময়েও তাঁহার হৃদয় দীন দরিদ্রের জন্ত কাতর হইত এবং তাহাদের হিতকল্পে যথাসাধ্য সাহায্য করিতে অহু-মাত্রও পরাঙ্মুখ ছিলেন না। এই সকল কার্যো তিনি আপনাকে কিছু-মাত্র গৌরবান্বিত মনে করিতেন না। প্রত্যুত এইরূপ কার্য্য তাঁহার কর্তব্য, যদি তিনি না করিতেন, তাহাতে তাঁহার প্রত্যাবায় ছিল, এই ধারণা তাঁহার অন্তঃকরণে বদ্ধমূল হইয়াছিল। তাঁহার নিকট কেহ দুঃখ জানাইলে তিনি তাঁহার উপর অণুমাত্র ক্রুদ্ধ বা বিরক্ত হইতেন না, যাহা পারিতেন, তিনি তাহাকে তাহাই দিতেন, আর না পারিলে মনে মনে বড়ই ব্যথা ভোগ করিতেন।

কি শিক্ষক কি ছাত্র কি অগ্রব্যক্তি যিনি দেবদাসের এই সমুদয় পবিত্র গুণ রাশির পরিচয় পাইতেন তিনিই তাঁহার গুণ গ্রামে বিস্তৃত হইয়া তাঁহাকে ভূয়সী প্রশংসা ও সাধুবাদ করিতেন। মাণিক যে স্থানে থাকুক, তাহার জ্যোতিঃ তৎস্থানকে আলোকিত করিয়া থাকে। দেবদাস স্বাভাবিক অতিশয় স্নন্দর পুরুষ না হইলেও তাঁহার আকৃতি এরূপ বিনয়-নম্র ছিল যে, তাঁহাকে দেখিলে ভালবাসা যেন আপনা আপনি লোকের মনে আসিয়া উপস্থিত হইত।

প্রত্যহ বিদ্যালয় হইতে আসিয়া হস্ত মুখাদি প্রক্ষালনপূর্বক তিনি

কিছু জলযোগ করিতেন । পরে কিছুকাল শরীর চালন কার্যে নিযুক্ত থাকিতেন । শরীর ও মন উভয়কে সমানরূপে পরিচালনা করা মনুষ্যের কর্তব্য, না করার দোষ । সন্ধ্যার প্রাকালে তিনি নির্জনে বসিয়া বিশ্রাম করিতেন, সেই সময় তিনি মনুষ্যের কর্তব্যাদি সম্বন্ধে নানাবিধ চিন্তা করিতেন । মহাপুরুষগণের বহুকাল ব্যাপিনী তত্ত্ব-চিন্তা প্রসূত উপদেশ পরম্পরা হইতে জানা যায়, ভগবান্ সর্বব্যাপী চৈতন্ত স্বরূপ । এই জগতে যত কিছু পদার্থ আছে, সকলই জড়, কেবল তিনি একমাত্র চৈতন্ত । জড় বস্তুর কার্য্য করিবার ক্ষমতা নাই । চৈতন্ত সকল জড় বস্তুর অভ্যন্তরে থাকিয়া কার্য্য করাইয়া থাকেন । এই যে মনুষ্য হইতে অতি সামান্য পিপীলিকা পর্য্যন্ত যত প্রাণী দেখা যায়, সকলের মধ্যে চৈতন্ত থাকায় তাহারা কার্য্য-শীল । সকল প্রাণীগণের মধ্যে ভগবান্ কার্য্যকরণোপযোগী কতক গুলি যন্ত্র সৃজন করিয়াছেন । মৃত্যুকালে সেই সকল যন্ত্রের কার্য্য করিবার শক্তি নষ্ট হইয়া যায়, যন্ত্রগুলি কার্য্যক্ষম থাকে না । তখন দেহের মধ্যে চালক থাকেন, কিন্তু চাল্য বা যন্ত্র পদার্থের অক্ষমতা নিবন্ধন সেই সকল প্রাণী কোন কার্য্য করিতে পারে না । তরু লতা প্রভৃতিও এই নিয়মের অধীন । তরু, লতা, মনুষ্য, গো, অশ্ব, প্রভৃতি যখন মৃত হয়, তখনও তাহাদের জড়দেহের মধ্যেও চৈতন্ত বিরাজিত থাকেন, কিন্তু চৈতন্তের কি কার্য্য তখনও আমরা তাহাদের জড়দেহের মধ্যে উপলব্ধি করিতে পারি । চৈতন্ত সেই সমস্ত মৃত জড়দেহের অভ্যন্তরে থাকিয়া জড়দেহস্থ পরমাণু সকলকে পরম্পর সংযুক্ত করিয়া থাকেন । পরমাণু বিল্লিষ্ট হইলে উহা চৈতন্ত সমুদ্রে ভাসমান হয়, পরিশেষে পরমাণু ও চৈতন্তে লয় প্রাপ্ত হয় । পরমাণু লয় প্রাপ্ত হইলে জগতে সেই চৈতন্ত ব্যতীত আর কোন পদার্থই বিদ্যমান থাকে না । এই তত্ত্ব মহাপুরুষগণের চিন্তা ও গবেষণার ফল । এক্ষণে যখন ইহাই স্থির যে, সকল মনুষ্যের মধ্যে এক চৈতন্ত বিরাজিত, তখন সকল মনুষ্য একরূপ প্রকৃতি অবলম্বন না করিয়া কেন ভিন্ন ভিন্ন

প্রকৃতি বিশিষ্ট হয় ? যে কোন ধর্মাবলম্বী ইউন না কেন, সাধু মাত্রেইই প্রকৃতি একরূপ । যে সকল মনুষ্য সাধুতার চরম সীমায় পদার্পণ করিতে পারেন নাই, তাহাদের প্রকৃতিই ভিন্ন ভিন্ন । মনুষ্য বহু বহু জন্ম গত করিয়া আজ আমাদের সম্মুখে উপস্থিত । ভগবান্ জীবের কার্যকলাপ চালাইতেছেন, আমি নিজে কিছু নহি, জীব এই জ্ঞান ক্রমশঃ হারাইয়া নানাবিধ সংস্কারের আশ্রয় গ্রহণ করেন, কেহ অহঙ্কারী, কেহ চৌরস্বভাব-সম্পন্ন, কেহ বা কামাসক্ত, কেহ বা ক্রোধী এইরূপ ভিন্ন ভিন্ন সংস্কার মনুষ্যের মন বুদ্ধিকে তন্ময় করিয়া তুলে । মৃত্যুকালে মন বুদ্ধি সূক্ষ্ম শরীর লইয়া অপর শরীরে প্রবেশ করে । এবংবিধ অপর শরীর লইয়া জীব জন্ম পরিগ্রহ করিলে সেই শরীরস্থ মন বুদ্ধি পূর্ব জন্মের সংস্কারাত্মক হয় । একটা লণ্ঠনের চারি ধারে চারিখানি ভিন্ন রংয়ের কাচ থাকিলে তদন্তর্গত আলোকটা ভিন্ন ভিন্ন দিকে ভিন্ন ভিন্ন রংয়ের প্রকাশিত হয় ; সেইরূপ মনুষ্য মধ্যে বাহ্যর মন বুদ্ধি যেরূপ সংস্কারবিশিষ্ট সংসারে তাহার কার্য্য সেইরূপ সংস্কারজনিত হইয়া থাকে । তিনি আপন সংস্কারানুযায়ী কার্য্যে সুখ পাইয়া থাকেন, অথ সংস্কারানুযায়ী কার্য্য তাহার ভাল লাগে না । সাধু গুরুর কৃপায় এই সকল সংস্কারেরূপনাশ হইলে, যখন নির্মল স্বেত কাচখণ্ডের দ্বারা তাহার মন বুদ্ধির বিকাশ হয়, তখনই তাহা হইতে ভগবানের নির্মল জ্যোতিঃ বিভাসিত হয় । এইরূপ নির্মল মনোবুদ্ধি বিশিষ্ট ব্যক্তিগণের মধ্যে মন বুদ্ধি সখ্যে কোন পার্থক্য থাকে না । সকলই এক ভাবাত্মক বলিয়া প্রকাশিত হয় । মনুষ্যের মন বুদ্ধি বিভিন্ন সংস্কারাত্মক হইলেও যখন আমার ভগবানের অংশ তাহাতে বিরাজিত, তখন কেন বা আমি আমার সেই প্রতিবাসীর প্রতি দ্রোহাচরণ করি, তাহাকে ভাল-বাসিলে আমার ভগবানের প্রতি ভালবাসা হইবে । যথাসাধ্য জীব জীবের প্রতি দয়া করিবে । জীব সকল আমার আপনার লোক—এই জ্ঞান প্রশস্ত । এক জীব অপর জীবের অনিষ্ট করিয়া নিজের সুখ ভোগের ইচ্ছা করিলে,



সেই জীব কি তাঁহার ভগবানের প্রতি অবৈধাচরণ করিলেন না ? যদি তোমার অভ্যন্তরস্থ ঠাকুর অত্র মন্দিরে দর্শন কর, তবে যে মন্দিরে সেই ঠাকুর থাকিবে তুমি কি সেই মন্দিরের প্রতি অসম্মান করিবে ? সেই মন্দিরটা স্থায়ী করিতে তুমি কি যথাসাধ্য চেষ্টা করিবে না ? যে সকল তরু লতা মন্দিরটিকে ধ্বংস করিতে প্রস্তুত, সেই সকল অনিষ্টকারী তরু লতা মন্দিরটা হইতে উঠাইয়া দিতে সাধ্য থাকিলে কি সচেষ্ট হইবে না ? যদি ঐ সকল কার্য্য না কর, তোমার কিসের শ্রদ্ধা, কিসের ভালবাসা ? তুমি যদি প্রকৃতই তাহাকে ভালবাস, তোমার ভালবাসার গুণে তাহার কুসংস্কার সকল তিরোহিত হইয়া যাইবে । সেই ব্যক্তি কালবশে নিশ্চল পবিত্রাশ্রয় হইতে পারিবেন । তাহার অভ্যন্তরস্থ পবিত্র জ্যোতিঃ আবার অত্মকে নিশ্চল করিবে । এইরূপে নিশ্চলাশ্রয় মনুষ্যের সংখ্যা ক্রমশঃ বৃদ্ধি প্রাপ্ত হইবে । অতএব মনুষ্য মাত্রেয় সাধু সঙ্গ আশ্রয় করা উচিত এবং কায়মনোবাক্যে তিনি যথা সাধ্য অপরের উপকার করিবেন ।

দেবদাস অদ্যাপি অপরিণত বয়স্ক একজন বৃদ্ধ । চিন্তার সর্বাংশিক গাঢ়ত্ব তাঁহার নিকট প্রত্যাশা করা অসুচিত । যাহা হউক প্রত্যহ সন্ধ্যাকালে তিনি এইরূপে নূতন নূতন চিন্তা সাগরে ভাসমান হইতেন । অধ্যয়নের সময়ে পূর্ব সমস্ত চিন্তা হইতে অন্তঃকরণ পরিস্কৃত রাখিতে পারিতেন ।



## ষষ্ঠ পরিচ্ছেদ

কালক্রমে দেবদাস এল এ, বি এ পরীক্ষায় উত্তীর্ণ হইলেন ; অধিকাংশ পাঠ্য বিষয়ে তিনি সর্বোচ্চ স্থান পরীক্ষায় অধিকার করায় বিশ্ববিদ্যালয় হইতে তিনি অনেকগুলি বৃত্তি পাইয়াছিলেন, পরিশেষে এম এ পরীক্ষার জ্ঞান তিনি প্রস্তুত হইতে লাগিলেন, এই সময়ে এক দিন সমাচার আসিল যে, তাঁহার পিতা কঠিন জ্বর রোগে আক্রান্ত হইয়া শয্যাগত । পীড়া ক্রমশঃ অতিশয় গুরুতর হইয়া উঠিয়াছে । সংবাদ পাইবামাত্র তিনি ও তাঁহার পিতৃব্য উভয়ে রামকৃষ্ণপুরে যাত্রা করিলেন । শ্রীকৃষ্ণ বাবু পীড়ার যত্নায় একান্ত ক্লিষ্ট । নানা উপসর্গ উপস্থিত হইয়া পীড়াকে অতি জটিল করিয়া তুলিয়াছে । শয্যাপার্শ্বে সহোদর ও পুত্রকে উপস্থিত দেখিয়া তাহার অশান্ত চিত্তে কিয়ৎক্ষণের জ্ঞান আনন্দের উদয় হইল । তিনি ভ্রাতা ও পুত্রকে আপন শয্যার একদশে বসিতে আদেশ করিলেন এবং তাহাদিগের কলিকাতাস্থ বাটীর কুশল জিজ্ঞাসা করিলেন । কিয়ৎকাল কথোপকথনে তিনি ক্লান্ত হইয়া পড়িলেন । সুতরাং ভ্রাতা ও পুত্র তাহার ক্লেশ নিবারণ কারণ কেহ তাল বৃত্ত

ব্যঞ্জন কেহ বা তাহার গাত্রে হাত বুলাইতে লাগিলেন । তাঁহার উভয়ে রোগীর অবস্থা দেখিয়া দুর্মনায়মান হইলেন । চিকিৎসকদিগকে জিজ্ঞাসা করিয়া জানিলেন যে, তাঁহার রোগের প্রতীকারের আশা বড়ই স্বল্প । দেবদাস সর্বদা পিতার নিকট উপস্থিত থাকিয়া যখন বেক্রপ সেবা শুশ্রূষা আবশ্যক হইত, তিনি তৎক্ষণাৎ তাহা সম্পন্ন করিতে লাগিলেন, তাহার রাত্রি দিন জ্ঞান ছিল না, অবহিত চিন্তে পিতার সেবা করিতে লাগিলেন । পিতা পুত্রের সেবায় সমধিক আনন্দ লাভ করিলেন । ক্রমে তাঁহার শরীর ক্ষীণ হইতে ক্ষীণতর হইতে লাগিল । একদিন তিনি অতি ক্ষীণ কণ্ঠে ভ্রাতা ও পুত্রকে আপন সন্নিধানে আহ্বান করিলেন । তাহার নিকটে আসিলে তিনি কহিলেন, “আমার মৃত্যুকাল আসন্ন । ভাই আমি দেবদাসকে তোমার হস্তে অর্পণ করিলাম ; তুমি এক্ষণ হইতে পিতৃ স্বরূপ হইয়া উহার তত্ত্বাবধান করিও । দেবদাস ! তোমার স্থায় সুশীল সুপণ্ডিত পুত্র পাইয়া আমি মনে মনে বড়ই আনন্দ লাভ করিয়াছি । ভবধাম পরিত্যাগ করিবার জন্ত আমার কোন ক্ষোভ নাই । তোমাকে আশীর্বাদ করিতেছি, তুমি ভগবানের ত্রীপাদ পদ্মে মতি রাখিয়া যেন সকল কার্য্য করিতে পার ।” এই কথা বলিয়া তিনি অতি ক্ষীণ স্বরে ভগবানের নাম করিতে লাগিলেন । এই নাম ব্যতীত তাহার অন্তিম কালে আর কোন কথাই ছিল না । অতঃপর শিবকৃষ্ণ বাবু দেবদাস ও তাহার কতিপয় প্রতিবেশী তাহার আসন্নকাল উপস্থিত দেখিয়া তাহাকে লইয়া পুণ্য সলিলা গঙ্গাতীরে উপস্থিত হইলেন এবং অর্দ্ধ-নাভি গঙ্গাজলে তাহার শরীর নিমগ্ন রাখিয়া সমবেত স্বরে “গঙ্গানারা-য়ণ ব্রহ্ম” নামোচ্চারণ করিতে লাগিলেন । দেখিতে দেখিতে তাহার প্রাণবায়ু দেহ হইতে চলিয়া গেল ।

মৃত্যুর জন্ত শোক করা নিম্প্রয়োজন ; যদিও দেবদাস ইহা বিশিষ্ট-রূপে অবগত ছিলেন, কিন্তু প্রিয়তম পিতার মৃত্যুরূপ ঝঙ্কারে তিনি

একান্ত বিচলিত হইয়া উঠিলেন । বালকের ত্রায় কাঁদিতে লাগিলেন ।  
কিন্মৎক্ষণ পরে স্থির হইয়া ভাবিতে লাগিলেন । পিতৃদেব যেরূপ  
রোগের যন্ত্রণা সহ করিতে ছিলেন, দীর্ঘকাল ঐরূপ ভোগ করা নিতান্ত  
কষ্টকর ও দুঃখপ্রদ । মৃত্যু সকল যন্ত্রণার শান্তি করিল । যে ঘোর  
মহামায়া প্রভাবে জীব সংসারের প্রতি একান্ত আসক্তি সম্পন্ন, অসহ  
যন্ত্রণা ভোগ করিতে থাকিলেও আসক্তি বশতঃ আপন প্রাণ, আপন পুত্র,  
আপন কন্যা, আপন কলত্র, আপন বিষয় সকলই তাহার অতি প্রিয়-  
বস্তু ; তিনি সেই সকল ছাড়িয়া যাইতে একান্ত অনিচ্ছুক । সুতরাং  
মৃত্যুকালে তাহাকে অনন্ত কষ্ট ভোগ করিতে হয় । যিনি ভগবানের  
রূপায় মহামায়ার এই সকল প্রভাব হইতে যে পরিমাণ আপনাকে  
উদ্ধার করিয়াছেন, তিনি মৃত্যুকালে সেই পরিমাণ ক্লেশের হস্ত হইতে  
পরিব্রাণ পান । এই দেখ আমাদের সম্মুখ দিয়া যে কুকুরটী যাইতেছে,  
উহার গাত্র ক্ষত পরিপূর্ণ, শরীর অনশনে একান্ত জীর্ণ । দুর্বলতা প্রযুক্ত  
হেলিয়া তুলিয়া রাস্তা দিয়া যাইতেছে । এক গাছি যষ্ঠি ইহার সম্মুখে  
উত্তোলন কর, দেখিবে, পাছে ইহার এই যন্ত্রণা পূর্ণ শরীর নাশ হয়, এই  
ভয়ে ইহা যতদূর পারে পলায়ন দ্বারা আত্মরক্ষা করিতে চেষ্টা করে ।  
জীবন ধারণ কুকুরটীর ক্লেশজনক ব্যতীত আর সুখ জনক নহে, কিন্তু  
মহামায়ার প্রভাবে এই কষ্টকর যন্ত্রণাপূর্ণ জীবনও পরিহার করিতে  
সে ইচ্ছুক নহে, ফলতঃ বিশেষরূপ বিবেচনা করিয়া দেখিলে মৃত্যু জীবের  
শান্তিদাতা ; দয়াময় ভগবান্ এরূপ স্থলে তাহার আসক্তির প্রতি  
কটাক্ষপাত না করিয়া তাহার সকল যন্ত্রণার শান্তি করিবার জন্ত সর্ব-  
সম্পদহর মৃত্যুকে তাহার নিকট পাঠাইয়া দেন ।

বাহারা মৃত ব্যক্তির আত্মীয়, মহামায়া প্রভাবে আসক্তি বশতঃ  
তাহারা মৃত ব্যক্তির নিকট নানাবিধ সুখের আশা করিয়া থাকেন ;  
হয়ত সুখের আশা নাই, কিন্তু দীর্ঘকাল একত্র অবস্থান নিবন্ধন অথবা

দেহ বশতঃ সেই ব্যক্তিকে পরিত্যাগ করিতে পারেন না। যতদিন তাহার জীবন এই ভবনামে থাকে, ততদিন গুটি পোকায় গ্রাস সকল আসক্তির অভ্যস্তরে জীব বাস করিতেছেন, আসক্তির নাশ জীবের নিত্যান্ত অসম্ভব।

পিতৃদেবের সংকার কার্যাদি যথা নিয়মে সমাপন করিয়া দেবদাস স্বগৃহে প্রতিনিবৃত্ত হইলেন। তিনি বাটীতে আসিলে মাতা তাহাকে দেখিয়া উচ্চৈঃস্বরে রোদন করিয়া উঠিলেন। তাহার কাতর ক্রন্দনে দেবদাস পুনরায় বিচলিত হইলেন। মাতা পুত্রে উভয়ে রোদন করিতে লাগিলেন। প্রতিবেশীগণ বুঝাইতে লাগিলেন, কিন্তু তাহাদের সকল বুঝান বত্তার জলের গ্রাস যে, কোথায় ভাসিয়া গেল, তাহার স্থিরতা নাই। কিয়ৎকাল পরে দেবদাস প্রকৃতিস্থ হইলেন, মাতাকে সাহ্বনা করিতে লাগিলেন, ক্রমশঃ ক্রন্দন কমিয়া আসিল।

পিতৃদেবের শ্রাদ্ধাদি ক্রিয়া যথা সময়ে যথা নিয়মে সম্পাদিত হইল। দেবদাস কলিকাতায় প্রত্যাবর্তন করিলেন। শিবকৃষ্ণ বাবু রামকৃষ্ণ পুরের বাটীর সম্বন্ধে একটা বন্দোবস্ত করিলেন, জমী বাগান যাহা ছিল, প্রজা বিলি করিয়া দিলেন। তদনন্তর ভ্রাতৃজ্ঞানাকে সমভিব্যাহারে লইয়া কলিকাতায় আপন বাটীতে আগমন করিলেন। এক্ষণ হইতে দেবদাস ও তাহার পিতৃব্য একান্নাবস্থায় রহিলেন। দেবদাসের পিতৃব্যের একটা মাত্র কণ্ঠা জন্মিয়াছিল; কোন পুত্র সন্তান ছিল না। কণ্ঠার বিবাহ হইয়াছিল। তিনি অধিকাংশ সময় স্বপুত্র আগয়ে থাকিতেন, মধ্যে মধ্যে পিত্রালয়ে আসিতেন। সুতরাং পিতৃব্যের সংসারে অধিকাংশ সময় চারিজন মাত্র লোক সংসারের অঙ্গ ছিলেন। দেবদাস মাসিক যে বৃত্তি পাইতেন, প্রয়োজনীয় খরচ বাদে সমস্ত পিতৃব্য হস্তে দিতেন। পিতৃব্য ঐ টাকা সমস্ত দেবদাসের জন্ত ব্যয় করিতেন, নিজে কিছুমাত্র গ্রহণ করিতেন না। ক্রমে দেবদাসের এম এ পরীক্ষার

সময় আসিল । পূর্ব পূর্ব পরীক্ষার স্থায় এ পরীক্ষায়ও তিনি শীর্ষ স্থান অধিকার করিলেন । সরকার বাহাদুর তাঁহার বিদ্যাবুদ্ধির পরিচয় পাইয়া মাসিক ৩০০ টাকা বেতনে একটি রাজকার্য্যে তাঁহাকে নিযুক্ত করিলেন । তাহার কার্য্যস্থান কলিকাতা ।



## সপ্তম পরিচ্ছেদ

এই সময়ে দেবদাসের বয়ঃক্রম একুশ বৎসর। শিবকৃষ্ণ বাবু দেবদাসের সুশীলতা বিবেচনা ও বুদ্ধির প্রার্থ্যা দেখিয়া একান্ত মুগ্ধ হইয়াছিলেন। তিনি দেবদাসের প্রতি এতাদৃশ অহরন্তর যে, তাঁহার পরামর্শ ব্যতীত কোন কার্য্য করিতেন না। ফলতঃ পিতৃব্য মহাশয় ভ্রাতৃপুত্রকে সুখী করিবার জন্ত তাঁহার অভিপ্রায়ানুযায়ী কার্য্য করিতে সদা সচেষ্ট থাকিতেন। দেবদাস সুশীল বিদ্যাবুদ্ধিসম্পন্ন এবং উচ্চ রাজকার্য্যে নিযুক্ত। তাঁহার সহিত কন্যা বিবাহ দিবার জন্ত অনেক ধনাঢ্য ব্যক্তি চেষ্টা দেখিতে লাগিলেন। কেহ চারি হাজার কেহ পাঁচ হাজার কেহবা ছয় হাজার টাকা দিতে সম্মত হইলেন। কেহ কেহ বা কহিলেন, কত্যাটি পরমা সুন্দরী। কত্যাটি একবার দেখুন, মনো-নীত হইলে দেনা পাওনা সম্বন্ধে কোন গোলযোগ হইবে না। দেবদাসের মাতা ও পিতৃব্য তাঁহার অভিপ্রায় ব্যতিরেকে কাহারও নিকট কোন কথার উত্তর দিতেন না। কিন্তু তাঁহাদের একান্ত ইচ্ছা এই সময় দেবদাসের বিবাহ হয়, তাঁহারা নববধূ লইয়া সুখে আপনাদের জীবন অতিবাহিত করেন।

বিবাহের কথাবার্তা শুনি দেবদাসের কর্ণগোচর হইতে বাকী রহিল না। তিনি মনে মনে চিন্তা করিলেন, এই প্রথাটা ভাল না মন্দ ! ভাল ত কিছুতেই নহে। একের নিকট হইতে অর্থ শোষণ করিয়া অত্বে লাভবান্। আবার এই অর্থ শোষণের প্রণালীগুলি এরূপ নির্মম ও পরপীড়ক যে, তাহাতে কোন হৃদয়বান্ ব্যক্তি স্থির থাকিতে পারেন না। নিদারুণ কথা শুনি শুনিলে একবারে মৰ্ম্মাহত হইতে হয়। কোথায় পবিত্র যৌন সম্বন্ধে এক পরিবার অপর পরিবারের সহিত সন্নিষ্ট হইবে, একের সুখ দুঃখে অপরের সুখ দুঃখ হইবে, না তাহার স্থলে ঘোর স্বার্থপরতা। এক পরিবারের কষ্টই হউক, আর দুঃখই হউক, তাহার দিকে দৃকপাত করিবার আবশ্যক নাই। অর্থই মূল উদ্দেশ্য। অর্থ শোষণ করিয়া লইতে পারিলেই উদ্দেশ্য সফল হইল। মনুষ্য মনুষ্যের প্রতি দয়া শ্রদ্ধা করিবে, পরস্পর ভ্রাতৃত্বাবে আবদ্ধ হইবে, এই ত বিশ্বনিরস্তা ভগবানের নিয়ম। জীব সেই পবিত্র নিয়মকে পদতলে দলিত করিতে কিছুমাত্র কুণ্ঠিত হইতেছে না, ইহা অপেক্ষা আক্ষেপের বিষয় আর কি আছে ! অবশ্য পরদুঃখকাতর হৃদয়বান্ মহাত্মা এখনও দেখিতে পাওয়া যায়। তাঁহারা এই প্রথাকে সম্পূর্ণ ঘৃণার চক্ষে পরিদর্শন করেন, এই যৌন সম্বন্ধ স্থাপনে তাঁহারা যেরূপ কার্য্য করিয়া থাকেন, তাহা প্রকৃত মহাত্মারই কার্য্য। কিন্তু সমাজে তাঁহাদের সংখ্যা এতাদৃশ সামান্য যে, তাঁহাদের অস্তিত্ব নাই বলিলেও অতুক্তি হয় না।

দীর্ঘকাল এই প্রথা বলবতী থাকিলে সমাজ যে উৎসন্ন হইবে তাহার আর কোন ভুল নাই। সকলেরই ইচ্ছা কথ্যটি সুপাত্রে সহিত বিবাহিতা হয়। সুপাত্রে বিবাহ দিতে যাইলে বহুতর অর্থ ব্যয় করিতে হইবে, সুতরাং সুপাত্রে বিবাহ দেওয়া অনেকের পক্ষে অসাধ্য। সুপাত্রে অভাবে পাত্রে স্বভাবটী ভাল হয় এবং গ্রাসাচ্ছাদনের ক্রেশ না হয়, এরূপ পরিবারস্থ পাত্র অনুসন্ধান করেন। শেষোক্ত শ্রেণীর পাত্রে সহিত



কন্তার বিবাহ দিতে যদি কোন পরিবার অক্ষম হন, তাহা হইলে অদৃষ্টের উপর নির্ভর করিয়া যেমন তেমন পাত্রে কন্যা সম্প্রদান করিতে বাধ্য হন । অল্প বয়সে কন্তাকে পাত্রস্থ করিতে হইবে, না করিলে সমাজে নিন্দা, কিন্তু পাত্রের বয়স যতই কেন হউক না, সে অবিবাহিত থাকিলে সমাজে কোন দোষ বা নিন্দা নাই ; এই কারণেই পাত্রস্থ করিতে কন্তাকর্তার অর্থনাশ বা সর্বনাশ । এই কারণেই পাত্রটীর বিশেষ কোন গুণ না থাকিলেও বিবাহের সময় সেও মূল্যবান হয় ।

যাঁহার অনেকগুলি কন্যা, সমাজের যেরূপ অবস্থা তাঁহার বিষয় সম্পত্তি বা অর্থ থাকিলেও তাঁহাকে নিঃস্ব হইতে হইবে, না হয় দেনাদার হইয়া সংসারে দেনার জালা সম্পূর্ণ ভোগ করিতে হইবে এবং দীনভাবে তাঁহাকে সংসার যাত্রা চালাইতে হইবে । সংসারে কাহারও একটী, কাহারও দুইটী কাহারও বা তদপেক্ষা অধিক কন্যা জন্মিয়া থাকে । কন্যা জন্মে নাই এমন লোকও অতি বিরল । সুতরাং এই ঘোর অনিষ্টকর নিয়ম প্রচলিত থাকায় প্রায় সকলকেই ইহার নির্যাতন ভোগ করিতে হয় । যাঁহারা টাকা লইয়া বিবাহ দেন, তাঁহাদের সেই সমস্ত অর্থই নষ্ট হইয়া যায়, কেবল মাত্র কন্তার অলঙ্কারাদি কিছুকাল বর্তমান থাকে । যিনি পুত্রের বিবাহ দিতে অর্থ লইয়া থাকেন, কন্তার বিবাহে তাঁহাকে অর্থ দিতে হয় । পুত্র বিবাহ লব্ধ ধনে কন্তার বিবাহ কখন সুসম্পন্ন হয় না ।

দেখা যাইতেছে, এই সমাজ-বিপ্লবকারিণী প্রথা দেশে প্রচলিত থাকিলে সকলকেই যখন ইহার প্রকোপ সহ্য করিতে হয়, তখন ইহার উচ্ছেদে যত্নশীল হওয়া কি কৃতবিদ্য যুবকগণের কর্তব্য নহে ? পিতা বা অল্প কর্তৃপক্ষের কার্যে প্রতিবাদ করা লজ্জার বিষয় ইহা মনে করিয়া নিশ্চিন্ত থাকা উচিত নহে । এইরূপে নিশ্চিন্ত থাকিলে এই মহতী রাক্ষসী প্রথার কিছুতেই বিলোপ সাধন হইবে না । পিতা বা অপর কর্তৃপক্ষকে এই মহানিষ্টকারী কুপ্রথার মূলে কুঠারাঘাত করিতে যথাসাধ্য অনুরোধ


করিবে। হে কৃতবিদ্য স্বদেশহিতৈষী যুবকগণ! স্বদেশী শিল্প বাণিজ্যের উন্নতি করলে তোমরা যেমন বন্ধপরিষ্কার হইয়াছ, স্বদেশী শিল্প বাণিজ্যের উন্নতি করিতে পারিলে যেমন অনেকের জীবন যাত্রার উপায় হয়, এই নিঃস্বতাকারিণী রাক্ষসী কুপ্রথার উন্মূলন করিতে পারিলে সমাজের অতি ভুষ্ট রোগ হইতে সমাজকে রক্ষা করিতে পারা যায়। এই রোগ বিদূরিত হইলে সমাজ সুস্থ হইবে। সমাজ সুস্থ হইলে লোকের উপার্জিত অর্থে সমাজ বলীয়ান হইবে, সমাজ বলীয়ান হইলে জীবের মঙ্গলদায়ক অশেষ কার্য সম্পাদিত হইবে। স্বার্থান্ধ হইয়া আজ যাহাকে বিবাহ করিলে এবং যাহার বিবাহে তুমি অপরিষ্যাপ্ত অর্থ পাইয়াও মনে মনে অসন্তুষ্ট সেই পরিলীতা ভার্য্যা কল্য তোমার সংসারের কত্রী হইবেন। সেই ভার্য্যা ও তদগর্ভজাত সন্তানাদি অপেক্ষা সংসারে কে আর তোমার প্রিয়তম হইবে এবং কে বা তোমার মঙ্গল অধিকতর কামনা করিবে? সন্তানের জন্মই ত বিবাহ। সুসন্তান লাভই মনুষ্যের সর্বতঃ সুখকর। যদি সুসন্তান লাভের প্রয়াস থাকে, সংস্খভাবসম্পন্ন জনক জননীর কত্যা সমধিক আকাঙ্ক্ষনীয়। যদি কত্মার গুণ কিছু মাত্র না থাকে কত্মার রূপ কি কার্যে লাগিবে? পুরুষের মধ্যে কোন পুরুষ নিগুণ হইয়া রূপশালী হইলে যেমন কাহারও আদরের বস্তু হয় না, স্ত্রীলোকের মধ্যে সেইরূপ বিচার প্রচলিত হওয়া কি উচিত নহে? গুণের প্রাধান্যই সংসারে উৎকৃষ্টতার পরিমাপক। রূপ কোন কার্যের নহে। নর নারীর শারীরিক বর্ণ কৃষ্ণ হউক, আর গৌর হউক, তাহাতে কিছুমাত্র লাভ বা ক্ষতি নাই। স্বামী যখন ভার্য্যার গুণে মোহিত হন, ভার্য্যার দৈহিক বর্ণ তাহার নিকট সর্ব্বথা উপেক্ষণীয়। সন্তানের অতি আদর ও আনন্দের বস্তু মাতা। সন্তান মাতার দৈহিক বর্ণের উপর কি কখন কটাক্ষপাত করেন? মনুষ্য যত-কাল ইহ জগতে জীবিত থাকিয়া সংসার যাত্রা নির্বাহ করিবেন, তাবৎকাল যদি সুভার্য্যা বা সুপুত্রের বা সুকত্মার সংসর্গ লাভ করিতে

পারেন তাহা হইলে তিনি গৃহে স্বর্গস্বখ-ভোগ করিতে সমর্থ হন । সংসারে সহস্র জালা ভোগ করিলেও গুণময়ী ভার্য্যার সংসর্গে সে জালা তিরোহিত হইয়া যায় । গুণহীনী দৃষ্টা স্ত্রীর সংসর্গে স্বামীকে যে অশেষ যন্ত্রণা ভোগ করিতে হয়, তাহার দৃষ্টান্ত ভূরি ভূরি পাওয়া যায় । চক্ষের উপর এই সকল দৃষ্টান্ত জাজ্জল্যমান থাকিলেও যদি মনুষ্য গুণের পরিবর্তে শুদ্ধ রূপের লালসায় দারপারিগ্রহ করেন, তবে তাহার অপেক্ষা জগতে আর কে নির্য্যোধ আছে ?

কত্থার যতদিন না বিবাহ হয়, তিনি আপন জনক জননী আশ্রয়ে প্রতিপালিতা হন । জনক জননীর নিকট শিক্ষালাভ করেন । তাঁহাদের রীতি নীতি স্বভাব ব্যবহার অনুকরণ করিতে অভ্যস্ত হন । পুত্র মাতা পিতার দৃষ্টান্ত ও উপদেশ ব্যতীত অত্র দৃষ্টান্ত ও উপদেশ পাইবার সুবিধা পাইয়া থাকেন । ভিন্ন সংসর্গদোষে পুত্র অসচ্চরিত্র হইতে পারেন, কিন্তু আমাদের দেশে কত্থাগণ কুমারীকাল পর্য্যন্ত পিতামাতার আশ্রয়ে প্রতিপালিতা হওয়ায় মাতা পিতার স্বভাব প্রাপ্ত হন । সুতরাং জনক জননী সৎ হইলে কত্থা যে সৎস্বভাবসম্পন্ন হন, তাহার আর সন্দেহ নাই । এই কারণেই সৎ পিতা মাতার বা সৎ পরিবার জনিতা কত্থা বিবাহ করা মনুষ্যের উচিত । এই সকল কত্থার গর্ভজাত সন্তান সুসন্তান হয় । সংসারে সুসন্তানের সংখ্যা যতই অধিক হইবে, সংসারে ততই স্বথের বৃদ্ধি হইবে । বুদ্ধি ও মেধার গুণে কুসন্তান বিদ্বান্ হইতে পারেন, কিন্তু চরিত্রহীন ব্যক্তি বিদ্বান্ হইলেও সংসারে অতীব দুঃখের বস্তু হন । তাঁহার কার্য্যে সকলে শশব্যস্ত । তিনি কখন যে কি দুষ্কার্য্য করিবেন তাহা তিনিই জানেন । একরূপ লোকের সংসর্গ সর্ব্বথা বর্জনীয় । চরিত্রবান্ সুসন্তানগণ জগতের অলঙ্কার । দেবদাস এইরূপে মনোমধ্যে চিন্তা করতঃ আবেগ বশতঃ স্বদেশবাসী শিক্ষিত সম্প্রদায়কে লক্ষ্য করিয়া অন্তঃকরে বলিতে লাগিলেন :—

হে স্বদেশবাসী কৃতবিদ্যা মহোদয়গণ! আপনাই সমাজের যাবতীয় দুর্নীতি মোচনের কর্তা এবং সুনীতিপ্রবর্তক। আপনাদের দৃষ্টান্ত সমাজের অপর সাধারণ জনগণ অনুকরণ করিয়া থাকেন; যৌন সম্বন্ধীয় দুর্নীতি বঙ্গদেশের অস্থিমধ্যে প্রবেশ করিয়াছে। এই দুর্নীতির উচ্ছেদ তোমাদের সমবেত চেষ্টা ব্যতিরেকে সম্ভবপর নহে। লজ্জা বা স্বার্থবশতঃ ইহা উৎসাদিত করিতে পশ্চাৎপদ হইও না। সকল দুর্নীতিরই বিমোচন করিতে বহুবিধ অন্তরায় আছে। তোমরা সেই সকল অন্তরায়ের উপর ক্রক্ষেপ করিও না; যাহা কর্তব্য প্রাণপণে তাহা সমাধান কর। কর্তব্যের অবহেলা করিলে তোমাদিগকে পাপাশ্রয় করিতে হইবে, এবং আপন দেশকে উৎসন্নতার পথাভিমুখ করিবে। তোমরা নিজের অবস্থা নিজের উপার্জনে উন্নীত কর। পরবিস্ত্রশোষণে তোমার দৈন্ত দশা ঘুচিবে না। পরকে দীন হীন করিলে তোমার সুখ কি বৃদ্ধি হইবে? যিনি তোমার ভাৰ্য্যা হইবেন, তাঁহার জনক জননী বা আত্মীয়গণ সুখে দিনপাত করিতেছেন, ইহা জানিলে কি তোমার সুখ স্বচ্ছন্দ হইবে না? এই কুপ্রথা বলবতী থাকিলে তোমাকে কি পশ্চাৎ ভাৰ্য্যার পিতা মাতার হান্ন কষ্ট ভোগ করিতে হইবে না? এই পাপ দুর্নীতি উৎসাদিত করিতে সবিশেষ যত্নশীল হও।

দেবদাস এই যৌন প্রথার ঘোর বিদ্রোহী। পিতৃব্য ও মাতার নিকট তিনি এ সম্বন্ধে প্রায় নানা কথা কহিতেন। তাঁহার যুক্তিপূর্ণ বাক্যাবলী শ্রবণ করিয়া তাঁহাদের মন ঘটকের কথায় কার্য্য করিতে অভিমুখ হইল না। তাঁহারা তাঁহার এই সকল সারগর্ভ সমাজহিতকর বাক্য সকল শ্রবণ করিয়া মনে মনে তাঁহার ভূয়সী প্রশংসা করিয়াছিলেন, এবং সংসার মধ্যে এই দুর্নীতি বাহাতে প্রচলিত না থাকে, তাহার জন্ত সাধ্যমত যত্নশীল হইয়াছিলেন। ঘটকগণ তাঁহাদের নিকট কোন আশ্বাস না পাইয়া নিরন্তর হইয়া চলিয়া গেলেন।



## অষ্টম পরিচ্ছেদ

রামকৃষ্ণপুর গ্রামে হরিদাস বসু নামে এক ব্যক্তি বাস করিতেন। তিনি অতি সদ্বিবেচক, বুদ্ধিমান ও ধার্মিক ছিলেন। তিনি কোন গবর্ণমেন্ট আফিসে চাকরী করিতেন। তাঁহার তিনটি পুত্র ও এক কন্যা জন্মিয়াছিল। প্রথম দুইটি পুত্র লেখা পড়ায় সর্বাশেষ উন্নতি সাধন করিতে না পারায় তাহাদিগকে বিদ্যালয় ছাড়াইয়া আপন আফিশে এক এক কার্যে নিযুক্ত করাইয়া দেন। তাহারা তাহাদের উপার্জিত সমস্ত বেতন পিতার হস্তে দিত। পিতা পুত্রদিগের প্রয়োজনীয় খরচ নির্বাহ কারণ পুত্রদিগকে কিছু কিছু দিতেন। বাকী সমস্ত বেতনে সংসার যাত্রা নির্বাহ ও অগ্ৰাণ্য প্রয়োজন সাধন করিতেন, হরিদাস বাবু ঐ দুইটি পুত্রের বিবাহও দিয়াছিলেন। কয়েকবৎসর হরিদাস বাবুর স্বচ্ছল অবস্থায় সংসারযাত্রা নির্বাহ হইয়াছিল। কিন্তু নিয়তির চক্র কে কিরাইতে পারে? হরিদাস বাবুর এই স্বচ্ছলতা অধিক দিন রহিল না। দুয়ারোগ্য বসন্ত রোগে ঐ দুই পুত্র একে একে পরলোক গমন করিলেন। শোক হুঃখে তিনি ক্লিষ্ট ও নিতান্ত শীর্ণ হইয়া উঠিলেন। তাঁহার সহ-ধর্মিণী অতি গুণবতী ও ধার্মিকা ছিলেন। পুত্র শোকে তিনি নিতান্ত

কাতরা, তাঁহার শরীর কঙ্কালসার হইয়াছিল। হরিদাসবাবু একজন জ্ঞানবান্ লোক ছিলেন। তিনি জ্ঞান বলে পুত্রশোক অনেক পরিমাণে অপনোদন করিলেও এই উপলক্ষ হইতে দারুণ অজীর্ণ রোগ তাঁহার শরীর একবারে জীর্ণ করিয়া ফেলিল। নানা চিকিৎসায় কথঞ্চিৎ রোগের হস্ত হইতে উদ্ধার লাভ করিয়া ছিলেন। তাঁহার সহধর্ম্মিণীর অবস্থা অতি শোচনীয়। একেত পুত্রশোকে তাঁহার শরীর জীর্ণ। তাঁহার মনের গতি উন্মাদের ঞায় হইয়াছিল। কখন যেন পুত্র দুইটি তাঁহার নিকট উপস্থিত, তাহারা মা বলিয়া তাঁহাকে ডাকিতেছেন, তিনি তাহাদিগকে কিছু খাওয়াইবেন বলিয়া, ইতস্ততঃ তাহাদিগের অনুসন্ধান করিতেছেন। সেই সময়ে কেহ সম্মুখে আসিলে তাঁহাকে জিজ্ঞাসা করিতেন, তুমি কি আমার দুইটি গোপালকে দেখিয়াছ ? এই ছিল, তাহারা আবার কোথায় গেল ? এইরূপ বিভ্রম তাঁহার প্রায় দেখা যাইত। কখন বা পুত্র দুইটিকে দেখিতে না পাইয়া তাহাদের গুণের কথা বিনাইয়া বিনাইয়া কাদিতেন। হরিদাস বাবু সহধর্ম্মিণীর পরিচর্যা কারণ কিছুকাল একটা পরিচারিকা নিযুক্ত করিয়াছিলেন এবং নিজেও বিধিমতে তাঁহার সেবা শুশ্রূষা করিয়া ছিলেন। কালবশে তাঁহার পত্নী অনেকটা স্তম্ভ হইয়াছিলেন।

পুত্র বিয়োগের পর আফিসের কার্য পরিচালন করা হরিদাস বাবুর অসাধ্য হইয়াছিল। তিনি অগত্যা সরকারী বৃত্তি ( Pension ) প্রাপ্তির আবেদন করিয়া কষ্ট হইতে অবসর লইলেন। এই সময় হইতে তাঁহার সাংসারিক অস্বচ্ছলতার আরম্ভ হইল। সরকার বাহাদুর হইতে তিনি যে বৃত্তি পাইতেন, তাহা সামান্য ; তাঁহার যে সামান্য বিষয় সম্পত্তি ছিল, তাহার আয়ও সামান্য। যাহা হউক এই উভয়বিধ আয় হইতে, তিনি একরূপে সংসার যাত্রা নির্বাহ করিতে লাগিলেন। তাঁহার কনিষ্ঠ পুত্রের বয়ঃক্রম এই সময়ে ৮ বৎসর মাত্র ছিল এবং কন্যাটির বয়স ত্রয়োদশ বৎসর। কন্যাটির বিবাহ জ্ঞাত্ত তিনি নানা স্থানে পাত্র

অন্বেষণ করিয়া ছিলেন। কিন্তু কোন স্থানেই ঠিক করিতে পারিলেন না। সকল পাত্রই তাঁহার অবস্থার অতিরিক্ত অর্থের আকাঙ্ক্ষা করেন। সুতরাং অর্থাভাব বশতঃ তাঁহার সমস্ত চেষ্টা বিফল হইল। একটা মাত্র কত্থা, সুপাত্রে দান করিবেন বলিয়া তিনি মনোমধ্যে কতই আশার পোষণ করিতেন, কিন্তু বিধাতার নির্বন্ধে তাঁহার সেই আশা একেবারে উন্মূলিতা হইয়া গেল। কোনরূপে কত্থা পাত্রস্থ করা তাঁহার ভাগ্যে অতি কঠিন হইয়া উঠিল।

সমাজের লোক অর্থলোভে বশীভূত। আজ ধার্মিকের কত্থার ভাগ্যে সুপাত্র ষুটিল না। হরিদাস বাবুর কত্থা সুহাসিনী অতি সুশীলা কন্নিষ্ঠা এবং ভগবানে ভক্তিমতী; এরূপ কত্থার পাণিগ্রহণে সংসারে সুখ স্বচ্ছন্দ বিরাজ করিয়া থাকে। আজ অর্থলোভ ধার্মিকের কত্থার গুণ গ্রহণ করিল না। হরিদাস বাবু কালচক্রে দরিদ্র হইয়া পড়িয়াছেন তাঁহার উপার্জনশীল সচরিত্র ছইটী পুত্র অতি অল্প দিনের মধ্যে একে একে ভব-ধাম পরিত্যাগ করিয়াছেন, তিনি রোগে শোকে জর্জরিত। হ্রস্ব অর্থলোভবশতঃ কেহই তাঁহার প্রতি অণুমাত্র সমবেদনা দেখাইল না। ঘাহারা তাঁহাকে ধার্মিক জানিয়া তাঁহার প্রাতি শ্রদ্ধা ভক্তি করিতেন, ভালবাসিতেন আজ তাঁহাদের মধ্যেও অনেকে অর্থলোভ বশতঃ তাঁহার প্রার্থনা কার্য্যতঃ উপেক্ষা করিলেন। হরিদাস বাবু কত্থাটিকে পাত্রস্থ করিতে আপনার বিষয় সম্পত্তি বিক্রয় কারবার প্রস্তাব করিলেন। কতিপয় মহাজনের নিকট ঐ সম্পত্তির দলিলাদি দেখাইলেন এবং তাঁহাদিগকে উহা ক্রয় করিবার জন্ত অরুরোধ করিলেন, কিন্তু কেহই তাঁহাকে তাঁহার প্রয়োজনমত উপযুক্ত মূল্য দিতে স্বীকার করিলেন না। তখন তিনি অনন্তোপায় হইয়া সর্ব্বদুঃখপরিহারকারী সেই ভূতভাবন বিখানয়ত্তা ভগবান্কে উদ্দেশ করিয়া কাতর কণ্ঠে মন্ত্ৰস্থল হইতে কহিতে লাগিলেন :—  
ঠাকুর! আমার সকল চেষ্টাত বিফল হইল, আমি সকলের নিকট প্রত্যা-

খাত হইলাম । আমার কষ্টে কষ্ট পাইতে ত কাহাকেও দেখিলাম না । ঠাকুর ! তুমি ত দয়াময়, তুমি আমার প্রতি কখন ত নির্দয় হইবে না । আমার পাপের প্রায়শ্চিত্ত হইতেছে । ভালই হইতেছে । তোমার কল-কাটি আমি কি বুঝিব ? তুমি বইত আমার কেউ নাই । আমার সকল ছুঃখ তুমি না ঘুচাইলে আর কে ঘুচাইবে ? ঠাকুর ! দয়াময় ! আর ছুঃখ সহ্য হয় না । হরিদাস বাবু এই কথা যেমন বলিতেছেন আর নয়নযুগল দিয়া অশ্রুধারা পড়িতেছে । এ অশ্রুধারায়, এ কথায় মানুষ তুমি না বিচলিত হইতে পার, সর্বসম্ভাপনাশক ভগবান্ কখন হির থাকিতে পারেন না ।

হরিদাস বাবুর সহিত দেবদাসের পিতার বিশিষ্টরূপ হৃদয়তা ছিল । তাঁহার উভয়েই ধার্মিক ছিলেন । উভয়ের বাটীতে উভয়েরই গতি বিধি ছিল । দেবদাস বাল্যকাল হইতে পিতার গ্রাম হরিদাস বাবুকে শ্রদ্ধা ভক্তি করিতেন । এক্ষণে দেবদাস উচ্চ রাজকার্য্যে অভিষিক্ত । তাঁহার মাসিক বেতন যথেষ্ট । ভগবানের নিকট শেযোক্ত প্রার্থনা করিবার পর হরিদাস বাবু মনে মনে সংকল্প করিলেন যে দেবদাসের নিকট যাই, সে যেক্রপ সচরিত্র দয়ালু তাহাকে আমার বিষয়-ক্রয় করিবার জন্ত অনুরোধ করিলে সে কিছুতেই আমার অনুরোধ প্রত্যাখ্যান করিতে পারিবে না । তাহার কোন আবশ্যক না থাকিলেও অনুরোধের বশবর্তী হইয়া আমার এই সামান্য বিষয় সম্পত্তি আমার অভীষিত মূল্যে ক্রয় করিতে পারিবে । হরিদাস বাবু এই সংকল্প করিয়া একদিন কলিকাতায় দেবদাসের বাটীতে উপস্থিত হইলেন ।

সুশীল ধর্ম্মাত্মা দেবদাস বহুদিনের পর পিতৃবন্ধুর সন্দর্শন পাইয়া যার-পর নাই আনন্দিত হইলেন । তখন তিনি বাটীতে বসিয়া রাজকার্য্য সংশ্লিষ্ট কতকগুলি কার্য্য করিতেছিলেন । সমস্রমে গাত্রোত্থান করিয়া পিতৃ বন্ধুকে প্রণাম করিলেন এবং তাঁহার পদধূলি মস্তকে লইয়া পরম



আনন্দলাভ করিলেন । তদনন্তর তাঁহার ও তাঁহার পরিবারস্থ অপর সকলের কুশল বার্তা একে একে জিজ্ঞাসা করিলেন । হরিদাস বাবুর পুত্রবিয়োগের ও শারীরিক পীড়ার বিষয় তিনি পূর্ব হইতে অবগত ছিলেন । এক্ষণে তাঁহাকে অতি জীর্ণ শীর্ণ দেখিয়া বড়ই দুঃখিত হইলেন । ভৃত্যদিগকে তাঁহার অবস্থান ও স্নানাহারের উপযুক্ত বন্দবস্ত করিবার আদেশ দিয়া তাঁহার বিশ্রামার্থ তাঁহাকে কক্ষান্তরে লইয়া গেলেন । তথায় তাঁহার বিশ্রামের প্রয়োজনীয় দ্রব্যাদি ভৃত্য দ্বারা আনাইয়া দিয়া তাঁহাকে সেই কক্ষমধ্যে রাখিয়া তাঁহার অনুমতি ক্রমে পুনরায় রাজকার্য্যে প্রবৃত্ত হইলেন ।

হরিদাস বাবু দেবদাসের সদাচরণে পরম প্রীতি লাভ করিলেন । তখন তাঁহার সেই প্রার্থনা ফলবতী হইবার সম্ভব এই বিশ্বাস তাঁহার মনোমধ্যে উদয় হইতে লাগিল । দেবদাসের পিতৃব্যের সহিত তাঁহার সাক্ষাৎ হইল ; উভয়ে পরস্পর কথা বার্তায় পরম পরিতোষ প্রাপ্ত হইলেন । দেবদাসের মাতা বহুকাল পরে স্বামীবদ্ধ তাঁহাদিগের নিকট আসিয়াছেন জানিতে পারিয়া সানন্দ মনে জনেক পরিচারিকা দ্বারা তাঁহার ও বাটীর সকলের কুশল বার্তা জিজ্ঞাসা করিলেন । আফিশে বাইবার সময় নিকটবর্তী হইলে, দেবদাস স্নানাদি কার্য্য সম্পন্ন করিয়া হরিদাস বাবুকে সঙ্গে লইয়া একত্রে ভোজন করিতে বসিলেন । ভোজনাশ্বে মুখ প্রক্ষালনাদি করিয়া আফিশের পার্শ্চদ পরিধান পূর্বক পিতৃবন্ধুর অনুমতি লইয়া শকটারোহণে আফিসের অভিমুখে প্রস্থান করিলেন । হরিদাস বাবু বিশ্রাম গৃহে গিয়া শয্যায় শয়ন করিলেন ।

সন্ধ্যার পর দেবদাস হরিদাস বাবুর বিশ্রাম কক্ষে প্রবেশ করিলেন এবং তাঁহাকে ষথারীতি অভিবাদনাদি করিয়া তাহার শয্যার একদেশে উপবেশন করিলেন । এই সময়ে হরিদাস বাবু দেবদাসকে নির্জজন পাইয়া আনুপূর্ব্বক আপনার অবস্থা ও আগমনের কারণ জানাইয়া অতি দুঃখি-

ভাস্কর্য্যে কহিতে লাগিলেন :—বৎস ! তুমি যদি দয়া করিয়া ৪০০ টাকা মূল্যে আমার পৈতৃক জমীগুলি ক্রয় কর তাহা হইলে আমি কোনরূপে কন্যার বিবাহ দিতে পারি, অত্যাধা অর্থভাবে আমার কন্যার বিবাহ দিতে পারিতেছিলাম, বিনা অর্থে বা সামান্য অর্থে কেহই বিবাহ দিতে সম্মত হন না । কন্যাটির বয়ঃক্রম ত্রয়োদশ বর্ষ পূর্ণ হইতে চলিল । এ সময় কন্যাকে পাত্রস্থা করিতে না পারিলে প্রতিবাসী মণ্ডলী মধ্যে বিলক্ষণ অসম্মান ও নিন্দার ভাজন হইতে হইবে । কন্যাকে আর গৃহে রাখা যায় না । কন্যা কখনও অবিবাহিতা থাকিবে না, ভগবান্ উহার পাত্র মিলাইয়া দিবেন আমি নিশ্চিত জানি ; তথাপি যেরূপ দেশের ভাব, প্রয়োজন মত অর্থ না দিতে পারিলে কতকটা ভাল পাত্র একেবারে মিলিবে না । রোগে আমার শরীর নিতান্ত জীর্ণ হইয়া পড়িয়াছে । অবশ্য পৈতৃক বিষয়ের উপস্থিত হইতে আমার কথঞ্চিৎ সাংসারিক সাহায্য হইতেছে, কিন্তু ঐ বিষয়টা বিক্রয় না করিলে আমার অর্থ সংস্থানের আর দ্বিতীয় উপায় নাই । আমি অনেক স্থলে উহা বিক্রয়ের জন্ত চেষ্টা করিয়াছিলাম কিন্তু উহার জন্ত কেহই আমাকে অভীষিত মূল্য দিতে স্বীকার করেন না । যদি সম্পত্তির মূল্য চারিশত টাকা হইবে না বলিয়া তোমার কোনরূপ আপত্তি থাকে কিম্বা যদি বল ঐ সম্পত্তি ক্রয় করিবার তোমার কোন প্রয়োজন নাই তাহা হইলে বৎস ! আমি তোমার নিকট এই অনুরোধ করি যে তুমি আমাকে তোমার পিতৃবঙ্কু জানিয়া আমার এই ঘোর বিপত্তির সময়ে আমার প্রার্থিত মূল্যে সম্পত্তিটা ক্রয় করিয়া আমার উপকার কর । আমার শ্রাম দরিদ্রের হঃখ দূর করিতে যত্নশীল হইলে করুণাময় পরমেশ্বর নিশ্চয় তোমার মঙ্গল বিধান করিবেন ।

পিতৃবঙ্কুর এই সমস্ত হৃদয়বিদায়ক কথা শুনিয়া তিনি আর স্থির থাকিতে পারিলেন না । মনের আবেগে হরিদাস বাবুকে কিছু না বলিয়া বাটীর মধ্যে চলিয়া গেলেন । হরিদাস বাবু পূর্ববৎ একাকী রহিলেন ।

তিনি মনে মনে ভাবিতে লাগিলেন অর্থই সম্বন্ধ কলুষিত করে । দেবদাস ত ভাল মন্দ কিছুই উত্তর দিলেননা ; বুঝিলাম বিধাতা আমার প্রতি এখ-  
নও অনুকূল নহেন । সামান্য সম্পত্তির অধিক মূল্য কেই বা দিতে স্বীকার  
করে ? অত্রে ঐ সম্পত্তির দরুণ স্বল্প মূল্য দিতে চাহে ইহা বলিয়া আমি  
ভাল কার্য্য করি নাই । কি করি উপায় নাই । দেবদাসের ত্রায় আত্মীয়ের  
নিকট হইতে বিফলমনোরথ হইলে আমার কত্তার বিবাহের আর উপায়  
নাই । হে পরম কারুণিক ভগবন্ ! তুমি দরিদ্রের প্রতি কৃপাশীল ।  
তুমি কি আমার এই ক্রন্দন শুনিয়াও শুনিতেছ না ? তোমার কাকাল  
আর কত ক্লেশ সহ করিবে ? ভাবিতে ভাবিতে হরিদাস বাবুর নয়ন  
যুগল দিয়া অশ্রুজল পড়িতে লাগিল ।

এই সময়ে অকস্মাৎ সম্মুখ দ্বার দিয়া দেবদাসের পিতৃব্য হরিদাস বাবুর  
বিশ্রাম কক্ষে প্রবেশ করিলেন । দেখিলেন তাঁহার নয়ন যুগলে জলধারা  
বহিতেছে । ইহা দেখিয়া তাঁহার মন, ক্ষোভ ও দুঃখে নিতান্ত কাতর  
হইয়া উঠিল । তিনি হরিদাস বাবুর মনোবেদনা শীঘ্র নিবৃত্তি করা যুক্তি-  
যুক্ত ভাবিয়া আশ্বাস বাক্যে তাঁহাকে কহিতে লাগিলেন ;—হরিদাস বাবু,  
আপনার কত্তার বিবাহের নিমিত্ত আর আপনাকে ব্যতিব্যস্ত হইতে হইবে  
না । পরম করুণাময় ভগবান্ আপনার প্রতি বিশেষ অনুকূল, আপনার  
মনের দুঃখ নির্বাপিত করিবার জন্ত আজ আমার দ্বারা তিনি আপনার  
নিকট স্নসমাচার প্রেরণ করিতেছেন । দেবদাসের মাতার, আমার এবং  
দেবদাসেরও অভিপ্রায় যে আপনি আপনার কত্তার সহিত দেবদাসের  
বিবাহ সম্বন্ধ স্থির করেন । আপনার বিষয় সম্পত্তি বিক্রয় করিতে হইবে না,  
প্রত্যুত দেবদাস আপনার প্রয়োজনোপযুক্ত সমস্ত অর্থাদি প্রদান করিবে ।

হরিদাস বাবু এই পরম সুখকর সমাচার শ্রবণ করিয়া আনন্দ ও  
বিস্ময়ে উৎফুল্ল ও নিকরীক হইয়া পড়িলেন । নয়ন যুগলে পুনরায় অশ্রু-  
জল দেখা দিল । কিয়ৎক্ষণ নিস্তব্ধ থাকিয়া ভগবান্কে উদ্দেশ

করিয়া কহিতে লাগিলেন :—দয়াময় প্রভো ! ইহা তোমার বিচিত্র লীলা । দেবদাসের সহিত একজন দীনহীন কাঙ্গালের কন্যার যে বিবাহ হইবে ইহা আমি স্বপ্নেও একবার ভাবি নাই । দেবদাস সর্বগুণে অলঙ্কৃত, বিশেষতঃ একজন উচ্চশ্রেণীর রাজকর্মচারীর পদে অভিষিক্ত । এরূপ পাত্রের কন্যাদান সৌভাগ্যের পরিণাম । যেরূপ দেশের অবস্থা তাহাতে দেবদাসের শ্রায় পাত্রকে কন্যাদান করিতে হইলে ৬৭ হাজার টাকা পাত্রকে দিতে হয় । ৬৭ হাজার টাকা ধিনি বিবাহকালে জামাতাকে দিতে পারেন তিনি যে বিশেষ ধনাঢ্য ব্যক্তি হইবেন তদ্বিয়ে সন্দেহ হইতে পারে না । জামাতার ধনাঢ্য ব্যক্তির নিকট যথেষ্ট অর্থ প্রাপ্তির সম্ভাবনা । দেবদাস এসমস্ত পদতলে দলিত করিয়া একটা কাঙ্গালের কন্যাকে বিবাহ করিবেন ইহা অপেক্ষা মহত্বের পরিচায়ক আর কি হইতে পারে ? ধন্য বঙ্গদেশ ! আজ তোমার ভূমিতে দেব প্রকৃতির আবির্ভাব । ধন্য দেবদাসের জনক জননী ! তোমরা দেবদাসের শ্রায় পুত্রের পিতা মাতা হইয়া জগতে খ্যাতি-সম্পন্ন । সুহাসিনী মা আমার, পূর্বরয়ে যে কি মহতী তপস্তা করিয়াছিলেন তাহা বলা যায় না । সেই তপস্তার বলে সর্বগুণালঙ্কৃত পবিত্রমনা দেবদাসের গলে বরমালা দিবার সৌভাগ্যলাভ করিয়াছেন । হরিদাস বাবু দেবদাসের পরিবারস্থ ব্যক্তিবর্গের অমানুষিক সৌজ্ঞেয় দর্শনে যারপরনাই প্রীতলাভ করিলেন এবং তাঁহার হৃদয়ের অন্তস্তল হইতে পুঞ্জ পুঞ্জ আশীর্বাদ দেবদাসের উপর বর্ষিত হইতে লাগিল ।

দেশপ্রচলিত প্রথা অনুসারে শুভদিন দেখিয়া হরিদাস বাবু দেবদাসের সহিত আপন কন্যা সুহাসিনীর বিবাহ সম্বন্ধ স্থির করিলেন । দেবদাসের এই বিপুল স্বার্থত্যাগের ও সমাজসংস্কারের চূড়ান্ত দৃষ্টান্তের সমাচার নগরে নগরে, গ্রামে গ্রামে তড়িৎবেগে প্রচারিত হইল । সর্ব-স্থানেই তাহার ভূয়সী প্রশংসা শ্রুত হইতে লাগিল । তাঁহার কার্যকলাপ মনুষ্যের সর্বথা অনুকরণীয় ।

ক্রমে বিবাহের দিন আসিয়া উপস্থিত হইল । দেবদাস বরভূষণে ভূষিত হইয়া বন্ধুবর্গ সমভিব্যাহারে রামকৃষ্ণপুর গ্রামে হরিদাস বাবুর বাটীতে যথা সময়ে উপস্থিত হইলেন । পুর নারীগণের শঙ্খ ও আনন্দ ধ্বনিতে কত্য়াকর্তার বাটী মুখরিত হইয়া উঠিল । যথাসময়ে শুভলগ্নে উদ্বাহ-ক্রিয়া সূসম্পন্ন হইল । বন্ধুবর্গের ও নিমন্ত্রিত ব্যক্তিবর্গের এবং অত্যান্ত লোকজনের আহারাদি অত্যাশ্চর্যরূপে সম্পাদিত হইল । পর দিন প্রাতে দীন দরিদ্রগণকে অভীষিত অর্থাৎ দান করিয়া দেবদাস সূহাসিনীকে লইয়া কলিকাতাভিমুখে প্রস্থান করিলেন ।



## নবম পরিচ্ছেদ

যদিও পিতার মৃত্যুর পর হইতে দেবদাস সংসারী লোকের গ্রাম অনেক বিষয়ে কার্য্য করিতে বাধ্য হইয়াছিলেন, তথাপি উদ্বাহ ক্রিয়ার পর হইতে তাঁহাকে প্রকৃত সংসারী হইয়া কার্য্যক্ষেত্রে অবতরণ করিতে হইল। দেবদাস সাধারণ সংসারীর গ্রাম ছিলেন না। তিনি ধার্মিক। সর্বদা ধর্ম্মকে লক্ষ্য রাখিয়া সংসার যাত্রা নির্বাহ করিতেন। স্বার্থ তাঁহার নিকট অতি তুচ্ছ পদার্থ ছিল। স্বার্থের অনুরোধে তিনি আপন কর্তব্য হইতে অণুনাশ বিচলিত হইতেন না। নিজের ক্ষতিক্কে তিনি ক্ষতি বলিয়া বিবেচনা করিতেন না। যদি তিনি ক্ষতি স্বীকার করিলে অন্তের মঙ্গল হয় তাহাই তিনি শ্রেয়স্কর বলিয়া তদনুযায়ী কার্য্য করিতেন। সংসারী লোক মাত্রের বাসনা যে, তিনি যে কার্য্য করিবেন তাহাতে যেন তাঁহার জয় হয়। সামান্য দ্রব্য জয় হইতে বৃহৎ বৃহৎ কার্য্য পর্য্যন্ত যত কিছু কার্য্য আছে, সকল কার্য্যেই তিনি জয়লাভ করিবেন, ইহা সংসারী লোকের একটা স্বভাব সিদ্ধ ধর্ম্ম। জয় একজনের হয়, অপর লোকের পরাজয়। সংসার ক্ষেত্রে যিনি যে কার্য্য করিতেছেন, যদি প্রত্যেকের সেই কার্য্য জয় হয়, তবে পরাজিত কে হইবে? যাহারা এইরূপ জয়লাভের অশ্রু যত্নশীল, যদি কোন কারণে তাঁহাদের পরাজয় হয় তবে তাঁহাদের ক্লোভ ও হৃৎথের

আর সীমা থাকে না। জয় পরাজয় তুল্যরূপ বিবেচনা করিয়া সংসারে কার্য্য করিলে ক্ষোভ ও দুঃখের আর কারণ থাকে না।

চিন্তাশীল দেবদাস সংসার সম্বন্ধে নানাবিধ চিন্তা করিতেন। একদিন তাঁহার মনোমধ্যে সংসার কি এবং কেনবা সংসারী লোক দুঃখিন্যাসক্ত হয় এই চিন্তা সহসা আসিয়া উপস্থিত হইল। চিন্তা তরঙ্গে কিয়ংকাল ভাসমান থাকিয়া তিনি বেরূপ সিদ্ধান্তে উপনীত হইলেন, নিম্নে তাহার সংক্ষিপ্ত বিবরণ প্রকাশিত হইল।

স্ত্রী পুরুষ এই উভয় লইয়া মৌলিক সংসার। পিতা, মাতা, ভ্রাতা, ভগিনী পুত্র, কন্যা, ইত্যাদি মনুষ্যের আত্মীয়বর্গ সময় অনুসারে ও অবস্থা-ভেদে এই মৌলিক সংসারে সংযুক্ত থাকিয়া মৌলিক সংসারের পরিসর বৃদ্ধি করিয়া থাকে। এই সংসারে সুখ স্বচ্ছন্দের জন্ত মনুষ্য একান্ত লালায়িত হইয়া অর্থ সংগ্রহে চেষ্টাশীল হয়েন। কেহ কোন রূপে সংসারস্থ মনুষ্যগণের ভরণপোষণোপযোগী অর্থ সংগ্রহ চেষ্টায় ব্যস্ত, কেহ বা তাহাতেও সুখ স্বচ্ছন্দের মাত্রা পরিসমাপ্ত না করিয়া বিপুল সুখ-স্বচ্ছন্দের আশায় বিপুল অর্থোপার্জনে সতত যত্নবান্ হয়। এই সংসারের উপর যাহার যেরূপ আসক্তি, অর্থোপার্জনের চিন্তা ও চেষ্টা তাঁহার সেইরূপ বলবতী। নিজের সংসারের উপর আসক্তি বলবতী হইলে মনুষ্য কেবল আপনার বা আপনার সংসারের লোকের সুখ স্বচ্ছন্দের উপর লক্ষ্য রাখিয়া থাকেন ; আপন প্রতিবেশী বা অপর কাহারও সুখস্বচ্ছন্দের প্রতি দৃকপাত করেন না। এই কারণে মনুষ্য মনুষ্যের প্রতি দ্রোহাচরণ করিয়া থাকেন। যাহারা সহুপায়ে অর্থোপার্জন করিতে সক্ষম তাঁহাদের ঐরূপ দ্রোহাচরণের আবশ্যক হয় না। কিন্তু যাহারা সে উপায়ে অর্থসংগ্রহ করিতে সক্ষম নহেন তাঁহাদের নিকট সমাজের অনিষ্টাচরণ সর্বদা আশঙ্কনীয়।

সাংসারিক সুখ ও অর্থোপার্জন এই দুইটা বিষয় লইয়া মনুষ্য এরূপ ব্যতি-

ব্যস্ত হইলেন যে, দিনের মধ্যে একবারও সেই পরমকারুণিক সৰ্ব্বমঙ্গল-দাতা বিধাতার দিকে দৃষ্টিপাত করিতে পারেন না। মনুষ্য তুমি এইরূপে আপনি আপনাকে নষ্ট করিয়া ফেলিতেছ। যাহাতে কাহারও উপর কোন দ্রোহাচরণ না হয় এরূপ ভাবে যদি অর্থোপার্জন কর বা বিষয়ার্জন কর, তাহা প্রশংসার বিষয় বটে, কিন্তু অপরের অনিষ্ট করিয়া অর্থ বা বিষয় অর্জন করিলে কে তোমায় ভাল বাসিবে? কে তোমায় প্রশংসা করিবে? সমাজের প্রতি দ্রোহাচরণ নিবারণ জন্ত রাজদণ্ডের বিধান হইয়াছে কিন্তু কেহ কেহ এরূপ বুদ্ধিশালী যে তাঁহারা এরূপ অনিষ্টাচরণ করিবে আর এরূপ উপায়রাশি অবলম্বন করিবেন যে, কোনরূপ রাজদণ্ডের ভোগ তাঁহাদিগের আর ভোগ করিতে হইবে না। বুদ্ধি সুদিকে চালিত হইলে জগতের সুখের কারণ, আর কুদিকে চালিত হইলে দুঃখের কারণ। মনুষ্য একবার চিন্তা কর, অসহুপায়ে অর্থ বা বিষয় অর্জন করিতে গিয়া তোমাকে কত মিথ্যা প্রবঞ্চনার আশ্রয় গ্রহণ করিতে হইয়াছে। দিবারাত্র নানাবিধ ভাবনায় বা হুশিষ্টায় আপনাকে জীর্ণ করিয়া ফেলিতেছ। তোমার কার্য্যে কত লোক অন্নাভাবে দেহত্যাগ করিয়াছে। কত শিশু সন্তান অকালে পিতা মাতা হারাইয়া অন্নের জন্ত দ্বারে দ্বারে ক্রন্দন করিয়া বেড়াইতেছে। কত লোক ভদ্রাসনচ্যুত হইয়া নানা স্থানাবলম্বী হইয়া কষ্টে দিনপাত করিতেছে। তুমি নিজের সুখ স্বচ্ছন্দের জন্ত অপরের সুখ স্বচ্ছন্দের বস্তু কাড়িয়া লইতেছ। ভাল, ইহাতে তোমারই বা কি হইল? দিবারাত্রি কুচিন্তায় কুচেষ্ঠায় নিতান্ত জীর্ণ দেহ। তোমার নিজের জন্ত কতটুকু অর্থের প্রয়োজন? তোমার নিজের সংস্কারানুসারে যে কার্য্য করিলে তুমি সুখী হইবে আশা কর, সেই কার্য্য করিতে গিয়া তোমাকে এত কষ্ট ভোগ করিতে হইয়াছে যে, সেই কষ্টের তুলনায় তোমার সেই সুখ সামান্য। ইহ জগতে যত দিন থাকিবে, কল্পিত সুখের চেষ্ঠায় দুঃখভোগ করিতে হইবে। ইহা অপেক্ষা পরিতাপের বিষয়



আর কি হইতে পারে ? এই যে সৌধমালা তোমার সম্মুখে বিরাজিত, এই যে উৎকৃষ্ট শয্যা পালক প্রভৃতি তুমি স্নুখে নিদ্রা বাইবার জন্য প্রস্তুত করাইয়াছ, তুমি দিবারাত্রি কুচিস্তায় আন্দোলিত, তোমার স্নুনিদ্রা কোথায় ? এই যে নানাবিধ অতি সুস্বাদু আহাৰ্য্য বস্তু তোমার অর্থে প্রস্তুত ও সংগৃহীত হইয়াছে, নানাবিধ হুশ্চিন্তা ও কষ্টে তোমার শরীর বহু-বিধ উৎকট উৎকট রোগের আলয়ীভূত হওয়ায় এই সকল আহাৰ্য্য বস্তু কে স্নুখে আহাৰ করিবে ? তুমি বহু চেষ্টা, বহু পরিশ্রম, বহু কষ্টের পর তোমার আরাধ্য সুখ হস্তগত করিলে সত্য, কিন্তু সে সুখ একবার ভোগ করিলে আর তোমার ভাল লাগিবে না । আবার নূতন প্রকারের সুখ পাইবার জন্য তোমার মন প্রধাবিত হইল । এখন ভাব দেখি, তুমি নিজ কৰ্ম্ম-দোষে আপন মন বুদ্ধি যেরূপ সংস্কারাত্মক করিয়াছ, বল দেখি, কোনরূপ সুখ তাহাদিগকে কি পর্যাাপ্ত করিতে পারে ? যত দিন জগতে বাস করিলে কৈ তোমার সুখ ত দেখিলাম না । জলরাশির মধ্যে থাকিয়াও তোমার কণ্ঠ শুষ্ক । তুমি মহামায়ার প্রভাবে হাবুডুবু খাইতেছ, এই মহামায়ায় তুমি এমনি জড়িত যে, তোমার উদ্ধারের আর উপায় নাই ।

অপরন্তু সংসারযাত্রা নির্বাহার্থ যদি তুমি মঙ্গলদাতা বিধাতার প্রতি দৃষ্টি রাখিয়া সকল কার্য্য সম্পাদন কর, তাহাতেই বা তোমার কি শুভ হইবে ?—ইহা তুমি জিজ্ঞাসা করিতে পার । ভগবানের উপর দৃষ্টি রাখিলে জীবের অমঙ্গলজনক কোন কার্য্য তোমার দ্বারা সাধিত হইবে না, কারণ যেমন আমার মধ্যে ভগবান বিজ্ঞমান তেমনি অল্প জীবের মধ্যেও বিরাজিত । আত্মহুত্বের জন্তে অস্ত্রের প্রতি দ্রোহাচরণ করিলে কি জীবের প্রতি কি দয়া করা হয় ? যে অনাদি পুরুষ সেই জীবের মধ্যে আছে, তাঁহার প্রতি সম্মান শ্রদ্ধা বা ভক্তি করা হয় ? স্তবরাং স্বস্ত্বের জন্য অস্ত্রের অনিষ্ট করা বিশ্বনিঃস্তুার অভিপ্রেত নয়, এই জ্ঞান তোমার অন্তঃকরণে স্বতঃ প্রসারিত হইয়া পড়িবে । ঘেব, হিংসা, পরনিন্দা, পরমানি, স্বস্বতৎপরতা তোমার

মন হইতে ক্রমশঃ তিরোহিত হইয়া যাইবে । তোমার কার্যের সাধুবাদ সকলে করিবে । তুমি একজন মহাত্মা বলিয়া সকলের শ্রদ্ধা ভক্তি আকর্ষণ করিতে পারিবে । কোন রূপ কুচিন্তা আসিয়া তোমার মন বিভ্রাবিত করিতে পারিবে না । তুমি নিশ্চিন্ত মনে সুখে নিদ্রা যাইতে পারিবে এবং যে কিছু আহাৰ্য্য বস্তু সংগ্রহ করিতে পারিবে, তাহাও সুখে আহাৰ্য্য করিতে পারিবে । সংকার্য্য করিলে শরীর মন সর্বদা প্রফুল্ল থাকে ।

অনেকে বলিয়া থাকেন যে, অর্থ সকল অনর্থের মূল । অতএব অর্থকে পরিত্যাগ করা উচিত । তাহা না করিলে ধৰ্ম্মাচরণ হয় না । সংসারে বাস করিবে, আর অর্থের চেষ্টা করিবে না একথা কদাপি যুক্তিসঙ্গত নহে । সংসারে সমস্ত কার্য্য অর্থ সাপেক্ষ । মনুষ্যের অর্থোপার্জন বা বিষয়ার্জন আবশ্যক কিন্তু তাহা একরূপভাবে করা উচিত, যেন তাহাতে কাহারও কোনরূপ অনিষ্ট ঘটতে না পারে বা ধর্ম্মের বিরোধী না হয় । সহপায়ে যাহা উপার্জন করিবে তাহাতেই সন্তুষ্ট হইবে । ধর্ম্মপথে থাকিয়া ও লোককে কষ্ট না দিয়া যদি উপার্জন অন্ন হয় তাহাতে ক্ষতি নাই । সং হউক অসং হউক যে কোন উপায়ে হউক অর্থার্জন করিতে হইবে এ ধারণা ধার্ম্মিক ব্যক্তির অন্তঃকরণে কখন আসিতে পারে না । পরদ্রোহকারী অধার্ম্মিক কখন সন্তোষরূপ অমৃত লাভ করিতে পারে না ; ধর্ম্ম সংসারে মনুষ্যের একমাত্র আশ্রয় । ইহাকে আশ্রয় করিয়া চলিলে মনুষ্য সমস্ত বিঘ্ন বিপত্তি হইতে অনায়াসে আপনাকে উদ্ধার করিতে পারিবে ।

এই সংসারে যে কত প্রকার প্রলোভনের বিষয় আছে তাহার ইয়ত্তা করা যায় না । ঘেব, হিংসা, কাম, ক্রোধ, লোভ প্রভৃতি রিপুগণ ইহাতে সর্বদা বিচরণ করিতেছে । মিথ্যা, প্রবঞ্চনা চারিদিকে ভীষণ আকারে বিরাজমানা । কত বিঘ্ন বিপত্তি করাল মুখবাদান করিয়া মনুষ্যকে গ্রাস করিতে ধাবমানা । আবার মোহ প্রযুক্ত স্ত্রী পুত্রাদির ইষ্ট চিন্তা

মহুযাকে শশবাস্ত করিতেছে। এই সংসার সমুদ্রে ধার্মিকরূপ স্নান কর্ণধার ধর্মরূপ হাল ধরিয়া স্থির থাকিতে পারেন। অপর সকলে এই প্রবল সমুদ্রস্রোতে ভাসমান। যিনি এই সংসারে ধর্মপথে থাকিয়া সংসার-যাত্রা নির্বাহ করিতে পারেন, তাঁহাকে মহাযোগী বলিলে অত্যাুক্তি হয় না। তিনি সংসারে যে যোগ আরম্ভ করিয়াছেন ঐ সকল পাপরূপ পিশাচাদি কোনরূপে তাঁহার সেই যোগ ভঙ্গ করিতে সমর্থ নহে। যিনি সংসার হইতে বিচ্যুত হইয়া নির্জনে ভগবদারাধন করিতেছেন কোনরূপ প্রলোভন বা বিঘ্ন বিপত্তিতে যাহাকে কখন পর্য্যদন্ত হইতে হয় না তাঁহা অপেক্ষা কি এই সংসারী মহাযোগী অধিকতর ক্ষমতালী নহেন? যিনি সংসার মধ্যে জী পুত্র কন্যা লইয়া সংসারের যাবতীয় বিঘ্ন বিপত্তি দ্বারা বিজ্ঞাবিত হইয়াও অক্ষুণ্ণ ভাবে ভগবদারাধনে একান্ত তৎপর এবং কোন প্রলোভনাদির দিকে দৃষ্টিপাত না করিয়া ধর্ম্মানুসারে সংসার যাত্রা নির্বাহ করিয়া থাকেন, তাঁহারই যোগ সিদ্ধ, তিনিই মুক্ত পুরুষ।

অনেকের ধারণা কামিনী কাকন পরিত্যাগ করিতে না পারিলে ধর্ম্ম-চরণ হয় না। কামিনী কাকন ত্যাগ করা সংসারী জীবের পক্ষে অসাধ্য। পরম মঙ্গলময় বিধাতা মহুযাকে সংসার বন্ধ করিয়াছেন, বুদ্ধি, বিচার, বিবেক প্রভৃতি ঐশ্বরিক বৃত্তি তিনি মহুযাকে দিয়াছেন। ধর্ম্মপথে থাকিয়া মহুযা সংসারে বিচরণ করিবে, ইহাই তাঁহার অভিপ্রেত বলিয়া বুঝা যায়। কামিনী ত্যাগ যদি জীবের ধর্ম্মানুচরণের প্রতিকূল হয় তবে মহুযের ইহা ত্যাগ করা উচিত; কিন্তু কামিনী ত্যাগ করিলে সংসারে মহুযের উৎপত্তি আর হইবে না। মহুযের উৎপত্তি না হইলে কালক্রমে সংসারও ধ্বংস প্রাপ্ত হইবে। সংসার ধ্বংস হওয়া কি সেই মঙ্গলময় বিধাতার উদ্দেশ্য? তবে কেন বা তিনি জী পুরুষ হই শ্রেণীতে মহুযাকে বিভক্ত করিলেন? কেন বা জীকে গর্ভধারণের ও পুরুষকে গর্ভোৎপাদনের ক্ষমতা দিয়াছেন? আর যদি মহুযা অর্থের চেষ্টা না করিবেন বা অর্থকে একবারে দূষিত পদার্থ

বলিয়া বিবেচনা করিবেন, তবে কি প্রকারে মনুষ্য দেহযাত্রা নির্বাহ করিবেন ? জীবিকা নির্বাহোপযোগী সকল দ্রব্য বিনিময় বাতিরেকে সংগৃহীত হয় না । বিনিময় কার্য প্রচলিত থাকিলে অর্থই একমাত্র সংগ্রহের উপায়, এরূপ অবস্থায় কামিনী কাঞ্চন ত্যাগ করিয়া সংসারী লোক কিরূপে দেহযাত্রা নির্বাহ করিবেন ? কামিনী কাঞ্চন পরিত্যাগ ভগবৎসাধনের ফল । মনুষ্য তুমি ইচ্ছা করিলেও তদ্বিষয়ে সফল হইতে পারিবে না ।

বশিষ্ঠ জনকাদি ঋষিগণ সংসারী ছিলেন । তাঁহারা ধর্মপথ হইতে কোন প্রলোভনাদি দ্বারা বিচ্যুত হইতেন না । তাঁহারা মুক্ত পুরুষ, সংসারী জীব সংসারে কিরূপে কার্য করিবেন, মনীষাসম্পন্ন মহর্ষিগণ তৎসম্বন্ধে বহু বহু উপদেশ লিপিবদ্ধ করিয়া রাখিয়া গিয়াছেন । সেই সমস্ত উপদেশ অনুসারে মনুষ্যের কার্য করা উচিত । কখন যদি তোমার পদস্থলন হয়, অনুতাপানলে তাহার প্রায়শ্চিত্ত করিবে, করুণাময় ভগবানের দয়া অবশ্য পাইবে । মনুষ্য ধর্ম্যানুসারে দেহযাত্রা নির্বাহ করিতে থাকিলে করুণাময় বিধাতার দয়া আকর্ষণ করিতে পারিবে । তাঁহার কৃপা হইলে কামিনী কাঞ্চন কেন, সকল আসক্তি দূর হইয়া যাইবে, তুমি স্বচ্ছন্দে মুক্তিলাভ করিতে পারিবে ।

অতিথি সংকার, দীন হীনের প্রাতি আলুকূলাদান এবং সজ্জনের সঙ্গলাভের চেষ্টা সংসারী মনুষ্যের একান্ত কর্তব্য । শিক্ষার দোষে- হউক বা যে কোন কারণে হউক আজকাল অতিথি সংকার বা দীনহীনের সাহায্য করা মনুষ্য কর্তব্যের চক্ষে দেখেন না । মনুষ্য মধ্যে যে কেহই অতিথি সংকার করেন না বা দীন দরিদ্রের কোনরূপ সাহায্য করেন না তাহা বলিতে পারা যায় না । হৃদয়বান্ লোকের এখনো অসম্ভাব নাই, কিন্তু বলিতে কি তাহাদের সংখ্যা সামান্য । সংসারী লোকের কর্তব্য অনেক, কিন্তু সাধারণতঃ লোকে অনেকস্থলে ঐ তিনটি কর্তব্যের প্রতি উপেক্ষা প্রদর্শন করেন । তাই দেবদাস ঐ তিনটি বিষয় বিশেষ রূপে উল্লেখ করি-

লেন । অতিথি-সংকার বা দীনহীনের প্রতি আনুকূল্য দান কি কারণে জীবের কর্তব্য তাহা তিনিও নির্দেশ করিয়াছেন ।

যদি তুমি কার্য্যগতিকে এমন স্থানে আসিয়া উপনীত হও যেখানে কাহারও সহিত তোমার কোন আলাপ নাই, আহ্বারের কোন সম্বল নাই, তুমি অতিশয় ক্ষুৎক্লান্ত, একরূপ অবস্থায় যদি তুমি কাহারও আলয়ে গমন কর এবং আহ্বারের জন্ত প্রার্থনা কর, যদি সেই ব্যক্তি তোমাকে কোনরূপ আহ্বাৰ্য্য না দিয়া তোমাকে তাড়াইয়া দেয় এবং সেই স্থানের অপর লোকেও তোমার প্রতি ঐরূপ ব্যবহার করে, তবে তোমার কি বিপদ হয় তাহা তুমি বেশ বুঝিতে পারিতেছ । অতিথি এই শ্রেণীর লোক । মনুষ্য বুঝিতে পারিলে অতিথি সেবা জীবের কর্তব্য না অকর্তব্য ? আশ্রয়হীনের যথাসাধ্য সাহায্য করা মনুষ্যমাত্রেরই উচিত । যেরূপ রক্ত মাংসে তুমি প্রস্তুত সেইরূপ রক্ত মাংসে অতিথি ও দীনদরিদ্র প্রস্তুত । সুখ দুঃখে তোমার যেমন বোধ তাহাদেরও সেইরূপ । যে চৈতন্ত তোমার মধ্যে, সেই চৈতন্তও তাহার মধ্যে আছে । সে ব্যক্তি কি তোমার সমশ্রেণী নহে ? নিরবচ্ছিন্ন নিজের ও পরিবারবর্গের সুখ স্বচ্ছন্দ বিধান করাই কি তোমার কার্য্য ? পশু পক্ষীর স্থায় নিজের ক্ষুৎপিপাসা শাস্তি করা কি তোমার কার্য্য ? ভূতভাবন ভগবান্ তাহাদের অপেক্ষা তোমাকে কি অধিকতর জ্ঞান বুদ্ধি ক্ষমতা দেন নাই ? তাহাদের স্থায় তবে কেন নির্মমতার পরিচয় দিবে ? আশ্রয়হীন অতিথির সেবা ও দীনদরিদ্রের প্রতি যথাসাধ্য আনুকূল্য করা প্রত্যেক সংসারী গৃহীর কর্তব্য । কত লোক কত কারণে নিরাশ্রয়ভাবে যে গৃহীর শরণাগত হয় তাহার ইয়ত্তা করা যায় না । দীন হীন দরিদ্র ও অতিথিকে যথাসাধ্য আনুকূল্য করা মঙ্গলময় বিধাতার অভিপ্রেত । একরূপ কার্য্যে ওঁদাসীত্ত্ব অবলম্বন করিলে নিশ্চয়ই তোমাকে পাপ ভোগ করিতে হইবে । মনীষাসম্পন্ন মহাশয়গণ—ইহা গৃহীর কর্তব্য, না করিলে ঘোর পাপ ইহা

নির্দেশ করিয়াছেন । পূর্ব পূর্বকালে অতিথিসংকার দেশ মধ্যে বহুল-  
রূপে প্রচলিত ছিল । গৃহী ইহাকে পুণ্যের কার্য্য বিবেচনা করিয়া  
অতিথিসেবায় সাধ্যমত যত্ন করিতেন । বিবেচনা করিয়া কার্য্য করিলে,  
তোমার উপার্জিত অর্থ তোমার পরিবারের ভরণ পোষণ ও অতিথি-  
সংকার অবাধে চলিতে পারে । কিন্তু কি পরিতাপের বিষয়, এই মহাব্রত  
আজ হিন্দু সমাজের অনেক স্থলে উপেক্ষিত । অনেকে বলিয়া থাকেন,  
অতিথি সংকারে ব্যয়বহুল, উহা সকল গৃহীর সাধ্য নহে । যদি সকল  
বা অধিকাংশ গৃহী এই মহৎকার্য্যের অন্তর্ধান করেন তাহা হইলে অতিথি-  
সংকার বহুল ব্যয়ের আবশ্যক করে না ।



## দশম পরিচ্ছেদ

দেবদাসের চিন্তাগুলি মহাভাবশালিনী ও জীবপ্রেমে উদ্ভাসিত। দেবদাস যে কার্য্য করিতেন, তাহাও মহীয়সী চিন্তাপ্রসূত। তাঁহার সহধর্ম্মিণী স্বামীর সমস্ত কার্য্যের পক্ষপাতিনী ছিলেন। তিনি সদগুণ-কেই জীলোকের অলঙ্কার বলিয়া জ্ঞান করিতেন। তিনি আপন পতিকে উৎকৃষ্ট অলঙ্কার বসনের জুতা কখন কোন কথা বলেন নাই। তাঁহার বেশ ভূষা সামান্য ছিল। বেশ ভূষার দিকে তাঁহার লক্ষ্য ছিল না। স্বামীর বেতন এক্ষণে মাসিক সহস্র টাকা। কিন্তু তিনি নিজ হস্তে অন্ন-ব্যাঞ্জনাদি প্রস্তুত পূর্ব্বক সকলের তৃপ্তি সাধন করিতে পরম আনন্দ লাভ করিতেন। পতির প্রাণ যে দিকে তাঁহার লক্ষ্যও সেই দিকে ছিল। পতির মনোমত কার্য্য করাই প্রকৃত পতিসেবা ইহাই তাঁহার ধারণা ও কথা। তজ্জন্ত যে পরিশ্রম, তাহা তিনি পরিশ্রম বলিয়া স্বীকার করিতেন না। জীব কত চেষ্টা, কত যত্ন, কত ক্লেশ, কত পরিশ্রম করিয়া ভগবদা-রাধনা করিতেছেন। পতিই যখন আমার দেবতা ও উপাস্ত, যে কার্য্য তাঁহার অভিপ্রেত তাহা সম্পাদন করাই প্রকৃত পতি-সেবা, এবং সেইরূপ পতিসেবা করিলে আমার ভগবদারাধনা হইবে, ভগবান্ নিশ্চয় আমায় কৃপা করিবেন। পতির অভিমত কার্য্য কলাপ সম্পাদনার্থ যদি আমাকে

কষ্ট সহ্য করিতে হয় বা পরিশ্রম করিতে হয় সে কষ্ট বা পরিশ্রম স্বীকার আমার পক্ষে একান্ত কর্তব্য, নচেৎ পতিসেবা সম্যক সাধিত হইতে পারে না। পতির সুখে আমার সুখ, পতির স্বচ্ছন্দে আমার স্বচ্ছন্দ। তিনি পতিকে সুখী করিতে পারিলে নিজে আনন্দ লাভ করিতেন। মাতা সন্তানের জন্ত যেরূপ যত্ন করিয়া থাকেন, অতিথি অভ্যাগতের জন্ত তিনি সেইরূপ যত্ন করিতেন ; অধিক কি যিনি একবার তাঁহার সেবা উপভোগ করিয়াছেন, তিনি তাহাতেই মুগ্ধ হইয়াছেন। পরিবার মধ্যগত দাসদাসী আত্মীয় কুটুম্ব তাঁহার সেবা ও সদৃশ্যে একান্ত বশীভূত ছিল। এরূপ পতি পত্নীর একত্র সমাবেশ সংসারে বড়ই বিরল।

ক্রমে সূহাসিনীর গর্ভে দেবদাসের দুই পুত্র ও এক কন্যা জন্মিয়াছিল। জ্যেষ্ঠ পুত্রের নাম গুরুদাস ও কনিষ্ঠ পুত্রের নাম জীবদাস, এবং কন্যার নাম কৃষ্ণাপ্রিয়া রাখিয়াছিলেন। পুত্র কন্যা সকলেই জনক জননীর স্বভাব-প্রাপ্ত হইয়াছিলেন। সকলেই সরল, বিনয়ী, দয়ালু এবং সদাই সহানুবদন। পুত্র দুইটী তুল্যরূপ বুদ্ধিমান ও মেধাবী। কন্যাটি পিতা মাতার বড়ই অনুগত ও আদরের বস্তু ছিলেন। যথা সময়ে পুত্র কন্যাকে শিক্ষা দিবার জন্ত দেবদাস একজন চরিত্রবান্ বিচক্ষণ বিদ্বান্ ব্যক্তিকে উপযুক্ত বেতনে শিক্ষক নিযুক্ত করিলেন। তিনি যে প্রণালীতে আপন পিতার নিকট প্রথম প্রথম শিক্ষা লাভ করিয়াছিলেন সেই প্রণালীতে শিক্ষা দিবার জন্ত শিক্ষক মহাশয়কে পরামর্শ দিয়াছিলেন। সংস্কার ও বিদ্যাশিক্ষা সম্বন্ধে ছাত্রগণের বাহাতে ভালবাসা জন্মে, হৃদয়ে সেই ভালবাসা বা আসক্তি বদ্ধমূল করিবার কারণ ছাত্রগণ বুদ্ধিতে পারে এরূপ সরল কথায় ছাত্রগণের সহিত নানাবিধ গল্প বলা উচিত। গল্প শুনিতে ছেলেরা খুব ভাল বাসে, এই সুযোগে তাহাদের মন গড়িতে হইবে। ছাত্রের মন বিচক্ষণ শিক্ষক একবার গড়িতে পারিলে লেখা পড়া শিক্ষাদান সম্বন্ধে শিক্ষকের পরিশ্রমের যথেষ্ট লাভ হইবে, ছাত্রগণ আপন



আগ্রহে লেখা পড়া শিখিতে চেষ্টা করিবে। এই প্রণালী পরিণামে বিশিষ্টরূপ ফলদায়িকা হইয়া থাকে।

গুরুদাস ষোড়শবর্ষে প্রবেশিকা পরীক্ষায় উত্তীর্ণ হইলেন, পরীক্ষায় তিনি প্রথম শ্রেণীর বৃত্তি লাভ করিয়াছিলেন। তদনন্তর ফাষ্ট আর্টস্ পরীক্ষায়ও বিশেষ সূখ্যাতির সহিত উত্তীর্ণ হইয়াছিলেন। এই শেষোক্ত পরীক্ষায় তিনি ইংরাজী ও অঙ্ক এই দুইটি বিষয়ে সর্বোচ্চ স্থান অধিকার করায় সর্ব সমতে তিনটি বৃত্তি লাভ করিয়াছিলেন। এই সময়ে দেবদাসের কত্যা কৃষ্ণপ্রিয়ার বিবাহের জন্ত পাত্রাভুসন্ধান হইতে লাগিল। কলিকাতা নগরী মধ্যে ধনঞ্জয় বাবু নামে এক ধনাঢ্য ব্যক্তি বাস করিতেন। তাহার পুত্র জ্ঞানেন্দ্রনারায়ণ বি এ পরীক্ষায় উত্তীর্ণ হইয়া ওকালতী ব্যবসায় অবলম্বন করিবার জন্ত আইন শিক্ষা করিতেছিলেন। পাত্রটি অতি সুশীল ও শিষ্টাচারসম্পন্ন এবং বিনয়ী ছিলেন। সর্বদিকে বিবেচনা করিতে হইলে পাত্রটি যে অতি সুপাত্র তদ্বিষয়ে কোন সংশয় নাই। পাত্রটির সন্ধান পাইয়া দেবদাস এক দিন ধনঞ্জয় বাবুর বাটীতে গমন করিলেন। ধনঞ্জয় বাবুর অবস্থা ও পাত্রের সংস্কার সম্বন্ধে তিনি নানা স্থান হইতে সুসংবাদ বিস্তৃত সূত্রে অবগত হইয়াছিলেন। ধনঞ্জয় বাবুর অবস্থা ভাল থাকা স্বত্বেও তিনি কিছু অর্থ-গৃধু ও কুটিল প্রকৃতির লোক কেহ কেহ তাঁহাকে বলিয়াছিলেন। দেবদাস ধনঞ্জয় বাবুর সহিত আপন কন্যার বিবাহ সম্বন্ধে নানা কথা বার্তা কহিয়াছিলেন, তাহাতে তাঁহার সম্বন্ধে যাহা শুনিয়াছিলেন তাহা প্রকৃত বলিয়া তাঁহার ধারণা হইল। শেষ স্থির হইল, কত্যাটি অগ্রে দেখিতে হইবে। কত্যা দেখিয়া তাঁহার অভিমত হইলে অত্র বিষয় সম্বন্ধে কথার স্থিরতা হইবে। সুতরাং কবে ধনঞ্জয় বাবু কত্যা দেখিতে যাইবেন দেবদাস জিজ্ঞাসা করায় তিনি আপন সুবিধা অসুবিধা বিবেচনা করিয়া একটি দিন স্থির করিয়া দিয়াছিলেন।

ধনঞ্জয় বাবুর পত্নীও স্বামীর অর্থপিপাসা ও কুটিলতা সম্বন্ধে কিছু অস্বকরণ করিতে পারিয়াছিলেন। দেবদাস চলিয়া গেলে, তিনি পত্নীকে গিয়া কহিলেন, “দেবদাস বাবু একজন বড় চাকুরে; তাঁহার কত্থার সহিত জ্ঞানেন্দ্ৰের বিবাহ দিতে হইলে কিছু বেড় দিতে হইবে, নচেৎ বেশী টাকা পাওয়া যাইবে না; আমাকে দেবদাস বাবুর জন্ত অনেক গণ্যমাত্র লোক অনুরোধ করিতে পারেন। আমি কিন্তু তোমার অভিপ্রায় অন্তরূপ ইহা বলিয়া অব্যাহতি লইব। আমাদের কুটুম্ব যোগেন্দ্র ও শিববাবু প্রভৃতি দেবদাস বাবুর পক্ষীয় লোক। আমার কথাবাসারে যদি তাহারা তোমাকে কোন অনুরোধ করেন খবরদার টাকার বিষয় কমাইও না।” পত্নীকে এইরূপ বুঝাইয়া নিরুপিত দিবসে যথাসময়ে ধনঞ্জয় বাবু তাঁহার একটা বন্ধু সমভিব্যাহারে দেবদাসের বাটীতে আসিয়া উপস্থিত হইলেন। দেবদাস বহুসময় পরে তাঁহাদের অভ্যর্থনা করিয়া আপন বৈঠকখানায় লইয়া গেলেন। ধনঞ্জয় বাবুর নিকট-কুটুম্ব যোগেন্দ্র বাবু ও শিববাবু, দেবদাসের পরম বন্ধু। জ্ঞানেন্দ্ৰ সুপাত্র জানিয়া তাঁহারাই দেবদাসকে সন্মান বলিয়া দেন, তাঁহাদের একান্ত ইচ্ছা জ্ঞানেন্দ্ৰনারায়ণের সহিত দেবদাসের কত্থা কৃষ্ণপ্রিয়ার বিবাহ হয়। ধনঞ্জয় বাবুর আসিবার অনতিবিলম্বে যোগেন্দ্রবাবু শিববাবু দেবদাসের বাটীতে আসিয়া উপস্থিত হইলেন। সকলে একত্র উপবেশন করিয়া নানা কথাবার্তা কহিতে আরম্ভ করিলেন। কিছুকাল পরে দেবদাস কত্থাটিকে সুসজ্জিতা করিয়া তাঁহাদের সম্মুখে আনয়ন করিলেন। কত্থাটি একে সুন্দরী তাহাতে যেরূপভাবে সুসজ্জিতা, দেখিতে পরম মনোরমা হইয়াছিল। উপস্থিত অধিকাংশ ব্যক্তি কৃষ্ণপ্রিয়ার সৌন্দর্য্যের প্রশংসা করিতে লাগিলেন। ধনঞ্জয় বাবুর সমভিব্যাহারে যে বন্ধুটি আসিয়াছিলেন, তাঁহার নাম পুরন্দর মিত্র। পুরন্দর বাবু কত্থাটি নিকটে আনিয়া তাহার হস্তপদ উত্তম-

রূপে পরীক্ষা করিলেন। তৎপর কণ্ঠামনোনয়ন সম্বন্ধে পাত্রপক্ষীয়ের অভিপ্রায় জিজ্ঞাসিত হইলে ধনঞ্জয় ও পুরন্দর বাবু কানে কানে কি পরামর্শ করিলেন, পরে পুরন্দর বাবু বলিলেন, “কণ্ঠাটী মন্দ নহে।” এইরূপ উত্তরের ভিতর তাঁহাদের কোন অভিপ্রায় যে নিহিত আছে তাহা সকলেই বুঝিতে পারিলেন। পুরন্দর বাবুর পুত্রের বিবাহোপলক্ষে ধনঞ্জয় বাবু দেনা পাওনার কথা স্থির করিয়াছিলেন, এক্ষণে ধনঞ্জয় বাবুর পুত্রের বিবাহোপলক্ষে দেনা পাওনার কথা তিনি অবধারণ করিবেন। যাহার পুত্রের বিবাহ তাঁহার মুখে দেনা পাওনা সম্বন্ধে সকল কথা শোভা পায় না, তাই এই বন্দোবস্ত। পুরন্দর বাবু, দেনা পাওনার কথা উত্থাপিত হইলে, কহিলেন, “জ্ঞানেন্দ্র নারায়ণের বিবাহের জন্ত গ্রামবাজারে একটী কথা চলিতেছে, সেখানে কণ্ঠাটী সুন্দরী এবং তাঁহারা পাঁচ হাজার টাকা দিতে চাহিতেছে।” এই কথা বলিবার পর যোগেন্দ্র বাবু কহিলেন, “সেটী কি মহাশয় কেদার বাবুর কণ্ঠা সম্বন্ধে বলিতেছেন?” পুরন্দর বাবু বলিলেন, “হাঁ।” যোগেন্দ্র বাবু তখন ধনঞ্জয় বাবুকে সঙ্ঘোষন করিয়া কহিলেন, “পিসা মহাশয় আপনি ও আমি সেই কণ্ঠা দেখিতে যাই সে কণ্ঠাত এরূপ সুন্দরী নহে এবং কেদার বাবু তিন হাজার টাকার বেশী দিতে সক্ষম নহেন বলিয়াছিলেন, আপনার কি তাহা স্মরণ হইতেছে না? এই কথায় পুরন্দর বাবু অপ্রস্তুত; তিনি আর কোন কথা কহেন না। তখন ধনঞ্জয় বাবু বলিলেন, “আমার পরিবারের অভিপ্রায় বেশী টাকা পান।” যোগেন্দ্র বাবু কহিলেন, পিশিমাতার মতামুসারে কি দেনা পাওনা স্থির হইবে? ধনঞ্জয় বাবু কহিলেন, “হাঁ।” তখন যোগেন্দ্র বাবু কহিলেন, “আচ্ছা আমি তাঁহাকে যাহা উপযুক্ত হয় তাহাতে সন্মত করাইব।” ধনঞ্জয় বাবু মনে মনে যোগেন্দ্র বাবুর উপর বিরক্ত হইলেন, প্রকাশে বলিলেন “বাপু হে যাহা ভাল হয় করিও। আমি তোমাদের ছেড়ে কি

কোন কার্য করিতে পারি? এইরূপে কথাবার্তা একরূপ স্থির হইলে সকলে জলযোগ করিতে বসিলেন। তৎপর সকলে চলিয়া গেলেন।

তৎপর দিবস যোগেন্দ্র বাবু ধনঞ্জয় বাবুর বাটীতে গমন করিলেন। তিনি ধনঞ্জয় বাবুর সহিত সাক্ষাৎ ও তাঁহাকে প্রণাম করিয়া পিশিমাতার নিকট যাইলেন। পিশিমাতাকে প্রণাম করিয়া দেবদাসের কন্ঠার সহিত জ্ঞানেন্দ্রনারায়ণের বিবাহের কথা উত্থাপন করিলেন। তাঁহারা একটী কুঠুরীর ভিতর বসিয়া কথাবার্তা কহিতে লাগিলেন। ধনঞ্জয় বাবু বিপদ বুঝিয়া উহার একটী গবাক্ষ পার্শ্বে থাকিয়া তাহাদের কথাবার্তা শুনিতে লাগিলেন। কন্ঠাটী পরম সুন্দরী জানিয়া পিশিমাতা ঐ কন্ঠার সহিত পুত্রের বিবাহ দিতে একান্ত চেষ্টিতা। বেশী টাকা দাবী করিলে পাছে বিবাহ সম্বন্ধ ভাঙ্গিয়া যায় এই তাঁহার আশঙ্কা। যোগেন্দ্র বাবুকে তিনি বড় ভাল বাসিতেন, সুতরাং যোগেন্দ্র বাবু যাহা প্রস্তাব করিলেন তিনি তাহাতে সম্মত হইলেন। ঘড়ী চেইন্ ও কন্ঠার অলঙ্কার সর্ব সমেত চারিহাজার টাকা দেবদাস বরপক্ষকে দিবেন স্থির হইল। ধনঞ্জয় বাবু গবাক্ষ দ্বারে আর স্থির থাকিতে পারিলেন না। তিনি তাহাদের সম্মুখে আসিয়া কি স্থির হইল, জিজ্ঞাসা করিলেন। উত্তর তাঁহার জানা ছিল, কিন্তু তথাপি জিজ্ঞাসা করিয়া উত্তরটী জানিলেন। ধনঞ্জয় বাবু অনন্তোপায়। তখন বেশী পীড়াপীড়ি করিতে না পারিয়া বিবাহের পর দিনের খরচের জন্ত আগ্রহ প্রকাশ করিলেন। কিন্তু তাঁহার পরিবার তাঁহাকে নিবারণ করায় তিনি মনে মনে সন্তুষ্ট না থাকিলেও নিরস্ত হইলেন।

এইরূপে সমস্ত কথা বার্তা স্থির হইয়া গেলে বিবাহ সম্বন্ধ পাকা করিবার জন্ত পাকা দেখার দিন স্থির হইল, এ দিন পুরন্দর বাবু আসেন নাই। ধনঞ্জয় বাবু ও তাঁহার অপর কতিপয় আত্মীয়

আসিয়া দেবদাস বাবুর বাটীতে উপস্থিত হইলেন । ষোগেন্দ্র বাবু শিববাবু ইঁহারাও আসিলেন । একজন জ্যোতিষী ও দেবদাসের পুরোহিত উপস্থিত । দেবদাস সকলকে যথাযোগ্য অভ্যর্থনা করিলেন । ভৃত্যগণ উপস্থিত ভদ্রলোকগণের পরিচর্য্যার তৎপরতা দেখাইতে লাগিল । বিবাহের দিন স্থির সম্বন্ধে কথা উঠিলে ধনঞ্জয় বাবু যাহাতে গোধূলি লগ্নে বিবাহ হয়, তাহা স্থির করিবার জন্তে জ্যোতিষী মহাশয়কে বিশেষ অনুরোধ করিলেন । জ্যোতিষী বহুক্ষণ গণনা দি করিয়া কহিলেন, এই ফাল্গুন মাসের মধ্যে গোধূলি-লগ্ন পাওয়া যাইতেছে না । কথাটা শুনিয়া ধনঞ্জয় বাবু কিছু ত্রিষ্ণু হইলেন । ষোগেন্দ্র বাবু কহিলেন গোধূলি লগ্নের বা আবশ্যক কি ? বেলাবেলি না হয় বর আনা যাইবে । কথাটা ধনঞ্জয় বাবুর মনের মত হইল । তিনি অতঃপর দিন স্থির সম্বন্ধে আর কোন কথা কহিলেন না । শুভ দিন শুভলগ্ন স্থির হইল । দেবদাস বাবু জল-যোগের ব্যবস্থা অতি উত্তমরূপে করিয়াছিলেন । সকলে জলযোগ করিতে বসিলেন, নানা রহস্য উঠিতে লাগিল । সকলে মহানন্দিত । আহারান্তে কিছু বিশ্রাম করিয়া আপন আপন বাড়ীতে সকলে প্রস্থান করিলেন ।

বিবাহের আয়োজন হইতে লাগিল । ফাল্গুন মাসের পূর্ণিমা তিথিতে রাত্রি চাটার পর বিবাহের লগ্ন । শিবকৃষ্ণ বাবু কত্কা সম্প্রদান করিবেন । পূর্বে কথানুসারে ধনঞ্জয় বাবু বর ও বরযাত্রীগণকে সমভিব্যাহারে লইয়া বেলা কিছু থাকিতে কত্কা কর্তার বাটীতে উপস্থিত । রানকৃষ্ণপুর গ্রাম হইতে বহুতর ব্যক্তিকে নিমন্ত্রিত করিয়া আনা হইয়াছিল । দেবদাস সকলকে যথাযোগ্য অভ্যর্থনা ও অভিবাদন করিতে লাগিলেন । দেবদাসের ভৃত্যবর্গ ও কতিপয় নিকট আত্মীয়ের পুত্রগণ নিমন্ত্রিতগণের পরিচর্য্যাতৎপর হইলেন । সভাস্থলে বর সুসজ্জিত ও

উপবিষ্ট। বর দেখিতে সুন্দর। যাহারা জানেন সকলেই বলিতে লাগিলেন যেমন কত্যা তেমনি বর। যথা সময়ে উদ্বাহ-ক্রিয়া সম্পাদিত হইল। বর কত্যা সম্প্রদানান্তে অন্তঃপুরে প্রবেশ করিলেন। অন্তঃ-পুরচারিণী মহিলাগণ বরের রূপ ও শিষ্টাচার দেখিয়া পরম পরিতোষ প্রাপ্ত হইলেন। স্নহাসিনীর বড়ই আনন্দ। তিনি সকলের মুখে পাত্রের প্রশংসা শুনিতে লাগিলেন। খাণ্ড দ্রব্যের বিপুল আয়োজন। নিমন্ত্রিত ব্যক্তি ও বরযাত্রী এবং অপরাপর সকলে উত্তমরূপে আহার করিয়া বিশ্রামার্থ স্ব স্ব স্থানে প্রস্থান করিলেন। পর দিবস যথা সময়ে নববধূ লইয়া জ্ঞানেন্দ্রনারায়ণ নিজ ভবনে গমন করিলেন। দেবদাস প্রচুর উপঢৌকনাদি জামাতালয়ে প্রেরণ করিলেন। ধনঞ্জয় বাবুর পত্নী নববধূ সন্দর্শন করিয়া পরম আনন্দ লাভ করিলেন। তিনি বধুমাতাকে বিশেষ স্নেহ ও বহ্ন করিতে লাগিলেন। এইরূপে আট দিন নববধূ লইয়া ধনঞ্জয় বাবুর গৃহে মহানন্দ চলিতে লাগিল। নবম দিবসে সামাজিক প্রথা অনুসারে কৃষ্ণপ্রিয়া পিতৃভবনে আগমন করিলেন। ধনঞ্জয় বাবু পুত্রের বিবাহে কিছু বেশী অর্থের আকাজক্ষা করিয়াছিলেন। কিন্তু বধুমাতা সুন্দরী ও গুণসম্পন্ন। হওয়াতে তাঁহার হুঃখ ক্রমশঃ অন্তর্হিত হইয়া গেল। জ্ঞানেন্দ্রনারায়ণ মনের মত সহধর্মিণী লাভ করিয়া পরম আনন্দ লাভ করিয়াছিলেন।



## একাদশ পরিচ্ছেদ ।

দেবদাসের পিতৃব্য শিবকৃষ্ণ বাবুর প্রমীলা সুন্দরী নামে একমাত্র কন্যা ছিল। তাঁহার পুত্র সন্তান জন্মে নাই। কন্যাটী পরমা সুন্দরী না হইলেও সুশ্রী ছিলেন। তিনি অনেকগুলি সঙ্গুণে ভূষিতা ছিলেন। কলিকাতা নগরী মধ্যে জনেক সম্পত্তিশালী ব্যক্তির পুত্রের সহিত তাহার বিবাহ দিয়াছিলেন। ঐ বিবাহে কন্যার বড়ই সুখ স্বচ্ছন্দ হইবে তাহার পিতা মাতার আশা ছিল। পাত্রটী বুদ্ধিমান ছিলেন। বিবাহের সময় তিনি কলিকাতাস্থ হিন্দু স্কুলে প্রথম শ্রেণীতে অধ্যয়ন করিতেন। প্রধান শিক্ষক মহাশয় ঐ শ্রেণীর “উত্তম ছাত্রগণের মধ্যে তিনি একজন” বলিয়া সুখ্যাতি করিতেন। কিন্তু বিবাহের পর হইতে কুসংসর্গে পতিত হওয়ায় তাহার চরিত্র অতীব দূষিত হইয়া পড়িল। বিদ্যালয়ে যাইতেছি ভান করিয়া তিনি বিদ্যালয়ে না গিয়া সমস্ত দিবা কুসংসর্গে অতিবাহিত করিতেন। বিদ্যালয়ের ছুটির পর যে সময় ছাত্র-গণ বাটীতে আসিয়া থাকে তিনি সেই সময়ে বাটীতে আসিতেন। এই ব্যাপার অধিককাল তাহার পিতা মাতার অবদিত রহিল না। প্রধান শিক্ষক মহাশয় তাহার পিতাকে তিনি অনেক দিন কেন বিদ্যা-

লয়ে আসেন না জানিবার জ্ঞান পত্র লিখিলেন। পিতা অহুস্কাণ করিয়া সমস্ত বৃত্তান্ত অবগত হইলেন। তিনি উপায়ান্তর নাই ভাবিয়া পুত্রকে বিতালয় ছাড়াইয়া আপন আফিসে একটা কার্যে নিযুক্ত করিয়া দিলেন। পিতা প্রত্যহ পুত্রকে সঙ্গে লইয়া আফিসে যাইতেন। যত দিন পিতা জীবিত ছিলেন তিনি আফিসের কার্য অতি সুন্দররূপে চালাইয়া ছিলেন। আফিসের কর্তা একজন সাহেব। তিনি তাঁহার কার্যে অতি সন্তুষ্ট হইয়া কয়েকবার তাঁহার বেতন বৃদ্ধি করিয়া দিয়াছিলেন। পিতার মৃত্যু হইলে তাঁহার পূর্বপরিচিত বন্ধুগণ একে একে তাঁহার সহিত মিলিত হইলেন। তাহাদের সংসর্গে তিনি বিলক্ষণ মজাপানী হইয়া উঠিলেন। এইরূপে কয়েক বৎসর কালাতিপাত করিলে মজাপান জনিত উৎকট রোগে তিনি আক্রান্ত হইয়াছিলেন। সেই রোগ হইতে মুক্তিলাভের কোন সম্ভাবনা ছিল না। ক্রমে রোগক্লিষ্ট হইয়া সহধর্মিণী ও আত্মীয় স্বজনকে শোক সাগরে ভাসাইয়া তিনি ইহলোক পরিত্যাগ করিলেন। প্রমীলা সুন্দরী পতি বিরোগ হৃদে নিতান্ত অধীরা হইয়া উঠিলেন। দেবদাস তাঁহাকে আপনাদের বাটীতে আনিলেন। এবং নানারূপে তাঁহার সেবা শুশ্রূষা করিতে লাগিলেন। স্বামীর মৃত্যুর পর ছয়মাস না গত হইতে উৎকট বিন্ধুচিকা রোগে তিনি আক্রান্ত হইয়া পড়িলেন। দেবদাস বিচক্ষণ চিকিৎসকগণ আনাইয়া তাঁহার চিকিৎসা করাইয়াছিলেন। কিন্তু তাঁহাদের বিবিধ চেষ্টা সত্ত্বেও তাঁহার জীবন রক্ষার সকল আশা তিরোহিত হইয়া গেল। তিনিও অচিরে স্বামীর পথানুসরণ করিয়া পরম শান্তিদায়িনী মৃত্যুর সুশীতল ক্রোড়ে শয়ন করিলেন। তাঁহার বৃদ্ধ জনক জননী শোকে অধীর হইয়া উঠিলেন। দেবদাস তাঁহাদের সেবা শুশ্রূষার ভালরূপ বন্দোবস্ত করিয়া দিলেন এবং নিজেও সুবিধা মতে নানা কথায় তাঁহাদিগকে সান্ত্বনা করিতে লাগিলেন।



কালবশে ক্রমে তাঁহার স্নহিত হইতে লাগিলেন, পিতৃব্য ও পিতৃব্য-পত্নী উভয়েরই শরীর শোকে অতিশয় জীর্ণ হইয়া উঠিল। তাঁহার আপনাদের চরম দশা নিকট জানিয়া বারাণসীধামে বাস করিবেন এই অভিপ্রায় দেবদাসকে জানাইলেন; দেবদাস তাঁহাদের অভিমত কার্য্য করিতে সন্মত হইলেন।

শিবকৃষ্ণ বাবু দেবদাসকে বড় ভাল বাসিতেন। তাঁহার দেহান্তে দেবদাস তাঁহার কলিকাতার বাটী উত্তরাধিকারী হুজে পাইবেন, তিনি জানিতেন; তথাপি যদি কোন গোলযোগ উপস্থিত হয় তাহা নিরা-কৃত করিবার অভিপ্রায়ে ঐ বাটীর একখানি দানপত্র দেবদাসের নামে লিখিয়া রেজিষ্টারী করাইয়া তাঁহাকে দিলেন। তাঁহাদের কাশী গমনের আয়োজন হইতে লাগিল।

এই সময়ে দেবদাসের মাতা তাঁহাকে কহিলেন “আমারও শরীর অতি-শয় জীর্ণ হইয়াছে। দেবদাস এক্ষণে তোমাকে সৰ্ব্বপ্রকারে মঙ্গলময়ের করুণায় সুখভোগ করিতে দেখিতেছি, সংসারে নিরবচ্ছিন্ন সুখভোগ কাহারও অদৃষ্টে সম্ভবপর নহে। এই সুখের পর যদি তোমার কোন-রূপ দুঃখ আইসে নিশ্চয়ই আমাকে তজ্জন্তু বিবিধ ক্লেশ ভোগ করিতে হইবে। এক্ষণে তোমরা সকলে সুস্থ; বিশেষতঃ ভগবানের অমুগ্ৰহে তোমার কোন অভাব নাই। দূরে বাস করিলে তোমাদের সকল বিষয় জানা যাইবে না, সুতরাং তোমাদের কোন দুঃখ উপস্থিত হইলে আমাকে আর নিগ্রহ ভোগ করিতে হইবে না। আমি ঠাকুরপোর সহিত কাশীবাস করিতে অভিলাষ করি।” দেবদাস জননীর প্রস্তাব শিরোধার্য্য করিলেন। তিনি তাঁহার বারাণসীবাসী জনেক বন্ধুর দ্বারা দশাশ্বমেধ ষাটের অতি সন্নিকটে একটা ভাল বাটী ভাড়া করিয়া রাখিলেন। একটা শুভদিন দেখিয়া বারাণসীধামে যাইবেন স্থির হইল।

এই সমস্ত বন্দোবস্ত চলিতেছে এমন সময়ে দেবদাসের স্বপ্নের হরিদাস

বাবু আসিয়া তাঁহার বাটীতে উপস্থিত হইলেন । সম্প্রতি তাঁহার জীবিয়োগ হইয়াছে । কনিষ্ঠ পুত্রটির একটি চাকরী দেবদাস যোগাড় করিয়া দিয়াছেন এবং তাঁহার বিবাহও একজন সম্পত্তিশালী ব্যক্তির কন্যার সহিত দিয়াছিলেন । হরিদাস বাবুর শরীর এক্ষণে অতি মাত্র জীর্ণ হইয়াছে । তিনি যে অধিককাল বাঁচিবেন সে আশা নাই । সুতরাং দেবদাস স্বস্তর মহাশয়কেও বারাণসীধামে রাখিবার মানস করিলেন । হরিদাস বাবু তাঁহার প্রস্তাবে সম্মত হইলেন । তিনি বৃদ্ধ বয়সে কাশীধামে বাস করিতে পারিবেন ইহা অপেক্ষা তাঁহার ত্রায় ধার্মিকের পক্ষে সুখের বিষয় আর কি আছে ?

শুভদিনে শুভক্ষণে দেবদাস ইহাঁদিগের সকলকে লইয়া বারাণসী-ধামে যাত্রা করিলেন । কলিকাতার বাটীতে সুহাসিনী ও পুত্র কল্যাণ রহিলেন ।



## দ্বাদশ পরিচ্ছেদ ।

পবিত্রসলিলা ভাগীরথীর পশ্চিম কূলে পুণ্যভূমি বারাণসী অবস্থিত। এখানে অত্যাপি বেদবেদান্ত পূর্ণ মাত্রায় অনুশীলিত হইতেছে। হিন্দু-ধর্মের কার্য্যকলাপ এখানে জাজ্ঞ্যমান। দেবী রাণীভবানী ও অহল্যা বাই প্রভৃতির মহীয়সী কীর্ত্তি সকল ইহার বক্ষে অত্যাপি বিরাজিতা থাকিয়া তাঁহাদের মহানুভবতা ও দানশীলতার পরিচয় দিতেছে। বহু সাধু সন্ন্যাসী এই মহাতীর্থে বাস করিয়া মঙ্গলময় শাস্তিদাতা ভগবানের চিন্তায় কালাতিপাত করিতেছেন। এই সকল নির্মলহৃদয় সাধু সংস্পর্শে অসাধু সংস্পর্শ জনিত কলুষরাশি নিরন্তর বিদূরিত হইতেছে। যে স্থান সাধুগণের আশ্রম, তাহা জীবের সর্ব্বধা মঙ্গলপ্রদ। দেবদাস এই পুণ্য ভূমিতে পদার্পণ করিয়া পরম প্রীতি লাভ করিলেন। তাঁহার বন্ধু তাঁহার কথামত পূর্ব্ব হইতে দশাশ্বমেধ ঘাটের সন্নিকটে একটা বাটা ভাড়া করিয়াছিলেন। বন্ধু তাঁহাদের সকলকে লইয়া সেই বাটাতে প্রবেশ করিলেন। তাঁহাদের আহালাদির সমস্ত বন্দোবস্ত পূর্ব্ব হইতে সম্পাদিত হইয়াছিল, সুতরাং তাঁহাদের কোন ক্লেশ বা অন্বিধা ভোগ করিতে হয় নাই।

দেবদাস নিত্য প্রাতঃকালে শয্যা হইতে গাল্লোথান করিয়া হস্ত মুখাদি প্রক্ষালন পূর্বক প্রাতঃক্রিয়াস্তু জীবের মুক্তিভূমি কাশীধামের সুবিস্তীর্ণ পথে বিচরণ করতঃ কিছুকাল সেই পুণ্যভূমির শান্তিপ্রদ নির্মল প্রাতঃসমীরণ সেবনপূর্বক প্রফুল্লচিত্তে গৃহে প্রত্যাগমন করিয়া ক্রমকাল বিশ্রাম করতঃ পুনরায় বহির্গত হইয়া দেব ও সাধুদর্শন করিতেন। বাটীতে ফিরিতে তাঁহার প্রায় ১০৥ ঘটিকা হইত। কিছুকাল বিশ্রামান্তে তিনি স্নান ও আহার সমাধান করিতেন। আহারের পর একাকী বসিয়া ধর্মশাস্ত্র অধ্যয়ন করিতেন। তথায় ক্রমশঃ দুই একটি সাধু সন্ন্যাসী এবং কতিপয় ভদ্র ব্যক্তির সহিত তাঁহার বিশিষ্টরূপ পরিচয় হইয়াছিল। প্রত্যহ বৈকালে প্রায় তাঁহাদের সহিত নানাবিধ সদালাপে ও সংকথায় কালাতিপাত করিতেন। সন্ধ্যার পর বিংশেশ্বর কেশবনাথ প্রভৃতি কতিপয় দেবতার আরজিক সন্দর্শন পূর্বক পুনরায় গৃহে প্রত্যাগমন করিয়া ধর্মশাস্ত্র পাঠ ও ঈশ্বর চিন্তায় রাত্রি দশটা পর্য্যন্ত অতিবাহিত করিতেন। পরে আহারাদি করিয়া শয়ন করিতেন।

এক দিন দেবদাস একাকী বসিয়া ধর্মের গূঢ় রহস্য সম্বন্ধে চিন্তা করিতেছেন; নানা বিরুদ্ধবাদ ও সংশয় আসিয়া তাঁহার চিত্ত একান্ত আলোড়িত করিতেছে; কোনরূপ সিদ্ধান্ত বা মীমাংসায় তিনি উপনীত হইতে পারিতেছেন না। তাঁহার সেই সমস্ত জটিল রহস্য কিরূপে বা মীমাংসিত হয় তাহার উপায় চিন্তায় তাঁহার চিত্ত নিমগ্ন, এমন সময়ে তাঁহার এক ভৃত্য আসিয়া তাঁহাকে জানাইল, একটা বৃদ্ধ দ্বারদেশে আসিয়াছে, আপনার সহিত সাক্ষাৎ করিতে ইচ্ছুক। ভৃত্য প্রভুর অমুমতি লইয়া সেই বৃদ্ধকে সঙ্গে লইয়া প্রভুর নিকট উপস্থিত হইল। আগন্তুক বৃদ্ধ দেবদাসকে সন্দর্শন করিয়া অতি ভক্তিভাবে মন্তক অবনত পূর্বক তাঁহাকে প্রণাম করিলেন। দেবদাস বৃদ্ধের ব্যবহারে কিছু বিচলিত হইয়া

উঠিলেন । তিনিও বুদ্ধকে নমস্কার করিলেন এবং তাঁহার উপবেশনার্থ আসন গ্রহণ করিতে অনুরোধ করিলে বুদ্ধ আসন গ্রহণ পূর্বক উপবিষ্ট হইলেন । দেবদাস তাঁহার পরিচয় জিজ্ঞাসা করিবার উত্তোগ করিতেছেন এমন সময়ে বুদ্ধ অতিমাত্র বিনীত ভাবে তাঁহাকে কহিলেন “মহাশয় ! বোধ করি আপনি আমাকে চিনিতে পারেন নাই । আপনি আমার সংসার-শান্তিলাভের উপায়ীভূত আদি গুরু ।” তাঁহার এই কথা শুনিয়া দেবদাস বিস্ময়াপন্ন হইলেন । তখন বুদ্ধ কহিলেন, “বোধ করি মহাশয়ের স্মরণ আছে, আপনি তখন বালক, একদিন আমি কোন স্থানে কিছুমাত্র আহার না পাইয়া বিলক্ষণ রূপে ক্ষুৎক্লেশ ভোগ করতঃ অতিমাত্র ক্লান্ত দেহে রামকৃষ্ণপুরে আপনাদের বাটীর সম্মুখবর্তী বকুল বৃক্ষতলে আসিয়া উপস্থিত হইয়াছিলাম । আঁম পূর্বে চুরি করিতাম । প্রথমবারে আমি চৌর্য্যাপরাধে ধৃত হইয়া বেত্রাঘাত দণ্ড ভোগ করিয়াছিলাম । দ্বিতীয় বারেও ঐরূপ অপরাধে ধৃত হইয়া শাস্তিরক্ষক পুলিশ কর্তৃক বিবিধ নিগ্রহ সহ্য করিয়া বিচারার্থ বিচারালয়ে আনীত হইয়াছিলাম । বিচারপতি বিচার করিয়া এবং আমার পূর্বকৃত চৌর্য্যাপরাধ বিবেচনা করিয়া কঠিন পরিশ্রমের সহিত তিন বৎসর কারাবাস আমার প্রতি আদেশ করিলেন । কারাবাস কালে বহুতর চোর দস্যুর সহিত আমার আলাপ হইয়াছিল । তাহাদের প্ররোচনায় চৌর্য্যকার্য্যে আমার ঘৃণা উপস্থিত না হইয়া সেই কার্য্যে আমার আসক্তি বৃদ্ধি হইতে লাগিল । তাহাদের নিকট চুরির নানাবিধ কৌশল শিক্ষা করিয়াছিলাম । চৌর্য্য কার্য্যে লাভ অতি যৎসামান্য । আমাকে প্রায় অতি সামান্য মূল্যে ঐ সমস্ত চোরাই দ্রব্য বিক্রয় করিতে হইত । বিক্রয় লব্ধ অর্থের আমার একদিনেরও বেশী চলিত না । তখন আমি মদ গাঁজা প্রভৃতি নানাবিধ মাদক দ্রব্য সেবন করিতাম । আমি যে সকল দ্রব্য চুরি করিতাম, আমাদের গ্রামে কতিপয় ভদ্র আধ্যাত্মিকী অবস্থাপন্ন ব্যক্তির নিকট বিক্রয় করিতাম । ইহারা আমাদের

সহায় ছিলেন এবং চৌর্য্যকার্য্যে আমাদিগকে যথেষ্ট উৎসাহ দিতেন । বলা বাহুল্য এইরূপে চৌর্য্য লব্ধ দ্রব্য হইতে তাঁহাদের অবস্থাও বিলক্ষণ স্বচ্ছল হইয়াছিল । আমার পিতা মাতা অতি নিরীহ ভাল লোক ছিলেন । চুরির কার্য্য হইতে আমাকে বিরত করিবার জন্ত তাঁহারা আমাকে নানা-বিধ উপদেশ দিয়া বুঝাইতেন । অবস্থা বিশেষে আমাকে যথেষ্ট লাঞ্ছনা ও নিগ্রহ করিতেন । আমার পাপে সেই নিরপরাধী পিতা মাতাকেও অনেক কষ্ট সহ করিতে হইয়াছিল । পরিশেষে আমার চরিত্র কোনরূপে সংশোধিত না হওয়ায় মনের হুঃখে আমার সহিত সকল সংস্রব পরিত্যাগ করিলেন । পিতার আলয়ে অবস্থান করিতে না পারিয়া আমার অনুরূপ স্বভাবসম্পন্ন বন্ধুবর্গের আশ্রয় লইলাম । কুলোকেব সংসর্গে থাকিয়া আমার মন এরূপ নিঃস্বয় নির্দয় হইয়া উঠিল যে, কোন রূপ দুঃস্বপ্ন আমার সম্ভাপকর ছিল না । আমি অবাধে সকল দুঃক্রিয়া সাধন করিতে অগ্রসর হইতাম ; ভদ্রনামধারী কতিপয় ব্যক্তির কথা আর কি বলিব, ইহঁারা নিজের দুঃভিসন্ধি সাধন জন্ত প্রতিবাসীর নিদারুণ অনিষ্ট করিতে আমাদিগকে নিযুক্ত করিতেন । ইহঁরাই প্রকৃত চোর । ইহঁারা আমাদিগকে সাহায্য করিতেন এবং আবশ্যক হইলে আমাদের জন্ত রাজদ্বারে মিথ্যা সাক্ষ্য পর্য্যন্ত দিতেন । ইহঁাদের সাহায্যে অনেক সময় আমরা অনেক বিপদ হইতে উদ্ধার পাইয়াছিলাম । প্রকৃত পক্ষে এই সকল ভদ্রলোকেই চোর । ইহঁাদের শাস্তি হইলে দেশের মঙ্গল ।

“তিন বৎসর কারাক্লেশ সহ করিয়া যথাসময়ে কারাগার হইতে মুক্তি লাভ করিলাম । কারাবাসে আমার চরিত্র কিছুমাত্র সংশোধিত হইল না । পূর্ব্বের স্থায় আমার মন চৌর্য্যকার্য্যের সন্ধান দেখিতে লাগিল । একদা একটা শিশু সোণার হার গলায় পরিয়া হুর্গোৎসবের সময় প্রতিমা-দর্শন করিতে ভূত্যের ক্রোড়ে উঠিয়া আসিয়াছিল । আমি ভূত্যের অসাধ-ধানতার জন্ত অনেককণ প্রতীক্ষা করিয়াছিলাম । ভূত্যটি অতিশয়

সাবধান। সে শিশুকে প্রতিমা দর্শন করাইতেছে কিন্তু সর্বদা তাহার লক্ষ্য সেই হারের উপরে ছিল। আমি চুরি করিবার সুবিধা না পাইয়া কতিপয় উপস্থিত লোকের মধ্যে একটা গোলযোগ বাধাইয়া দিলাম। ভৃত্যটী ঐ গোলযোগে যেমন একটু অগ্রমনস্ক হইয়াছে, আমি সেই অবকাশে শিশুর গলা হইতে সেই হার কাটিয়া লইলাম। ভৃত্যটী যদিও আমার হৃদ্ধতি দেখিতে পায় নাই, কিন্তু সেই সময়ে নিকটস্থ এক ব্যক্তি আমার হৃদ্ধার্য দেখিতে পাইয়া আমাকে ধরিল, আমি পলাইবার জন্ত বিস্তর চেষ্টা করিয়াছিলাম কিন্তু বহু সংখ্যক লোক আসিয়া আমার উপর পড়ায় আমার সকল চেষ্টা বিফল হইল। আমি ধরা পড়িলাম। বিচারে আমার পাঁচবৎসর সশ্রম কারাবাস দণ্ড হইল। কারাগারে বাস করিতে আমাকে বিস্তর দৈহিক ক্লেশ সহ করিতে হইয়াছিল। চোর দস্য প্রভৃতি যতকাল কারাগারে আবদ্ধ থাকে, ততকাল মনুষ্য সমাজ তাহাদের অত্যাচার হইতে পরিত্রাণ পায় মাত্র, কিন্তু এই সকল হৃদ্ধতি-শালী ব্যক্তির চরিত্র প্রায় সংশোধিত হয় না। হৃদ্ধতিশালী, সমাজের সুখ-স্বচ্ছন্দ বিপ্লবকারী, বহুলোক একত্র কারাগারে বাস করে, তাহাদের সংসর্গে মনে অনুতাপ আসিতে পারে না। অনুতাপ কোনরূপে তাহাদের মনে উদয় না হইলে তাহাদের পরিত্রাণের আর উপায় নাই। অনুতাপই পরম বস্তু। কারাবাসে কাহার কাহারও হৃদয়ে কখন কখন অনুতাপ হয়। যাহার হয় সে পরিত্রাণ পায়।

“দ্বিতীয় বার কারাবাস কালে এক দিন আমি একাকী বসিয়া আছি ; কি সুখে আমি চুরি করিলাম মনে মনে ভাবিতে লাগিলাম। দেখিলাম, ধরা পড়িলেও কষ্ট, না পড়িলেও চৌর্য্যোপার্জিত অর্থ আমার অমঙ্গলের কারণ ও হৃদ্ধয়ের প্রশ্রয় দাতা। বাল্যকালে স্নেহময়ী জননী আমার প্রতি কিরূপ স্নেহ করিতেন। পিতা আমার কল্যাণ জ্ঞাত কত চেষ্টা করিতেন। আমার চোর স্বভাবে আমি তাহাদের স্নেহ ও যত্ন হারাই-

রাছি । আমি নিজে সুখ স্বচ্ছন্দ ত কখন পাইলাম না । আমার চৌর্য্যলব্ধ অর্থ কেবল অপর লোককে অর্থবান্ ও পরিপুষ্ট করিয়াছে । পরের জন্ত আমি নিজের সুখ স্বচ্ছন্দ কেন হারাইলাম ? কেন বা কত নিরপরাধী ব্যক্তির সর্বনাশ করিলাম ? এই সকল চিন্তা আমার মনকে বড়ই ক্লেশিত করিতে লাগিল । পুনরায় কারাগারস্থিত বন্ধু বর্গের সংসর্গে সেই অনুতাপ চলিয়া গেল । এই সময় হইতে অনুতাপ আমার মনের মধ্যে আসিতে লাগিল, আবার চলিয়া যাইতে লাগিল, যখন আমি মুক্তি লাভ করিয়া রাম-কৃষ্ণপুরে আগমন করিয়া ছিলাম সেই সময় লোক সকল আমার পরিচয় জানিতে পারিয়া তাহাদের বাটিতে প্রবেশ করিতে দিলেন না । অল্পের জন্ত নানাস্থানে ভিক্ষা করিলাম, কিন্তু কাহারও আমার উপর দয়া হইল না । আমি কোন স্থানে কিছুমাত্র আহার পাইলাম না । ক্ষুধায় একান্ত ক্লান্ত হইয়া আপনার বাটীর সম্মুখবর্তী বকুল বৃক্ষ তলে আসিয়া উপবেশন করিলাম । আমি নিজ দোষে লোকের সমবেদনা হারাইয়াছি নচেৎ নিশ্চয় লোকে আমাকে অনাহারী জানিয়া দয়া করিতেন । এই চিন্তা মনোমধ্যে যতই উদয় হইতে লাগিল, অনুতাপ ততই আমার চিত্তকে ক্লেশিত করিতে লাগিল ।

এই সময়ে আমি আমার পরিব্রাণের নিদান স্বরূপ ভবদৌর মহাশ্বার সন্দর্শন পাইলাম । আপনি তখন বালক । আহারের জন্ত বন্দোবস্ত করিয়া দিলেন । আহার করিয়া আমার ক্ষুধা দূর হইল, কিন্তু অনুতাপ পুনরায় হৃদয় হইতে অগ্গদান করার আমার স্বভাব-দোষ পুনরায় দেখা দিল । আমি আপনার প্রদত্ত লোটাটি লইয়া পলায়নপর হইলে গ্রাম্য চৌকিদার কর্তৃক ধৃত হইয়া আপনার সমীপে আনীত হইলাম । পুনরায় আমার চৈতন্তের উদয় হইল । ঘোর অনুতাপ আসিয়া আমার চিত্ত ক্ষুভিত করিল । আমি একজন দাঙ্গী চোর লোটাটি সমেত ধরা পড়িয়াছি, এবারে যে আমার কারাদণ্ডের মাত্রা



বুদ্ধি পাইবে তাহার আর সন্দেহ নাই । আমার হ্রায় হৃদ্ধতিশালী ব্যক্তির অনুরূপ চরিত্রবান্ লোকের সহিত সহবাস, ভগবানের বিচার ও উদ্দেশ্য ইহা স্থির । আমাকে অসচ্চরিত্র জানিয়া লোকে আমাকে এক মুষ্টিমেয় অন্ন পর্য্যন্ত দিতে কুণ্ঠিত হইয়াছিল । আমাকে ঘৃণার চক্ষে দেখিয়াছিল । একটা বালক আমার প্রতি কিছু মাত্র ঘৃণা না করিয়া আমাকে আহার করাইল ; আমার ক্ষুধা ক্রেশ হইতে আমাকে উদ্ধার করিল, ধিক্ আমার চৌর্য্য স্বভাব ! আমি এই মহানুভব বালকের দ্রব্য অপহরণ করিলাম !

“অতঃপর যে কাণ্ড ঘটয়াছিল, তাহা বোধ করি আপনার স্মরণ আছে । আপনি সেই সময়ে যেরূপ মহেশ্বের পরিচয় দিয়াছিলেন, সেইরূপ মহেশ্ব জগতে বিরল । আপনার মহানুভবতা দেখিয়া আমি একবারে নির্বাক্ । ভগবান্ আমার পরিত্রাণের উপায় করিয়া দিলেন । এই সময়ে হইতে অনুতাপ আমার চিত্তে বদ্ধমূল হইয়া বসিল । আমি মনে মনে প্রতিজ্ঞা করিলাম, মহাত্মা সাধুগণ ব্যতীত আর কাহারও আশ্রয় গ্রহণ করিব না । আমি আপনাদের নিকট বিদায় লইয়া পূণ্যভূমি এই বারাণসীধামে আসিয়া উপস্থিত হইলাম । এখানে আসিয়া সামান্য মজুরী করিয়া আমি দিনপাত করিতে লাগিলাম । কোথায় আমার পরিত্রাতা সাধুর সন্দর্শন পাই, তাহারই চেষ্টা দেখিতে লাগিলাম । সাধু সন্ন্যাসী এখানে বিস্তর কিন্তু কি কারণে জানি না, কেহই আমার প্রতি রূপা করিলেন না । অনুতাপ আমার পূর্ব্বকৃত হৃদ্ধতিরশির বিভীষিকা আমার মনোমধ্যে উদয় করিয়া দিতে লাগিল । অশান্তি আমার মনকে জ্বালাতন করিয়া তুলিল । এই অশান্তির হ্রায় জগতে ক্রেশকর বিষম বোধ করি আর কিছুই নাই । কোন স্থানে শান্তিলাভ করিতে না পারিয়া আমি একবারে নিরাশ হইয়া পড়িলাম । তখন মনে মনে প্রতিজ্ঞা করিলাম আমার পরিত্রাতা সাধু সন্দর্শন না পাইলে আমি জল

পর্যন্ত গ্রহণ করিব না। অশান্তির বিষম যন্ত্রণাভোগ অপেক্ষা মৃত্যু শ্রেয়স্কর।

“এই প্রতিজ্ঞাবলম্বী হইয়া আমি এক বৃক্ষতলে শয়ন করিয়া রহিলাম। দুই দিবস আহার নাই। অশান্তি পরিভ্রাণের কোন উপায় দেখিলাম না। নৈরাশ্র বশতঃ রোরুদ্রমান। শাস্তিদাতা মঙ্গলময় ভগবান্কে কত যে ডাকিলাম তাহার ইয়ত্তা নাই। শরীর আমার ক্রমশঃ ক্ষীণ হইয়া আসিতে লাগিল। বুঝিলাম এই মহাপাপীর জন্ত মৃত্যুই একমাত্র শাস্তিদাত্রী। তৃতীয় দিবস অনগ্রমনে সাধুর করুণাভিলাষ করিতে করিতে নিদ্রাদেবীর সকল সস্তাপহরা মহাশক্তির আশ্রয় পাইলাম। প্রকৃতই তিনি কিছুকাল আমাকে বিষম যন্ত্রণাভোগ হইতে রক্ষা করিয়াছিলেন। প্রভাত হইল। বিহঙ্গমগণ স্নমধুর কণ্ঠে গান করিতে লাগিল। সূর্য্যোদয় সমীরণ ধীরে ধীরে বৃক্ষপত্র কম্পিত করিয়া প্রবাহিত হইতে লাগিল, আমি তখনও নিদ্রিত। এমন সময়ে কে যেন আমার গাত্রস্পর্শ করিয়া বলিতে-ছেন, ‘বাবা উঠ, তোমার চিন্তা নাই। অচিরাত্ত তোমার সকল সস্তাপ বিদূরিত হইয়া যাইবে।’ তাঁহার স্পর্শে আমার নিদ্রাভঙ্গ হইল। উঠিয়া দেখি আমার সম্মুখে এক প্রশান্তমূর্ত্তি শুভ্র শ্রদ্ধাকারী সহাস্তবদন পুরুষ উপস্থিত, তাঁহার বাক্যগুলি স্নমধুর সস্তাপনাশক। তাঁহাকে দর্শন করিয়া আমি ভক্তিভাবে প্রণাম করিয়া তাঁহার পদধূলি মস্তকে লইলাম। কথা প্রসঙ্গে জানিলাম, তিনি আমার সকল সস্তাপের কারণ বিলক্ষণরূপে অবগত আছেন। হৃদয়ের যে কথা আমি কখন কাহারও নিকট ব্যক্ত করি নাই, অন্তর্মামী গুরুদেব ব্যতীত কে ইহা জানিতে সক্ষম? মঙ্গলময় বিধাতা আমার প্রতি করুণা বিস্তার করিয়া গুরুরূপে আজ আমার নিকট উপস্থিত, তাঁহার স্নমধুর আশ্বাস বাক্যে আমার সেই ঘোর অশান্তির যন্ত্রণার উপশম হইতে লাগিল। তখন ভক্তি ভালবাসা প্রবলবেগে আমার অন্তঃকরণ হইতে তাঁহার উপর প্রধাবিত হইল। তিনি আমাকে সঙ্গে লইয়া তাঁহার

শান্তিময় নিকেতনে লইয়া গেলেন। আমি ভালরূপ চলিতে পারিতেছি না, গুরুদেব আমাকে আপন সন্তানের ছায় ধরিয়া লইয়া ধীরে ধীরে চলিতে লাগিলেন।

“গুরুদেব আমার, একজন গৃহী। একটা বিধবা কন্যা ব্যতীত সংসারে তাঁহার আর কেহই নাই। পিতার শিক্ষাপ্রভাবে তিনিও ভগবৎসাধন কার্যে বিশিষ্টরূপ উৎকর্ষ লাভ করিয়াছেন। কন্যা পিতার সংসারের সমস্ত কার্য নিজে সম্পাদন করিয়া থাকেন। ইহাঁদের সংসারাসক্তি কিছুমাত্র নাই। দেহরক্ষার জন্ত যাহা আবশ্যক, ধর্ম্মানুসারে আসক্তিশূন্য হইয়া তৎসমস্ত করিয়া থাকেন। হিংসা, ঘেঁষ প্রভৃতি রিপুবর্গ ইহাঁদিগকে অনুমাত্র বিচলিত করিতে পারে না। ইহাঁরা শান্তিময় ও শান্তিপ্ৰদ। এই সংসাররূপ ঘোর অরণ্য মধ্যে গুরুদেব আমার, একটা ফুটন্ত ফুল। সৌভাগ্যক্রমে যিনি এই ফুলের আশ্রয় পাইয়াছেন তিনি ইহাঁর সৌগন্ধ ও মাধুর্যের আশ্বাদ উপভোগ করিতে পারিয়াছেন। প্রতিবেশী মণ্ডল ইহাঁকে ধার্মিক জানিয়া বিশিষ্টরূপ শ্রদ্ধা ভক্তি করিয়া থাকেন। যাঁহার সৌভাগ্যের উদয় হইয়াছে, তিনিই ইহাঁতে আত্মসমর্পণ করিয়াছেন এবং যিনি আত্মসমর্পণ করিতে পারিয়াছেন তিনিই শান্তিলাভ করিতে পারিয়াছেন।


“গুরুদেব আমাকে সেই দিবস গৃহে আনয়ন পূর্বক অতীব শ্রদ্ধার সহিত আমার স্নান ভোজনাদি করাইলেন। আমিও তথায় বিশ্রামাদি করিয়া বিলক্ষণরূপে সুস্থতা লাভ করিলাম। গুরুদেব সেই দিবস সাংস-সন্ধ্যা সমাপন করিয়া সন্ধ্যার পর আমাকে লইয়া নানাবিধ সংকথার আলোচনা করিতে লাগিলেন। তিনি কহিলেন, ‘বাবা, জীবের কোন স্বাতন্ত্র্য নাই। ভগবান্ জীবকে ধেরূপ কার্য্য করান, জীব সেইরূপ কার্য্য করেন। এই বিশ্বাস যাঁহার হৃদয়ে বদ্ধমূল তাঁহাকে অনুতাগের জালা কখন ভোগ করিতে হয় না। ভগবানের প্রতি যাঁহার এতাদৃশ বিশ্বাস,

তিনি সর্বজীবে ভগবানের সত্তা উপলব্ধি করিয়া জীবের অকল্যাণকর সর্বপ্রকার পাপকার্য্য হইতে বিরত থাকিতে বাধ্য হন । এ বিশ্বাস বড়ই হুল্লাভ । বাক্যে বলিলে চলে না । তোমার কঠোর অমুতাপ তোমার পূর্ব্বকৃত পাপের প্রায়শ্চিত্ত । এই অমুতাপ, কলুষরাশি দূরীভূত করিয়া তোমার চিত্তকে নির্মল করিয়াছে, তুমি ভগবানের প্রসাদ লাভের উপযুক্ত হইয়াছ । বাবা, কল্যা আমি তোমাকে দীক্ষা দান করিব ।

“পরদিন প্রত্যুষে তাঁহার আদেশমতে আমি ভাগীরথী হইতে স্নান করিয়া আসিলাম । তিনি আমাকে নিজ পার্শ্বে উপবেশন করাইয়া আমার দীক্ষাদান করিলেন । দীক্ষান্তে আমার হৃদয় অপূর্ব্ব আনন্দরসে প্লাবিত হইতে লাগিল । জগৎ সংসার এমন কি নিজের সত্তা পর্য্যন্ত ভুলিয়া গেলাম । আমার নয়নযুগল দিয়া আনন্দাশ্রু প্রবাহিত হইতে লাগিল । আমি যে কতক্ষণ এই আনন্দ উপভোগ করিলাম, তাহা আমার জ্ঞান নাই । গুরুদেব অতঃপর আমাকে সংঘত করিলেন । সেই আনন্দের তিরোভাবে আমি নিতান্ত ক্লিষ্ট হইয়া গুরুদেবের চরণযুগলে আপন মস্তক রাখিয়া ক্রন্দন করিতে লাগিলাম । গুরুদেব ! যে সুখ আমি আপনার রূপায় উপভোগ করিতে পারিয়াছিলাম, সেই সুখ হইতে কেন আমার বঞ্চিত করিলেন ? দিবা রজনী এই সুখ ভোগ করিতে পারি, ইহা আমার একান্ত বাসনা । গুরুদেব আমার বাক্যে পরম প্রীতিলাভ করিয়া কহিলেন, ‘সেই পরমানন্দের অমুভূতি শিষ্যের চিত্তক্ষেত্রে উৎপাদন করাই গুরুর প্রথম কার্য্য । বিনা সাধনায় এ ভাব স্থায়ী হইতে পারে না । দিন যামিনী এই জ্ঞানানন্দের অমুভূতি লাভ করিতে হইলে শিষ্যের বিশিষ্টরূপ সাধনা চাই । আমি তোমাকে সাধন প্রণালী একে একে শিক্ষা দিব, তুমি এই প্রণালীমতে সাধনা করিলে ঐ পরমানন্দ লাভ করিতে সমর্থ হইবে ।’ তদবধি আমি তাঁহার আদিষ্ট সাধন প্রণালী অনুসারে ভগবৎ সাধন করিতেছি । গুরুদেব আমার, আমাকে আশ্রয়-

হীন জানিয়া আপন ভবনে বাস করিতে অনুমতি করিলেন । আমি তদবধি তাঁহার আশ্রমে থাকিয়া শ্রদ্ধা ও ভক্তি সহকারে যথাসাধ্য তাঁহার সেবা করিতেছি ।

“কথাপ্রসঙ্গে এক দিবস গুরুদেবের নিকট আপনার কথা বলিয়াছিলাম । তিনি মহানন্দে আপনার কার্যের ভূয়সী প্রশংসা করিয়াছিলেন । তিনি আমাকে কহিয়াছিলেন, ‘সজ্জন কখন ভগবানের অনুগ্রহ লাভে বঞ্চিত হইবেন না । কিন্তু উহা কাল সাপেক্ষ ।’



## ত্রয়োদশ পরিচ্ছেদ

দেবদাস আগন্তুক বৃদ্ধের নিকট সমস্ত অবগত হইয়া সৎগুরুর আশ্রয় লাভ করিষ্য প্রভাবশালী তাহা বিলক্ষণরূপে বুঝিতে পারিয়াছিলেন। তিনি আগন্তুক বৃদ্ধের সৌভাগ্যে পরম আনন্দ লাভ করিলেন এবং প্রাণ খুলিয়া তাঁহাকে অভিবাদন ও ধন্যবাদ প্রদান করিলেন। কথাপ্রসঙ্গে তিনি গুরুদেব সম্বন্ধে আরও অনেক তথ্য অবগত হইলেন, পরে কহিলেন, মহাশয় ! আপনার গুরুদেবের সহিত সাক্ষাৎ করিতে আমার নিতান্ত অভিলাষ। কোন্ সময়ে তাঁহার সাবকাশ হয় এবং কোন্ সময়ে তাঁহার সহিত সাক্ষাৎ হইলে অত্র লোকসঙ্গ বিয় না হয়, ইহা তাঁহাকে জিজ্ঞাসা করিয়া যদি আমাকে সমাচার দেন, তাহা হইলে আমি পরম উপকৃত হইব। আমাদের ইচ্ছানুসারে যে কোন সময়ে সাধুর নিকট গমন করা কর্তব্য নহে।” আগন্তুক বৃদ্ধ দেবদাসকে অভিবাদনাদি করিয়া প্রস্থান করিলেন।

বৃদ্ধ চলিয়া গেলো দেবদাস মনে মনে তাঁহার সেই আশ্চর্য্য পরিবর্তনের বিষয় চিন্তা করিতে লাগিলেন। যাহা শুনিলাম, ইহা অতি আশ্চর্য্যের কথা। বৃদ্ধের দুষ্কৃতির বিষয় আমার স্মরণ হইয়াছে। যিনি নিতান্ত নির্দয় ও নির্ভয় ছিলেন ; দুষ্কর্ম্ম যাঁহার আনন্দের বিষয়, কুটিলতা যাঁহার

মর্মে মর্মে জড়িত ছিল, তাঁহার হৃদয়ে আজ ভগবৎ প্রেমের আবির্ভাব দেখিলাম। অন্তঃকরণ বিশুদ্ধ ও নির্মল না হইলে সেই প্রেম সেখানে প্রকাশিত হয় না। কথাগুলি কি সরলতাব্যঞ্জক ও মধুর। জানিলাম, সাধু সঙ্গরূপ স্পর্শমণির সংযোগে ইহাঁর হৃদয় মণিময় হইয়াছে। সাধুর উপদেশ, সাধুর দৃষ্টান্ত, সাধুর জীবনী প্রজ্জ্বলিত অনল সদৃশ। এই অনলের সন্মুখে কোনরূপ দৃষ্টি থাকিতে পারে না, সমস্তই ভস্মীভূত হইয়া যায়। সাধু সঙ্গে দৃষ্টিশালী পুরুষেরও কিরূপ সৌভাগ্যোদয় হয়, আগন্তুক বৃদ্ধ তাহার দৃষ্টান্ত। বৃদ্ধ! তুমি আমাকে আদি গুরু বলিয়া সম্বোধনা করিয়াছ। তোমার দৃষ্টান্ত দেখিয়া সাধুসমাগম লাভে আমার চিত্ত একান্ত আগ্রহান্বিত। সাধুলাভ আমাকে করিতেই হইবে, এই প্রতিজ্ঞা আজ তোমার দৃষ্টান্ত প্রসূত। যিনি সাধু সমাগমলাভে সহায়তা করেন, তিনি একজন গুরু। আমি এক্ষণে বুঝিয়া দেখিলাম, তুমি আমার গুরু আদি গুরু। আমারই সৌভাগ্যবশতঃ বুঝি আজ আপনা হইতে আমার বাটীতে আসিয়াছিলে। আমার মঙ্গলার্থে আমার চিত্তকে আজ সাধুসঙ্গ লালসায় যে প্রধাবিত করিয়া দিয়াছ, সে উপকার আমি কিছুতেই বিস্মৃত হইব না। তোমার কথাগুলি আমার হৃদয়তন্ত্রীতে এখনও বাজিতেছে। সাধুগুরু না পাই জীবন বিসর্জন করিব, এই প্রতিজ্ঞাবদ্ধ হইয়া তুমি কাহাকে কিছু না বলিয়া বিজনে এক বৃক্ষতলে শয়ন করিয়া রহিলে। সামান্য মনুষ্য কি তোমার হৃদয়ের কথা বলিতে পারে, না বুঝিতে পারে? গুরুদেব নিশ্চয়ই অসামান্য লোক, তিনি অন্তর্ধামী ও পরোক্ষদর্শী। তিনি জীবের নিস্তার কর্তা। ইহাঁর পাদপদ্ম আমার আশ্রয় ও উদ্ধারের উপায় স্বরূপ। যিনি চৌর্যাদি নানা দোষে কলঙ্কী ছিলেন, মনুষ্য আজ তাঁহার সৌভাগ্য দেখ! তিনি সদৃশগুরুর পদাশ্রয় লাভ করিতে পারিয়াছেন। যিনি দৃষ্টিশালী বলিয়া সকলের ঘৃণ্য ছিলেন এক্ষণে তাঁহাতে আর দৃষ্টি নাই। তিনি কিরূপ নির্মল ও

সরলহৃদয় হইয়াছেন, একবার সঙ্গ করিয়া দেখ । তিনি আর ঘৃণ্য নহেন, প্রত্যুত তাঁহার সঙ্গ একান্ত প্রার্থনীয় । এই সমস্ত ব্যাপার ভাবিতে ভাবিতে তিনি নিতান্ত অধৈর্য্য হইয়া পড়িলেন । সাধুগুরুর সঙ্গ পাইবামাত্র করিবে । গুরুদেবের সাক্ষাৎ করিবার জন্ত কখন তাঁহার সাবকাশ হইবে, সেই সময় বুঝিয়া তাঁহার সহিত সাক্ষাৎ করিবার বাসনা প্রকাশ করা, আমার অতি গর্হিত কার্য্য হইয়াছে । জীবের মঙ্গল করা সাধুতার কার্য্য । সময়ের অপেক্ষায় থাকিলে যদি সময় না আইসে তবেই ত অমঙ্গল । গুরুদেব মুক্ত পুরুষ, তিনি সকল সময়ে জীবের মঙ্গলার্থ প্রস্তুত । তাঁহার সময় বা কি ? অসময় বা কি ? কি অপরাধ করিয়াছি ? কেন বা বুদ্ধের সঙ্গে তখনই যাইলাম না ? এখন কি করি ! কোথায় যাই । গুরুদেবের বাসস্থানবাটীর সন্ধানটী ভুলক্রমে লই নাই । বুদ্ধ কোন্দিচ্ দিয়া আসিয়াছিল এবং কোন্দিচ্ দিয়া বা চলিয়া গেল কিছুই জানিয়া রাখিতে পারি নাই । আমার বুদ্ধির কি বিপর্য্য হইল । সাধুগুরুর সন্দর্শন জীবের দুঃখাপ্য । সুবিধা হইল, হেলায় হারাইলাম । আমার ভ্রাতৃদ্বারা আরাধিত আছি ? আমি আপনাদের সর্বনাশ আপনি করিলাম । তাঁহার পদাশ্রয় ব্যতীত আমার নিস্তার নাই । গুরুদেব আপনি অন্তর্যামী ও পরোক্ষদর্শী । আমার হৃদয়ের যাতনা ত বুঝিতেছেন, আমাকে রক্ষা করুন । এই বলিয়া দেবদাস আত্ম-হার্য্য হইয়া ক্রন্দন করিতে লাগিলেন । তাঁহার তৎকালিক কার্য্যকলাপ সমস্ত বাতুলের ভ্রাতৃ ।

রাত্রি দেবদাস কিছুমাত্র আহার করিলেন না । কাহারও সহিত তাঁহার কোন কথা নাই । যে অনুতাপ তাঁহার হৃদয়কে বিদ্ধ করিতে-ছিল, সে অনুতাপ ক্রেশকর হইলেও তাঁহার নিকট সুখকর । অনুতাপ ব্যতীত কোন কার্য্যে তাঁহার মন যায় না । তাঁহার মানসিক অবস্থা যেদ্রুপ, অনুতাপানল হৃদয়ে পোষণ করাই স্বচ্ছন্দ । উষ্ট্র কাঁটা চর্ব্বণ



করিতেছে, কাঁটায় তাহার হই স্বক্ৰমী ক্ষত হইয়াছে । অবিরল ধারায় রক্ত পড়িতেছে, তথাপি দেখ, সে ছই চক্ষু নিম্নলিত করিয়া সেই কাঁটা চর্কণস্থ ক্রমেন অল্পভব করিতেছে । যিনি দেবদাসের স্থায় অবস্থায় পড়িয়াছেন, তিনি জানেন এই অবস্থা কিরূপ । সমস্ত রাত্রি আহার নিদ্রা পরিহার করিয়া বিজনে গুরু অদর্শনজনিত ক্রোশে তিনি অশ্রুজল বিমোচন করিতে লাগিলেন । রাত্রি শেষে তাঁহার নিদ্রা আসিয়াছে । ভূত্যাগণ নিঃশব্দে দ্বার ও গবাক্ষ সকল উদ্বাটিত করিল ।

এদিকে গুরুদেব বৃদ্ধের প্রমুখাৎ দেবদাসের সমাচার পাইয়াছিলেন । রজনী প্রভাতে তিনি বৃদ্ধকে সঙ্গে লইয়া দেবদাসের বাটতে উপস্থিত । ভূত্যাগে জিজ্ঞাসা করিয়া তিনি ও বৃদ্ধ একবারে দেবদাসের নিকট উপস্থিত । তিনি দেবদাসের গাত্রস্পর্শ করিয়া কহিলেন “দেবদাস উঠ, আর অল্পতাপ করিতে হইবে না ।” দেবদাসের নিদ্রাভঙ্গ হইল ; উঠিয়া দেখেন এক প্রশান্ত পুরুষ তাঁহার সম্মুখে উপস্থিত । তাহার নেত্রযুগল বিশাল, স্থির, সরলতাব্যঞ্জক । মস্তকের সম্মুখের কেশ নাই । পক্ষ গুম্ফ ও অশ্রু তাঁহার বদনমণ্ডলের শোভা বর্ধন করিয়াছে । শরীর দীর্ঘ, গৌরবর্ণ । আনন্দ তাঁহার মুখে সুসদা বিকশিত হইতেছে । তাঁহার পরিধেয় ও উত্তরীয় বস্ত্র শুভ্র । তাঁহার অসামান্য মাধুর্য্য দর্শনে দেবদাস বিমোহিত । পশ্চাতে দেখিলেন তাঁহার সেই পূর্ব পরিচিত আগন্তুক বৃদ্ধ । শেবোক্ত ব্যক্তিকে দেখিয়া দেবদাসের আর বৃত্তিতে বাকী রহিল না । যাহার জন্ম তাঁহার অল্পতাপ সেই আজ সম্মুখে উপস্থিত । তিনি পরম ভক্তি ও শ্রদ্ধাসহকারে তাঁহাকে প্রণাম করিলেন ও তাঁহার পদধূলি মস্তকে গ্রহণ করিলেন । পরে অতিমাত্র ব্যস্ততা সহকারে তাঁহাদের উপবেশনার্থ ছইখানি আসন প্রদান করিলেন । গুরুদেব আসনে উপবেশন করিলেন । আগন্তুক বৃদ্ধ তখনও দণ্ডায়মান । দেবদাস আগন্তুক বৃদ্ধেরও যথোপযুক্ত অভিবাদনাদি করিলেন । গুরুদেবের পশ্চাত্তাপে

তিনি বসিতে প্রার্থনা করিলে দেবদাস গুরুদেবের পশ্চাৎ তাঁহার আসন দিলেন । তিনি গুরুদেবের আদেশে আসনে উপবেশন করিলেন ।

তাঁহার উপবেশন করিলে তিনি গুরুদেবের নিকট স্বীয় অপরাধ জানাইলেন, এবং সেই অপরাধ মোচনের জন্ত প্রার্থনা করিলেন । গুরুদেব কহিলেন “বাবা যে অপরাধের কথা তুমি বলিলে তাহা অতি লঘু, সে অপরাধ তোমার নিজের অমৃত্যুতে ভস্মীভূত হইয়া গিয়াছে, তজ্জন্ত তোমার ক্ষোভ বা দুঃখ নিশ্চয়োজন ।” তদনন্তর দেবদাস আনন্দিতমনে কহিতে লাগিলেন “দেব ! মল্লয়া ধর্ম্মপথে থাকিয়া সতত সাবধান হইয়া সংসার ক্ষেত্রে পদচারণা করিলেও সংসার চক্রে পড়িয়া তাঁহাকে বিবিধ সস্তাপ ভোগ করিতে হয় । গুরুদেব এ সকল সস্তাপের হাত হইতে উদ্ধার পাইবার উপায় কি ? আমি আপনার মহাশক্তির দৃষ্টান্ত পাই-  
রাছি । আপনার কৃপায় নির্মম নির্দয় অন্তঃকরণ কুহুমবৎ কোমল হইয়া ভগবৎ সাধন কার্য্যে স্থপটু হইয়াছে । তবে কি দেব ! এই অধমের প্রতি আপনার অমুকম্পা বিতরিত হইবে না ? এই অধমের চিত্ত হইতে সকল সস্তাপ দূরীভূত করিয়া ইহাতে ভগবৎপ্রেম ভক্তি রোপিত করিয়া ইহাকে কি নিস্তার করিবেন না ? গুরুদেব আপনি ভগবানের স্বরূপ, আপনি অন্তর্যামী ; অধমের হৃদয়ের অবস্থা ত বেশ বুঝিয়াছেন, অধমের উদ্ধারের উপায় করুন । অধম আপনার শরণাগত । দেবদাসের বিনয় ও সদা-  
চারে গুরুদেব পরম আনন্দ লাভ করিয়া তাঁহাকে কহিতে লাগিলেন “বৎস ! তোমার আর ক্ষোভ ও দুঃখের কারণ নাই । তুমি পূর্ব্বজন্মার্জিত পুণ্যবলে স্বভাবসিদ্ধ ধার্ম্মিক । তুমি ধর্ম্মপথে অনেকদূর অগ্রসর । দীক্ষা লাভ করিবার জন্ত তোমার চিত্তলোলুপ । তোমার সময় হইয়াছে । আমি অল্পই তোমাকে দীক্ষা দান করিব । আমার আদিষ্ট প্রণালী-  
মতে ভগবৎসাধন কার্য্যে মন প্রাণ অর্পণ করিলে তোমাকে আর সংসার জন্মিত কোন সস্তাপ ভোগ করিতে হইবে না । আনন্দসমুদ্রে ভাসমান

হইয়া আনন্দমুখা পান করিতে পারিবে । বৎস ! আমার সঙ্গে আমার আলয়ে আইস । সেস্থান অতি নির্জ্ঞন, সেখানে আমি তোমায় দীক্ষাদান করিব । অণু মহার্থ লাভ হইবে ।” দেবদাস গুরুবাক্যে আশ্বস্ত হইয়া তৎক্ষণাৎ গুরুদেবের পশ্চাৎ পশ্চাৎ তাঁহার আলয়ে গমন করিলেন । আগন্তুক বৃদ্ধও সেই সঙ্গে প্রত্যাবর্তন করিলেন ।

আজ দেবদাসের দীক্ষা হইবে । সদগুরুর নিকট যিনি কখন দীক্ষা লাভ করিয়াছেন, তিনিই জানেন দীক্ষা কি পদার্থ । গুরুদেবের সহিত কথা-প্রসঙ্গে দেবদাসের অন্তঃকরণ অতি নির্ম্মল ও স্বচ্ছ হইয়াছে । গুরুদেবের আদেশে তিনি স্মরধুনী গঙ্গা হইতে স্নান করিয়া আসিলেন । গুরুদেব তাঁহার পরিধানের জন্ত বস্ত্র ও উত্তরীয় প্রদান করিলেন । তিনি উহা পরিধান করিয়া গুরুদেবের পার্শ্বস্থ আসনে উপবেশন করিলেন । গুরুদেব যথারীতি তাহাকে দীক্ষা দিলেন । দীক্ষা লাভ করিয়া দেবদাসের হৃদয় অভূতপূর্ব আনন্দরসে অভিষিক্ত হইল, নয়নযুগল দিয়া আনন্দাশ্রু পড়িতে লাগিল । আনন্দের হিল্লোল উপর্যুপরি তাঁহার উপর পড়িয়া তাঁহাকে যেন ভাসাইয়া লইয়া চলিল, তিনি নিজ সমাজজ্ঞান হারাইয়া ফেলিলেন । কিছুক্ষণ এইরূপে আনন্দরস উপভোগ করিলে পর দেবদাস সেই আনন্দের মধ্যে অমুভব করিলেন, তাঁহার হৃদয়ে আনন্দ-প্রতিমাক্রপী অপূর্ব এক মূর্তি বিরাজিত । সেই মূর্তির হাসি যেন চারিদিকে হাসি ছড়াইতেছে । দেবদাস সেই মধুর মূর্তির সেবা করিতে লাগিলেন । সেবায় আবার আনন্দের হিল্লোল বাড়িতে লাগিল । কিছুক্ষণ এইরূপে আনন্দ উপভোগ করিলে পর ক্রমে দেবদাসের বাহ্যিক চৈতন্য আসিতে লাগিল । ক্রমে আনন্দের হ্রাস হইতে লাগিল । পরিশেষে তাঁহার অন্তঃকরণে সেই আনন্দময়ের অমুভূতি মাত্র রহিল । দেবদাস চক্ষু উন্মীলিত করিলেন ; তাঁহার সেই অমুভববশতঃ হউক বা যে কোন কারণে হউক তাঁহার বোধ হইল যেন প্রত্যেক পদার্থেই সেইরূপের বিরাজ-

মানতা দেদীপ্যমানা । যাহা হউক এভাবে তাঁহার অধিকক্ষণ রহিল না । সেই ভাবের অবর্তমানে তিনি নিতান্ত ক্লিষ্ট হইয়া গুরুদেবের নিকট নিকট রোদন করিতে লাগিলেন । গুরুদেব তাঁহাকে আশ্বস্ত করিয়া কহিলেন বৎস ! তুমি পূর্বজন্মার্জিত পুণ্যবলে আজ সেই আনন্দময়মূর্তি অনুভব করিলে । অতি সৌভাগ্যশালী অন্ন লোকে এই মূর্তি অনুভব করিতে পারিয়াছেন । বৎস ! আমি তোমাকে ক্রমশঃ সাধনপ্রণালীগুলি শিক্ষা দিব ! তুমি সেই প্রণালী অনুসারে ভগবৎচিন্তায় অনন্তমনা হইয়া পরিণামে এইরূপ তুমি ইচ্ছামাত্রে দর্শন করিতে পারিবে । দেবদাস একমাস কাল গুরুসহবাসে একে একে সাধনপ্রণালীগুলি আয়ত্ত করিলেন । তাঁহার চিত্ত ভগবৎসাধনে একান্ত লোলুপ হইয়া উঠিল ।

ধর্ম্মানুসারে সংসারযাত্রা নির্বাহ করিতে হইলে গুরুকরণ মনুষ্যের একান্ত কর্তব্য । সংসারে যত প্রকার ধর্ম্ম প্রচলিত আছে সকলগুলি যে সাধু প্রচারিত তাহা অবশ্য স্বীকার্য্য । সাধুগণও আপন আপন গুরুর অনুগত হইয়া বহুকাল তপস্তা ও সাধনবলে যে আনন্দময়ের দর্শন লাভ করিয়াছেন, সেই আনন্দময় লাভের উপায়গুলিও তাঁহারা বিলক্ষণ অবগত আছেন । মনুষ্য ! তুমি সেই সাধুর শরণাগত না হইলে কি প্রকারে সেই সকল উপায় জানিবে ? জগতে যত কিছু বিদ্যা আছে সকল বিদ্যাশিক্ষার গুরু আছেন । গুরু ব্যতীত সেই সকল বিদ্যা শিক্ষা করা যায় না । যিনি তোমাকে পুস্তক পড়িতে শিক্ষা দিয়াছেন তিনি তোমার গুরু । আর যিনি পুস্তকে নানাবিধ উপদেশ কথা লিখিয়াছেন তিনিও গুরু । ফলতঃ যাহার নিকট যাহা কিছু শিক্ষালাভ করা যায় তিনিই গুরু । এই সংসারে যে কিছু তত্ত্ব, যে কিছু কল, যে কিছু শিল্প আবিষ্কৃত হইয়াছে আবিষ্কর্তাগণ সকলেই আপন আপন আবিষ্কৃত বিষয় সম্বন্ধে মৌলিক শিক্ষাগুলি গুরুর নিকট শিক্ষালাভ করিয়াছেন, তৎপর নিজের প্রতিভা ও বহুকালের চিন্তা ও সাধনবলে সেই সেই বিষয়ের আবিষ্কার করিতে সক্ষম

হইয়াছেন। যে গুরু নিজের প্রতিভা ও বহুকালব্যাপিনী চিন্তা ও সাধনবলে নূতন তত্ত্বাদির আবিষ্কার করিয়াছেন তিনি কৃপাপরবশ হইয়া যদি ঐ সকল আবিষ্কৃত নূতন তত্ত্বাদি কাহাকে শিক্ষাপ্রদান করেন তাহা হইলে সেই শিক্ষা কেমন স্থলভে লাভ করিতে পারা যায়। আবিষ্কর্তার ঞ্জর তাঁহার প্রতিভা বা বহুকালব্যাপিনী চিন্তা বা সাধনের আবশ্যক হয় না। গুরু কৃপা করিলে তাঁহার বহু চিন্তা ও সাধনের ফল শিষ্যের আয়ত্তাধীন করিতে পারেন। সকল ব্যক্তিই যে বহু চিন্তা ও সাধনবলে জীবনে আপন অনুসন্ধানীয় তত্ত্বাদির আবিষ্কার করিতে পারিয়াছেন তাহাও ঠিক নহে, সুতরাং গুরুর শরণাপন্ন হইয়া তাঁহার প্রীতি ও কৃপা অর্জন করিতে না পারিলে তিনি পরম প্রিয়বস্ত্র সাধনের ধন অল্পকে দিতে ইচ্ছা করেন না। গুরু আবার দেখেন যে সেই প্রিয়ধন কাহাকে দিলে তিনি তাহার প্রতি যথোচিত সমাদর করিতে পারিবেন।

আধ্যাত্মিক বিষয়ে গুরু যতদূর উন্নতি লাভ করিতে পারিয়াছেন, কৃপা করিলে তিনি শিষ্যকে ততদূর শিক্ষাদান করিতে সমর্থ। সুতরাং যিনি সূক্ষ্মত্ববলে এমন সাধু গুরুর আশ্রয় লাভ করিয়াছেন, যিনি আপন হৃদয়ে সেই আনন্দময়ের আনন্দময় মূর্তি অনুক্ষণ দর্শন করিতে সক্ষম হইয়াছেন, সেই গুরুদেব কৃপা করিলে নিশ্চয়ই তাঁহাকে সেই আনন্দময় মূর্তি দর্শন করাইতে পারেন। যদি গুরুদেবের কৃপায় তুমি সেই পরমানন্দ লাভ করিতে পারিলে, সাংসারিক সুখ দুঃখ যদি তোমাকে কোনরূপে ক্লিষ্ট করিতে না পারিল বল, দেখি সেই গুরুদেবের নিকট তোমায় কিরূপ-ভাবে থাকিতে হইবে? তাঁহার একান্ত শরণাপন্ন তোমাকে আপনাপনি হইতেই হইবে। তুমি তোমার সর্বস্ব সেই গুরুকে দিলেও তৎকৃত উপকারের পরিশোধ করিতে পারিবে না। যে গুরু আধ্যাত্মিক উন্নতি-দানে সম্পূর্ণ অসমর্থ সে গুরুর শরণাপন্ন হইলে কোন ফল লাভের আশা নাই। আধ্যাত্মিক উন্নতি লাভ মনুষ্যের উদ্দেশ্য, কিন্তু আধ্যাত্মিক

উন্নতির আশা নাই, কেবলমাত্র কোনরূপ সম্বন্ধ বা আত্মীয়তার অনু-  
রোধে গুরুকরণ করিলে কি লাভ? নিজের চেষ্টা ও সদগুরুর রূপা  
আধ্যাত্মিক উন্নতি লাভের সোপান । গুরুদেব সহবাসে এক মাস কাল-  
যাপন করিয়া দেবদাস গুরুদেবের অনুমতিক্রমে কলিকাতায় প্রত্যাবর্তনের  
বন্দোবস্ত করিতে লাগিলেন । মাতা, পিতৃব্য, শ্বশুর ও খুড়ীঠাকুরাণীর  
কাশীবাসের উপযুক্ত নিয়মাদি নির্ধারণ করিয়া দিয়া তাঁহাদের পাদপদ্মে  
প্রণামপূর্বক তিনি কলিকাতাভিমুখে যাত্রা করিলেন ।



## চতুর্দশ পরিচ্ছেদ

দেবদাস কলিকাতায় প্রত্যাবর্তন পূর্বক আপন কর্মে পুনঃ প্রবেশ করিলেন। কৃষ্ণপ্রিয়ার উদ্বাহক্রিয়ার পর ইতিমধ্যে তিনি কয়েকবার শ্বেতরাণ্যে গিয়াছিলেন। পিতৃগৃহে যখন থাকিতেন জ্ঞানেন্দ্রনারায়ণ প্রায় শ্বেতরাণ্যে আসিতেন। তিনি স্বামীকে প্রাণস্বরূপ দেখিতেন। বাহাতে স্বামীর আনন্দ হয় সেই কার্য্য তিনি অনুষ্ঠান করিতেন। স্বামীর উপর তাঁহার অকৃত্রিম ভক্তি ও শ্রদ্ধা ছিল। তিনি আনন্দের সহিত স্বামীসেবা করিতেন, স্বামী সেবায় নিজের গুরুতর পরিশ্রম করিতে হইলেও তাহাতে তিনি কিছুমাত্র ক্লেশ বোধ করিতেন না, প্রত্যুত আনন্দ উপভোগ করিতেন। তাঁহার কথাগুলিও অতি মধুর, বিনয় শিষ্টাচার-সম্বিত। স্বামী তাঁহার কথায় ও কার্য্যে মনে কখন কোনরূপ ক্লেশ বা ক্লোভ পান নাই। স্বামী তাঁহার মধুমাখা কথায় ও সদাচরণে পরম প্রীতলাভ করিতেন এবং বনিতার সংসহবাসে আপনাকে পরম সৌভাগ্যশালী বিবেচনা করিতেন। পতিও পত্নীকে প্রাণসম ভালবাসিতেন। পত্নীর সুখস্বচ্ছন্দ বাহাতে বৃদ্ধি হয়, সেইদিকে পতির লক্ষ্য ছিল। কে কাহাকে অধিক ভালবাসিতে পারে ইহা লইয়া স্বামী ও স্ত্রীর মনোমধ্যে একটা যেন হড়াহড়ী পড়িয়া গিয়াছিল। উভয়ের এক

মন এক প্রাণ । সাধু জনকজননীর দৃষ্টান্ত কৃষ্ণপ্রিয়ার আদর্শ । জনক-জননীর সাধু দৃষ্টান্ত তাঁহার হৃদয়ের মর্মে মর্মে জড়িত থাকিয়া তাঁহার সেই মধুময় সাধুচরিত্রের গঠন করিয়াছিল । কৃষ্ণপ্রিয়ার চরিত্র জ্ঞানেন্দ্র-নারায়ণের চিত্তপটে প্রতিফলিত হইয়াছিল । পরহিতকার্য্যে কৃষ্ণপ্রিয়া নিতান্ত তৎপর ছিলেন । দীনহীন ও অতিথির প্রতি তিনি বিলক্ষণ শ্রদ্ধাশীল ছিলেন । পিতা তাঁহার নিজ খরচের জন্ত মাসিক যাহা দিতেন তিনি তৎসমস্ত দীনহীন ব্যক্তির মধ্যে বিতরণ করিতেন । নিজের সুখস্বচ্ছন্দের জন্ত তাহার এক কপর্দকও ব্যয় করিতেন না । পিতার আলসে যখন কোন অতিথি আসিতেন তিনি তাহাদের সেবায় যত্নবতী হইতেন । পিতামাতা তাঁহার এই সদব্যবহারে পরম প্রীতিলাভ করিতেন । জ্ঞানেন্দ্র-নারায়ণ তাঁহার সহধর্ম্মিণীর এতাদৃশী পরোপকার-তৎপরতা জানিতে পারিয়া মনে মনে বড়ই আনন্দ লাভ করিতেন ।

প্রথম প্রথম যখন স্বশুরালয়ে আসিয়াছিলেন তাঁহার স্বশুর ও স্বশ্র-ঠাকুরাণী তাঁহার গুণবস্ত্রার বিশিষ্ট কার্য্যগুলি দেখিতে পান নাই । এক্ষণে কয়েকবার স্বশুরালয়ে আসিয়া ক্রমে তাহাদের বিশিষ্ট পরিচিতা হইলেন । তাঁহার গুণগ্রাম তাহাদের নিকট বিকশিত হুইতে লাগিল । ধনঞ্জয় বাবু জ্ঞানেন্দ্রনারায়ণের বিবাহে তাঁহার অভীষিত অর্থ না পাওয়ায় মনে মনে কিছু অসন্তুষ্ট ছিলেন । কৃষ্ণপ্রিয়া অতি বুদ্ধিমতী ছিলেন, তিনি স্বশুর মহাশয়ের মনের ভাব বিশেষরূপ বুঝিতে পারিয়াছিলেন । কিন্তু কি করিবেন কিছু ঠিক করিতে পারিলেন না । জ্ঞানেন্দ্রনারায়ণের এক জ্যেষ্ঠ সহোদর ছিলেন, তিনি জ্ঞানেন্দ্রনারায়ণের বিবাহের বহু পূর্বে পরলোক গমন করিয়াছিলেন । তাঁহার সন্তানসন্ততি ছিল না । ভ্রাতৃ-জায়া বরাবর ধনঞ্জয় বাবুর সংসারভুক্তা ছিলেন । সুতরাং ধনঞ্জয় বাবুর নিজ পরিবার মধ্যে অতি অল্পলোক ছিলেন । কৃষ্ণপ্রিয়া ক্রমে বয়স্থা হইয়া উঠিলেন । সংসারের কার্য্য সকল ক্রমে ক্রমে তিনি নিজ হস্তে



গ্রহণ করিলেন । তিনি পরিবারস্থ সকলের উপর শ্রদ্ধা ভক্তি করিতেন । স্বপুত্র স্বশ্রী ঠাকুরাণীর মনোগত ভাব বুঝিয়া সকল কার্য্য করিতেন । যে সকল কার্য্য তাঁহারা ভাল বাসিতেন তিনি সেই সকল কার্য্য করিতেন । তিনি বিশেষ শ্রদ্ধা ভক্তি সহকারে তাঁহাদের সেবা করিতে লাগিলেন । ধনঞ্জয় বাবু সম্পত্তিশালী ব্যক্তি ছিলেন । তাঁহাদের পাককার্য্য সমাধার জন্ত একজন পাচিকা ছিল, দাস দাসীও দুই তিন জন ছিল । অবশ্য গৃহকার্য্য সমাধার জন্ত কৃষ্ণপ্রিয়াকে কোন পরিশ্রমের কার্য্য করিতে হইত না সত্য, কিন্তু তিনি নিজে সমস্ত তদন্ত ও বন্দবস্ত করিতেন । পরিবারস্থ ব্যক্তিগণের মধ্যে যিনি যেরূপ খাদ্য ভাল বাসিতেন তাহার জন্ত সেইরূপ খাদ্যের আয়োজন করিয়া দিতেন । তাঁহার সুবন্দোবস্তে পূর্ব্বাপেক্ষা সংসারের ব্যয় স্বল্প হইতে লাগিল, অথচ সকলে আহার করিয়া পরিতোষ লাভ করিতেন । দাস দাসী সকলের আহারের দিকে তাঁহার দৃষ্টি ছিল । কাহারও কোন রূপ ক্ষোভের কারণ ছিল না । নববধূ-মাতার সুবন্দবস্তে সংসার খরচ কমিয়াছে, ধনঞ্জয় বাবু জানিতে পারিয়া তাঁহার উপর বড় প্রসন্ন হইলেন । অধিকন্তু তাঁহার প্রতি বধুমাতা যেরূপ যত্ন ভক্তি ও সেবা করিতে লাগিলেন তাহাতে ক্রমশঃ তিনি তাঁহার প্রতি আকৃষ্ট হইয়া পড়িলেন । মনের সহিত শ্রদ্ধা ভক্তি ও যত্ন করিলে যে ব্যক্তির প্রতি তাহা প্রযুক্ত হয় তিনিও তাহা মনে মনে বুঝিতে পারেন । সেই শ্রদ্ধা ভক্তি ও যত্নের গুণে তিনি আকৃষ্ট হইয়া পড়েন । তিনি পিতার নিকট হইতে মাসিক যে অর্থ পাইতেন তদ্বারা উত্তমোত্তম দ্রব্য ক্রয় করাইয়া আনিয়া স্বপুত্র, স্বশ্রীঠাকুরাণী, স্বামী ও বিধবা ভাস্কর-পত্নীকে যত্ন সহকারে আহার করাইতেন । সংসারব্যয় কমিয়াছে অথচ উত্তমোত্তম দ্রব্য বধুমাতা তাঁহাদিগকে আহার করাইতেছেন, কি প্রকারে এক্ষণ হইতেছে আপন পত্নীকে ইহার কারণ জিজ্ঞাসা করিলেন । তিনি কহিলেন বধুমাতা তাঁহার পিতার নিকট হইতে মাসিক যাহা পান তদ্বারা

ভাল ভাল জিনিষ বাজার হইতে ক্রয় করাইয়া আনিয়া আমাদিগকে আহার করান। আপনি তাহা কিছু মাত্র আহার করেন না। আমি তাঁহাকে তাঁহার অর্থ এইরূপে ব্যয় করিতে নিষেধ করিয়াছিলাম। কিন্তু বধুমাতা তন্নিমিত্ত মনে মনে অতিশয় ব্যথিতা হইয়া আমাকে বলিয়াছিলেন মা! আমার অর্থ যদি আপনাদের সেবায় না দিতে পারি তাহা অপেক্ষা আমার হুঁত্যা আর কি হইতে পারে? আমার সামান্য অর্থ যদি আমার গুরুজনের পরিতোষকারণ হয় তবেই আমি চরিতার্থ হইব। মা! আমার গুরুজনের সেবা কার্যে নিষেধ করিবেন না। গুরুজনের সেবাই আমার আনন্দ ও লক্ষ্য। ধনঞ্জয় বাবু পত্নীর মুখে বধুমাতার কথা শুনিয়া তাঁহার সজ্জনতার জন্ত ভূয়সী প্রশংসা করিলেন এবং তাঁহাকে ডাকিয়া কহিলেন মা! তোমার নিজের অর্থ কেন অকারণ আমাদের জন্ত ব্যয় কর? উহা সঞ্চয় করিয়া রাখিলে ত ভবিষ্যতে তোমার অনেক অর্থ হইবে এবং তদ্বারা তোমার নানারূপ সুখ স্বচ্ছন্দের সামাগ্রী হইতে পারিবে। স্বপুত্র মহাশয়ের কথা শুনিয়া কৃষ্ণপ্রিয়া অতি বিনয় ও ভক্তি সহকারে কহিলেন বাবা! আপনারাই আমার পরমারাধ্য গুরুজন, আপনারাই আমার প্রিয়-বস্তু, আপনাদিগকে যথাযোগ্য সেবা না করা পাপ এবং সমাজেও তজ্জন্ত নিন্দারভাজন হইতে হয়। সামান্য অর্থের বিনিময়ে যদি সেই পরমারাধ্য প্রিয়জনের সেবা করা যায়, তবে তাহা অপেক্ষা আমার আনন্দ ও সৌভাগ্যের বিষয় আর কি হইতে পারে? আপনি আশীর্ব্বাদ করুন, আপনাদের সেবায় যেন আমার জীবন অতিবাহিত করিতে পারি। বাবা! সংকার্ষ্যে ব্যবহার না করিলেও অর্থের সদ্ব্যবহার হয় না। অর্থ সঞ্চয় করিয়া রাখিলে বেশী অর্থ হইবে তাহাতেই বা আমার লাভ কি? অর্থের সদ্ব্যয় হইলে জগতে যিনি সদ্ব্যয় করেন তিনি বিমল আনন্দ লাভ করিতে পারেন, এবং সাহায্য প্রাপ্ত ব্যক্তি উপকারপরম্পরায় ক্লেশ ও দুঃখের হস্ত হইতে শান্তিলাভ করিতে সক্ষম হইবেন।

আপনারা ভগবানের কৃপায় দীর্ঘজীবন লাভ করুন, পরিণামের সুখ স্বচ্ছন্দের জন্ত আমার কোন ভাবনা নাই। বধুমাতার সান্নিধ্য মধুর বাক্যে ধনঞ্জয় বাবুর মনে অনুতাপ আসিয়া দেখা দিল। তিনি আপনার কৃপণতার দ্বিধার দিতে লাগিলেন, এবং মনে মনে আক্ষেপ করিয়া কহিতে লাগিলেন আমি বৃদ্ধ হইয়াছি, কিছুকাল পরে মারা যাইব। কেবল অর্থ সঞ্চয় করিলাম, তাহার সদ্ব্যবহার করিলাম না। বধুমাতা অল্পবয়স্কা, নিজের জন্ত অর্থের ব্যবহার চান না, কোথায় আমরা সুখ স্বচ্ছন্দ ভোগ করিব তাহার জন্ত তিনি লালায়িত। আমরা পরিতোষ লাভ করিলে তাঁহার স্বচ্ছন্দ ও আনন্দ। আমিও ইহার দ্বারা অর্থের সদ্ব্যবহার করিতে পারিলে কত লোকের কত উপকার সাধন করিতে পারিতাম। বস্তুতঃ অর্থ সঞ্চয় করিয়া রাখায় আমি ভাল কাজ করি নাই।

মনে মনে আক্ষেপ করতঃ প্রকাশে বধুমাতাকে কহিলেন মা! তুমি আর নিজের টাকা আমাদের জন্ত ব্যয় করিও না। আমরাগিকে তৃপ্তি পূর্বক আহাৰ করাইতে যে ব্যয় হইবে তাহা মা তুমি আমাকে বলিও আমি তোমাকে তাহা দিব। বধুমাতার দৃষ্টান্তে ধনঞ্জয় বাবুর সংসারে আহাৰ ও জলযোগাদির উৎকৃষ্ট ব্যবস্থা হইল। এক্ষণে বধুমাতার অর্থ সংসারের কার্যে ব্যয়িত হইত না। কিন্তু অর্থসঞ্চয় করিয়া রাখা বধুমাতার স্বভাব ও বিবেচনার বিরুদ্ধ। ধনঞ্জয় বাবুর গৃহে কখন ভিত্তারীকে ভিক্ষা দেওয়া হইত না। বধু মাতা নিজের অর্থে চাউল ক্রয় করিয়া চাকর দিগের দ্বারা প্রতাহ ভিত্তারী দিগের মুষ্টিভিক্ষা দিবার ব্যবস্থা করিয়া দিলেন। অবস্থা বিবেচনায় কখন কখন তাহাদিগকে পয়সাও দিতেন। ধনঞ্জয় বাবু ভৃত্যদিগকে কে চাউল বিতরণ করিতেছে? জিজ্ঞাসা করায় তাহারা কহিল আপনাদের মঙ্গল কামনায় বধুমাতা চাউল বিতরণের ব্যবস্থা করিয়াছেন। ধনঞ্জয় বাবু কোন কথা আর বলিলেন না। তিনি মনে মনে চিন্তা করিলেন অর্থ সঞ্চয় করিয়া রাখা

বধূ মাতার স্বভাব বিরুদ্ধ । কিসে আমাদের মঙ্গল হইবে এই চিন্তাই তাঁহার হৃদয়ে বলবতী । নিজের সুখ স্বচ্ছন্দের প্রতি অক্লেপও করেন না । চৌরঙ্গীতে আমার আটখানা বাড়ী ভাড়া দেওয়া আছে । তাহা হইতে আমার মাসিক তিন হাজার টাকা আয় । এতদ্ব্যতীত আমার আড়াই লক্ষ টাকার কোম্পানির কাগজ আছে, তাহা হইতেও যথেষ্ট আয় হইয়া থাকে । আমার পরিবার বড় নহে । মাসিক সামান্য ব্যয়ে এই পরিবার প্রতিপালিত হয় । বাকী যে টাকা থাকে তাহাই আমি সঞ্চয় করিয়া রাখিতেছি । না দেব কার্য্যে, না পিতৃ কার্য্যে, না পরোপকার কার্য্যে, কোন কার্য্যে একটা পয়সা ব্যয় করি নাই । কাহার জ্ঞাত আমার সঞ্চয়, কাহার জ্ঞাতই বা আমার ব্যয়কুষ্ঠতা । একটা মাত্র সম্ভান, সেটা কৃতবিদ্য । সম্প্রতি কলিকাতা হাইকোর্টে বাহির হইতেছেন । তাহার বুদ্ধি বৈরাগ্য মার্জিত শীঘ্র ওকালতী ব্যবসায় উন্নতি লাভ করিতে পারিবে । যে অর্থ ব্যয় করিবার আমার সাধ্য নাই, সে অর্থ যে আমার তাহা আমি কিরূপে বলিব ? যতদিন বাঁচিলাম রূপণ বলিয়া আমার নাম লইতে লোকে একান্ত বিরূপ । বধূমাতা সাধুর কন্যা, একজন সাধবী । পরোপকার করা তাহার স্বভাবসিদ্ধ । স্বার্থপ্রদর্শন ব্যতীত পরোপকার হইতে নিবৃত্ত রাখিবার কোন যুক্তি আমি দেখি না । বধূ মা আমার স্বার্থ চান না । তিনি যে নিঃস্বার্থে পরোপকার করিতে প্রস্তুত, তাহা তাঁহার কার্য্যে প্রকাশ । আমি ত বৃদ্ধ হইয়াছি, একজন বালিকার যে পরহিতংপরতা সেরূপ ত আমার নাই । জগতে যতদিন বাস করিলাম লোকনিন্দা, লোকগঞ্জনা সহ করিলাম ; আমার অর্থের দ্বারা কত লোকের যে কত উপকার সাধিত হইতে পারিত তাহার ইয়ত্তা করা যায় না । বধূ মাতার আমার, কি সেবা ! কি ভক্তি ! কি যত্ন ! এরূপ আমি কখন দেখি নাই । তাঁহার সেই সেবা ভক্তিও যত্ন আমার মর্মে মর্মে বিদ্ধ হইয়াছে, যত ভাবি আমি অপার আনন্দ লাভ করি । আমার চিত্ত

আমার রূপণতার নিমিত্ত এক্ষণে নিতান্ত ব্যথিত। এই রূপণতার বিষয় যতই ভাবি অনুতাপ আসিয়া আমার হৃদয়কে জ্বলাইয়া তুলে। আমি কোন মতে শাস্তি লাভ করিতে পারি না। ধিক্ আমার অর্থ-সঞ্চয়স্পৃহা! ধিক্ আমার ব্যয়কুষ্ঠতা! আমি প্রতিজ্ঞা করিলাম অস্ত্র হইতে সেই পুণ্যবতী সাধবী রমণীর অভিপ্রায় মত আমার অর্থের সদ্ব্যবহার করিব। অর্থের এরূপ সদ্ব্যবহার ব্যতীত আমার চিন্তাশান্তির উপায় নাই।

মনে মনে দারুণ অনুতাপানলে ক্লেশিত হইয়া তিনি বধুমাতার নিকট গিয়া কহিলেন মা! তোমার দেব প্রকৃতি সন্দর্শন করিয়া আমার সঞ্চয়স্পৃহা আর নাই। ঘোরতর প্রজ্বলিত অগ্নির তায় অনুতাপ আমার হৃদয় মধ্যে আবির্ভূত হইয়া আমার চিত্তকে দগ্ধ করিতেছে। আমার নিস্তারের উপায় মা তোমরা মধুময় শান্তিপ্রদ উপদেশ। এক্ষণে কি করিলে আমার অর্থের সার্থকতা হয় তাহার উপায় বল। শ্বশুর মহাশয়ের সাধু প্রস্তাব শুনিয়া তিনি মনে মনে অপার আনন্দ অনুভব করিলেন। মধুর কথায় নানাবিধ সংকার্য্য অনুষ্ঠানের উল্লেখ করিয়া তাঁহার চিত্ত কথঞ্চিৎ সান্ত্বনা করিলেন। এই সময়ে ধনঞ্জয় বাবুর পিতার একোদ্বিষ্ট শ্রাদ্ধের তিথি অতি সন্নিকট হইল। তিনি এই শ্রাদ্ধ উপলক্ষে ব্রাহ্মণ কায়স্থ প্রতিবাসী অপার জাতি দীন দরিদ্র কাঙ্গালী জনকে আহ্বার করাইবার ইচ্ছা করিলেন। বধু মাতা তাঁহার এই প্রস্তাবে সাধুবাদ করতঃ উহা সর্ব্বথা সমর্থন করিলেন। শ্রাদ্ধের যথোপযুক্ত আয়োজন হইতে লাগিল। তিনি পূর্ব্ব দিন একজন ব্রাহ্মণ দ্বারা প্রতিবাসী ব্রাহ্মণদিগকে নিমন্ত্রণ করিতে পাঠাইলেন। প্রতিবাসী ব্রাহ্মণগণ ধনঞ্জয় বাবুকে রূপণ বলিয়া নিন্দা করিত। ব্রাহ্মণ তাঁহাদিগকে নিমন্ত্রণ করিতে যাইলে কেহই নিমন্ত্রণ গ্রহণ করিলেন না। সকলেই কহিলেন ধনঞ্জয়বাবু জ্ঞানেজ্ঞানারায়ণের বিবাহে আমাদিগকে নিমন্ত্রণ করিয়া

অপরাত্নে আমাদের আহারের আয়োজন করিয়াছিলেন । আমরা সমস্ত দিন অনাহারে ছিলাম, তাহার পর যে খাদ্য আমাদের দিয়া ছিলেন তাহা অতি জঘন্য । ব্রাহ্মণদিগের উপর তাঁহার কোন যত্ন বা ভক্তি নাই । আমরা উপবাসের লোভে তাহার নিমন্ত্রণ গ্রহণ করিতে পারি না ।

নিমন্ত্রণকারী ব্রাহ্মণ প্রত্যাবর্তন করিয়া ব্রাহ্মণগণের কথা ধনঞ্জয় বাবুকে জ্ঞাপন করিলেন । ধনঞ্জয় বাবু নিজ দুষ্কৃতির জন্য বিস্তর আক্ষেপ করিলেন । ক্রমে কথাটা কৃষ্ণপ্রিয়ার কর্ণকুহরে প্রবেশ করিল । তিনি মনে বড় ব্যথা পাইলেন এবং স্বপ্নের মহাশয়কে কহিলেন বাবা ! আপনি নিজে নিমন্ত্রণকারী ব্রাহ্মণকে সঙ্গে লইয়া ঐ সকল ব্রাহ্মণগণকে বিশিষ্টরূপ শ্রদ্ধা ও ভক্তি সহকারে কহিবেন, আপনারা অনুগ্রহ করিয়া আমার অপরাধ মার্জনা করুন । কল্যাণ বেলা ১০টার মধ্যে আপনারা যাহাতে আহার করিতে পান, তাহার বন্দোবস্ত করিব, যদি আপনার কোন ক্রটি দেখেন, আমাকে যথোচিত লাঞ্ছনা করিবেন । আপনারা অনুগ্রহ করিয়া আমার নিমন্ত্রণ গ্রহণ করুন । এখন অনুতাপে ধনঞ্জয় বাবুর মন জলিত হইছে । তাঁহার হৃদয়ে বিনয় ও শিষ্টাচার স্থান পাইয়াছে । পূর্বের জ্ঞান ওদাস্তের ভাব আর ছিল না । ব্রাহ্মণগণ তাঁহার এই বিনয় ও শিষ্টাচার দেখিয়া বিস্ময়াপন্ন হইলেন এবং অনুমাত্র দ্বিরুক্তি না করিয়া নিমন্ত্রণ গ্রহণ করিলেন । শ্রাদ্ধের দিবসে ধনঞ্জয় বাবুর শ্রদ্ধা ভক্তি যত্ন ও শিষ্টাচারে সকলেই আনন্দলাভ করিলেন । পূর্বের কথামত ১০টার মধ্যে ব্রাহ্মণ কায়স্থ ও প্রতিবাসী অপর জাতীয় ব্যক্তিগণ ভিন্ন ভিন্ন স্থানে আহারার্থ উপবেশন করিলেন । তাঁহারা সকলে অতি পরিতোষের সহিত আহার করিলেন । খাদ্য দ্রব্যাদি যথেষ্ট ও অত্যুত্তম হইয়াছিল । সকলের নিকট দীনভাবে শিষ্টাচার বাক্য প্রয়োগ করিতে লাগিলেন, এবং ব্রাহ্মণগণকে উপযুক্ত দক্ষিণা দান করিলেন । সকলে ধনঞ্জয় বাবুর এই আশ্চর্য

পরিবর্তনে বিশ্বাসাপন্ন হইলেন । যাহা হউক প্রতিবাসীগণ অচিরে এই পরিবর্তনের কারণ জানিতে পারিয়া সেই দেবপ্রকৃতি বধুমাতাকে মুক্তকণ্ঠে ধন্যবাদ দিতে লাগিলেন । শ্রাদ্ধান্তে দীনহীন কাকালগণ পর্যাপ্তরূপে ভোজিত হইয়াছিল ।

অতঃপর ধনঞ্জয় বাবু দীক্ষা গ্রহণ করিলেন । প্রত্যহ তাঁহার বাটীতে ধর্মশাস্ত্র পাঠিত হইতে লাগিল । তিনি হিন্দুর করণীয় নানা ক্রিয়াকাণ্ডে অর্থব্যয় করিতে লাগিলেন । বহুতর অনাথ দীনহীন শিশু সন্তানের ও বিধবার ভরণপোষণ জন্ত তাহাদিগকে মাসিক সাহায্য দিতে লাগিলেন । লেখা পড়া শিক্ষা সম্বন্ধে কেহ অভাব জানাইলে তিনি সেই অভাব নিরাকরণোপযোগী অর্থ তাঁহাকে দিতেন । অতিথি অভ্যাগতদিগকে বিশিষ্ট শ্রদ্ধাভক্তি সহকারে আহারাদি করাইতেন । যে দানকার্য্য কোনরূপে গোপন করা যায় না সেই সকল দান সাধারণে জানিতেন । উহা ব্যতীত তাঁহার অনেক দান গোপনে সাধিত হইত । সেই সকল দান ভগবান্ এবং তাঁহার অতি আত্মীয় অন্তরঙ্গ ব্যতীত কেহই জানিত না । এখন প্রতিবাসীমণ্ডলী ধনঞ্জয় বাবুকে পুণ্যবান্ ও দাতা বলিয়া প্রশংসা করিতে লাগিলেন । সাধু দেবদাস ! তোমার সেই পুণ্যবতী স্ত্রীলা কত্কার অনন্ত-সাধারণ সেবা ভক্তি যত্ন ও বুদ্ধিমত্তার গুণে নিতান্ত নির্মমহৃদয় কৃপণস্বভাব ধনঞ্জয় বাবুর হৃদয় আজ পরহুঃখকাতর ও দানশীল হইয়া উঠিল ।

কালক্রমে জ্ঞানেন্দ্রনারায়ণের দুই পুত্র জন্মিল । ঐ দুই পুত্রের জাত-ক্রিয়া ও অন্নপ্রসাদি কার্য্যে বিস্তর অর্থ ধনঞ্জয় বাবু ব্যয় করিয়াছিলেন । ধনঞ্জয় বাবুর সংসার এক্ষণে একটি আদর্শ সংসাররূপে পরিণত হইল । কৃষ্ণাপ্রসার সেবা ভক্তি ও যত্ন বাটীর সকলের হৃদয়ে প্রতিফলিত হইয়াছিল । সকলের মন নির্মল ভক্তিপ্রবণ, সকলেই সহাস্তবদন । ইহাদিগকে দেখিলে বোধ হইত যেন এই দুঃখবহুল মর্ত্যজগতে একটি আনন্দময় সংসারফুল প্রস্ফুটিত হইয়াছে । এ অবস্থা কিন্তু বহুকাল রহিল না ।

অনিবার্য বিধাতার চক্রে এই আনন্দময় সংসার নিরানন্দ হইয়া উঠিল । কৃষ্ণপ্রিয়ার জ্যেষ্ঠ পুত্রটী যখন চারি বৎসর বয়স্ক এবং কনিষ্ঠের বয়স দুই বৎসর সেই সময়ে কৃষ্ণপ্রিয়া কঠিন অরোগে আক্রান্ত হইয়া পড়িলেন । অর ক্রমশঃ বৃদ্ধি পাইতে লাগিল । সঙ্গে সঙ্গে নানা উপসর্গ দেখা দিল । দেবদাস সপরিবারে ধনঞ্জয় বাবুর গৃহে আসিলেন । সহরের ভাল ভাল চিকিৎসক দ্বারা চিকিৎসা চলিতে লাগিল । পীড়ার উপশম নাই ।

সন্তানের আপন জননীকে যেরূপ সেবা ও যত্ন এ সময়ে করা কর্তব্য ধনঞ্জয় বাবু বধুমাতার প্রতি সেইরূপ সেবা ও যত্ন করিতে লাগিলেন । পীড়া আরোগ্য করা চিকিৎসকগণের হৃঃসাধ্য হইল । পিতা মাতা ভ্রাতা শ্বশুর খাণ্ডড়ী স্বামী সকলেই কৃষ্ণপ্রিয়ার শয্যার পার্শ্বে উপস্থিত । তিনি সকল গুরুজনকে প্রণাম করিলেন । স্বামীকে আপন মস্তকের নিকট আহ্বান করিলেন । তাঁহার ক্রোড়ে আপন মস্তক বিলুপ্ত করিয়া কিয়ৎক্ষণ তাঁহার সুখাবলোকন করিতে লাগিলেন । তখন উভয়ের নয়নযুগলে অশ্রুধারা পড়িতে লাগিল । পরে ভগবানের নাম গ্রহণ করিতে করিতে নয়নযুগল নিম্নীলিত করিলেন । সে দৃশ্য কেহই দেখিতে পারিল না । কৃষ্ণপ্রিয়া নীরব নিম্পন্দ । তিনি স্বর্গধামে চলিয়া গেলেন । ঘোরতর ক্রন্দনের ধ্বনি উপস্থিত হইল । ধনঞ্জয় বাবু “মা ! কোথায় চলিয়া গেলে,” বলিয়া আছাড় খাইয়া ভূমিতে পতিত হইলেন । সংজ্ঞাহীন । জানেজ্ঞানারাম সেই দেবপ্রতিম কৃষ্ণপ্রিয়ার মুখে মুখ দিয়া উচ্চৈঃস্বরে রোদন করিতে লাগিলেন । কৃষ্ণপ্রিয়ার খাণ্ডড়ী মাতা ভ্রাতা সকলেই উচ্চৈঃস্বরে রোদন করিতে লাগিলেন । শোকে সকলেই অস্থির । দেবদাস গভীর । প্রবল শোকের বশ্য সকলকেই আগ্রুত করিল, কাহাকে কোথায় যে ভাসাইয়া ফেলিল তাহা কে বলিতে পারে ? প্রতিবেশীমণ্ডলী মধ্যে হাহাকার পড়িয়া গেল । অনাথ বিধবাগণ ও বহুসংখ্যক দীনহীন আর্তনাদ করিতে করিতে, “মা কোথায় চলিয়া গেলি ? কে আর আমাদের যত্ন করিবে, কে আর আশা-



দেব-খাওয়াইবে” ইত্যাদি বহু আক্ষেপ করিয়া কাদিতে লাগিলেন। শোকের বশ্যায় চতুর্দিকে হাহাকার। ব্রাহ্মণ কায়স্থ ও ভিন্ন ভিন্ন জাতীয় লোক সকলেই আর্তনাদ করিতে লাগিল। এই মহা-বস্ত্রার মধ্যে পড়িয়া দেবদাস কিছু চঞ্চল হইয়াছিলেন মাত্র, কিন্তু তিনি স্থানচ্যুত হন নাই। যোগেন্দ্র বাবু ও তাঁহার স্ত্রী সকলকে সময়োচিত সাঙ্ঘন্যের চেষ্টা করিতে লাগিলেন। দেবদাস যোগেন্দ্র বাবুর সহিত সংকারের ও অগ্রাগ্র বিষয়ের পরামর্শ করিয়া স্নাহাসিনী ও পুঞ্জবরকে লইয়া শকটারোহণে নিজ বাটাতে আগমন করিলেন।

স্বজাতি প্রতিবেশিগণ সংকারের আয়োজন করিতে লাগিলেন। মৃতদেহ ভিতর হইতে বাহিরে আনয়ন করা হইল। সকলেই রোদন করিতে করিতে কহিতে লাগিলেন, আমরা মার গুণের পরিচয়ই পাইয়াছি মাকে কখন দেখি নাই। আমরা জন্মের মত একবার মাকে দেখিব। তদনন্তর মৃতদেহাচ্ছাদক বস্ত্রখানি উদ্ঘাটন হইল। সকলে সেই দেবী-প্রতিমা দর্শন করিয়া হাহাকার করিয়া উঠিল, মা আমাদের যেমন গুণবতী তেমনি রূপবতী। পীড়ার প্রকোপে তাঁহার সেই অতুলনীয় সৌন্দর্য্য কতকটা নষ্ট হইলেও তখনও অনেকটা বিদ্যমান ছিল। প্রতিবেশিগণ মাকে পুষ্পমালায় বিভূষিত করিয়া দাহনার্থ শ্মশানভূমিতে লইয়া চলিল।

ধনঞ্জয় বাবু বধুমাতার নিমিত্ত দারুণ শোক প্রাপ্ত হইয়াছিলেন। এই ঘটনার কয়েক মাসের মধ্যে তিনি মানবলীলা সম্বরণ করিলেন। জ্ঞানেন্দ্রনারায়ণ শোকে একান্ত অধীর হইয়া পড়িয়াছিলেন। কালগতে বন্ধুবর্গের সাঙ্ঘন্য যদিও তিনি হাইকোর্টে ও কালতী করিতে বাহির হইয়াছিলেন, কিন্তু যে কালিমা তাঁহার হৃদয়ে পড়িয়াছিল, তাহা কিছুতেই তিরোহিত হইল না। তাঁহার শিশু সন্তান দুইটা তাঁহার মাতা ও বিধবা ব্রাহ্মজ্ঞা প্রতিপালন করিতে লাগিলেন। অনেকে তাঁহাকে দ্বিতীয় দ্বার-

পরিগ্রহ করিতে অস্বরোধ করিয়াছিল, তিনি কিছুতেই সন্মত হন নাই ।  
যে প্রতিমা অহরহ তাঁহার হৃদয়ে আগন্ধক, সেই প্রতিমাস্থলে অল্প কোন  
প্রতিমা স্থান পায় না ।



## পঞ্চদশ পরিচ্ছেদ

দেবদাসের কান্দীধাম হইতে প্রত্যাগমন এবং কৃষ্ণপ্রিয়ার পরলোক-গমন এই উভয় ঘটনার মধ্যস্থলে দেবদাসের অপূর্ণ যে সকল ঘটনা ঘটিয়াছিল, তাহা এস্থলে বিবৃত করা বিশেষ আবশ্যিক। কালক্রমে দেবদাসের জ্যেষ্ঠ পুত্র গুরুদাস এম্ এ পরীক্ষায় অঙ্ক শাস্ত্রে উত্তীর্ণ হইলেন, তিনি যেমন গুণবান্ তেমনি রূপবান্ ছিলেন। দেবদাসের কনিষ্ঠ পুত্র জীবদাস প্রবেশিকা ফাষ্টয়ার্টস্ পরীক্ষায় বিশিষ্ট যোগ্যতা প্রদর্শন পূর্বক উত্তীর্ণ হইয়াছিলেন। পিতা মাতার আদর্শে পুত্র দুইটি বিনয় ও শিষ্টাচারের আদর্শ হইয়া উঠিয়াছিলেন। জীবদাস পরহুংথে বড়ই কাতর হইতেন। নিজের যতদূর ক্ষমতা পরহুংথ নিবারণে সেই ক্ষমতাসাধ্য কোন কার্য্য করিতে তিনি ক্রটি করিতেন না। আবার পরহুংথে তিনি যেমন কাতর হইতেন পরহুংথে তেমনি উল্লাসিত হইতেন। তিনি সকলের মঙ্গল কামনা করিতেন। পিতা মাতার নিকট যখন যাহা পাইতেন তদ্বারা দীন দরিদ্রের সাহায্য করিতেন। অবস্থা বিশেষে নিজের পরিধেয় বস্ত্রাদি দান করিতেও কুষ্ঠিত হইতেন না। পিতা মাতা পুত্রের এই সদগুণ জানিতে পারিয়া মনে মনে পরম আনন্দলাভ করিতেন। পুত্র তাঁহাদের নিকট যখন যাহা

চাহিতেন তাঁহার! সাধ্যমত তাঁহাকে তাহা দিতেন। চিকিৎসা-শাস্ত্রে পারদর্শিতা লাভ করিতে পারিলে বহু লোকের উপকার করিতে পারিবেন এই নিমিত্ত তিনি কলিকাতা মেডিক্যাল কলেজে প্রবেশ করিলেন।

এই সময়ে গুরুদাসের বিবাহ সম্বন্ধে নানাস্থান হইতে নানা প্রস্তাব আসিতে লাগিল। ঘটকগণ দেবদাসকে ব্যতিব্যস্ত করিয়া তুলিলেন। বিবাহে অর্থস্পৃহা দেবদাস অতি ঘৃণার চক্ষে দেখিতেন। ঘটকগণ তন্নিমিত্ত তাঁহার নিকট অর্থের কথা উল্লেখ করিতে বিরত হইতেন। দেবদাসের অভিপ্রায় জানিয়া কন্তার পিতা মাতা অতি সজ্জন এই সকল কথা বলিয়া বিবাহের প্রস্তাব করিতেন। যাহা হউক দেবদাস সবিশেষ বিবেচনা করিয়া আপনার একটা বাল্যবন্ধুর কন্তার সহিত গুরুদাসের বিবাহ সম্বন্ধ স্থিরীকৃত করিলেন। তাঁহার বাল্যবন্ধুটির অবস্থা ভাল ছিল না। সামান্য চাকুরী করিয়া আপনার পরিবার প্রতিপালন করিতেন। বন্ধুটি ধার্মিক বিনীত ও সংস্কারবাস্পন্ন। প্রায় প্রত্যহ দুই বন্ধু সন্ধ্যার পর একত্র অবস্থান পূর্বক নানাবিধ সদালাপে সময় কাটাইতেন। বন্ধুর কন্তাটির নাম পবিত্রতা-সুন্দরী। দেবদাসকে কন্তাটি শিশুকাল হইতে ভাল বাসিতেন এবং জেঠা মহাশয় বলিয়া তাঁহাকে সম্বোধন করিতেন। কন্তার রূপ অপেক্ষা গুণে দেবদাস বিশিষ্টরূপ আকৃষ্ট হইয়াছিলেন। তিনি বন্ধুকে বলিয়া দিয়াছিলেন যে তিনি এই বিবাহে কিছুমাত্র দেনা না করেন। যাহা তাঁহার অনায়াসসাধ্য তিনি যেন তাহাই ব্যয় করেন। দেবদাসের ভদ্রতায় বন্ধু কৃতার্থ হইলেন। একে বন্ধুর অবস্থা সামান্য, তাহাতে কন্তা বিবাহযোগ্যা হইয়া উঠিয়াছিল। বন্ধুর ভাবনা র ইয়ত্তা ছিল না। দীন-বন্ধু ভগবান্ বন্ধুর উপর কৃপাপরবশ হইয়া অত্যাশ্রয় পাত্র তাহার কন্তার হস্ত যোগাড় করিয়া দিয়াছিলেন। শুভ দিনে শুভ লগ্নে পবিত্রতা সুন্দরীর সহিত গুরুদাসের বিবাহ সুসম্পন্ন হইল। দেবদাসের এই মহান্ চরিত্র যিনি অবগত হইয়াছেন তিনি তাঁহার সাধু চরিত্রের জন্য তাঁহাকে

শ্রদ্ধা ভক্তি করিতে বাধ্য হইতেন । দেবদাসের সমস্ত কার্য্য সমাজের শিক্ষাপ্রদ । ভগবান্ মহুষ্যের কল্যাণ সাধনার্থে অমঙ্গলপূর্ণ সমাজমধ্যে বতই এইরূপ লোকের সৃষ্টি করিবেন ততই সমাজ উন্নতি লাভ করিতে পারিবে । দৃষ্টান্ত উপদেশ অপেক্ষা অধিকতর কার্য্যকরী ।

বিবাহের পর বর কত্কা দেবদাসের বাটীতে আগমন করিলেন । দেবদাস সহধর্ম্মিণী বধুমাতা লইয়া পরম আনন্দে কালযাপন করিতে লাগিলেন । সুহাসিনী নববধূর জন্ত নানাবিধ উপহার দিলেন । তিনি তাঁহাকে অতিশয় স্নেহ ও যত্ন করিতে লাগিলেন । বধূটীও কালবশে শ্বশুর ও স্বশ্রীঠাকুরাণীর একান্ত অনুগত হইলেন । বাহা হউক বধুমাতা শ্বশুরালয়ে কিছুকাল থাকিয়া পিত্রালয়ে গমন করিলেন ।

পুত্রের বিবাহ কার্য্য সমুদয় যথানিয়মে সম্পাদিত হইলে পর দেবদাস কিছুকাল ভগবৎসাধন কার্য্যে মনোভিনিবেশ করিতে পারিয়াছিলেন । দ্বিবাভাগে আফিশের কার্য্যে ও সাংসারিক ব্যাপারে তাঁহাকে নিবিষ্টচিত্ত থাকিতে হইত । প্রত্যহ আফিশ হইতে বাটীতে আসিতে ৫।০ টা হইত । শৌচাদি সমাপন করিয়া কিঞ্চিৎ বিশ্রামের পর তিনি জলযোগ করিতেন । সুস্থতা লাভ করিয়া আপন তৃতীয় তলস্থ একটা গৃহে বসিয়া যথানিয়মে ভগবৎ সাধন কার্য্যে নিবিষ্টচিত্ত হইতেন । ঐ গৃহটী অতি নির্জজন ছিল । সুতরাং উহা ভগবৎ সাধন কার্য্যের বিশেষ অনুকূল ছিল । প্রত্যহ রাত্রি ১০½ টা ১১ টা পর্য্যন্ত ভগবৎ সাধন ভজন করিতেন । তৎপর আহারাদি করিয়া শয়ন করিতেন । রাত্রি ৪টার সময় শয্যা হইতে গাত্রোত্থান করিয়া শৌচাদি কার্য্য সম্পন্ন করিয়া বেলা ৬টা পর্য্যন্ত ভগবৎ সাধন ভজন করিতেন । ৬টার পর প্রত্যহ অর্দ্ধ ঘণ্টাকাল ভ্রমণ করিতেন । ভ্রমণান্তে বিশ্রাম করতঃ পুনরায় আফিশের কার্য্য ও সাংসারিক ব্যাপারে মনোনিবেশ করিতেন । সাড়ে নয়টার পর স্নানাহারাদি করিয়া ১০½ টার সময় আফিশাভিমুখে যাত্রা করিতেন ।

সংসারশ্রমে থাকিয়া মনুষ্যমাত্রেই যদিও সমস্ত দিব্যাত্মের অধিকাংশ সময় ভগবৎ সাধন ভজন কার্যে নিযুক্ত করিতে সক্ষম না হন, তথাপি মনের শ্রোত ভগবানের দিকে পরিচালিত করিলে সাধন ভজনের ফলে চিত্ত সংসারকার্যে ব্যাপ্ত থাকিলেও মনুষ্যের মন ভগবানের দিকে লক্ষ্য রাখিয়া থাকে। যিনি সংসার আশ্রমে থাকিয়া ধর্ম্মানুসারিত কার্য্যপরম্পরায় সংসারযাত্রা নির্বাহ করিতে পারেন এবং অধর্ম্ম কার্য্য সকল বিষয়ে পরি-  
তাগ করিতে পারেন, তিনি সংসারে থাকিয়াও মহাবোগী। এই সংসারে কত বিষয় বিপত্তি আছে কত প্রকার প্রলোভন আছে, কত প্রকার রিপুকার্য্য আছে যিনি এই সমস্তকে অনায়াসে পর্য্যুদন্ত করিয়া অবলীলা-  
ক্রমে ধর্ম্ম পথে বিচরণ করিতে পারেন তাঁহার গ্রাম ক্ষমতাশালী বীর কে আছে ? তাঁহার গ্রাম চিত্তসংযমকারীই বা কে ? সেই মহাপুরুষ অটল অচল। তাঁহারই দৃষ্টি প্রকৃত ভগবদভিমুখিনী। দেবদাস এইরূপে প্রকৃত বীরের গ্রাম সংসারশ্রমে থাকিয়া ধর্ম্মানুসারে আপন গন্তব্য পথে বিচরণ করিতে লাগিলেন।

এই সময়ে কৃষ্ণপ্রিয়ার ভয়ঙ্কর পীড়ার সমাচার দেবদাস পাইলেন। সেই পীড়ার কি পরিণাম পাঠকগণ তাহা অবগত আছেন। কৃষ্ণপ্রিয়ার বিরোগে সুহাসিনী শোকে নিতান্ত অধীর। তাঁহার আহার নিদ্রা নাই কেবল কন্ঠার গুণরাশি মনে করিয়া বিনাইয়া বিনাইয়া আর্তনাদ করিতে-  
ছেন। তাঁহার সেবার কারণ তাঁহার প্রিয় কিঙ্করীগণ নিকটে উপস্থিত। গুরুদাস জীবদাস সতত মাতার নিকট উপস্থিত থাকিয়া তাঁহার শোকা-  
পনোদনের চেষ্টা করিতে লাগিলেন। বাটীতে সুহাসিনীকে এই অবস্থায় রাখিয়া দেবদাস পুনরায় আর একবার ধনঞ্জয় বাবুর বাটীতে গমন করিলেন। এখানে তিনি অধিকক্ষণ থাকেন নাই। যোগেন্দ্র বাবুর সহিত কয়েকটা বিষয় পরামর্শ করিয়া বাটীতে প্রত্যাবর্তন করিলেন।

দেবদাসের বিপদের কথা শুনিয়া তাঁহার বন্ধুগণ সকলে তাঁহার বাটীতে

উপস্থিত হইলেন । তাঁহাকে সাক্ষ্য আর তাঁহারা কি করিবেন ? তাঁহার মনস্থিতার ক্ষমতা দেখিয়া তাঁহারা বিশ্বাসাপন্ন হইলেন । তিনি যেরূপভাবে আপন কর্তব্য পালন করিতেন সেইভাবে সকল কার্য্য সম্পাদন করিতে লাগিলেন । কথাবার্ত্তায় কেহই তাঁহার মনের কিছু মাত্র বিকার উপলব্ধি করিতে পারিলেন না ।

এদিকে কালক্রমে দেবদাসের বিপৎপাতের কথা গুরুদেবের কর্ণে প্রবেশ করিল । তিনি দেবদাসকে যে পত্র লিখিয়াছিলেন তাহা পরম মঙ্গলকর । ঐ পত্র জীবের শিক্ষাপ্রদ ।

গুরুদেবের পত্র খানি এখানে উদ্ধৃতযোগ্য থাকায় তাহা যথাযথ লিখিত হইল ।

ক্ষেমাম্পদ শ্রীমান্ দেবদাস দত্ত

বাবাজী সকল কল্যাণ ভাজনেষু -

বৎস !

তোমার প্রিয়তম কন্যা স্বর্গধামে গমন করিয়াছেন । সংসারী মনুষ্য মাত্রেই এরূপ বিপদে মুহুমান হইয়া থাকেন । কন্যাকে বাঁচাইতে তোমরা অবশ্যই যথেষ্ট চেষ্টা যত্ন করিয়াছ । কিন্তু তথাপি তোমরা তাঁহাকে বাঁচাইতে পারিলে না । বিশ্বপতি বিধাতার ইচ্ছায় তাঁহার জীবন ও মৃত্যু সংঘটিত হইয়াছিল । সুতরাং যাহা ভূতভাবন ভগবানের ইচ্ছা তদনুরূপ কার্য্য হওয়া ভগবন্তের জনের প্রার্থনীয় । ভগবান্ পরম দয়ালু ; কিসে জীবের সুখ ও মঙ্গল হইবে তাহা তিনি জানেন । তিনি মহাজ্ঞানী মহান্ সদবিবেচক । তাঁহার মহান্ অভিপ্রায়ের গূঢ়তম কারণ জীব বিদিত নহে । তাঁহার কার্য্যে ভগবন্তের জনের নিরানন্দ হওয়া সম্পূর্ণ অকর্তব্য । নিরানন্দ হইলে তাঁহার কার্য্যে দোষারোপ হয়, তাহাতে প্রত্যব্যয় আছে । জীব সকল তাঁহার, না এই জগতে সেই জীবের যে পিতামাতা বা আত্মীয় স্বজন আছে তাহাদিগের ? পিতামাতা জীবের নিমিত্ত কারণ মাত্র । কে

সেই সন্তানকে বৃদ্ধি করিল ? কে তাহাকে জ্ঞানবুদ্ধি বিবেচনা ইত্যাদি দ্বারা ভূষিত করিল ? শরীরমধ্যগত দেহ ধারণের যন্ত্রসকল কে সৃষ্টি করিল ? ভাবিয়া দেখ পিতামাতার ইচ্ছায় সন্তান জন্মে না । সমস্ত ভগবৎ মহাশক্তির কার্য্য । যদি তাঁহার জীব তিনি উহা গ্রহণ করেন, জীব তুমি কেন শোক হুঃখ কর । আসক্তি বশতঃ জীবের এই শোক হুঃখ । তুমি সন্তান হইতে নানারূপ আশা করিতে সেই সন্তানের বিয়োগ তোমার সকল আশা উন্মূলিত করিয়া দিল । যে জীব তোমার নহে তাঁহার উপর কেন আশা, কেন আসক্তি । মনুষ্য তুমি জ্ঞান ও সদ্বিবেচনার আশ্রয় গ্রহণ কর, এই সম্বন্ধে বিশিষ্ট চিন্তাকর, অকারণ শোকমোহের আশ্রয় লইও না ।

বৎস ! আমি জানিতেছি তুমি সাধনবলে বলীয়ান হইয়াছ । শোক মোহকে তুমি পর্য্যদন্ত করিতে পারিয়াছ । আমার চিরআশীর্বাদ তোমার উপর । যদি সুবিধা হয় একবার তোমার বাটীতে যাইব । আমি তোমার মনের ভাব অবগত আছি । তোমার প্রার্থনা সিদ্ধি আমার বিশেষ লক্ষ্য ।

তোমার আশীর্বাদক

গুরুদেব ।





## ষোড়শ পরিচ্ছেদ ।

গুরুদাস পিতার ভ্রায় সদৃশশালী ছিলেন । কলিকাতা বিশ্ববিদ্যালয়ে এম এ পর্যন্ত যাবতীয় পরীক্ষায় তিনি বিশিষ্ট যোগ্যতার সহিত উত্তীর্ণ হইয়া ছিলেন । কতিপয় কৃতবিদ্য ব্যক্তিকে গবর্ণমেন্ট ডেপুটি ম্যাজি-স্ট্রেট পদে নিযুক্ত করিবার অভিপ্রায় করিয়া কলিকাতা বিশ্ববিদ্যালয়ের কর্তৃপক্ষগণের নিকট প্রয়োজনমত কতকগুলি ভাল ভাল কৃতবিদ্য ব্যক্তির নাম চাহিয়া পাঠাইলেন । তাঁহারা যে সকল ব্যক্তির নাম দিয়া-ছিলেন তন্মধ্যে গুরুদাসের নাম ছিল । তদনন্তর গবর্ণমেন্ট গুরুদাসের অভিপ্রায় লইয়া তাঁহাকে ডেপুটি ম্যাজিষ্ট্রেটের পদে নিযুক্ত করিয়া ছিলেন । তিনি কিছুকাল ডেপুটি ম্যাজিষ্ট্রেটের কার্য্য কলাপ যত্নের সহিত শিক্ষা করিয়াছিলেন । উদ্ধতন রাজকর্ম্মচারীগণ তাঁহাকে ম্যাজিষ্ট্রেট কার্য্যে বিশিষ্টরূপ শিক্ষিত দেখিয়া একটি মহকুমার কর্তৃত্বভার তাঁহার হস্তে ব্রহ্ম করিলেন । মহকুমার কর্তৃত্বভার গ্রহণ করিয়া বিচারকার্য্যে তিনি সক-লের শ্রদ্ধা আকর্ষণ করিতে লাগিলেন । মহকুমাবাসী জনগণের উন্নতি কল্পে তিনি বিলক্ষণ চেষ্টা করিতেন । সংসারের অশান্তিকর কুচরিত্র লোক সকলের দমন কার্য্যে তিনি বড়ই তৎপর ছিলেন । তাঁহার শাসনশৃে

চৌর্যাদি ছক্কতির সংখ্যা ক্রমশঃ স্বল্প হইতে লাগিল । গুণবান্ সচরিত্রের প্রতি তিনি বিশিষ্টরূপ শ্রদ্ধা করিতেন । তিনি যখন যে মহকুমার যাই-  
তেন, সেই মহকুমায় উন্নতিসাধন করিতে তিনি সবিশেষ চেষ্টা করিতেন । তিনি প্রত্যহ দীনদরিদ্রগণকে যথাসাধ্য অর্থ সাহায্য করিতেন । অনাথ বিধবা ও নিরাশ্রয় শিশুসন্তানের জন্ত নিজে সাধ্য মত অর্থ দিতেন এবং সম্পত্তিশালী অগ্নাত ব্যক্তির দ্বারা তাহাদিগেরও যথেষ্ট অর্থ সাহায্য করাই-  
তেন । তাঁহার দান অতি গোপনে নিম্পাদিত হইত । তাঁহার দান বা সাহায্য লোকে না জানিতে পারে ইহা তাঁহার প্রধান চেষ্টা ছিল । ফলতঃ তিনি যখন যে মহকুমায় যাইতেন সেই মহকুমাবাসী লোকগণ তাঁহাকে ভক্তি শ্রদ্ধা ও প্রশংসা করিতেন । উন্নতন রাজকন্মচারীগণ তাঁহার বিচার ও শাসনপ্রণালীর যথেষ্ট স্মৃতি রাখিতেন এবং ক্রমশঃ তাঁহাকে উচ্চ হইতে উচ্চতর শ্রেণীতে উন্নীত করিয়াছিলেন ।

জীবদাস কলিকাতা মেডিক্যাল্ কলেজে প্রবেশ করিয়া বিশেষ যত্ন সহকারে অধ্যয়নাদি করিতে লাগিলেন । শিক্ষকগণ তাঁহার প্রতিভার পরিচয় সত্ত্বর পাইয়াছিলেন । চিকিৎসা-শাস্ত্রে তাঁহার বুদ্ধি ও বিবেচনার অতিমুখতা স্বভাবসিদ্ধ ছিল । চিকিৎসা-সংক্রান্ত ভিন্ন ভিন্ন বিদ্যায় তৎ-  
কালে তাঁহার তুল্যরূপ পারদর্শিতা কোন ছাত্র লাভ করিতে পারে নাই । শিক্ষকগণ মুক্তকণ্ঠে তাঁহার ভূয়সী প্রশংসা করিতেন । তিনি এম, বি পরী-  
ক্ষায় সর্বোচ্চস্থান অধিকার করিয়াছিলেন । কর্তৃপক্ষগণ তাঁহার গুণবত্ত্ব ও যোগ্যতার সবিশেষ পরিচয় পাইয়া তাঁহাকে একটা বড় চিকিৎসালয়ের  
তত্ত্বাবধারক নিযুক্ত করিলেন । এই কার্যে তিনি চিকিৎসাসম্বন্ধীয় বিস্তর অভিজ্ঞতা লাভ করিতে সক্ষম হইয়াছিলেন । এই সময়ে তিনি  
এম, ডি পরীক্ষার জন্ত প্রস্তুত হইতে লাগিলেন । শেষোক্ত পরীক্ষায়ও তিনি বিশিষ্ট সম্মানের সহিত উত্তীর্ণ হইয়া ছিলেন । অতঃপর তিনি  
চিকিৎসালয়ের কার্য পরিচালনা করিয়া স্বাধীনভাবে চিকিৎসা ব্যবসায়

আরম্ভ করিয়াছিলেন। কলিকাতা তাঁহার কার্যস্থান। তিনি অতিশয় দয়ালু ছিলেন। লোকেও তাঁহার দয়ালুতার সুযোগ পাইয়া অনেক সময় তাঁহার প্রাপ্য মুদ্রা হইতে তাঁহাকে বঞ্চিত করিত। কিন্তু জীবদাস তাহাতে অণুমাত্র ক্রুদ্ধ বা দুঃখিত হইতেন না। পরোপকার করাই তাঁহার লক্ষ্য, অর্থ তাঁহার মূখ্য উদ্দেশ্য ছিল না। কি দরিদ্র, কি ধনী কাহাকেও তিনি অযত্নের সহিত চিকিৎসা করিতেন না। চিকিৎসা ও সজ্জনতার গুণে অচিরে তিনি লক্ষপ্রতিষ্ঠ হইলেন।

এপর্যন্ত জীবদাসের বিবাহ হয় নাই। দেবদাস গুণের পক্ষপাতী ছিলেন। রূপ দেখিতে ভাল, কিন্তু সংসার কার্যে কোন প্রয়োজনে লাগেনা। সদ্বুদ্ধিশালী ধার্মিক ব্যক্তির কন্যা রূপবতীই হউন বা না হউন, তিনি অন্যের কন্যা অপেক্ষা তাঁহাকে অধিকতর মনোনীত করিতেন। মনোনয়ন কালে কন্যার দুর্বলতা, কন্যার বা কন্যার পিতামাতার রোগ-গ্রস্ততা তিনি সবিশেষ লক্ষ্য করিতেন। তিনি যেরূপ কন্ঠার সহিত পুত্রের বিবাহ দিতে ইচ্ছা করিতেন সেইরূপ পাত্রীও প্রাপ্ত হইয়াছিলেন। কলিকাতা নগরী মধ্যে সিমুলিয়া নিবাসী হরিশচন্দ্র বহুর প্রথম কন্ঠা সুনীলার সহিত জীবদাসের উদ্বাহ-ক্রিয়া সম্পাদিত হইল। কন্যাটী নামে সুনীলা ; কার্যেও সুনীলা কন্যার ন্যায় গুণশালিনী ছিলেন। জীবদাসের বিবাহে দেবদাস কন্ঠার পিতার নিকট কিছুমাত্র প্রত্যাশা করেন নাই। বরং তাঁহাকে পরিকার রূপে জানাইয়া ছিলেন যে যেরূপ ব্যয় তাঁহার অনাস্থাসাধ্য সেইরূপ ব্যয় কন্যার বিবাহে করেন, অন্যথা তিনি বিশিষ্টরূপ অসন্তোষ প্রাপ্ত হইবেন। হরিশবাবু একজন সাধক বৈষ্ণব। তিনি পরদুঃখকাতর এবং লোকের উপকার করিতে সদা সচেষ্ট। বড়বাজারে তাঁহার একটি ঔষধের দোকান ছিল। সেই দোকান হইতে তাঁহার যথেষ্ট উপার্জন ছিল। তিনি আপন জ্যেষ্ঠ পুত্র রামচন্দ্রকে দোকানের কার্য চালাইতে ভাল রূপ শিক্ষা দিয়াছিলেন। রামচন্দ্র শিক্ষিত অতি

বিনীত ও বুদ্ধিমান । তিনি দোকানের কার্য্য বিশিষ্ট পরিশ্রম ও সুখ্যাতির সহিত নির্বাহ করিতেন । হরিশবাবু অবসর পাইলে পুত্রের কার্য্যের সহায়তা করিতেন, কিন্তু দিবসের অধিকাংশ সময় আপন সাধন ভজন ও লোকহিতকর কার্য্যে অতিবাহিত করিতেন, হরিশ বাবুর সহিত দেবদাসের বিলক্ষণ সৌহার্দ্য জন্মিল । অবসর মতে উভয় বৈবাহিক একত্র বসিয়া ধর্ম্মালোচনা করিতেন ।

দিনের পর দিন যাইতে লাগিল, কৃষ্ণপ্রিয়ার জন্ম শোক যদিও মধ্যে মধ্যে সুহাসিনীকে কাতর ও ক্লেশিত করিয়াছিল কিন্তু ঐ শোকের আবেগ পূর্বাপেক্ষা অনেকটা শিথিলীভূত হইয়াছিল । সুহাসিনীর হৃদয়ে শান্তি-স্থাপন দেবদাসের লক্ষ্য ছিল । সদৃশ ব্যতীত তাপিত হৃদয়ে শান্তিরূপ নীতল বারি কে অভিসিক্তন করিতে সমর্থ ? গুরুদেবই এই শান্তি স্থাপনে একমাত্র সক্ষম । গুরুদেব কলিকাতায় আসিতে ইচ্ছুক ছিলেন । এক দিন কাশীধাম হইতে স্বহাদ আসিল গুরুদেব রেলপথে কালী হইতে কলিকাতা অভিমুখে যাত্রা করিয়াছেন । কল্যা হাবড়া ষ্টেশনে সকালে পৌছি-বেন । গুরুদেবের দর্শনলাভ হইবে এই আনন্দে দেবদাস মাতোয়ারা হইয়া পরদিন সকালে তিনি গুরুদেবকে আনিবার জন্ত প্রস্তুত হইয়া শকট-রোহণে হাবড়া ষ্টেশনে গমন করিলেন । দেবদাস একজন উচ্চ রাজ-কর্ম্মচারী । অনেক সাহেবের সহিত তাঁহার বিশেষ পরিচয় ছিল । হাবড়া ষ্টেশনে যে সকল লোক কার্য্য করিয়া থাকেন তাঁহারা অনেকে তাঁহাকে চিনিতেন, সুতরাং যে মঞ্চের পার্শ্বে লৌহ পথের গাড়ীগুলি আসিয়া থাকে সেই মঞ্চে বাইতে তাঁহাকে কেহ নিবারণ করিল না । তিনি সেই মঞ্চের উপর গাড়ীর প্রতীক্ষায় দাঁড়াইয়া রহিলেন । ক্রমে ট্রেন দেখা দিল, ক্রমে গাড়ীগুলি আসিয়া সেই মঞ্চের পার্শ্বে দাঁড়াইয়া রহিল । টিকিট গ্রহণকারী কর্ম্মচারীগণ এক একটা গাড়ীর দায় বুনিয়া আরোহীগণের নিকট হইতে টিকিট লইয়া তাহাদিগকে ছাড়িয়া দিতে লাগিলেন ।

কিয়ৎক্ষণ পরে দেবদাস গুরুদেবের সন্দর্শন পাইলেন । গুরুদেব দেবদাসকে দেখিতে পান নাই । তিনি মঞ্চ হইতে নামিয়া বাহিরে আসিতেছেন এমন সময় দেবদাস তাঁহার সম্মুখে লম্বমান পতিত হইয়া তাঁহাকে প্রণাম করিলেন এবং পদধূলি মস্তকে গ্রহণ করিয়া গাজ্রোথান করিলেন । গুরুদেব তাঁহাকে দেখিতে পাইয়া পরম পুলকিত হইলেন । বাহ দ্বারা তাঁহাকে কতকক্ষণ বক্ষঃস্থলে আলিঙ্গন করিয়া রহিলেন, পরে উভয়ের নয়নযুগল দিয়া আনন্দাশ্রু পড়িতে লাগিল । অনেকগুলি আরোহী তখনও বাহির হইতে ছিল । তাহারা উভয়ের এই আচরণে বিস্ময়াপন্ন হইলেন । তদনন্তর গুরুদেব দেবদাসের কুশল জিজ্ঞাসা করিয়া তাঁহার সহিত একত্রে আসিয়া শকটারোহণ করিলেন ।

দেবদাস গৃহে গুরুদেব উপস্থিত । ভৃত্যবর্গ সকলেই ব্যস্ত । জীবদাস গুরুদাস জ্ঞানেন্দ্রনারায়ণ একে একে গুরুদেব চরণে পতিত হইয়া প্রণাম করিলেন এবং তাহার পদধূলি আপন আপন শিরোদেশে গ্রহণ করিলেন । সুহাসিনী গললগ্নীকৃতবাসা হইয়া তাহার চরণে প্রণাম করিলেন । গুরুদেব সকলকে আশীর্বাদ করিলেন । দেবদাস ব্যতীত গুরুদেব অপর কাহাকে চিনিতেন না, দেবদাস একে একে সকলের পরিচয় তাঁহাকে দিলেন । গুরুদেব আসনে উপবেশন করিলেন । তাঁহার সেই প্রশান্ত সৌম্য গম্ভীরাকৃতি দর্শন করিয়া সকলের মনে এক অপূর্ব ভাবের সমাবেশ হইল । প্রবল আনন্দ স্রোত যেন সকলের মন ভাসাইয়া তুলিল । সকলের চিত্ত যেন শান্তির প্রয়াসী হইয়া তাঁহার অভিমুখে ধাবিত হইল । তিনি সহাস্তে সকলের সহিত আলাপ করিতে লাগিলেন । কথাগুলি বড়ই মধুর, চিত্তে কোনরূপ আক্ষেপ আসিতে দেয় না । দেবদাস ভৃত্যের দ্বারা নিজের তাঁহার সেবা করিতে লাগিলেন । সেবার ভার তিনি পুত্র, কি জামাতা, কি বনিতা কাহাকেও দিতে সম্মত ছিলেন না । গুরুদেব দেবদাসের পরিচর্যায় পরম প্রীতি লাভ করিলেন । বিশ্রামান্তে স্নান, স্নানান্তে

কিয়ংকাল দেবদাসের উপাসনা-গৃহে বসিয়া ভগবদ্বারাদনা করিলেন । পরে দেবদাস পরম যত্ন ও ভক্তি সহকারে তাঁহার আহাতিরা দিয়া একটা উৎকৃষ্ট শয্যোপরি তাঁহাকে শয়ন করাইলেন এবং নিজে তাঁহার পাদসম্বাহন করিতে লাগিলেন । গুরুদেবের নিদ্রাক্ষণ হইলে তিনি উঠিয়া আসিয়া স্নানাহার করিলেন । গুরুর প্রতি দেবদাসের এতাদৃশ যত্ন ভক্তি ও সেবা দেখিয়া সকলে বিস্ময়াপন্ন হইলেন । প্রথম দিন তিনি আফিসে গেলেন না । নিদ্রান্তে গুরুদেব উঠিয়া দেখেন দেবদাস পদতলে বসিয়া আছেন । তিনি যে আদেশ করিবেন সেই আদেশ যেন পাঠবার প্রতীক্ষায় বসিয়া আছেন । সে দিন দেবদাসের গুরুদেবের সেবা বাতীত আর কোন কার্য ছিল না । এই গুরুসেবাই তাহার সে দিনের ভগবত্বপাসনা । সে দিন তিনি তাঁহার কোন বন্ধু বান্ধবের সহিত সাক্ষাৎ করিবার অবসর পান নাই । গুরুদেব তাঁহার অন্তঃপুরে অধিষ্ঠিত । তাঁহার সেই অমানুষিক সেবা ভক্তি ও শ্রদ্ধায় গুরুদেব বশীভূত । উভয়ের অন্তরে ভালবাসার স্রোত বহিল । শিষ্যের ভালবাসা গুরুর ভালবাসাকে পরাজিত করিল । নয়নযুগলে উভয়েরই আনন্দাশ্রু প্রবাহিত হইল ।

দ্বিতীয় দিবস দেবদাস পুনরায় গুরুদেবের সেবা আরম্ভ করিলেন । দেবদাসের আফিশ কামাই হইতেছে, তাহাতে দেবদাসের ক্ষতি হইতে পারে, একক্ষণের জন্ত দেবদাসের মনে এজ্ঞান উঠে নাই । কিসে আমার গুরুর সুখ হয় তাহার জন্ত লালায়িত, তাহার জন্ত সদা চেষ্টিত । গুরুদেব দেবদাসের সকল বিষয় অবগত ছিলেন । দেবদাসকে কৰ্ম্মস্থানে পাঠান আবশ্যক, নচেৎ উহার ক্ষতি হইবে গুরুদেব ইহা স্থির করিয়া দেবদাসকে আফিশে যাইবার কথা বলিলে তিনি অতিশয় বিনয় ও ভক্তি সহকারে কহিলেন বাবা ! আপনার সেবা স্থখে বঞ্চিত হওয়া অপেক্ষা আফিসে না যাওয়া ভাল । গুরুদেব দেবদাসের মঙ্গলার্থে কহিলেন বৎস ! তুমি যথারীতি আপন কার্য্য কর, নচেৎ আমি সন্তোষ পাইব না । অগত্যা

দেবদাস বনিতা ও পুত্রগণের উপর সেবার ভার দিয়া প্রত্যেক দিন যথাসময়ে আফিসে যাইতেন। যতক্ষণ আফিসে থাকিতেন তদ্ব্যতীত অবশিষ্ট সময় তিনি নিজে গুরুদেবের পরিচর্যা রত থাকিতেন।

দেবদাসের বনিতা, দুই পুত্র এবং জামাতা গুরুদেবের শরণাপন্ন হইয়া সকল শাস্তি-প্রদায়িনী দীক্ষার জন্ত প্রার্থনা করিলেন। গুরুদেব তাঁহাদের মনোগত ভাব বুঝিতে পারিয়া মধুর বাক্যে কহিলেন তোমরা দেবদাসের সম্বন্ধে আমার পরমাত্মীয়। তোমাদিগের নিকট আমার অদেয় কিছুমাত্র নাই। তোমাদের প্রার্থনা, সিদ্ধি লাভ করুক। অতঃপর তাঁহারা সকলেই দেবদাসের দৃষ্টান্ত হৃদয়ে গাঁথিয়া গুরুসেবাকার্য্যে একান্ত অবহিত হইলেন। গুরুদেব তাঁহাদের সকলের প্রতি প্রসন্ন হইয়া একে একে তাঁহাদিগকে দীক্ষাদান করিলেন। বলা বাহুল্য দীক্ষালাভে তাঁহাদের সকলের অন্তঃকরণ আনন্দরসে আপ্লুত হইয়া উঠিল।

দীক্ষার পর হইতে স্নানাসিনীর মন শাস্তির পথে অগ্রসর হইতে চলিল। তিনি এক্ষণে বেশ বুঝিতে পারিলেন পুত্র বল, কন্যা বল, স্বামী বল, সকলই কিছুকালের জন্ত। এক আনন্দময়ই নিত্যবস্তু, কি জীবনে কি মরণে তিনিই জীবের সহায়, তিনিই জীবের মঙ্গলদাতা ও শাস্তিদাতা। তিনি ব্যতীত জীবের জীবন নাই।

দেবদাস-গৃহে গুরুদেব প্রায় একমাস কাল থাকিয়া শিষ্যগণকে বহুবিধ সাধন-প্রণালী শিক্ষা দিতে লাগিলেন। সাধনের গুণে সকলের চিত্ত স্থির হইয়া আসিতে লাগিল। শিষ্যগণ সাধনের ঔৎকর্ষ, আনুকর্ষ অতুল্যমানে আনন্দের মাত্রা উপলব্ধি করিলেন। তদনন্তর তিনি শিষ্যগণের নিকট বিদায় লইয়া কশীধামে প্রত্যাবর্তন করিলেন। তাঁহার বিরহে শিষ্যগণ মনে মনে বড়ই ক্লেশ বোধ করিতে লাগিলেন।



## সপ্তদশ পরিচ্ছেদ

গুরুদেব বারাগমী ধামে প্রত্যাবর্তন করিলে পর এক দিন দেবদাস 'মলুষ্য কিরূপে সংসার যাত্রা নির্বাহ করিবেন' এই সম্বন্ধে গাঢ় চিন্তায় নিমগ্ন হইলেন। এই বিষয়ে তিনি যে মৌমাংসার উপনীত হইলেন নিম্নে তাহা অবিকল প্রকাশিত হইল। গৃহস্থ মাত্রেয়ই নানা বিপদে পড়িবার সম্ভাবনা। সেই সকল বিপদ হইতে উদ্ধার লাভ করিতে হইলে অর্থের প্রয়োজন। এজন্য গৃহস্থ মাত্রেয়ই ভবিষ্যৎ বিপদ মুক্তির জ্ঞাত অর্থসঞ্চয়ের আবশ্যক। বিপদকালে সঞ্চিত অর্থ না থাকিলে গৃহীকে বাধ্য হইয়া অন্যের নিকট ঋণ করিতে হয়। গৃহী যদি সৌভাগ্য ক্রমে ঋণ পরিশোধ করিতে পারিলেন তবে তাঁহার মঙ্গল, অন্যথা ঋণজালে জড়িত হইয়া সংসারে অশেষ ক্লেশ উপভোগ করিতে হয়। তাঁহার বিষয় সম্পত্তির নাশ হয়, শেষ কারাবাসও ভোগ করিতে হয়। সুতরাং গৃহস্থমাত্রেয়ই কিছু কিছু অর্থসঞ্চয় আবশ্যক।

ইহ সংসারে জন্মগ্রহণ করিয়া মলুষ্যমাত্রেয়ই ধর্ম্মার্থে কিছু কিছু ব্যয় করা উচিত। দীন দরিদ্র প্রতিবাসীর বা আত্মীয় অন্তরঙ্গের অভাব, যথাসাধ্য মোচন করা প্রত্যেকের উচিত। কেবল আমার সৌভাগ্য হউক, অপরে কষ্ট পাইলে ও তাহার প্রতীকার করিবার প্রয়োজন নাই, একরূপ ভাবনা



স্বার্থপর নীচমনা ব্যক্তির উপযুক্ত। যিনি যে ধর্ম্মাবলম্বী হউন না কেন, সকলেরই আপন আপন ধর্ম্মানুসারে কার্য্য করিতে হইলে কিছু কিছু ব্যয়ের আবশ্যক হয়। কিছুমাত্র ব্যয় করিব না, কেবল মুখের কথায় ধর্ম্মাচরণ করা চলে না। যিনি অনাহারে ক্লেশ পাইতেছেন তাঁহাকে যদি আহার না দেন বা আহাৰ্য্য সঞ্চয়ের উপযুক্ত অর্থ না দেন তবে কি শুদ্ধ কথায় তাঁহার দুঃখ দূর হইবে? যিনি পীড়ায় শয্যাগত উপযুক্ত ঔষধ বা পথ্যের সম্পূর্ণ অভাব, বল দেখি মুখের কথায় তাঁহার কি উপকার হইবে? ঔষধ বা পথ্য না পাইলে তাঁহার কোন উপকার নাই। মনুষ্য আপন দারিদ্র্যাক্রান্ত প্রতিবেশীর দুঃখ দূর করিবেন ইহা ভগবানের অভিপ্রায় এবং এই জন্য মনুষ্য সমাজবদ্ধ হইয়া বাস করিতেছেন। আমি কাহারও কোন সাহায্য করিব না এবং অন্যোও আমায় কোন সাহায্য করিবে না ইহা যদি ভগবানের অভিপ্রায় হইত, তবে সমাজবদ্ধ হইয়া বাস করিবার আবশ্যকতা কি? এই সংসারে সকল ধর্ম্মাবলম্বী ব্যক্তির তত্ত্বার্থপ্রিয় সাধু-দিগের অনুষ্ঠিত কার্য্য বা উপদেশ অনুসারে চলিতে হইলে কিছু কিছু ব্যয় করা উচিত, অতএব ধর্ম্মার্থ ব্যয় প্রত্যেক গৃহীর অবশ্য কর্তব্য।

ধর্ম্মানুসারে অর্থোপার্জন মনুষ্যের কর্তব্য। অধর্ম্মানুসারে অর্থোপার্জনে সমাজের ঘোর অনিষ্ট সাধিত হয়, সুতরাং অধর্ম্মানুসারে অর্থোপার্জন জগদীশ্বরের অভিপ্রেত নহে। উপরের লিখিত বাক্যানুসারে ইহা সিদ্ধান্ত হইল যে সংসারী মাঝেই ধর্ম্মানুসারে অর্থোপার্জন করিবে এবং তাহার কার্য্য তিনটি :—প্রথম নিজ ও পরিবারবর্গের ভরণ পোষণ, দ্বিতীয় অবস্থানুসারে ধর্ম্মার্থ ব্যয়, ত্রয় অবস্থানুসারে অর্থসঞ্চয়। সকল গৃহী এই তিন কর্তব্য কৰ্ম্ম পালন করেন না, সুতরাং অবস্থাতেদে তিন প্রকার গৃহী। যে সকল গৃহী পূৰ্ব্বোক্ত তিনটি কর্তব্য কৰ্ম্ম করিয়া থাকেন তাঁহাদিগকে উত্তম শ্রেণীর গৃহীপদবাচ্য বলিতে পারা যায়। এই শ্রেণীর গৃহস্থমধ্যে অতি উদারহৃদয় পরদুঃখকাতর স্বার্থভ্যাগী মহাত্মা দৃষ্টিগোচর

হয় । যাহারা প্রথম ও তৃতীয় কর্তব্য সাধারণতঃ পালন করেন কিন্তু দ্বিতীয়টির উপর বিলক্ষণ দৃষ্টি রাখিয়া যথাসাধ্য প্রচুর অর্থ ঐ কর্তব্য কার্যে প্রয়োগ করেন, তাঁহাদের সংখ্যা বিরল হইলেও তাঁহাদিগকে এই উত্তম শ্রেণী গৃহী মধ্যে অন্তর্ভুক্ত করা হইল । যাহারা দ্বিতীয় কর্তব্য কার্য সম্পূর্ণরূপে উপেক্ষা করিয়া কেবলমাত্র প্রথম ও তৃতীয় কর্তব্যের উপর দৃষ্টি রাখিয়া থাকেন, স্বার্থপ্রণোদিত হইয়া কেবল সঞ্চয় ও আত্মোদয় পূর্ণ করিবার চেষ্টা করিয়া থাকেন, সমাজের কোন উপকারজনক কার্য যাহাদিগের দ্বারা অনুষ্ঠিত হয় না তাঁহারা এই অধম শ্রেণীর গৃহীপদ বাচ্য । যাহারা কেবলমাত্র প্রথম কর্তব্য পালন করেন, দ্বিতীয় বা তৃতীয়টি উপেক্ষা করেন তাঁহারাও অধমশ্রেণী গৃহীপদবাচ্য । শাস্ত্রে কথিত আছে অনেক গৃহী ভিক্ষালব্ধ অন্ন হইতে অতিথি সংকার করিয়াছেন । স্তত্রাং বিবেচনা করিয়া দেখিতে গেলে ইহা প্রতিপন্ন হয় আত্মস্তর ব্যতিরেকে কোন গৃহী দ্বিতীয় কর্তব্যপালনে অসমর্থ নহেন । যে গৃহী দ্বিতীয় কর্তব্য পালনে পরাভূত তাঁহাকে অধমশ্রেণীর গৃহী মধ্যে গণ্য করা হইল । যিনি তৃতীয় কর্তব্য পালনে বিমুখ বা অসমর্থ কিন্তু অপর দুই কর্তব্য পালন করেন তাঁহাকে মধ্যম শ্রেণীর গৃহীমধ্যে পরিগণিত করা হইল ।

এই সংসার মধ্যে এবশ্বিধ লোক দেখা যায় যাহারা বহু বহু লোকের সর্বনাশ করিয়া প্রচুর অর্থ উপার্জন করতঃ পূর্বকথিত তিনটি কর্তব্য পালন করিতেছেন । আহা ! এই সকল নীচমতি পাপাত্মা লোক-সকলের কার্যে যে কত লোক আত্মনাশ করিতেছে, কত সরলচিত্ত গৃহস্থ একবারে উৎসাদিত হইয়া বাইতেছে তাহার সংখ্যা করা যায় না । অধর্মোপার্জিত অর্থের দ্বারা, বা কতক জীবের প্রতি দ্রোহাচরণ করিয়া অপর কতিপয় জীবের উপকার করা অপেক্ষা, কাহারও কোন অনিষ্ট না করিয়া দরিদ্র গৃহী হইয়া সংসারে বাস করা অধিকতর প্রশংসার

বিষয় তাহার আর সন্দেহ নাই । যাহারা কষ্টে আত্মপরিবারের উদরান্নের সংস্থান করেন বা সম্পূর্ণরূপে নিজপরিবার ভরণপোষণ করিতে অসমর্থ, পর সাহায্যব্যতিরেকে যাহাদের জীবিকা নির্বাহ সুকঠিন তাঁহারা দরিদ্র-গৃহী । দরিদ্রগৃহী সদাশয় হইলে আপনাকে বঞ্চিত করিয়া অনেক সময় পরোপকার ধর্ম পালন করিয়া থাকেন ।

যে গ্রাম বা নগরে উত্তম শ্রেণীর গৃহীর সংখ্যা অধিক সে গ্রাম ও নগরের পরম সৌভাগ্য । তথায় দরিদ্র গৃহীর সকল অভাব তাঁহারা মোচন করিয়া থাকেন, তথায় অনাথ শিশু সন্তানের অভাব জনিত আর্ন্তনাদ শ্রুত হয় না, পতি-পুত্র-হীনা কামিনার অনকষ্টাদির জন্ত অশ্রু-জল ফেলিতে হয় না । উত্তম শ্রেণীস্থ গৃহীগণ নিজের অভাব হইলে যেমন তাহার প্রতিবিধানের চেষ্টা করিয়া থাকেন, দরিদ্রগৃহীর অভাবকেও সেই চক্ষে দর্শন করিয়া থাকেন । দরিদ্র গৃহীর মধ্যে কোন পুরুষকে কর্মক্ষম দেখিলে তাহাকে একটি কর্মের যোগাড় করিয়া দেন ; স্ত্রীলোকদিগের মধ্যেও নানাবিধ শিল্পকার্য্য প্রবর্তিত করিয়া দিয়া তাহাদিগকে নিজের উপাঙ্গনে নিজকে ভরণ পোষণ করিতে শিক্ষা দিয়া থাকেন । বস্তুতঃ উত্তম শ্রেণীর গৃহী সংসারের অলঙ্কার স্বরূপ বলিলে অত্যাুক্তি হয় না । অধম ও দরিদ্র গৃহীদিগকে উত্তম শ্রেণীর গৃহী মধ্যে উন্নীত করা উত্তম শ্রেণীর গৃহীর কার্য্য । উত্তম শ্রেণীর গৃহী নিজ কর্মদোষে অধম বা দরিদ্র গৃহীর শ্রেণীস্থ হইতে পারেন । উত্তম শ্রেণীর গৃহী যাহাতে স্বশ্রেণী হইতে বিচ্যুত না হন এবং দরিদ্র ও অধম শ্রেণীর গৃহীগণ যাহাতে উত্তম শ্রেণীর গৃহী পদে উন্নীত হইতে পারেন তাহার সম্বন্ধে উপায় কি ? প্রায় দেখিতে পাওয়া যায় উত্তম শ্রেণীর গৃহীদিগের মধ্যে অর্থের অভাব হইলে তাঁহারা অপরের সাহায্য প্রার্থী হন না, বা অপরকে জানান না ; জানাইতেও লজ্জা বোধ করেন । ঋণের উপর ঋণ করিয়া তাঁহাদিগকে ক্রমশঃ পদস্থলিত হইতে হয় ।

তঁাহারা যে অবস্থায় বরাবর চলিয়া আসিতেছেন তাহা হইতে বিচ্যুত হওয়া তঁাহাদের পক্ষে অসম্ভব । মনুষ্যের অভাব হইলে প্রায় সদ্বুদ্ধির অভাব হয় ; সদ্বুদ্ধির অভাব হইলে সাংসারিক অভাবমোচনের জন্ত গৃহী হৃক্ষণ করিতেও বিরত হন না । এইরূপে উত্তম শ্রেণীর গৃহীকে অধম বা দরিদ্র গৃহীর পদে নমিত হইতে দেখা যায় ।

যাঁহারা উত্তম শ্রেণীর গৃহীপদবাচ্য তাঁহারা সংসারে সর্বদা সাবধান হইয়া কার্য্য করিবেন । কিরূপ সাবধান ? ইহা অবশ্য জিজ্ঞাস্য হইতে পারে । নিজের অবস্থা ও পরিণাম চিন্তা করিয়া তাঁহারা আপন বুদ্ধি ও বিবেচনার অমুরূপ কার্য্য করিবেন । ফলতঃ সাবধানী গৃহী প্রায় সংসার ক্লেশ হইতে পরিত্রাণ পাইয়া থাকেন । সদ্বুদ্ধি ও সদ্বিবেচনা করিয়া কার্য্য করা হইল, ফল অমুরূপ ফলিল এরূপ প্রায় হয় না ; যদি হয় তাহা ভগবানের অভিপ্রেত, মনুষ্য তুমি তাহার আর কি করিবে ? সদ্বুদ্ধি ও সদ্বিবেচনা পরিচালন পূর্ব্বক সংসারী নিজের অবস্থা ও পরিণামের উপর সম্যক দৃষ্টি রাখিয়া কার্য্য করিলে আশামুরূপ ফললাভ করিতে প্রায় সক্ষম হইয়া থাকেন । সুতরাং মনুষ্য সদ্বুদ্ধি ও সদ্বিবেচনা পরিচালন পূর্ব্বক নিজের অবস্থা ও পরিণাম চিন্তা করিয়া সাংসারিক কার্য্য সকল সম্পাদন করিলে সুখ স্বচ্ছন্দে সংসারযাত্রা নির্বাহ করিতে পারিবেন এবং অভাব জনিত ক্লেশের হস্ত হইতে পরিত্রাণ পাইতে পারিবেন ।

সংসারে পুরুষ যেমন সংসার যাত্রা নির্বাহ বিষয়ে যত্ন ও পরিশ্রম করিবেন, স্ত্রীলোকদিগেরও সেইরূপ যত্ন ও পরিশ্রম করা আবশ্যিক । নিয়মিত পরিশ্রম করিলে নর নারী উভয়ের স্বাস্থ্য বৃদ্ধি হয় । উপার্জন যেমন কিছু বৃদ্ধি হইল অমনি চেষ্টা হইল রন্ধনार्थ লোক নিযুক্ত করা, নুতন দাস দাসী নিযুক্ত করা বা তাহাদের সংখ্যা বৃদ্ধি করা । ফলে কি হইল ? স্ত্রীর কোন পরিশ্রম করিতে হইল না, তিনি আলস্য সাগরে ভাসমান হইয়া কালাতিপাত করিতে লাগিলেন । যিনি শারীরিক পরিশ্রমে

বিরত, রোগ তাহাকে আশ্রয় করিতে ক্ষান্ত হয় না । রোগের চিকিৎসা চলিতে লাগিল । তাঁহার গর্ভে যে সকল সন্তান জন্মিল তাহাদের দশা জননীর অনুরূপা । এইরূপে মনুষ্য আপন বুদ্ধি দোষে সংসারযাত্রা নির্বাহ সম্বন্ধে অধিকতর বায়ভারে ক্লিষ্ট হইয়া থাকেন । নিজের পরিবার-মধ্যগত ব্যক্তি রক্ষনাদি করিলে যেমন উৎকৃষ্ট ও অভিমত অন্ন ব্যঞ্জনাদি প্রস্তুত হয়, নিযুক্ত রক্ষনকারী ভৃত্যের দ্বারা তাদৃশ অন্ন ব্যঞ্জনাদি প্রস্তুত হয় না, প্রত্যুত তাহাদিগের দ্বারা রক্ষনাদি সম্বন্ধে রক্ষন দ্রব্যের অতিরিক্ত ব্যয় হইয়া থাকে । বিশ্বস্তত্বেরে অবগত হওয়া গিয়াছে একদা কোন বাবুর রক্ষনকারী ভৃত্য কোন কারণে অনুপস্থিত ছিল, বা কর্ম ত্যাগ করিয়া চলিয়া গিয়াছে ; নূতন লোকের যোগাড় হইতেছে না। তখন আহার প্রস্তুতের অত্র উপায় না পাইয়া সেই বাবু ও তাঁহার সমস্ত পরিবার দোকানে প্রস্তুত মিঠাই তরকারী আহাঁর করিয়া দিন পাত করিলেন । পরিবারস্থ স্ত্রীলোকগণ রক্ষন জানেন না, বা রক্ষন করিতে সম্পূর্ণ অসমর্থ । ধন্য বাবুগিরি ! তুমি দেশের সর্বনাশ করিতে বেশ সক্ষম । বাবুগণ ! তোমরাও ধন্য ! তোমরা এই সর্বনাশ দেখিয়াও দেখিতেছ না, প্রতীকারের কোন চেষ্টা নাই । হে নর নারীগণ ! যদি তোমরা নিজের বা আপন পরিবার ও সন্তান সম্ভতিগণের কল্যাণ কামনা কর তবে শারীরিক প্রশ্রমকে হীন বিবেচনা করিও না । বাহা দ্বারা শরীরের মঙ্গল হইবে তাহা নিজে প্রস্তুত করিলে এবং যত্ন ও শ্রদ্ধা সহকারে আপন অন্তরঙ্গ মধ্যে পরিবেশন করিলে যে কি উপকার হয় তদ্বিষয়ে বিশেষ অনুধাবন করিবেন । বড় বড় ধনাঢ্য বাবুদিগের দৃষ্টান্ত সামান্ত সামান্ত উপার্জনকারী ব্যক্তিগণ অনুকরণ করিয়া যে বিষম বিপদে পতিত হইতেছেন তাহা বলা বাহুল্য ।

যেমন পুরুষগণ পরিশ্রমশীল হইয়া অর্থোপার্জন করেন, গৃহস্থ পরিবার-মধ্যে স্ত্রীলোকগণ সাবকাশ প্রাপ্ত হইলে বহুবিধ শিল্পকার্য্যের মধ্যে কোন

না কোনটার অনুষ্ঠান করিতে পারেন। জীলোকগণ ঐ সকল শিল্প দ্বারা কিছু কিছু উপার্জন করিতে পারেন। সকলের সমবেত উপার্জনে গৃহস্থ সমধিক স্বচ্ছন্দভাবে সংসার যাত্রা নির্বাহ করিতে সমর্থ হন। সংসারযাত্রা নির্বাহ সম্বন্ধে পরিণামস্থ সকলেই যদি যথাসাধ্য কায়িক পরিশ্রম করিয়া সংসারের উন্নতি সাধন করেন, তবে সেই পরিবার সবিশেষ উন্নতি লাভ করিতে নিশ্চয় পারিবেন। পরপ্রত্যাশা প্রকৃত সুখ স্বচ্ছন্দ লাভের অন্তরায় স্বরূপ।

স্বল্প ব্যয়ে ভক্ষ্য বস্ত্র লাভের চেষ্টা সাংসারিক ব্যক্তির পক্ষে বিশেষ প্রয়োজনীয়। যে সকল গৃহস্থের শালী জমী আছে তাহা হইতে বাহাতে বৎসর বৎসর ধাত্ত পাওয়া যায় তাহার বন্দোবস্ত করিবেন। চাউল ক্রয় করিয়া সংসার নির্বাহ করিতে হইলে অধিকতর ব্যয় পড়ে; ধাত্ত সংগ্রহ থাকিলে সংসার খরচ কম হয়। যে গৃহস্থের নিকটে শুনা জমী আছে তিনি তাহাতে প্রয়োজন মত আহাৰ্য্য দ্রব্য উৎপাদন করিতে পারেন। কোন মতে সে সকল জমী পতিত বা অবাবহার্য্য রাখা উচিত নহে। সামান্য ব্যয়ে এই সকল জমীর উৎপন্ন ফসল প্রাপ্ত হইলে সংসারের বিলক্ষণ সুবিধা হয়। প্রত্যেক গৃহস্থ নিজে বা প্রয়োজন বুঝিলে কোন সুবিজ্ঞ কৃষকের পরামর্শ লইয়া আপন আপন জমীতে উপযুক্ত ফসল উৎপন্ন করিবেন। এ সম্বন্ধে কোন নির্দিষ্ট নিয়ম উল্লেখ করা নিম্প্রয়োজন। যে দিন যে ভক্ষ্য বস্তুর আবশ্যক সেই দিন সেই ভক্ষ্য বস্ত্র ক্রয় করা অনেক গৃহস্থের অভ্যাস। যে বস্ত্র প্রত্যাহ না ক্রয় করিলে চলে না সে বস্ত্র প্রত্যাহ ক্রয় করিবে; কিন্তু তদ্ব্যতীত অনেক ভক্ষ্য দ্রব্য আছে যাহা মাসের বা সপ্তাহের মত ক্রয় করিলে মূল্যের ও দ্রব্যের সম্বন্ধে গৃহস্থের অনেকটা সুবিধা হয়। সামান্য রূপে দ্রব্য ক্রয় করা অপেক্ষা এক সময়ে কিছু বেশী দ্রব্য ক্রয় করিলে মূল্যের সুবিধা হয়। পরিমিত ব্যয়শীল গৃহকর্ত্তী আপন সুবুদ্ধি চালন করিয়া তাহা হইতেও

যাহা কিছু উদ্ভূত করিতে পারেন তাহা গৃহীর পক্ষে সুবিধা। ফলতঃ গৃহস্থ যেমন উপার্জন করিবেন উপার্জিত অর্থ সদ্বৃদ্ধি সহকারে যাহাতে পরিমিতরূপে ব্যয়িত হয় তৎপক্ষে তাহার দৃষ্টি রাখা একান্ত কর্তব্য। মিতব্যয় সম্বন্ধে গৃহলক্ষ্মীগণকে শিক্ষাদান করা ও সাংসারিক ব্যাপারে তাহাদিগকে শিক্ষিত করা গৃহীর কর্তব্য। স্ত্রী পুরুষ উভয়ে মিতব্যয়ী হইলে গৃহীর বিশিষ্ট সুখ ও স্বচ্ছন্দ।

একটি নির্দিষ্ট প্রণালী বা নিয়ম অনুসারে, প্রত্যেক গৃহীর সাংসারিক ব্যয় করা উচিত। যাহার কোন প্রণালী বা নিয়ম নাই পরিবার ভরণপোষণ সম্বন্ধে তাহার ব্যয় অতিরিক্ত হইয়া পড়ে। নিয়মানুসারে না চলিলে গৃহীর পরিণামে কষ্টে পড়িতে হয়, তজ্জন্ম মনে নানাবিধ অশান্তির উদয় হইয়া থাকে।

প্রত্যেক গৃহীর অবস্থানুসারে দানাদি কার্য সম্পাদন করা উচিত। এককালে বেশী দান করা অনেক গৃহস্থের সামর্থ্যের অতিরিক্ত, সুতরাং গৃহস্থ সেইরূপ দানে পরাভুখ। যদি গৃহী কোন বিষয়ে দান করিতে ইচ্ছা করেন, যদি সেই দান এককালীন সম্পাদন করা তাহার অশক্য হয় নিক্ষিপ্ত সময়ান্তর স্বল্প স্বল্প করিয়া দান করিলে তাহার পূর্বাভীষিত দান তিনি অনায়াসে সুসম্পন্ন করিতে পারেন। গৃহস্থগণ যদি এইরূপে দান করিতে অভ্যাসশীল হন তাহা হইলে গৃহী সকলের সমবেত দানে একটি বৃহৎ মঙ্গল কার্য সুসম্পন্ন হইয়া যায়, অথচ অতিরিক্ত দান বা অল্প কোন কারণে গৃহীকে ক্লেশ ভোগ করিতে হয় না। এইরূপে কার্য নির্বাহ করিতে হইলে গৃহীগণ আপন আপন গ্রামে বা নগরে ভাল ভাল কতিপয় লোক লইয়া এক একটি দাতব্য সভা স্থাপন করিবেন এবং ঐ সভা-সংগৃহীত অর্থ দ্বারা দরিদ্র গৃহীর ও দীনহীন অক্ষম ব্যক্তির সাহায্য করিবেন এবং প্রয়োজন মতে অত্রান্ত মঙ্গলকর কার্য অবোধে নিষ্পন্ন করিতে পারিবেন। সভা সাধারণের বস্তু, সুতরাং ইহার কার্যপ্রণালী

যাহাতে স্বেচ্ছাক্রমে সম্পাদিত হয় তাহার প্রতি লক্ষ্য রাখা সাধারণের নিত্য কৰ্ত্তব্য।

সভার কার্য নির্বাহ সম্বন্ধে কোন কার্যের প্রতি বিরক্তি বা উপেক্ষা প্রদর্শন করা নিত্য কৰ্ত্তব্য। বিরক্তি বা উপেক্ষা প্রদর্শন করিলে কোন কার্য স্বেচ্ছাক্রমে সম্পাদিত হয় না। সাধারণ কার্যে আমার মত চলিল না, অধিকাংশ অগ্র মত করিতেছেন, ইহা জানিয়া নিশ্চিন্ত হইও না, বা তন্নিমিত্ত কোন ক্ষোভ বা রোষের আশ্রয় নাইও না। যথাসাধ্য তোমার মত অপর সকলকে বুঝাইবার চেষ্টা করিবে, যদি তাঁহারা তোমার মত ভাল বলিয়া না বুঝেন, অধিকাংশের মতানুসারে যদি কোন সৎকার্য হয়, বা যদি কোন কার্য সম্পাদিত না হয় তথাপিও কোন ক্ষোভ বা রোষ প্রকাশ করিবে না। ক্ষোভ রোষে কার্যাহীন। আজ অধিকাংশের মতানুসারে এক কার্য হইল, ঐ কার্যে দোষ বা ক্ষতি ভবিষ্যতে প্রকাশিত হইলে তাহা ভবিষ্যতে সংশোধিত হইয়া যাইবে।

আজি কালি অনেক গুলি জীবন সার্থীকরণ (Life Insurance) আফিস স্থাপিত হইয়াছে। সাধারণতঃ এই সকল আফিশের কার্য সুন্দর রূপে চলিতেছে। যৌবন দশায় উপার্জনের প্রথম অবস্থা হইতে এই সকল সংমিলিত কারবারের কোন একটীতে নির্দিষ্ট কালের জন্য আপন অবস্থানুসারে জীবন সার্থীকরণ করা নিত্য কৰ্ত্তব্য। এমন ঘটনা প্রায় দেখা যায় যে লোক যতদিন জীবিত থাকেন সুখস্বচ্ছন্দে পরিবার ভরণ পোষণ করিলেন, কিন্তু তাঁহার দেহান্ত কালে পরিবার বর্গের জন্য এক কপর্দকও রাখিয়া যাইতে পারিলেন না। সুতরাং তাঁহার দেহান্ত হইলে পরিবারবর্গের উপার্জনশীল ব্যক্তির অভাবে দারুণ কষ্টে পড়িতে হয়। যদি জীবনের শেষ দশায় অর্থ পাইবার বন্দোবস্ত থাকে তাহা হইলে অর্থ পাইয়া তোমার অক্ষম অবস্থা সুখে যাপন করিতে পারিবে। যাহা হউক এই প্রণালীতে বহুতর পরিবার ঘোরতর বিপদ হইতে পরিত্রাণ পাইয়া-




ছেন । ডাক ঘর সমুদয়ে যে অর্থ সঞ্চয়ের ব্যবস্থা আছে তাহাও বিশেষ প্রশংসার বিষয় । সামান্য সামান্য অর্থ যাহা কিছু উৎপত্ত হয়, তাহা ইহাতে জমা দিতে পারা যায়, আবার আবশ্যক মতে তৎসমস্ত বা তাহার কোন অংশ উঠাইয়া লওয়া যায় । এই সকল প্রণালী অর্থসঞ্চয়ের উপায় । এই সকল প্রণালী সকলের নিকট পরিচিত, সুতরাং তৎসম্বন্ধে অধিক লেখা নিম্নয়োজন । এই সকল ব্যবস্থা গৃহীর পক্ষে বিশেষ হিত-করী তাহার আর সন্দেহ নাই ।

সংসার আশ্রমে থাকিলে মনুষ্য নানাবিধ কার্য্য কলাপ বিঘ্ন বিপত্তিতে ব্যতিব্যস্ত হইয়া উঠেন । এই সকল ব্যাপারে সংসারী ব্যক্তি ধীরতা আশ্রয় করিবেন । অধীর হইলে কর্তব্যাকর্তব্য স্থির করিতে পারা যায় না, সুতরাং তাহাতে বিলক্ষণ ক্ষতি হইবে । যিনি যতই ধীরতা সহকারে কার্য্য করিতে পারিবেন তিনি ততই সফল পাইতে পারিবেন । মনুষ্য বিপত্তি নিবারণার্থ যথাসাধ্য চেষ্টা করিবেন, বিশিষ্টরূপ চেষ্টা স্বপ্নেও যদি তিনি নিষ্ফল হন তিনি মনকে এই বলিয়া প্রবোধ দিবেন যে যাহা ভগবানের ইচ্ছা তাহা সম্পাদিত হইল, এক্ষণে বিপদ সহ করা ব্যতীত উপায়ান্তর নাই । মনুষ্য চেষ্টা করিবেন, ফল ভগবানের হস্তগত । কেহ কেহ বলিয়া থাকেন যে চেষ্টা করা বুঝা, যাহা ভগবানের অভিপ্রায় চেষ্টা করিলেও হইবে, না করিলেও হইবে । এরূপ কথা যুক্তি ও শাস্ত্র-বিরুদ্ধ । অবশ্য ভগবানের অভিপ্রায় কি তাহা মনুষ্য অগ্রে জানিতে পারে না । যাহা তাহার ইচ্ছা তাহা সম্পাদন করাইবার নিমিত্ত তিনিই মনুষ্যকে চেষ্টা করাইতে বাধ্য করেন । মনুষ্য তাহার অধীন, তিনিই মনুষ্যকে ঘুরাইতেছেন, তিনিই মনুষ্যকে নানাকার্য্যে প্রবৃত্ত করাইতেছেন । মনুষ্য তোমার সাধ্য কি তুমি সেই মহাপ্রভুর বিশ্বপতির ইচ্ছায় বিরুদ্ধে চেষ্টা না করিয়া চূপ করিয়া থাকিবে ?

ধর্ম্মের দিকে লক্ষ্য রাখিয়া বাহাতে সাংসারিক সকল কার্য্য সম্পাদিত

করিতে পার, তজ্জন্তু সেই করুণাময় ভগবানের নিকট মনুষ্য সর্বদা প্রার্থনা করিবে। তাঁহার কৃপায় তুমি ধর্মপথে থাকিয়া সাংসারিক কার্য্য কলাপ নির্বাহ করিতে পারিবে এবং সেই মঙ্গলদাতা বিধাতা তোমাকে বিষয় বিপত্তি হইতে নিস্তার করিবেন। যদি ধর্মপথে থাকিয়া কার্য্য করিলে ঘোরতর বিপদ, এমন কি প্রাণ নাশের সম্ভাবনা হয় মনুষ্য তথাপি তুমি ধর্মপথ পরিত্যাগ করিবে না। যদি এক দিকে প্রচুর লাভ, অন্য দিকে বিপুল অনিষ্ট, কিছু অনিষ্ট সংঘটিত হইলেও তোমার ধর্ম রক্ষা হয় তাহা হইলে মনুষ্য তুমি সেই প্রচুর লাভকে সর্বথা উপেক্ষা করিবে। এইরূপ মহীয়ান্ সচ্চরিত্রবান্ লোক জগতের আদর্শ। মৃত্যু সকলের হইবে, মৃত্যুর পর তোমার নামও বোধ হয় কেহ জানিবেন না, কিন্তু ঐরূপ মহচ্চরিত্রবান্ পুণ্যাত্মা আদর্শ পুরুষের নাম জগতে চিরকাল বিদ্যমান থাকিবে, এবং সকলের মুখে তাঁহার স্মরণ পরিকীর্তিত হইবে। পরম-কারুণিক ভগবান্ এ জন্মে যদি না হয় পরজন্মে নিশ্চয়ই তাঁহার মঙ্গল বিধান করিবেন।



## অষ্টাদশ পরিচ্ছেদ

কৃত্যাবিযোগের পর কয়েক বৎসর দেবদাস ভগবত্পাসনায় চিত্ত সমাবেশ করিতে পারিয়াছিলেন। এই কয়েক বৎসর সংসার যাত্রা তিনি সুখে সমাপন করিয়াছিলেন। এই সময়ে তাঁহার জ্যেষ্ঠ পুত্রবধূ একটা সুকুমার প্রসব করিলেন। দেবদাস বিধিপূর্বক পৌত্রটির জাতকর্ম সমুদয় সম্পাদন করিলেন। দীন দরিদ্র ব্রাহ্মণগণকে সাধ্যমত অর্থদানে পরিতুষ্ট করিলেন। পৌত্রমুখচন্দ্র নিরীক্ষণ করিয়া সুহাসিনীর বড়ই আনন্দ। দেবদাসের চিত্ত সদা প্রসন্ন। লাভ লোকসানে সমভাবাবলম্বী, তিনি অধীর কিছুতেই হন না। যাহা শাস্ত্র ও লোকাচারমত তিনি অবহিত হইয়া তাহা পালন করিতেন। তিনি শিষ্টাচার ও বিনয়ের আদর্শ। তাঁহার গুণে লোক সকল এমনি বশীভূত হইয়াছিলেন যে তাঁহার সৌভাগ্য তাঁহারা আপন সৌভাগ্য বিবেচনা করিতেন, তাঁহার বিপদে আপনাদের বিপদ ভাবিতেন। ক্রমে পৌত্রটির অন্নপ্রাশনের সময় আসিল। দেবদাস পৌত্রটির নাম দ্বিজদাস রাখিলেন। অন্নপ্রাশনোপলক্ষে তিনি বিস্তর ব্রাহ্মণ কায়স্থ অপর জাতীয় লোক দীন দরিদ্রকে পরিতোষ পূর্বক ভোজন করাইয়াছিলেন। দীন দরিদ্র ও ব্রাহ্মণগণকে সাধ্যমত অর্থদান করিয়াছিলেন। ফলতঃ পৌত্রের অন্ন-

প্রাশন ব্যাপারে যথাসম্ভব অর্থ ব্যয়ে ক্রটি করেন নাই । সকলেই তাঁহার কার্যে ভূয়সী প্রশংসা করিয়াছিলেন ।

এই সময়ে বারাণসী ধামে বিস্থচিকা রোগের অতিশয় প্রকোপ হইয়াছিল । বিস্তর লোক এই রোগে কালগ্রাসে পতিত হইলেন । তাঁহার খুড়া ও খুড়ী ঠাকুরাণী এই রোগে আক্রান্ত হইয়াছিলেন । তাঁহাদের পীড়ার সমাচার পাইয়া দেবদাস জীবদাসকে সমভিব্যাহারে লইয়া বারাণসী ধামে গমন করিলেন । জীবদাস ও তত্রত্য কতিপয় সুবিজ্ঞ চিকিৎসক বিশিষ্টরূপে তাঁহাদিগকে চিকিৎসা করিতে লাগিলেন । রোগের কিছুমাত্র প্রতীকার হইল না । একে একে উভয়ে পুণ্যভূমি বারাণসী ক্ষেত্রে মানবলীলা সম্বরণ করিলেন । দেবদাস তাঁহাদের অন্তেষ্টিক্রিয়াদি যথানিয়মে নিষ্পাদিত করিলেন । তদনন্তর মাতা ও স্বপুত্র মহাশয়কে অন্য একটা বাটীতে স্থানান্তরিত করিলেন । গুরুদেব সহবাসে কয়েকদিন অতিবাহিত করিয়া রাজকার্য্যের অনুরোধে গুরুদেবের অনুমতি লইয়া কলিকাতায় প্রত্যাবর্ত্তন করিলেন ।

যথা সময়ে পিতৃব্য ও পিতৃব্যপত্নীর কাশীলাভে দানাদি কার্য্য দেবদাস কলিকাতায় সম্পাদন করিলেন । এই দুই ব্যাপারে তিনি সাধ্যমত ব্যয় করিয়াছিলেন কোন ক্রটি করেন নাই । এই ঘটনার পর কয়েক মাস নির্দিষ্টকালে কাটিয়া গেল, দেবদাস গুরুদাস ও জীবদাস আপন আপন কর্ম্ম মনোযোগপূর্ব্বক চালাইয়া আসিতে লাগিলেন । কোন বিপৎপাত ঘটে নাই । অকস্মাৎ দেবদাস একদিন আপনার বাটীতে বসিয়া আছেন এমন সময় ডাকে এক পত্র পাইলেন, ঐ পত্র তাঁহার কাশীস্থ একবন্ধু লিখিয়াছেন । ঐ বন্ধুটীও তাঁহার গুরুদেবের শিষ্য । পত্র পাঠ করিয়া জানিলেন গুরুদেব দুই দিবস হইল মর্ত্যধাম পরিত্যাগ করিয়াছেন । দেহত্যাগের পূর্ব্বে কোন পীড়া তাঁহাকে ক্লেণ্ডিত করে নাই । একদিন সকালে তিনি তাঁহার বারাণসীবাসী শিষ্যগণকে সমভিব্যাহারে লইয়া

শ্রীশ্রীবিষ্ণুদেব দেব দর্শন করিতে গমন করিলেন। মন্দিরের সম্মুখস্থ চত্বরে শিষ্যগণ লইয়া উপবেশন করিলেন। শিষ্যগণ পরিবেষ্টিত হইয়া তিনি যোগাবলম্বন করিলেন, কিয়ৎক্ষণ পরে শিষ্যগণ জানিতে পারিলেন গুরুদেব তাঁহাদিগকে পরিত্যাগ করিয়া স্বর্গধামে গমন করিয়াছেন। কাশীধামে গুরুদেব সর্বজনপ্রিয় ছিলেন। শিষ্যগণ আর্তনাদ করিতে লাগিলেন। সকলে হাহাকার করিতে লাগিলেন। গুরুদেবের বিরহ শিষ্যগণের অসহ্য ছিল। গুরুদেবকর্তা সমাচার পাইয়া তথায় আসিলেন এবং বহুক্ষণ একদৃষ্টে গুরুদেবকে নিরীক্ষণ করিতে লাগিলেন, পরে “ভগবন্! তোমার ইচ্ছা সুসম্পন্ন হউক” বলিয়া শিষ্যগণ দ্বারা গুরুদেবদেহ মণিকর্ণিকায় লইয়া গেলেন, তথায় যথারীতি তাঁহার ঔর্দ্ধদৈহিক ক্রিয়া সম্পাদন করিলেন।

গুরুদেব একজন সম্পত্তিশালী ব্রাহ্মণ ছিলেন। তাঁহার এক পুত্র ও এক কন্যা জন্মিয়াছিল। পুত্রটী শৈশবাবস্থায় পরলোক গমন করেন, কন্যাটী বালবিধবা। পত্নী, পুত্র ও জামাতৃ বিয়োগে অতিশয় শোকাক্তা হইয়াছিলেন। পরে অরে কিছুদিন শয্যাগতা থাকিয়া সকল শান্তিদাজী মৃত্যুর ক্রোড়ে শয়ন করিলেন। গুরুদেবের একটা ভাগিনের তাঁহার বিষয়সম্পত্তির তত্ত্বাবধারণ করিতেন। গুরুদেব একজন সিদ্ধ বিরাগীর নিকট দীক্ষিত হইয়াছিলেন। সাধন ভজন ব্যতীত তাঁহার আর কোন কার্য ছিল না। অনন্তমুখা হইয়া ভগবৎসাধনের ফলে মহাশক্তি তাঁহাতে অন্তর্নিহিত হইয়াছিল। তিনি আপন মাসিক ব্যয় ২৫ ও কন্যার মাসিক ব্যয় ২৫ মোট ৫০ টাকা মাসে মাসে পাইবার বন্দবস্ত করিয়া ভাগিনেরকে সমস্ত বিষয় দান করিয়া কাশীধামে বাস করিতে লাগিলেন। গুরুদেব কোন শিষ্যের নিকট কিছুমাত্র প্রত্যাশা করিতেন না। অধিকন্তু তাহাদিগকে আহালাদি দ্বারা পরিতুষ্ট করিতে পারিলে আনন্দলাভ করিতেন। নিজের ও কন্যার আহালাদি কারণ সামান্য ব্যয় হইত।

অবশিষ্ট অর্থ তিনি দীন দুঃখী অনাথ ব্যক্তিগণের সাহায্যার্থ ব্যয় করিতেন। তাঁহার কন্যা ও দেবদাস তাঁহার সমস্ত সাধনপ্রণালী আয়ত্ত করিতে পারিয়াছিলেন। অপর শিষ্যগণ সাধনমার্গে ইহাদের তুল্য উৎকর্ষ লাভ করিতে পারেন নাই। দেবদাসহৃদয়ে গুরুদেবপ্রতিমা অত্যুজ্জলরূপে অঙ্কিত ছিল। সদাই হৃদয়ে গুরুদেবের সাক্ষাৎকার লাভ করিতেন। গুরুদেব দেহ রাখিলেন বটে, কিন্তু তাঁহার হৃদয় হইতে অন্তর্হিত হইতে পারেন নাই। গুরুদেবের দেহত্যাগ সমাচার তিনি সেইদিন সুহাসিনী ও জীবদাসকে দিয়াছিলেন এবং পত্র লিখিয়া গুরুদাস ও জ্ঞানেন্দ্রনারায়ণকে অবগত করিয়াছিলেন। এই সমাচারে সকলেই শোকার্ত ও ভ্রিয়মাণ। দেবদাসের ভাব স্বতন্ত্র, তিনি ত গুরুদেবকে হারান নাই, তাঁহার শোকই বা কি দুঃখই বা কি ? গুরুদেবের প্রীত্যর্থে দান করিবার জন্য দেবদাস পাঁচশত টাকা গুরুদেব কন্যার নিকট পাঠাইয়া ছিলেন। কিন্তু শিষ্যের নিকট অর্থ লওয়া গুরুদেবের নিষেধ থাকায় তিনি বিনয় ও ভদ্রতা সহকারে উহা ফেরত দিয়াছিলেন। গুরুদেবের ভাগিনেয় শ্রাদ্ধার্থে সমস্ত ব্যয় পাঠাইয়া দিয়াছিলেন।

কাশীবাসী কতিপয় পণ্ডিতের সহিত গুরুদেবের বিশেষ হৃদয়তা ছিল। গুরুদেবের উপর তাঁহাদের অতিশয় শ্রদ্ধা ছিল। গুরুদেব কাশীধামে দেহ রাখিয়াছেন, দেহান্তে তিনি শিবত্ব লাভ করিয়াছেন। বাঁহার প্রেতত্ব নাই তাঁহার জ্ঞান-প্রশাদ্ধের কিছুই আবশ্যক নাই। তাঁহার প্রীত্যর্থে দানাদি চলিতে পারে, এই ব্যবস্থা তাঁহারা দিয়াছিলেন। সুতরাং সেই সকল প্রিয়সুহৃদ পণ্ডিতগণের ব্যবস্থানুসারে গুরুদেবের শ্রাদ্ধকার্য্য হয় নাই। দান, কাঙ্গালীভোজন, ব্রাহ্মণাদি নিমন্ত্রিত ব্যক্তিগণকে পরিতোষ-পূর্ব্বক আহার করান ইত্যাদি কার্য্য সুশৃঙ্খলে সম্পাদিত হইয়াছিল।

গুরুদেবের শ্রাদ্ধ সম্বন্ধে দেবদাস ও গুরুদেবকন্যার অভিপ্রায় একরূপ। তাঁহাদের অভিপ্রায় এবং পণ্ডিতমহাশয়গণের ব্যবস্থা ফলে সমান, কিন্তু

কারণ পৃথক্ । উভয়ে গুরুদেবকে সাক্ষাৎ ঈশ্বর স্বরূপ বিবেচনা করিতেন, মনুষ্য জ্ঞান করিতেন না । যিনি আনন্দস্বরূপ, জীবের নিস্তার-কর্তা, শান্তিদাতা, তাহার আবার প্রেতঙ্গ কোথায় ? তাঁহার জ্ঞাত প্রেতশ্রাদ্ধের আবশ্যক কি ? সাধন সাহায্যে তাঁহার। গুরুদেবের মহা-শক্তির ও স্বরূপতার পরিচয় পাইয়াছেন ; ‘গুরুদেব সাক্ষাৎ ঈশ্বর’ এই বিশ্বাস ও জ্ঞান তাঁহাদের হৃদয়ে বদ্ধমূল, কিছুতেই উৎপাটিত হইবার নহে । গুরুদেব মর্ত্যদেহ পরিত্যাগ করিয়াছেন, কিন্তু তাঁহার প্রিয়তম ভক্তজন হৃদয়ে নিরবধি আনন্দে লীলা করিতেছেন, তিনি ভক্তজনকে কখন পরিত্যাগ করেন নাই । ভক্তজন নিত্য তাঁহাকে প্রত্যক্ষ করিতেছেন । তিনি তাঁহাদের হৃদয়ে শান্তিদান করিতেছেন । যে সকল ভক্ত সম্যক সাধনবলে বলীয়ান, তাঁহাদের সহিত তাঁহার নিত্য কথা-বার্তা চলিতেছে । তাঁহার শরীর প্রেমময়, কার্য্য প্রেমময় । তিনি আনন্দ রসরাজ । এই সকল অন্তরঙ্গ ভক্তগণ তাঁহার প্রেমানন্দে বিভোর হইয়া আত্মহার্য্য হইতেছেন । গুরুদেবের মর্ত্য-দেহত্যাগেও যখন তাঁহার চিন্ময় প্রেমময় শরীর এই সকল ভক্তজন হৃদয়ে জাজ্জল্যমান তখন তাঁহার জ্ঞাত আবার কিসের শোক ? কিসের ক্ষোভ ? কিসের দুঃখ ? কিসের শ্রদ্ধা ?



## উনবিংশ পরিচ্ছেদ ।

গুরুদেবের তিরোভাবের পর, কয়েক বৎসর সুহাসিনী পুত্র পোত্র পুত্রবধূগণ লইয়া আনন্দে গার্হস্থ্যধর্ম পালন করিতে লাগিলেন । গুরুদেব-দীক্ষিত সাধনপ্রণালী অনুসারে স্বামী পুত্র এবং তিনি নিজে প্রত্যহ প্রতুষে ও প্রদোষে ভগবৎসাধনকার্য্য সমাধান করিতেন । অতিথি অভ্যাগত, দীন দরিদ্র আহাৰ্য্যপ্রাপ্তির আশায় তাঁহার বাটীতে উপস্থিত হইলে তিনি তাহাদিগকে আহাৰ দিয়া পরিতুষ্ট করিতেন । সকলের আহাৰ পরিসমাপ্ত হইলে নিজে আহাৰ করিতেন । প্রতিবেশীমণ্ডলী মধ্যে কাহারও কোন পীড়া হইলে লোকদ্বারা সন্বাদ লইতেন, দরিদ্র হইলে তাহাকে প্রয়োজনানুসারে সাধ্যমত অর্থ সাহায্য করিতেন ।

আহারের পর বধূগণ লইয়া ধর্মপুস্তক বা অস্ত্রাস্ত্র জ্ঞান চরিত্র সম্বন্ধীয় পুস্তক লইয়া পাঠ করিতেন, কখন বা বধূগণকে গৃহকার্য্য শিক্ষা দিতেন । কয়েক বৎসর এইরূপে অতিবাহিত হইল । একদা কানী হইতে সন্বাদ আসিল দেবদাসের জননী ও শ্বশুর মহাশয় অতি শঙ্কট পীড়ায় আক্রান্ত, উদ্ধারের সম্ভাবনা নাই । দেবদাস, জীবদাস ও সুহাসিনীকে সমভিব্যাহারে লইয়া কানীধাম যাত্রা করিলেন । উভয় রোগী ব্যোম্বদ্ধ ; তাঁহাদের রোগের বেরূপ অবস্থা তাহাতে প্রকৃতই তাঁহাদের জীবনাশা সামান্য । দেবদাস, জীবদাস ও সুহাসিনীকে দেখিয়া তাঁহারা পরম



আনন্দ লাভ করিলেন । ইহারা সকলে তাঁহাদিগকে প্রণাম করিলেন । তাঁহারা সর্বে ইহাদিগকে আশীর্বাদ করিলেন । জীবদাস একজন লক্ষপ্রতিষ্ঠ সূচিকিৎসক, পিতামহী ও মাতামহকে বিশেষরূপে চিকিৎসা করিতে লাগিলেন । কিন্তু পীড়ার হাস হওয়া দূরে থাকুক উত্তরোত্তর বৃদ্ধি হইতে লাগিল । পীড়ার উপশমের আশা নাই দেখিয়া দেবদাস ঔষধ প্রয়োগ বন্ধ করিলেন এবং সর্বদা রোগীগণের নিকটে থাকিয়া ভগবানের মহিমা কীর্তন ও নাম গুনাইতে লাগিলেন । ইহাদের জন্ত দেবদাসকে অধিক দিন কাশীধামে থাকিতে হয় নাই । তাঁহাদের পৌছবার ৫ দিন পরে তাঁহার মাতাঠাকুরাণী এবং ৬ দিন পরে স্বপুত্র মহাশয় কাশী-প্রাপ্ত হইলেন । দেবদাস তাঁহার মাতার এবং সুহাসিনী তাঁহার পিতার মুখানল করিয়াছিলেন । ক্রমান্বয়ে যথারীতি উভয়ের উর্দ্ধদেহিক ক্রিয়া নিষ্পাদিত হইয়াছিল ।

মাতা ও স্বপুত্র মহাশয়ের পীড়ার সংবাদ পাইলে দেবদাস কাশীধামে আসিয়া তাঁহাদের সেবা গুরুত্ব করিতেন । কথঞ্চিৎ সাবকাশ পাইলে গুরুদেবের বাটীতে গমন করিতেন । সে বাটীটা এক্ষণে শূন্যপ্রায় । সেখানে আর গুরুদেব নাই । আগন্তুক বৃদ্ধটা গুরুদেবের পূর্বে কাশীলাভ করিয়াছেন, গুরুদেব কত্কা একাকী এক্ষণে সেই বাটীতে বাস করেন । তাঁহার বয়ঃক্রম এক্ষণে ৫৫:৫৬ বৎসর । তিনি বালবিধবা । সন্তানাদি কিছু না হওয়ায় এখনও তাঁহার শরীর কৰ্ম্ম করিবার উপযোগী ছিল । তাঁহাকে দেখিলে বোধ হইত যেন তাঁহার অন্তরে আনন্দরাশি জ্বীড়া করিতেছে, আকৃতি অতি সৌন্দর্য ও সুন্দর । তিনি মাসিক যে বৃত্তি পাইতেন তাহার সামান্য অংশমাত্র নিজের ভরণপোষণাদিতে ব্যয় করিতেন ; অবশিষ্ট অংশ দীনহীন অনাথ লোকের সেবায় ব্যয় করিতেন । বারাণসী-ধামে প্রায় সকলের তিনি পরিচিত ছিলেন । পরিচিত ব্যক্তিমাঝেই তাঁহাকে বিশিষ্টরূপ শ্রদ্ধা ভক্তি করিতেন । এরূপ সর্বজনপ্রিয়তা কাশীধামে তৎ-

কালে কেহই আকর্ষণ করিতে পারেন নাই। জ্ঞান ও ভক্তি বিষয়ে তিনি পিতার নিকট হইতে সুশিক্ষা লাভ করিয়াছিলেন। ক্রমশঃ অল্পলীলন দ্বারা তাহা অতি উচ্চ শ্রেণীর পদবী প্রাপ্ত হইয়াছিল। তিনি পিতার নিকট দীক্ষিত হইয়া তাঁহার সমস্ত সাধন-প্রণালী অতি সুচারুরূপে আয়ত্ত করিয়াছিলেন। দেবদাসের তিনি অতিশয় প্রিয় ছিলেন। যখন দেবদাসের মাতা ও স্বস্তরের গুরুতর পীড়া এবং দেবদাস উপস্থিত হইতে পারেন নাই সেই সময়ে গুরুদেব কত্না প্রত্যাহ তাঁহাদের তত্ত্ব লইতেন এবং দেখা শুনা করিতেন। কোনরূপে মনুষ্যের সেবা করিতে পারিলে তিনি আপনাকে কৃতার্থমন্ত্ৰা বিবেচনা করিতেন। দেবদাসের যথেষ্ট পরিচারক ছিল, স্ততরাং তাঁহাকে কখন কোন বিশেষ সেবার কার্য্য করিতে হয় নাই ; কিন্তু তাঁহার যেরূপ মহান্ চরিত্র, প্রয়োজন উপস্থিত হইলে সকল প্রকার সেবা তিনি করিতে প্রস্তুত ছিলেন।

কাশীধামে অনাথ নিরাশ্রয় বিস্তর লোক বাস করিত। তিনি জাতি নির্বিশেষে তাহাদের বিপদে সহায়তা করিতেন। এই সকল সেবা কার্য্যে তাঁহার অর্থের কোন অভাব হইত না। কাশীবাসী সকলেই তাঁহাকে শ্রদ্ধা ভক্তি করিত। তিনি লোক বিবেচনা করিয়া কাশীবাসী দ্বাহাকে যে সাহায্য করিতে বলিতেন, তিনি আনন্দের সহিত সেই সাহায্য করিতে প্রস্তুত হইতেন। ফলতঃ তাঁহার সদৃশে সকলে একরূপ আকৃষ্ট যে, কোন অর্থ সাহায্য তাঁহা দ্বারা সম্পাদিত হইলে তাঁহারা সেই অর্থ যে উপযুক্ত পাত্র প্রযুক্ত হইয়াছে এবং তাঁহাদের অর্থ সাহায্যের সার্থকতা হইয়াছে মনে করিতেন। তাঁহার সাধু দৃষ্টান্ত ক্রমে অনেকেই অনুকরণ করিতে লাগিলেন। রোগী ও বিপদের সেবার্থ অনেকেই তাঁহার কার্য্যের সহায়তা করিতে লাগিলেন। নিজ শরীর রক্ষার্থ দিনান্তে তিনি যে আহার করিতেন তাহা স্বল্প ব্যয়ে ও স্বল্প শ্রমে নির্বাহিত হইত। পরসেবায় তিনি আপন শরীর ও মন সম্যক্ অর্পণ করিয়াছিলেন। পরের ক্লেশ তাঁহার

ক্লেশ, পরের সুখ তাঁহার সুখ বলিয়া বিবেচনা করিতেন। রোগী হউক, বিপন্ন হউক তিনি যাহার নিকট উপস্থিত হইতেন সেই ব্যক্তি ঘেন এক অপূর্ণ স্নেহরসের আশ্বাদ পাইতেন। তাঁহার সেই স্নেহমাখা ভালবাসা তাহাদের হৃদয়ে তাঁহার প্রতি অনুরূপ ভালবাসার উদ্বেক করিত। যখন সংক্রামক রোগ জানিয়া কেহই নিরাশ্রয় রোগীর নিকট যাইতে সাহস করিতেছে না, রোগী যন্ত্রণায় ছটফট করিতেছে, তাহার আত্মীয় স্বজন কেহই নিকটে নাই, এই অলোকসামান্য পরহিতপ্রাণা আত্মজীবন তুচ্ছীকৃত করিয়া তাঁহার সেবা করিয়া থাকিতেন। সেবার গুণে তাহার সেই নিরাশ হৃদয়ে আশার সঞ্চার হইত। তিনি দীন হীন কাঙ্গালের বন্ধু। তাহাদিগকে অন্নাদি দ্বারা পরিভূষ্ট করিতে অতিশয় আনন্দ বোধ করিতেন। তাঁহাকে সকলেই আপন মাতার ছায় বিবেচনা করিতেন এবং মা বলিয়াও সম্বোধন করিতেন। কি রোগী, কি বিপন্ন, কি দীন দরিদ্র যাহাকে তিনি অনন্তগতি দেখিতেন তাঁহাকেই তিনি প্রয়োজনমত আনুকূল্য ও সেবাদ্বারা পরিভূষ্ট করিতেন। দোকানদার হউক, সম্পত্তিশালী ব্যক্তি হউক বা কান্দীবাসী যে কোন ব্যক্তি হউক তিনি যাহার চক্ষে পড়িতেন সকলেই তাঁহাকে প্রণাম বা অভিবাদন করিতেন। তাঁহার ছায় নিঃস্বার্থ জীবপ্রেম মনুষ্য মধ্যে সূক্ষ্মলভ।

সময় অসময় বলিয়া পরহিতকর কার্যে তিনি বিরত হইতেন না। অনেক দিন এমন গিয়াছে যে তিনি আহার করিবার সময় পান নাই। তিনি বালবিধবা ছিলেন। স্বামীর সহধর্মিণী হইয়া স্বামী সেবা করা তাঁহার ভাগ্যে ঘটে নাই। তিনি পিতার নিকট থাকিয়া ভগবৎ সাধন ভজন উত্তমরূপ শিক্ষা করিয়াছিলেন। ব্রহ্মচর্য্য তাঁহার ব্রত ছিল। বিধবার ভাগ্যে স্বামী সেবা ঘটে না সত্য, কিন্তু ব্রহ্মচর্য্যাবলম্বিনী বিধবা সংসারে লক্ষ্মীস্বরূপা। পরহিতকর কার্যে তিনি বৈরূপ তৎপর হইতে পারেন, তাঁহার ছায় আর কেহ সেরূপ হইতে পারেন না।

পতি পুত্র বিরহিতা হওয়ায় পতিপুত্রের সেবার আবশ্যকতা না থাকায় তিনি অবাধে পরহিতকর কার্যে আপন সময় অতিবাহিত করিতে পারিতেন ।

তিনি যে কেবল রোগে বা বিপদে সেবা বা সহায়তা করিতেন এমন নহে । আবশ্যকমতে ধর্মোপদেশ দিয়া মানব হৃদয়ে শান্তি স্থাপনের চেষ্টা করিতেন । শরীর ধারণ করিলে রোগ ও বিপদের হস্তে প্রায় পতিত হইতে হয়, সেই সময়ে মনুষ্য পরিত্রাণের জন্ত ভগবানের নাম গ্রহণ পূর্বক আর্তনাদ করেন, সময় বুঝিয়া তিনি তাঁহাকে ভগবানের শরণাপন্ন হইতে শিক্ষাদান করিতেন । তাঁহার প্রত্যেক কথায় ঈশ্বরানুগ প্রকাশিত, তাঁহার প্রত্যেক কথা মানব হৃদয়ে প্রবেশ করিয়া মানবচিত্ত ভগবানের শ্রীপাদ পদ্মে অনুরক্ত রাখিতে সক্ষম ছিল । তাঁহার ধর্মোপদেশ, কার্য-ক্ষম, ও ফল দাতা । যেমন তাঁহার কথাগুলি শুল্লিত ও মধুর, উপদেশ-গুলি তেমনি ক্ষমতাশালী ; উহা হৃদয়ের অন্তস্তল প্রবেশ করিয়া মর্মে মর্মে জড়িত হইয়া যাইত । মানবের মনে এই সকল ভাবের সঞ্চার হইতেও দেখা যাইত ; ইহাতে বোধ হয় ভগবান তাঁহাদের নিস্তার কামনায় এই দেবীকে তাঁহাদের নিকট প্রেরণ করিয়া দিতেন ।

গুরুদেব কত্কার সহিত দেবদাসের সর্বদা সাক্ষাৎ হইত । তিনি তাঁহার অলোকসামাগ্র গুণরাশির কার্যদর্শনে পরম পরিতুষ্ট হইলেন । গুরুদেব কত্কারকে তিনি ইতিপূর্বে ৫০০ টাকা দিতে চাহিয়া ছিলেন, কিন্তু তিনি সমধিক সৌজন্য সহকারে ঐ দান গ্রহণ করিতে অস্বীকার করিয়াছিলেন । তন্নিমিত্ত তিনি তাঁহার সম্মতিক্রমে দীন দরিদ্রের, রোগী ও বিপদের সেবা শুশ্রূষার জন্ত ৫০০ টাকা তত্ত্ব্য একজন বিশ্বাসী ধনাঢ্য ব্যক্তির নিকট রাখিয়া দিলেন । তাঁহার যখন আবশ্যক হইবে উহার নিকট হইতে প্রয়োজনমত অর্থ লইতে পারিবেন । এইরূপ বন্দোবস্ত করিয়া গুরুদেব কত্কারকে ভক্তি সহকারে প্রণাম করিয়া কলিকাতার প্রত্যাবর্তন করিবার

জ্ঞান তাঁহার নিকট বিদায় গ্রহণ করিলেন। দেবদাস তাঁহার একজন অন্তরঙ্গ আত্মীয় ছিলেন। এই বিদায়ের সময় উভয়ের চিত্ত পরস্পরের জ্ঞান আকুল হইয়া উঠিল। উভয় হৃদয়ে অপূর্ণ ভাবের সমাবেশ। বহুক্ষণ কাহারও কোন বাঙ্-নিষ্পত্তি হইল না। উভয়ে প্রকৃতিস্থতা লাভ করিয়া পরস্পর কিস্তিক্ষণ কথোপকথন করিলেন, তৎপর দেবদাস বিদায় লইয়া চলিয়া গেলেন।



## বিংশ পরিচ্ছেদ

দেবদাস কলিকাতায় পৌঁছিলেন। বন্ধু বান্ধবের সহিত পরামর্শ করিয়া কর্তব্য অবধারণ করিতে লাগিলেন। তাঁহার জ্যেষ্ঠ পুত্র গুরুদাস পিতামহী ও মাতামহের কাশীলাভের সমাচার পাইয়া ছুটির জন্ত আবেদন করিলেন। দীর্ঘকাল বিদেশে নানাস্থানে কার্য্য করায় তাঁহার শরীর অসুস্থ হইয়াছিল সুতরাং তিনি ছয়মাসের ছুটির প্রার্থনা করিলেন। প্রার্থিত ছুটি মঞ্জুর হইল, তিনি স্ত্রী পুত্রাদি লইয়া কলিকাতায় আগমন করিলেন। জননী কাশীবাসিনী ছিলেন। বারাণসীধামে তাঁহার দেহ-লীলার অবসান হইয়াছে। তিনি শিবদ্ব লাভ করিয়াছেন। তাঁহার প্রেতদ্ব নাই। সুতরাং প্রেতশ্রাদ্ধ হইবে না। জননী ও ভগবানের প্রীতি কামনায় দানাদি সমস্ত কার্য্য হইবে। জন্মভূমি রামকৃষ্ণপুর গ্রামে কার্য্যের স্থান স্থির হইল। বিদেশাগত নিমন্ত্রিত ব্রাহ্মণ কুটুম্ব বন্ধু বান্ধবের জন্ত আবাসস্থান নির্দিষ্ট হইল। আহারাদির জন্ত দ্রব্যসম্ভার যথাস্থানে সঞ্চিত হইতে রহিল। দানাদি কার্য্য সম্পাদিত হইবার পূর্ব্ব দিন দেবদাস গ্রামবাসী দীন দরিদ্র হইতে ধনাঢ্য পর্য্যন্ত সকলের নিকট কার্য্য সুপ্রভুলের জন্ত প্রার্থনা করিলেন এবং যথাযোগ্য সম্মান পূর্ব্বক সকলকে নিমন্ত্রিত করিলেন। এই মহাকাণ্ডে কীর্ত্তন করিবার জন্ত কলিকাতা হইতে তৎ-

কালীন জনৈক সুপ্রসিদ্ধ কীর্তনকারীর নিয়োগ করা হইল । এই কীর্তন-কারীর কণ্ঠ সুমধুর, তিনি একজন ভক্ত প্রেমিক ছিলেন । দানাদির দিনে কার্য্যস্থান দানসামগ্রী ব্রাহ্মণ পণ্ডিত অগ্ৰাণ্ণ নিমন্ত্রিত ও অনিমন্ত্রিত বহুতর লোকে পরিপূর্ণ হইল । একদিকে ব্রাহ্মণ পণ্ডিতগণ নানাবিধ তর্কজাল বিস্তার করিয়া আপনাদের মধ্যে বিচার আরম্ভ করিলেন । অগ্ৰ একদিকে কীর্তনীয় সঙ্গীত আরম্ভ করিলেন । নানাস্থানে নানারূপ কলরব হইতে লাগিল । সুহাসিনীর জগ্ন স্বতন্ত্র স্থান দানকর্ম্মার্থ নিরূপিত ছিল । পুরোহিতগণ দেবদাস গুরুদাস ও জীবদাসকে পৃথক্ পৃথক্ মন্ত্র পাঠ করা-ইয়া দান কার্য্য সমাধা করিতে লাগিলেন । নিমন্ত্রিত অধ্যাপক ও বিদেশস্থ অপর ব্রাহ্মণগণকে যথাযোগ্য সৎকার করিয়া অর্থাদি দিয়া বিদায় দেওয়া হইল । গ্রামবাসী ব্রাহ্মণগণকেও যথাযোগ্য অর্থদান করা হইয়াছিল । গ্রামবাসী ব্রাহ্মণ কায়স্থ ও অপরাপর জাতীয় সকলেই পর্য্যাপ্তরূপে ভোজিত হইয়াছিলেন । দীন দরিদ্র কাঙ্গালীদিগকে বস্ত্র ও অর্থ দান করা হইয়াছিল এবং উত্তমরূপে তাহাদিগকে আহার করান হইয়াছিল । কি নিমন্ত্রিত কি অনিমন্ত্রিত সকলেই পর্য্যাপ্তরূপে আহার প্রাপ্ত হইয়াছিলেন । পর দিবস কীর্তন হইবে । কীর্তন শুনিবার জগ্ন সকলেরই আগ্রহ । দেখিতে দেখিতে স্থানটি লোকে পরিপূর্ণ হইল । অনেকগুলি প্রেমিক ভক্তের একত্র সমাবেশ হইল । দেবদাস এই সকল প্রেমিক ভক্তগণকে কীর্তনীয়ার সম্মুখে উপবেশন করাইয়া নিজে স্বতন্ত্র একটা স্থানে আসন গ্রহণ করিলেন । কীর্তনের মহাজনৌ পদগুলি প্রেমিক ভক্তগণের হৃদয়ের সামগ্রী । ইহার সমাক্ আশ্বাদ পাইতে হইলে রাধাকৃষ্ণ তত্ত্বের কিছু কিছু হৃদয়ঙ্গম করা উচিত । সেজগ্ন এখানে দেবদাস তাঁহার মনের গুটীকতক কথার অবতারণা করিলেন ।

প্রীতি, প্রণয় ও প্রেম এই তিনটি একই ভালবাসা হইতে উৎপন্ন । যখন কাহারও সদৃশ সন্মুখ জানিতে পারা যায় এবং কার্য্যকলাপ

সকল নির্দোষ ও উৎকৃষ্ট বলিয়া প্রতীত হয় কিন্তু তাহার সহিত মিশা-মিশি ঘটে নাই তখন তাহার উপর শ্রদ্ধা জন্মে এবং সেই শ্রদ্ধা হইতে প্রীতির সঞ্চার হয় । যখন সেই ব্যক্তির সহিত মনের মিল হয়, পরস্পর পরস্পরকে ভাল বাসিতে থাকে, পরস্পরের সুখ স্বচ্ছন্দ পরস্পর আকাঙ্ক্ষা করে, মিশামিশি ঘটিয়া যায়, তখন প্রণয়ের উৎপত্তি হয় । প্রেমের অবস্থা স্বতন্ত্র । ইহা আত্মস্তিক ভালবাসার চরম অবস্থা । মধুর ভাব হইতেই প্রেমের উৎপত্তি । এই মধুর ভাবের মধ্যে পাঁচটা ভাব নিহিত আছে ;—শান্ত, দান্ত, সখ্য, বাৎসল্য এবং মধুর । এই কয়েকটা ভাব একত্রীভূত না হইলে মধুর ভাব পূর্ণতা প্রাপ্ত হয় না । দান্তের মধ্যে শান্ত ও দাম্য-ভাব, সখ্যভাবের মধ্যে শান্ত দান্ত সখ্য তিনটি ভাব, বাৎসল্য ভাবের মধ্যে শান্ত দান্ত সখ্য এবং বাৎসল্য এই চারিটি ভাব আছে, মধুর ভাবের মধ্যে সকল ভাবের সমাবেশ । এই পাঁচটা ভাবই মহান্ । শুক নারদ প্রভৃতি শান্তভাবে ভগবানকে ভাল বাসিতেন । ইহার ফল হৃদয়ে আনন্দ লাভ । হনুমান দান্তভাবে ভগবানকে ভাল বাসিয়াছিলেন, ইহার ফল আনন্দ লাভ ; এই ভাবের কার্য্য সেবা । গোপ বালকগণ ও অঙ্কুর সখ্যভাবে ভগবানকে ভাল বাসিয়া ছিলেন, ইহার ফল আনন্দ লাভ, কার্য্য সেবা ও বন্ধুর করণীয় সমস্ত কার্য্য । নন্দ যশোদাদি বাৎসল্যভাবে ভগবানকে ভাল বাসিয়াছিলেন, ইহার ফল আনন্দ লাভ, কার্য্য দাসের শ্রায় সেবা, বন্ধুর শ্রায় কার্য্য করা এবং জনক জননীর ন্যায় স্নেহ করা । গোপিনীগণ মধুরভাবে ভগবানকে ভাল বাসিয়াছিলেন, ইহার ফল আনন্দ লাভ, কার্য্য সেবা, বন্ধুর শ্রায় কার্য্য করা, জনক জননীর ন্যায় স্নেহ করা এবং স্ত্রীর ন্যায় মধুর আলাপনাদি করা । এই পাঁচটা ভাবের যে কোনটা ভাবে ভগবানের উপাসনা করিলে ভগবানকে লাভ করিতে পারা যায় । কিন্তু এই সকল ভাবের মধ্যে আবার তর তম আছে । শান্ত অপেক্ষা দান্ত শ্রেষ্ঠ ; দাম্য অপেক্ষা সখ্য, সখ্য অপেক্ষা বাৎসল্য এবং বাৎসল্য



অপেক্ষা মধুর ভাব শ্রেষ্ঠ । পূর্বকথিত ভক্তগণ ভগবানের সাক্ষাৎকার লাভ করিয়াছিলেন, সুতরাং সেবাদি দ্বারা ভগবানের প্রীত্যাংগাদান করিতে তাঁহারা যথেষ্ট সুবিধা পাইয়াছিলেন । এক্ষণে জীবের উপায় কি ? কোথায় ভগবান্ পাইবেন ? কোথায় বা তাঁহার সেবাদি করিবে ? ঐ সকল ভাবের কোন একটা ভাবে ভগবানকে ভাল বাসিবার জন্ত গুরু শিষ্যকে মূল মন্ত্র দ্বারা শিক্ষা দান করেন এবং সেই ভাবে ভগবানকে ভাবনা করিবার জন্ত তাহার উপায়ীভূত সাধন প্রণালী সকলও শিষ্যকে শিক্ষা দেন । নিরন্তর সাধন বা চিন্তার গুণে মন সেই ভাবাক্রান্ত হয় । ভগবানের রূপায় চিত্ত মধ্যে সেই রূপের অনুভব এমন কি সাক্ষাৎকার লাভ হয় । তখন মনুষ্য আপন আপন ভাবে তাঁহার সেবাদি করে । চিত্ত তখন সেই সেবাদি কার্যে পরম আনন্দ লাভ করেন । চিত্ত যে ভাবাক্রান্ত হয় ইঞ্জিয়াদি সকলই প্রগাঢ় সাধন বলে সেই ভাবাক্রান্ত হয়, তখন অন্তরে বাহিরে ভগবানের বিস্তারিত উপলব্ধি করিতে সমর্থ হয় । যতই সাধন মনুষ্য করিবে মনের সমস্ত চঞ্চলতা দূর হইয়া যাইবে । ভগবানের প্রসাদ লাভ করা যাইবে । সিদ্ধ গুরুর মহতী শক্তি । কি উপায়ে মানবচিত্ত স্থির হয় ও ভগবানের প্রসাদ অপেক্ষাকৃত অল্প আয়াসে লাভ করিতে পারা যায় তাহা তিনিই জানেন ।

প্রভুভক্ত দাস, প্রভুর নিতান্ত প্রিয় তাহার আর সন্দেহ নাই । এই দাস অপেক্ষা তাঁহার প্রিয় সুহৃদ্ তাঁহার আরও অন্তরঙ্গ এবং আরও প্রিয় । এই প্রিয় সুহৃদ্ অপেক্ষা জনক জননী আরও অন্তরঙ্গ এবং আরও প্রিয় । জনক জননী অপেক্ষা পতিব্রতা স্বাধী স্ত্রী আরও অন্তরঙ্গ এবং আরও প্রিয় । ইহারা সকলেই প্রভুকে ভাল বাসেন । তাঁহার পিতা মাতার ভালবাসা অতিশয় অধিক তাহার আর ভুল নাই । কিন্তু পিতা মাতার ভালবাসার মধ্যে মধুর ভাবের ভালবাসা নাই ; দাস ও সখ্যভাবের ভালবাসা মাতা পিতার ভালবাসার মধ্যে পাওয়া যায় । পতিব্রতা স্বাধী

স্ত্রী স্বামীকে সকল ভাবে ভাল বাসেন, সেই কারণে এই পতিব্রতা সাধ্বী স্ত্রীর ভালবাসা সকল প্রকারের ভালবাসা অপেক্ষা উৎকৃষ্ট। পতিব্রতা সাধ্বী স্ত্রীর ভালবাসাকে বৈষ্ণব শাস্ত্রে স্বকীয় প্রেম কহে। পতিব্রতা সাধ্বী স্ত্রীর ভালবাসা সর্ব প্রকার ভালবাসায় পরিপূর্ণ। সে কারণে এই মধুর ভাবের ভালবাসা হইতে যে প্রেমের উৎপত্তি হয় অপর কোন প্রকারের ভালবাসা হইতে চূড়ান্ত ভালবাসা যে প্রেম তাহা উদ্ভূত হইতে পারে না। পতিব্রতা সাধ্বী স্ত্রী আপন পতিকে সর্বদা দেখিতেছেন, পতি তাঁহার করতল গত, স্ততরাং পতির রূপ ধ্যান, পতির কার্য্য ধ্যান, কিম্বা যখনই তিনি গৃহস্থালীর কোন কার্য্য করেন, তখনও পতির চিন্তা, একরূপ ধ্যান বা চিন্তা তিনি করেন না, তাঁহার করিবারও আবশ্যক নাই। পতি তাঁহার করতল গত, তাঁহার অশ্রান্ত চিন্তাও মনে উদয় হইয়া থাকে। যে বিবাহিতা স্ত্রীলোক আপন পতি অপেক্ষা অন্য পুরুষকে একান্ত ভাল বাসেন, সংসারের কার্য্য করিতেছেন কিন্তু সেই উপপতির রূপ চিন্তা, উপপতির কার্য্য চিন্তা, কিরূপ সেবা, কিরূপ ভাল বাসিলে উপপতি তাঁহার বশতাপন্ন হইবে সকল সময়ে এই সকল চিন্তায় তাঁহার মন ব্যতিব্যস্ত। উপপতি অপর স্ত্রীলোকের বিবাহিত, স্ততরাং উৎকট ভালবাসা ব্যতীত তাঁহাকে আশ্রয় করিবার উপায় নাই। যখনই উপপতির সহিত তাঁহার মিলন হয় তিনি অত্যাৎকৃষ্ট ভালবাসায় তাঁহাকে স্মৃতি করিবার চেষ্টা করেন। শেষে লজ্জা ধর্ম্ম সমস্তই উপপতির সেবায় বিসর্জন দেন। এইরূপ ভালবাসাকে বৈষ্ণব শাস্ত্রে পরকীয় প্রেম কহে। এখন বুঝিয়া দেখুন সেই উপপত্নীর ঐকান্তিক ভালবাসা বিবাহিতা পতিব্রতা সাধ্বী স্ত্রীর ভালবাসা অপেক্ষা কি গুরুতর নহে? সামাজিক বিধান মতে উপপত্নীকে নিন্দা করিতে পার, বা উপপত্নীর প্রেমকে দুষণীয় বলিতে পার, কিন্তু শুদ্ধ ভালবাসা সম্বন্ধে ইতর বিশেষ করিতে হইলে উপপত্নীর ভালবাসাকে গুরুতর বলিতে হইবে।

এক্ষণে ভাবন উপপতিটী নপুংসক। উপপত্নী এই নপুংসককে ভাল বাসেন। নিজের কোন সুখ বা ইচ্ছিয় চরিতার্থতা উপপত্নী আশা করেন না। সুতরাং এ ভালবাসার মধ্যে রিপূর চরিতার্থতা নাই। উপপত্নীর নিজের কোন সুখের আশা নাই। নপুংসক উপপতি কিসে সুখী হন তাহার চেষ্টায় তিনি ব্যস্তা, তাঁহার জ্ঞাত তিনি লোক নিন্দা গঞ্জন কিছুই ক্রক্ষেপ করেন না। সেই উপপতির জ্ঞাত তিনি প্রাণ পর্য্যন্ত বিসর্জন দিতে প্রস্তুত। যদি একরূপ ভালবাসা এই সংসার মধ্যে কোথায় দেখিতে পান তাহা হইলে সেই ভালবাসা, সেই প্রেম যে নিকাম ও ভালবাসার চূড়ান্ত, তাহার তুল্য ভালবাসা বা প্রেম নাই ইহা, মহুষা, তোমাকে নিশ্চয় বলিতে হইবে।

এই নপুংসক উপপতি ভগবান্। গোপিনীগণ তাঁহার উপপত্নী। তাঁহার যে জ্ঞান, তাঁহার যে বৈরাগ্য, সেইরূপ জ্ঞান বৈরাগ্য ত কাহারও নাই। যিনি সংসার সৃষ্টি করিয়াছেন, সমাজ সৃষ্টি করিয়াছেন, কামমূলক সাধারণ উপপতি উপপত্নী ভাব মহুষাকে শিক্ষা দিবার জ্ঞাত তিনি পৃথিবীতে অবতীর্ণ হন নাই। এই প্রথা সমাজ বিপ্লবকারিণী তাহা তিনি বিলক্ষণ জানেন। তিনি কোন রিপূর বশীভূত নহেন। তিনি যে রাসলীলা করিয়াছিলেন সে লীলা অতি নিভূতে সম্পাদিত হইয়াছিল। কামদেব চিত্তোন্মাদকারী তাঁহার পঞ্চণর ভগবানের প্রতি প্রক্ষেপ করিলেন। অমোঘ শর বার্থ হইল। কামদেব ভগবানের কিছুমাত্র মনো-বিকার না হওয়ায় বিমোহিত হইলেন, সে কারণে ভগবানের একটি নাম মদনমোহন। গোপিনীগণ নিজের কোনজ্ঞাত সুখের জ্ঞাত তাঁহার নিকট প্রত্যাশা করেন না। গোপিনীগণের প্রেম নিকাম সুনির্মল; এই প্রেমের তুল্য প্রেম জগতে নাই। তাহাদের নিজ সুখের কোন কামনা ছিল না। পুরুষোত্তম ভগবান্ তাঁহাদের সেই ভালবাসার প্রতিপ্রেম দিতে অসমর্থ। ত্রীকৃষ্ণ প্রত্যেক গোপিনীর স্বামীরও পতি; সুতরাং স্বামীর পতিকে একরূপে ভালবাসায় পাতিব্রতার্থ্য হইতে গোপিনীগণ বিচ্যুতা হন নাই।

গোপিনীগণের মধ্যে সকলেই বিবাহিতা ছিলেন। সকলেরই স্বামী বর্তমান ছিলেন। শ্রীরাধার স্বামী নপুংসক। নপুংসক স্বামী জী-সঙ্গ বিষবৎ পরিত্যাগ করেন। অত্যাগ গোপিকা স্বামী ও পুত্রাদির জন্ত কতকটা ভালবাসা রাখিয়াছিলেন। কিন্তু শ্রীকৃষ্ণ ব্যতীত শ্রীরাধার আর ভালবাসার বস্তু জগতে ছিল না, তিনি পূর্ণ মাত্রায় ভগবান্ শ্রীকৃষ্ণকে ভাল বাসিতে পারিয়াছিলেন। এই শ্রীরাধার প্রেম অতুল্য। গোপিনীগণের প্রেমের প্রতিপ্রেম একে দিতে পারেন নাই, শ্রীরাধার জন্ত তিনি কি করি বেন? ভগবানের যাহা কিছু ঐশ্বর্য গোপিনীগণকে দিতে তিনি চাহেন। তুচ্ছ সামগ্রী বলিয়া গোপিনীগণ তাহা প্রত্যাখ্যান করেন। শ্রীরাধার প্রেমের নিকট ভগবান্ দাস। শ্রীরাধার প্রেমখানে তিনি ঋণগ্রস্ত।


মহাপ্রেমিকা শ্রীরাধার নিকট ভগবানকে সর্বদা সাবধান হইয়া থাকিতে হইত। সর্পের গতির দ্বায় প্রেম চাই দিক্ দেখিয়া হেলিয়া ফুলিয়া চলিতেছে। নায়কের কোন অপরাধ দেখিলে প্রেম আর চলে না। দুর্জয় মান আসিয়া প্রেমকে আচ্ছাদিত করিল। প্রেম না পাইয়া শ্রীরাধার পদতলে পড়িয়া ষাহাতে তাঁহার মানভঞ্জন হয়, তাহার চেষ্টা ভগবান্ করিতে লাগিলেন। তখন ও ভগবানকে তিনি পাইয়াছেন। শ্রীরাধা অতি সরলহৃদয়া। ভগবানকে তাঁহার অপরাধের জন্ত কিছু শাস্তি দিতে মনন করিলেন। প্রেমময়ী মান করিয়া রহিলেন। সরলা জানেন না যে তাঁহার প্রেম না পাইলে তিনি তাঁহার চক্ষের অন্তরাল হইবেন। নায়ক চক্ষের অন্তরাল হন, নায়িকা তাহা চাহেন না। এ দিকে নায়ক মানভঞ্জন করিতে যেই অসমর্থ হইয়া চলিয়া গেলেন অমনি নায়ককে দেখিতে না পাইয়া মানিনীর মানভঞ্জন হইল। দুরন্ত বিরহ আসিয়া শ্রীরাধাকে ক্লেষিতা করিল। নায়ককে পাইবার জন্ত নায়িকা যেরূপ চেষ্টিতা, নায়িকাকে পাইবার জন্ত নায়ক সেইরূপ চেষ্টিত হইল। উভয়ে মিলনের জন্ত একান্ত লোলুপ, শেষ মিলন হইল।

ভগবান মথুরায় চলিয়া গেলেন । শ্রীরাধার বিরহ । তপ্ত ইক্ষু বা তপ্ত কোন মধুর দ্রব্য যদি কাহাকে খাইতে দেওয়া হয় তাহা হইলে সেই ব্যক্তির মুখ উত্তাপে পুড়িতেছে, কিন্তু মধুর দ্রব্যের আশ্বাদ কিছুতেই পরিত্যাগ করিতে পারিতেছে না । কষ্ট হইতেছে কিন্তু মধুর আশ্বাদে হৃদয় আনন্দিত । বিরহ সাধকের শেষ অবস্থা । বিরহে নায়ক-ভগবানের রূপ, কার্যকলাপ, ভালবাসা প্রভৃতি যাবতীয় ব্যাপার নায়িকা—শ্রীরাধার চিত্ত ক্ষেত্রে অত্যুজ্জ্বলরূপে প্রকাশিত হইয়া নায়িকাকে আনন্দ দিতেছে, কিন্তু নায়ককে প্রত্যক্ষ দেখা পাওয়া যাইতেছে না বলিয়া নায়িকার বিষম কষ্ট । শ্রীকৃষ্ণ শ্রীরাধার হৃদয় মন্দিরে নিত্য বিদ্যমান । তিনি শ্রীরাধা, এমন কি যে বৃন্দাবনে শ্রীরাধার অবস্থিতি, তাহা ছাড়িয়া এক পদ ও যাইতে পারেন না । শ্রীরাধার চিত্তক্ষেত্রে সর্বদা উপস্থিত থাকিয়া তিনি প্রেমসুধা পান করিতেছেন । শ্রীরাধা সেই নিত্য মিলনে আনন্দ সুখ উপভোগ করিতেছেন ।

দেবদাস একজন উচ্চশ্রেণীর সাধক । যে কীর্তনীয়াকে তিনি মাতৃ-শ্রাদ্ধোপলক্ষে আনিয়াছিলেন তিনিও একজন বিশিষ্ট প্রেমিক ভক্ত । কীর্তন আরম্ভ হইল । প্রেমিক কীর্তনীয়া ও তাঁহার হৃদয়ের ভাব বুঝিবার লোক উপস্থিত আছেন জানিয়া অতি ভক্তিভাবে সুললিত স্বরে পদগান করিতে লাগিলেন । হৃদয়ের অন্তস্তল হইতে মুখ দ্বার দিয়া মনমোহিতকারী আখর সকল বাহির হইতে লাগিল । প্রবল তরঙ্গের ভ্রার ভাবের হিল্লোল প্রবাহিত হইতে লাগিল । শ্রীরাধার দুর্জয় মানের ব্যাপার কীর্তিত হইতেছিল । দেবদাস ও অল্প অল্প ভক্তগণ কেহই স্থির থাকিতে পারিলেন না । তাঁহাদের নয়নযুগল দিয়া কখন আনন্দাশ্রু কখন বা শোকাশ্রু প্রবাহিত হইতে লাগিল, কখন বা তাহারা সংজ্ঞাহীন । রাধা-কৃষ্ণের প্রেমলীলা ব্যতীত তাহাদের হৃদয়ে কোন ভাবই ছিল না । প্রেমের এক তরঙ্গ মনমধ্যে প্রবেশ করিল, আবার অল্প একটা তরঙ্গ

আসিয়া পূর্ব তরঙ্গকে পর্য্যদন্ত করিল এবং প্রবলবেগে মন প্রাণ বিদ্রাবিত করিয়া তুলিল। কীর্ত্তনীয়ার কণ্ঠস্বর কখন রুদ্ধ হইতেছে, কখন ক্ষীণ স্বরে হৃদয়ের উচ্ছ্বাস পরিব্যক্ত হইতেছে, কখন প্রেমাশ্রু, কখন বা শোকাশ্রু তাঁহার নয়নযুগল হইতে বহিতে লাগিল। একরূপ কীর্ত্তন অপূর্ব ও বড়ই মধুর। অত্যাশ্রিত শ্রোতৃবর্গ প্রেমের এই লীলা দেখিয়া বাক্য-রহিত হইয়া চিত্রাপিতের ত্রায় স্নকণ্ঠনিঃসৃত পদগুলি শুনিতে লাগিলেন। তাহাদের হৃদয় আর্দ্র হইয়া উঠিল। ধন্য কীর্ত্তন ! তুমি মানব মনকে আজ স্বর্গরাজ্যে তুলিয়া দিয়াছ। কীর্ত্তন ভঙ্গ হইল, কিন্তু ভক্তজনগণ হৃদয়ে এক অপূর্ব শান্তি ও ভাবের সমাবেশ রহিল।

দেবদাসের মাতৃশ্রাদ্ধ যথা বিধানে সুসম্পন্ন হইল। ক্রমে নিমন্ত্রিত কুটুম্ব প্রভৃতি বিদায় লইয়া চলিয়া গেলেন। যথাসময়ে দেবদাস, জীবদাস কলিকাতায় প্রত্যাবর্তন করিয়া আপন আপন কার্য্যে পুনরায় মনোনিবেশ করিলেন। রামকৃষ্ণপুর গ্রামে কেবল গুরুদাস, তাঁহার পত্নী ও মাতা রহিলেন। গুরুদাসের পুত্র কলিকাতায় বিদ্যাভ্যয়ন করেন, সুতরাং তিনিও পিতামহের সহিত কলিকাতায় গিয়াছিলেন।



## একাবংশ পরিচ্ছেদ

গুরুদাস দীর্ঘকালে বিদেশে ছিলেন। স্বগ্রামে থাকিয়া নিজ গ্রামের যথাসাধ্য উন্নতি করিতে তাহার হৃদয়ে সর্বদা বাসনা হইত। কিন্তু অবসর অভাবে তাহা সুসম্পন্ন করিয়া উঠিতে পারেন নাই। এবারে তিনি ছয়মাসের ছুটি লইয়াছিলেন, সুতরাং এই সাবকাশে তিনি রাম-কৃষ্ণপুর গ্রামের যাবতীয় ভদ্র ভদ্র লোকের সহিত এই সম্বন্ধে কি করা কর্তব্য তাহার পরামর্শ করিলেন এবং সর্ব সাধারণের মতামুসারে তিনি একটা হিতকারী সভা প্রতিষ্ঠিত করিলেন। গ্রামস্থ দীন দরিদ্রের, অনাথা বিধবার ও নিরাশ্রয় শিশুগণের যথাসাধ্য সাহায্যদান এবং নিরাশ্রয় বালকগণের বিদ্যাশিক্ষার উপায় বিধান ও গ্রামস্থ সাধারণ লোকে যাহাতে নানাবিধ পুস্তক ও সম্বাদপত্রাদি পাঠ করিতে পারেন তাহার বন্দবস্ত করা এই সভার কার্য্য। এই সভার কার্য্য সুচারুরূপে সম্পন্ন করিবার জন্ত একটা কার্য্য নির্বাহক অধ্যক্ষ-সভার সৃষ্টি করিলেন। এই সভার হস্তে দেবদাস এককালীন ১০০০ টাকা গুরুদাস ২৫০ জীবদাস ২৫০ টাকা এবং গ্রামস্থ অত্যন্ত ভদ্র মহোদয়গণ একত্রিত হইয়া ২৫০০ টাকা দান করিলেন। ইহা ব্যতীত দেবদাস জীবদাস এবং গুরুদাস তিন জনে মাসিক ৫০ টাকা এবং গ্রামস্থ অপরাপর ভদ্র ভদ্রমহোদয়গণ ৫০ একুনে ১০০ টাকা মাসিক টানা দিতে লাগিলেন।

অধ্যক্ষ সভার সভাগণ সকলেই কৃতবিদ্যা ও স্বদেশহিতৈষী ছিলেন । যাহাতে সভার কার্য্য সুচারুরূপে সম্পন্ন হয় তৎ প্রতি সকলেই বিশিষ্ট যত্নশীল ছিলেন । সভার সুচারু বন্দোবস্তে রামকৃষ্ণপুর গ্রামে কাহারও অন্ন বস্ত্রের অভাব দেখা যাইত না । দরিদ্র রোগীর চিকিৎসা ও পথ্যাদির ব্যবস্থা, দীনহীন বালকের বিদ্যাশিক্ষার উপায় বিধান প্রভৃতি বহুবিধ সংকার্য্য এই সভা কর্তৃক নিয়মিতরূপে অনুষ্ঠিত হইতে লাগিল । পুস্তকালয়ের নানা প্রকারে উন্নতি সাধন করায় গ্রামস্থ সকলে পুস্তকাদি পাঠের যথেষ্ট সুবিধা ও স্বচ্ছন্দ উপভোগ করিতে লাগিলেন । যদি সকল মনুষ্য আপন আপন গ্রামে বা নগরে এইরূপ এক একটা সভার প্রতিষ্ঠা করেন এবং আপনাদের সমবেত চেষ্টা ও আত্মকূল্যে আপন আপন গ্রামের বা নগরের উন্নতি করে যজ্ঞবান্ হন তাহা হইলে সমস্ত দেশ সমৃদ্ধিবান্ হইবে, দেশে দুর্ভিক্ষ থাকিবে না, অনাথ বিধবা, দীন হীন বালকবালিকা সকলে যথাযোগ্য সাহায্য পাইয়া আনন্দে কালাতিপাত করিতে পারিবেন । সংসার আনন্দের বস্ত্র হইয়া উঠিবে । গুরুদাস নিজ গ্রামে অনেক দিবস অতিবাহিত করিয়া এবং সাধারণ কার্য্য নিৰ্বাহে গ্রামবাসীগণকে উত্তমরূপে শিক্ষিত ও উৎসাহিত করিয়া আপন কার্য্যস্থানে গমন করিলেন ।

ক্রমে দেবদাসের কার্য্যকাল শেষ হইয়া আসিল । রাজ নিয়মানুসারে তাঁহাকে কার্য্য হইতে এককালে অবসর লইতে হইল । তিনি অবসর বৃত্তি ( Pension ) পাঠবার আবেদন করিলেন । তাঁহার উন্নতন কর্ম্মচারীগণ তাহাকে বিশিষ্টরূপ শ্রদ্ধা করিতেন এবং ভাল বাসিতেন । সুতরাং তাঁহার। দেবদাসের গুণ গ্রামের যথেষ্ট প্রশংসা করিয়া তাঁহাকে বিদায় দিলেন । দেবদাস এক্ষণে সমস্ত সাংসারিক কার্য্য জীবদাসের হস্তে সম্ভ্রান্ত করিয়া নির্জনে ভগবৎ সাধনে অবশিষ্ট জীবন অতিবাহিত করিবার সংকল্প করিলেন । জন্মভূমি রামকৃষ্ণপুর গ্রামে দেবদাস শেষ জীবন



অতিবাহিত করিবার ইচ্ছা প্রকাশ করিলে জীবদাস তাঁহার জ্ঞাত সমস্ত বন্দোবস্ত করিলেন । বিষয় কাণ্ডের কোন কার্যে তাঁহাকে লিপ্ত থাকিতে হইল না । তিনি আপনার একটি নির্জন কক্ষে বসিয়া দিবসের অধিকাংশ সময় ভগবৎসাধন কার্যে অতিবাহিত করিতে লাগিলেন । আহার বিশ্রাম ও নিদ্রার জ্ঞাত অতি স্বল্প সময় নির্ধারণ করিলেন । প্রত্যহ বৈকালে ভাগবত ও অত্যাগত ধর্ম পুস্তক অতি মনোযোগের সহিত অধ্যয়ন করিতেন এবং পঠিত বিষয় চিন্তারূপে নির্মল মনিলে পরিতৃপ্ত করিয়া লইতেন । সাধন বলে তিনি চিন্তের স্থিরতা ইতিপূর্বেই লাভ করিয়াছিলেন । এক্ষণে আপন মনকে নিজ বশতাপন্ন করিতে সক্ষম হইলেন । সাধন বলে বলীয়ান্ দেবদাস আপন চিন্তা মধ্যে অপূর্ব শান্তি ও আনন্দলাভ করিতে লাগিলেন । সাংসারিক স্বার্থ নাশ, শোক দুঃখ, লাভ অলাভ, সুখ সমৃদ্ধি কিছুই তাঁহার চিন্তাকে আর বিক্ষিপ্ত করিতে পারিল না । তিনি সর্বদা আপন হৃদয়ে ভগবৎসান্নিধ্য উপলব্ধি করিয়া মানসিক প্রেম ও ভক্তি দ্বারা ভগবানের পূজা করিতে লাগিলেন । এইরূপে কয়েক বৎসর অতিবাহিত হইল, তিনি এক্ষণে সর্বস্থানেই সেই প্রেমময় আনন্দময়ের বিজ্ঞমানতা উপলব্ধি করিতে লাগিলেন । মধ্যে মধ্যে সংজ্ঞাশূন্য হইতেন, কখন কাঁদিতেন, কখন হাসিতেন কখন বা উন্মত্তের স্থায় প্রলাপ বাক্য সকল তাঁহার মুখ দ্বার দিয়া বহির্গত হইত । আবার চৈতন্তের আগমনে জীবমধ্যে ভগবান্কে প্রত্যক্ষ করিয়া জীব সেবাই ভগবৎসেবা এই জ্ঞানে জীব সেবা করিতে লাগিলেন । ইনি আমার, ইনি পর, এজ্ঞান তাঁহার চিন্তে আর ছিল না । কামিনী কাঞ্চনে তাঁহার আর আসক্তি নাই । ভগবান্ কৃপা করিয়া সেই আসক্তির নাশ করিয়া দিয়াছেন । তিনি একটি সুমিষ্ট পাকা ফল । আসক্তিরূপ বৃক্ষ হইতে পাকিয়া ভূমিতলে পড়িয়াছে । মনুষ্য যতই তাঁহার সঙ্গ করিবে, তিনি যে কি সুমিষ্ট তাহা বোধ

করিতে পারিবে এবং চিন্তে অতৃত পূর্ব আনন্দ লাভ করিতে পারিবে ।

এই সময়ে সমাচার আসিল গুরুদাসের উৎকট পীড়া । জীবদাস পিতাকে এই সংবাদ দেওয়া যুক্তিসঙ্গত নহে বিবেচনা করিয়া তাঁহাকে কোন সন্বাদ না দিয়া প্রয়োজনীয় ঔষধাদি লইয়া জ্যেষ্ঠ সহোদরের কক্ষ-স্থানে গমন করিলেন । গুরুদাসের পীড়ার উত্তরোত্তর বৃদ্ধি । জীবদাস বহু চেষ্টা করিয়াও কিছুতেই পীড়ার উপশম করিতে পারিলেন না । গুরুদাস আপন শেষ দশা যে উপস্থিত তাহা বিলক্ষণ বোধ করিতে পারিলেন । ভ্রাতাকে কহিলেন “ভাই ! আমার অন্তিমকাল উপস্থিত । এ সময়ে বাবা ও মাকে যে দেখিতে পাইলাম না তাহাই আমার কষ্ট । বাবা সিদ্ধপুরুষ, তাঁহাকে সন্দর্শন করিতে করিতে দেহত্যাগ করিতে পারিলে আমার সকল কষ্ট দূর হইত । আমার স্ত্রী পুত্রের জন্ত আমি কিছু ভাবি না । তোমার গ্রাম গুণবান্ সহোদর যাহার আছে সে নিশ্চয় ভাগ্যবান্ । তুমি তাঁহাদের যে প্রতিপালন করিবে ইহা বলা বৃথা । জীবদাস ! আর ভাই আমাকে ঔষধ খাওয়াইও না । আমার চরম কাল উপস্থিত । আমি অসহায়ের সহায়, সেই ভগবানের ত্রীপাদ পদ্ম হৃদয়ে চিত্তা করি” এই বলিয়া তিনি নয়ন নিমীলিত করিলেন । অপাঙ্গ দিয়া অশ্রুজল পড়িল । আর কোন কথা কহিলেন না । কিম্বৎক্ষণ পরে জীবদাস দেখিলেন দাদার প্রাণবায়ু বাহির হইয়া গিয়াছে । গুরুদাসের পত্নী স্বামীর পার্শ্বে সর্বদা উপস্থিত ছিলেন । স্বামী দেহত্যাগ করিলেন জানিতে পারিয়া উচ্চৈঃস্বরে রোদন করিয়া উঠিলেন । পরক্ষণে মূর্ছিতা হইয়া ভূমিতে পড়িলেন । সংজ্ঞা নাই । জীবদাস কাঁদেন আর ভ্রাতৃজ্ঞানকে চেতন করিবার চেষ্টা করেন । নিকটে আর কোন আত্মীয় অন্তরঙ্গ ছিল না । যাহা হউক এই বোর বিপদে তিনি ধৈর্য্যাবলম্বন করিয়া কিম্বৎক্ষণ পরে ভ্রাতৃজ্ঞানকে কক্ষান্তরে লইয়া গেলেন । তাঁহার শুশ্রূষা কারণ

উপযুক্ত বন্দোবস্ত করিয়া মৃতদেহের ঔর্দ্ধদেহিক কার্য সম্পাদনের চেষ্টা করিতে লাগিলেন । ভাগিরথী তীরে যথা বিধানে মৃতদেহের সংকার সম্পাদিত হইল । জীবদাস মুখানল করিলেন, সে সময়ে তাঁহার বুক ফাটিয়া যাইতে লাগিল । রোদন করিতে লাগিলেন । মুখানল করিতে হাত অগ্রসর হয় না । বাহা হউক কথঞ্চিৎ ধৈর্য্যাবলম্বন করিয়া মুখানল করিলেন । দেখিতে দেখিতে চিতা প্রজ্জ্বলিত হইয়া উঠিল । তখন জীবদাস একদৃষ্টে চিতার দিকে দৃষ্টিপাত করিয়া রহিলেন । তখন হৃদয়ে না শোক, না হুঃখ, কিছুই রহিল না, সংসার যেন ভোজের বাজী এইরূপ ভাব উদয় হইল । দেখিতে দেখিতে চিতানল মৃতদেহ প্রায় ভস্মীভূত করিয়া ফেলিল ।

পর দিবস জীবদাস ভ্রাতৃজায়া ও তথায় গুরুদাসের যে কিছু দ্রব্যাদি ছিল তৎসমস্ত লইয়া কলিকাতাভিমুখে প্রত্যাবর্তন করিবার আয়োজন করিলেন । গুরুদাস যে মহকুমায় কার্য্য করিতেন তথাকার সকল ব্যক্তি তাঁহার সৌজন্য ও শিষ্টাচারে সন্তুষ্ট ছিলেন । সম্ভ্রান্ত ব্যক্তিগণ সকলে তাঁহার পীড়ার সময় যথেষ্ট চেষ্টা ও পরিশ্রম করিয়াছিলেন । জীবদাসের গৃহ প্রস্থান সময়ে তাঁহারা ও তত্রতা অত্যাগ্ৰ অধিবাসী উপস্থিত থাকিয়া গুরুদাসের নানাবিধ স্তুত্যাতি করিতে লাগিলেন । জীবদাস বিপৎ-কালে তাঁহারা যে সাহায্য করিয়াছিলেন তন্নিমিত্ত তাঁহাদিগের প্রতি কৃতজ্ঞতা প্রদর্শন করিয়া কাতরভাবে তাঁহাদিগের নিকট বিদায় লইলেন । তাঁহারা সকলে তাঁহার সহিত ষ্টেশনে গমন করিলেন । তিনি ভ্রাতৃজায়া ও দ্রব্যাদি লইয়া গাড়িতে উঠিলেন । ট্রেন যতক্ষণ তাঁহাদের দর্শন পথে ছিল তাঁহারা ট্রেনের দিকে চাহিয়া রহিলেন । জীবদাস গাড়ীর ভিতর হইতে মুখ বাড়াইয়া তাঁহাদিগের দিকে চাহিয়া রহিলেন । ক্রমে জীবদাস তাঁহাদের নয়ন পথের বহির্ভূত হইলেন ।

যথা সময়ে জীবদাস ভ্রাতৃজায়াকে সঙ্গে লইয়া কলিকাতার বাটীতে

উপস্থিত হইলেন । কলিকাতায় তখন স্নাহাসিনী ছিলেন । জীবদাস ও বড় বধূমাতাকে রোরুণমান অবলোকন করিয়া স্নাহাসিনী জানিতে পারিলেন তাঁহার সর্বনাশ হইয়াছে । গুরুদাস আর নাই ! স্নাহাসিনী ও গুরুদাস পত্নীর সাক্ষর ক্রন্দনে প্রতিবেশীগণ ক্রমে ক্রমে তাঁহাদের বাটীতে আসিতে লাগিলেন । এ সময় তাঁহারা কি করিবেন ; কোন সাহসনা কার্য্যকরী হইবে না । তাঁহারাও গুরুদাসের পরলোক গমনে যার পর নাই ব্যথিত হইয়াছিলেন ; তাঁহারাও রোদন করিতে লাগিলেন । প্রতিবেশিনীগণ স্নাহাসিনী ও বড় বধূকে রক্ষা করিবার জন্য বসিয়া রহিলেন, এবং মধ্যে মধ্যে সাহসনা বাক্য প্রয়োগ করিতে লাগিলেন । প্রতিবাসীগণ জীবদাস ও দ্বিজদাসকে নানাবিধ কথায় সাহসনা করিতে লাগিলেন । জীবদাসের স্ত্রী পিত্রালয়ে ছিলেন, তাহাকে সন্বাদ দিয়া আনয়ন করা হইল । তিনি আসিলে পর পুনরায় ক্রন্দনের রোল উঠিল । ক্লেশ-প্রিয়র শোক এ সময়ে পুনরাবৃত্ত হইল । উভয় শোকে স্নাহাসিনী এক বারে মূচ্ছিত হইয়া পড়িলেন । ক্ষণে সংজ্ঞা, ক্ষণে মুচ্ছা ; প্রতিবেশিনীগণ কথা কহিতে পারিতেছেন না, তাঁহাদের কণ্ঠরোধ হইয়া আসিল । অবিরল অশ্রুজল তাহাদের নয়ন হইতে পড়িতে লাগিল । বহুকণ পরে স্নাহাসিনী সংজ্ঞা লাভ করিলেন । অতি করুণ স্বরে ক্রন্দনের রোল উঠিতে লাগিল । সে ক্রন্দন চতুর্দিক আকুলিত করিল, পাষাণ হৃদয়ও বিগলিত হইল । ক্রমে ক্রমে সকলে স্থির হইলেন । দ্বিজদাস পরিহিত বস্ত্র পরিত্যাগ পূর্বক ছুই খণ্ড নূতন খণ্ডবস্ত্র পরিধান করিলেন । হবিষ্যান্নের আয়োজন হইতে লাগিল । অধিকাংশ প্রতিবেশিনী চলিয়া গেলেন ।

দেবদাস রামকৃষ্ণপুরে অবস্থান করিতেছিলেন । তাহার মানসিক অবস্থা যে উচ্চতর ছিল তাহা জীবদাস প্রভৃতি সকলেই জানিতেন । শোক তাহাকে যে আকুলিত করিতে পারে না ইহা তাহাঁরা জানিতেন । পরিবারবর্গকে তাঁহার নিকট লইয়া গেলে তাঁহার সাধন ভক্তনের ব্যাঘাত

হইবে টহা বুঝিয়া জীবদাস একাকী রামকৃষ্ণপুরে আগমন করিলেন । তিনি পিতার নিকট গমন করিয়া কাদিতে কাদিতে গুরুদাসের পরলোকগমনের কথা পিতৃদেবকে জানাইলেন । দেবদাস কিয়ৎক্ষণ নির্ঝাঁক নিষ্পদভাবে রহিলেন । তৎপর বিশ্বপতি বিধাতাকে স্মরণ করিয়া কহিতে লাগিলেন, “প্রভো ! সকলই তোমার ইচ্ছা । গুরুদাস তোমার ছিল । আমার নিকট তাহাকে কিছুকাল রাখিয়া দিয়াছিলাম । তুমিই আমার দ্বারা তাহাকে প্রতিপালন করাইয়াছ । আমিও কিছুই করি নাই । ঠাকুর ! তোমার জিনিষ তুমি লইয়াছ । ভালই করিয়াছ, আমার ত দুঃখ করিবার কিছুই নাই । জীব তোমার মহান্ উদ্দেশ্য কি বুঝিবে ? করুণাময় ! তুমি যে কি করুণা গুরুদাসের উপর প্রকাশ করিয়াছ তাহা তুমি জান । আমার একান্ত বিশ্বাস তাহারই মঙ্গলের জন্ত তাহাকে লইয়াছ । তোমার শ্রীপাদপদ্মে মন প্রাণ জীব সমর্পণ করুক । তোমার কার্য্য সকলই মঙ্গলময় বলিয়া জীব বিশ্বাস করুক । জীবের কোন শোক কোন দুঃখ কিছুই থাকিবে না ।” তৎপর জীবদাস মুখে অসহায়ের সহায় ভগবানকে হৃদয় মধ্যে চিস্তা করিতে করিতে তাহার দেহাবসান হইয়াছে জানিতে পারিয়া পরম আনন্দলাভ করিলেন । অতঃপর আপন সাধন কার্য্যে মনোভিনিবেশ করিলেন । জীবদাস পিতাকে আর কিছু বলিলেন না, গুরুদাসের শ্রাদ্ধাদি কার্য্য যথা-বিধানে সম্পাদন করাইলেন ।

এই ঘটনার ৮ মাস পরে দেবদাস জীবদাসকে রামকৃষ্ণপুরের বাটীতে আনাইলেন । তিনি সমস্ত পরিবারবর্গকে রামকৃষ্ণপুরে আনয়ন করিবার জন্ত আদেশ করিলেন । জীবদাস পিতার আদেশ পালন করিলেন । বৈশাখী পূর্ণিমা তিথি উপলক্ষে গ্রামস্থ সকলকে পর্য্যাপ্ত রূপে আহার করাইবেন এই ইচ্ছা প্রকাশ করিলেন । জীবদাস তাহার আয়োজন করিলেন । দেবদাস নিজে উপস্থিত থাকিয়া সকলকে অতি পরিতোষের সহিত আহার করাইলেন । সকলের আহার শেষ হইলে তিনি গঙ্গায়

জ্ঞান করিতে গমন করিলেন । নাভিদেশ পর্য্যন্ত গঙ্গাজলে নিমগ্ন করিয়া পদ্মাসনে উপবেশন করিলেন । তৎপর ভগবৎ পদারবিন্দ স্মরণ করিয়া ক্রমধ্যে দৃষ্টি স্থাপন করিলেন ।

এ দিকে বহুক্ষণ হইল তথাপি পিতৃদেব কেন আসিলেন না কারণ জানিবার জ্ঞাত জীবদাস স্বয়ং গঙ্গার ঘাটে আসিয়া পিতাকে যোগাবলম্বী দেখিলেন । ক্রমে অপরাহ্ন হইয়া পড়ায় তিনি পিতৃদেবকে পুনঃ পুনঃ ডাকিতে লাগিলেন । কোন উত্তর না পাইয়া জীবদাস তাঁহার দেহ পরীক্ষা করিলেন । তখন জানিলেন পিতৃদেব তাহাদিগকে পরিত্যাগ করিয়া স্বর্গধামে গমন করিয়াছেন । এই সমাচার তড়িৎবেগে রামকৃষ্ণপুর গ্রামে প্রচারিত হইল । সকলেই হাহাকার করিতে করিতে সেই দেবদর্শন সাধুপুরুষকে দর্শন করিবার জ্ঞাত গঙ্গার ঘাটে আসিতে লাগিলেন । লোকে লোকারণ্য, কি স্ত্রী, কি পুরুষ সকলেই সাধু সন্দর্শন করিতে ব্যগ্র । তাহারা সাধুকে দেখেন তাঁহার অলোক সামান্য চরিত্রের কথা স্মরণ করেন, আর চক্ষের জলে তাহাদের বক্ষঃস্থল ভাসিয়া যায় । শোকে তাহাদের কণ্ঠরোধ হইতে লাগিল । চতুর্দিকে হাহাকার ধ্বনি । জীবদাস ও অগ্নাত বাহারা তাঁহার দেহ স্পর্শ করিয়াছিলেন সকলের হৃদয়ে এক অপূর্ণ আনন্দের সমাবেশ হইল । শোক বা বিষমতা তাহাদের হৃদয়ে স্থান পাইল না । তাহার স্ত্রী পুত্রবধু পৌত্র ও দৌহিত্রগণ কঁাদিতে কঁাদিতে আসিয়া তাহার চরণে নিপতিত হইলেন । চরণ স্পর্শে তাহাদের মন শোক মোহ পরিশূন্য নির্মল হইয়া উঠিল । ক্রমে এই আশ্চর্য্য কাণ্ড সকলে জানিতে পারিলেন । তখন কি ব্রাহ্মণ, কি কায়স্থ, কি অপর জাতি সকলেই সেই সাধুদেহ স্পর্শ করিতে লাগিল । সকলেই আনন্দলাভ করিতে পারিয়াছিলেন, তখন সেই সাধুদেহ পুষ্পমালায় বিভূষিত করিয়া একখানি দেবচৌকীতে বসাইয়া দাহনার্থ শ্মশানে লইয়া চলিলেন । চতুর্দিক হইতে তাঁহার উপর পুষ্প

ছুটি হুটেতে লাগিল। সঙ্গে সঙ্গে বৈষ্ণবগণ হরিনাম সংকীৰ্ত্তন করিতে করিতে চলিলেন। একটা মহা ব্যাপার। সকলের প্রিয় দেবদাস আজ সকলকে আনন্দময় করিয়া আনন্দধামে গমন করিলেন।

এদিকে চিতা প্রস্তুত হইল। তাহাতে প্রচুর পরিমাণে চন্দনাদি কাষ্ঠ প্রদত্ত হইল। চিতার উপর সেই দেবপ্রতিমঃ শায়িত হইল। জীবদাস মুখানল করিলেন। অগুরু ধূপ ধূনা দ্বিত পর্য্যাপ্ত পরিমাণে প্রসিক্ত হইতে লাগিল। সৌগন্ধে শশান ভূমি মনোরম হইয়া উঠিল। দেখিতে দেখিতে সাধুদেহ ভস্মীভূত হইয়া গেল।

একটা জীবন সার্থীকরণ কার্যালয়ে (Life Insurance office) দেবদাস আপন জীবন গুণাংশ হাজার টাকার জন্য সার্থীকরণ করিয়াছিলেন। তিনি জীবিত থাকিতে জীবদাসকে ঐ টাকা তাঁহার দেহান্তের পর উঠাইয়া লইয়া রামকৃষ্ণপুর গ্রামস্থিত হিতকরী সভার হস্তে দিতে বলিয়াছিলেন। ইহা কেবল জীবদাস জানিতেন। হিতকরী সভা ঐ টাকা অনাথ দীন দরিদ্র বিধবা ও শিশুগণের ও অন্যান্য হিতকার্য্যে ব্যয় করেন ইহা দেবদাসের ইচ্ছা ছিল; জীবদাস পিতার আদেশ পালন করিলেন। হিতকরী সভার হস্তে ৫০ হাজার টাকা প্রদান করিলেন।

সম্পূর্ণ।







